





*chi l'a pi 'd fil farà pi 'd teila*

*Ex libris*

LUIGI FIRPO

2. 4. 18.

FIRPO

210

BIBLIOTECA NAZIONALE  
TORINO

S. A. S.

Sub Proprietate ~~Cardinalis~~

Emptio Romae 30 Junij 1643

~~Cardinalis~~





DE  
REPUBLICA  
ECCLESIA-  
STICA

Libri quatuor

CONTRA MARCVM AN-  
TONIVM DE DOMINIS, NVPER  
*Archiepiscopum Spalatensem, nunc. Deser-  
torem & Apostatam,*

AUTHORE

MARTINO BECANO SOCIETATIS  
Jesu Theologo, & in Cæsarea Academia Vi-  
ennensi Professore Ordinario.



*Cum Gratia & Privilegio Cæsar. Maieft.*

MOGVNTIÆ

Ex Officina JOANNIS ALBINI  
ANNO M. DC. XIX.



*APPROBATIO R. P. PROVINCIALIS*  
*Provincia Rhenana Societatis*

J E S U.

Hos IV. libros de Repub. Ecclesiastica à R.  
P. Martino Becano Societatis nostræ Theolo-  
go contra M. Antonium de Dominis conscri-  
ptos, atq; à deputatis ad id Theologis lectos  
& approbatos. Ego Joannes Copperus Socie-  
tatis J E S U, apud Rhenum Provincialis, con-  
cessa mihi facultate ab admodum R. P. N.  
Mutio Vitalesco, Societatis nostræ Præposito  
Generali, Typis mandari permitto. Molshe-  
im, An. 1618. die 2. Septemb.

*Joannes Copperus*





PAULO V.

PONTIFICI MAXIMO.

**A**Liquot jam menses  
elapsi sunt; Beatissime  
Pater, cum in Austriam  
rumore perlatum est,  
novum Ecclesiae hostem, Marcum  
Antonium de Dominis, subito è la-  
tebris prodiisse, qui Divi Petri ac  
successorum ejus Primatum, teme-  
rè oppugnare ausus sit. Monitus à  
bonis viris, & omninò persuasus  
sum, ut brevi scriptione hominem  
confutarem. Ac fecissem id sine  
mora: Sed exemplar voluminis,  
quod ille conscripsit, habere non  
potui. Viennæ, nullum erat. Unum  
tandem aliunde nactus. Feci id, quæ  
(?) 2 potui

## EPISTOLA

potui brevitate ; totamque confutationem libris quatuor complexus sum ; quos cum eâ , quâ par est , obfervantiâ , Tuæ Sanctitatis conspectui nunc offero. Hostis , ut dixi , novus est ; sed veterum hæreticorum vestigia sequitur : ac eodem , quo illi , spiritu superbiæ ac rebellionis , ad scribendum impulsus est. Nostro commodo ; suo detrimento. Nam ille quidem , nihil aliud hoc suo conatu , vel assecutus est , vel assequi potuit ; quam ut veluti membrum putidum ab Ecclesiæ corpore præscinderetur , & omni vitali succo ac spiritu destitutum , penitus exaresceret. Nobis contra accidit. Oblata est occasio benè merendi de Ecclesia ; confirmandi Catholicos in fide ; revocandi seductos ab errore ; confundendi adversarios , ne pergant insolescere. Quam minimè negligendam censeo:

leo: præsertim cùm nostræ Societatis hominibus, id vel maximè commendatum esse sciam à Beato P. N. Ignatio, ut Romanæ & Apostolicæ Sedis authoritatem omni studio ac industria tueamur. Quod quidem hætenus præclarè ab Illustrissimo Cardinale Bellarmino, alijsque doctissimis & præstantissimis eiusdem Societatis scriptoribus præstitum est. Ego sanè, qui minimus sum, non patiar voluntatem mihi deesse. Faciam, quod illi fecerunt: si non pari fructu; certè non minori affectu. Et meritò. Naturæ instinctus eo nos ducit. Videmus, in humano corpore, quanta membrorum omnium cura ac sollicitudo sit in conservando capite. Singula malint in seipsis immissam plagam accipere, quàm in læsionem Capitis consentire. Quid ni? Salvo Capite, membrorum salus sperari potest: læ-

so, vix potest. A Capite, cum saluum est, derivantur spiritus sensitivi in corpus universum; & singulis membris vitalem vim ac vigorem imperiunt. In Capite vigent sensus, ratio, prudentia, memoria, quibus membrorum actiones diriguntur. Nemo hoc nescit. At eandem esse proportionem in Corpore Ecclesiæ, Christiana fides nos docet. Illius corporis membra nos sumus. Caput primum, Christus; Vicarium, Pontifex. A Christo, tanquam perenni fonte ac scaturigine, diffunduntur in nos aquæ salientes in vitam æternam. Ab ejus Vicario, in nostris actionibus gubernamur. De utriusque conservanda authoritate sollicitos nos esse, par est. Si Ariani Christo, si Calvinistæ Vicario illius plagam intentant: nos objecto clypeo, excipere eam oportet. Præluxerunt nobis in hoc studio antiqui Patres, qui & Christi

DEDICATORIA.

Christi Divinitatem contra Arium,  
& Romani Pontificis Primatum  
contra Schismaticos, suis scriptis e-  
gregiè propugnarunt. Nos in eorum  
locum successimus. Non debemus  
esse filij degeneres; sed illorum fidè,  
ac fervorem imitari. Hæc nostra vo-  
catio est. Ad hanc exequendam, tã-  
etsi mea sponte fuerim propensissi-  
mus, magni viri, suo jure, cohortati  
me sunt. Feci, quod potui. Si quid  
profeci, cedat in bonum publicum:  
sin minus, obedientiæ fructus me  
consolabitur. Quod reliquum est,  
vestram Sanctitatem benè valere, &  
in pio promovendi rem Christianã  
studio persistere, ex animo precor.  
Viennæ Austriæ, ex Cæsareo Socie-  
tatis Jesu Collegio, an. Christi 1618.  
mense martio.

*Vestra sanctitatis*

Humillimus in Christo servus

MARTINUS BECANUS.



## LECTORI.

1

**N**OTVM ex Evangelio est, Scribas & Phariseos, suo quidem Iudicio ac opinione in Scriptura Veteris Testamenti fuisse exercitatissimos. Et tamen Christum de ijs dixisse: Cæci sunt, & duces cæcorum. Nimirum, externum Scripturæ corticem videbant; sed sensum sub cortice latentem non videbant. Idem contingit nostris aduersariis. Scripturarum autoritate se tumentur; & illarum intelligentiam consecutos se esse, non solum ipsi existimant, sed etiam palam gloriantur. Et tamen cæci sunt. Non vident in Scriptura, quod boni omnes vident. Quid illud? Ex multis, unum hoc accipe, Non vident, frustra se laborare in oppugnando Pontificis Primatu & autoritate: Non vident, se suo conatu, non Pontifici, sed sibi ipsis interitum consciscere. Nam Pontifex quidem oppugnari potest, sed expugnari non potest. Hoc, quia cæci, sane non vident. Et tamen in Scriptura consignatum est. Legimus in Veteri Testamento, quid rebelles moliti sint contra Primatum Aaronis: quo eventu id fecerint: quo miraculo, conatum ipsorum irritum fuisse, ac deinceps fore, Deus palam demonstravit.

2. Res gesta describitur Numer. 17. his verbis: Et locutus est Dominus ad Moysen, dicens: Loquere ad filios Israel, & accipe ab eis virgas singulas per cognationes suas, à cunctis Prin-

capitulum



*Praefatio ad Lectorem.*

cipibus tribuum, virgas duodecim, & uniuscujusque nomen superscribes virga suæ. Nomen autē Aaron erit in tribu Levi, & una virga cunctas seorsum familias cōtinebit: poneſque eas in Tabernaculo fœderis coram testimonio, ubi loquar ad te. Quem ex his elegero, germinabit virga ejus: Et cohibebo a me querimonias filiorum Israel, quibus contra vos murmurant. Locutusque est Moſes ad filios Israel: & dederunt ei omnes Principes Virgas per singulas tribus; fueruntq; virgæ, duodecim absque virga Aaron. Quas cum poſuiſſet Moſes coram Domino in tabernaculo testimonij, ſequenti die regressus invenit germinasse virgam Aaron in domo Levi: & turgentibus gēmis eruperant flores, qui folijs dilatatis in amygdalas deformati sunt. Protulit ergo Moſes omnes virgas de conſpectu Domini ad cūctos filios Israel: videruntque, & receperunt ſinguli virgas ſuas. Dixitque Dominus ad Moſen: Refer virgam Aaron in tabernaculum testimonij, ut ſervetur ibi in ſignum rebellium filiorum Israel, & quieſcant querelæ eorum à me, ne moriantur.

3. *Hic, qui cæci non ſunt, manifeſtè vident, Primatum Aaronis & ſucceſſorum ejus, contra querimonias & conatus rebellium miraculo Virgæ germinantis, à Deo conſignatum & confirmatum eſſe; mortemq; iſ, omnibus intentari, qui ſimili ſcelere ac temeritate, in poſterum obſtriçturi ſe eſſent. Sed quid hoc, inquires, ad Romanum Pontificem: quid ad eos, qui illius Primatui hoſtes ſe eſſe profitentur? Au-*

### *Præfatio*

*di Apostolum 1. Cor. 10. 6. Hæc, inquit, in figura facta sunt nostri, ut non simus concupiscentes malorum, sicut & illi concupierunt, &c. Neq; murmuraueritis, sicut quidam eorum murmuraverunt, & perierunt ab exterminatore. Ex quo loco, sicceus non es, sic ratiocinandum tibi est: Quæ fiebant in veteri Testamento, erant umbræ seu figura futurorum in novo Testamento. At Deus in veteri se verè puniebat eos, qui erant rebelles Pontifici: & Primatum Pontificis volebat saluum ac illesum persistere. Ergo idem in novo facturum est, & re ipsa facit. Quod apertè insinuat Apostolus loco citato, cum ait: Hæc autem omnia (inter quæ erat rebellio) contingebant illis: scripta sunt autem ad correptionem nostram.*

4. *Ut hoc clarius percipiatur, explicanda est figura, quam attuli. Potest autem sic explicari. Jacob habuit duodecim filios Patriarchas, ex quibus duodecim tribus filiorum Israel exorta sunt. Vna ex illis tribubus, quæ erat Joseph, dividebatur in duas, Ephraim scilicet & Manasse. Sic tredecim effectæ sunt. Principes harum tribuum, erant Primogeniti. Vnus ex illis fuit Aaron, in tribu Levi; cui Primatus Sacerdotij, præ cæteris, à Deo datus est. Obstiterunt illi rebelles sed à Deo puniti sunt. Et quod solus Aaron cum suis successoribus, perpetuum esset habiturus Primatum, miraculo virgæ germinantis demonstratum est.*

5. *Hæc figura est. Sequitur applicatio. Christus habuit duodecim Apostolos, Principes ac primogenitos filiorum Novi Testamenti. Hus Paulus, decimus tertius adjunctus est. Petrus, præ cæteris Prima-*

*tum*

tum à Christo obtinuit, his verbis, *Pasce oves meas.* Et ad significandam istius Primatus stabilitatē, dictum est illi, & successoribus ejus : *Ego rogavi pro te, ut non deficiat fides tua.* Quotquot haecenus Primatum Petri & successorum ejus oppugnarunt, exterminati sunt : Et qui deinceps oppugnaturi, simili pœna subjacebunt.

6. Igitur, ut verbo dicam, Jacob fuit figura Christi: Patriarcha, Apostolorum: Aaron, Petri Virga Aaronis germinans, fidei Petri non defecitura: Rebelles Judæi, rebellium Christianorum: Pœna, qua illi plexi sunt, pœna, qua hi plectuntur. Qui hoc non vident, cæci sunt. Cæci igitur Lutherani & Calvinistæ. Cæcus Marcus Antonius de Dominis, qui post irritos tot aliorum rebellium conatus, adhuc non videt, in oppugnando Petri Primatu, oleum ac operam se perdere. Nec perpendit, quod prudenter à Gamalielē dictum est, *Act. 5. 59.* Si ex Deo est hoc opus, non poteritis dissolvere illud.

INDEX CAPITUM MAT-  
TERIAM HORUM LIBRO-  
rum complectentium.

LIBRI PRIMI

De Christo supremo Ecclesiæ Capi-  
te, seu Monarcha

- Cap. 1. An Ecclesia Christi, ab ipso Christo funda-  
ta & adificata sit?* 8  
*Cap. 2. Quando Christus caperit esse caput Ecclesiæ?*  
16  
*Cap. 3. An Christus sit Caput Ecclesiæ visibile?* 19  
*Cap. 4. Quod sit officium Christi quatenus est Caput  
Ecclesiæ?* 21  
*Cap. 5. Annon sit aliud caput Ecclesiæ præter Chri-  
stum?* 27

LIBRI SECUNDI

De Primatu Petri

- Cap. 1. Quod Spiritus Sanctus proprie non sit vica-  
rius Christi.* 44  
*Cap. 2. Refellitur Primatus Petri à Marco Anto-  
nio confictus.* 49  
*De Primatu vocationis.* 52  
*De Primatu Charitatis.* 65  
*Cap. 3. Verus Petri Primatus probatur ex scriptura.*  
69  
*Cap. 4. Primatus Petri probatur ex Patribus.* 85  
*Cap. 5. Primatus Petri probatur ex Augustino.* 105  
*Cap. 6. Primatus Petri probatur ex Prærogativis  
Petri.* 117

*Index Capitulum.*

<i>Prima Prærogativa Petri.</i>	119
<i>Secunda Prærogativa.</i>	124
<i>Tertia Prærogativa.</i>	126
<i>Quarta Prærogativa.</i>	127
<i>Quinta Prærogativa.</i>	129
<i>Sexta Prærogativa.</i>	134
<i>Septima Prærogativa.</i>	142
<i>Octava Prærogativa.</i>	151
<i>Reliquæ Prærogativæ.</i>	152
<i>Nona Prærogativa.</i>	155
<i>Decima Prærogativa.</i>	159
<i>Undecima Prærogativa.</i>	<i>ibid.</i>
<i>Duodecima Prærogativa.</i>	160
<i>Decima tertia Prærogativa.</i>	163
<i>Cap. 7. Diluuntur objectiones Marci Antonij contra</i> <i>Primum Petri.</i>	105
<i>Primâ. Ecclesia Apostolis omnibus æque fuit com-</i> <i>mendata.</i>	166
<i>Secundâ. Evangelium reprobat Primum inter</i> <i>Apostolos.</i>	181
<i>Tertiâ. Ipsi Apostoli in Petro non agnoverunt pri-</i> <i>matum.</i>	184
<i>Quarta. Petrus nunquam exercuit primum.</i>	186
<i>Quinta. Pauli reprehensio destruit Primum Pe-</i> <i>tri.</i>	189
<i>Sextâ. Pauli scripta destrunt Primum Petri.</i>	197
<i>Septima. Ex comparatione Petri &amp; Pauli destruitur</i> <i>Primus Petri.</i>	201

LIBRI TERTII

De Primatu Romani Pontificis

Cap. 1. An Ecclesia Romana à Petro fundata sit?

212

Cap. 2. An Petrus fuerit Episcopus Romana Eccle-

sia?

228

Cap. 3. An Pontifex sit successor Petri?

233

Cap. 4. An Pontifex sit Caput seu Pastor universa-  
lis Ecclesiae?

238

Privilegia Pontificis.

Primum. Tota Ecclesia Pontifici gubernanda com-  
missa est.

240

Secundum. Appellatio ad Pontificem.

250

Tertium. Qui in fide non vult errare, debet ad-  
harere Ecclesiae, & Pontifici Romano.

254

Quartum. Nullum Decretum statui potest pro tota  
Ecclesia, nisi Pontifice consentiente

257

Quintum. Pontifex potest sancire leges Eccle-  
siasticas, quae obligent universam Ecclesiam.

261

Sextum. Pontifex potest excommunicare Episcopos,  
Reges, & Principes graviter delinquentes, si con-  
tumaces sint.

263

Cap. 5. Diluuntur Objectiones Marci Antonij con-  
tra Primatum Pontificis.

267

Prima. Ex Principijs Marci Antonij.

ibidem

Secunda. Ex doctrina Parisiensium.

268

Ter-

## Index Capitulum.

*Tertia. Ex eo, quod in Ecclesia nulla sit jurisdictio.*

269

*Quarta. Ex dictis Pelagij, & Gregorij Pontificum.*

272

*Quinta. Ex Conciliis Oecumenicis.*

280

*Sexta. Ex Episcopis Asianis.*

281

*Septima. Ex Cypriano.*

283

*Octava. Ex Firmiliano Episcopo.*

290

*Nona. Ex Episcopis Orientalibus in Concilio Antiocheno.*

292

*Decima. Ex Athanasio.*

294

*Undecima. Ex Basilio.*

296

*Duodecima. Ex Nazianzeno.*

297

*Decima tertia. Ex Hieronymo & Damaso.*

299

*Decima quarta. Ex Socrate.*

305

*Decima quinta. Ex Ambrosio.*

306

*Decima sexta. Ex Augustino.*

307

*Decima septima. Ex Concilio Africano.*

309

## LIBRI QVARTI

### De Rectoribus & Ministris Ecclesiæ

*Cap. 1. An singuli Episcopi cum plena potestate in solidum regant Ecclesiam?*

312. & 313

*Cap. 2. An Ministri Ecclesiæ jure teneantur ad Cælibatum.*

315

*Cap. 3. An votum continentia sit annexum sacro ordini?*

334

Cap.

*Cap. 4. An votum continentie quod sacris ordinibus annexum est, dirimat matrimonium?*

*336*

*Cap. 5. An sacer ordo sit Sacramentum?* *340*

*Cap. 6. An Augustinus duo tantum agnoscat Sacramenta?* *372*

*Cap. 7. De Monachis & Apostatis.* *374*





MARTINI BECANI  
DE REPUBLICA  
ECCLESIASTICA  
LIBRI QUATUOR

Contra Marcum Antonium  
de Dominis.

1. **I**bellus tuus, Marce Antoni,  
quem scripsisti de consilio profe-  
ctionis tuae in Angliam, diebus  
superioribus Viennam Austriae  
ad me perlatus est. In quo pro-  
mittis decem libros de Republi-  
ca Ecclesiastica, magno multorum annorum studio  
ab te elaboratos: 1. De Monarchia Ecclesiae. & Pri-  
matu Petri. 2. De Ministris & Rectoribus Ecclesiae.  
3. De Hierarchia Ecclesiastica. 4. De privilegiis &  
praerogativa Romana Ecclesiae, praeter aliis Ecclesiis  
particularibus. 5. De potestate & jurisdictione Ec-  
clesiae. 6. De potestate & jurisdictione Regum ac Prin-  
cipum in Ecclesiam. 7. De interna Ecclesia direc-  
tione, quae fit per fidem. 8. De externo Ecclesia regimine  
per leges, canones & judicia. 9. De temporalibus Ec-  
clesiae bonis. 10. De libertate Ecclesiastica.

2. Priores quatuor jam exstant, Londini in  
Anglia nuper excusi. Quid de posterioribus futurum,  
nescio. Porro primaria puncta, quae in prioribus à te  
pertractantur, sunt ferè haec: 1. Ecclesiam Christi,  
non ab ipso Christo in hac vita, sed ab Apostolis. post

*Christi ascensionem, adificatam esse. 2. Christum quidem esse caput Ecclesia invisibile; nunquam tamen fuisse caput visibile. 3. Vicarium Christi in regimine totius Ecclesia, nec Petrum, nec Pontificem esse, sed S. sanctum. Petrum reliquis Apostolis, Pontificem reliquis Episcopis parem esse, non superiorē. 4. Episcopos tamen jure divino eminentiores esse presbyteris. 5. Sacrum ordinē, quo Episcopi & presbyteri initiantur, non esse proprie Sacramentum. 6. Ministros Ecclesia ad cœlibatum jure non teneri. 7. Votū continentia non esse annexum sacro Ordini: nec ullo tali voto dirimi matrimonium. 8. Monachos non esse ministros Ecclesia, nec fieri Apostatas, si post votum solenne, relinquāt monasterium, & redeant ad vitam secularem. Omitto alia minoris momenti.*

*3. Ex his duo colliguntur: Unum est, te neque Catholicum esse, neque Lutheranum, neque Calvinistam; sed ab omnibus dissentire, & novum doctrinae symbolum, partim ex aliorum scriptis, partim ex tuo cerebro consarcinasse. Alterum, duplici spiritu ad scribendum impulsus te esse: altero odij in Pontificem; altero amoris propriae excellentiae & cupiditatis. Et quidem in Pontificem, ut passim in tuis libris apparet, amaro & iracundo es animo. Itaque ultiscendi studio, conaris illum de Primatu Ecclesia deturbare, negando Christi Vicarium, & visibile Ecclesia caput esse. Hoc non potes, nisi idem neges de Petro, cujus ille successor est. Et hoc ergo negas. Sed, si Petrus non fuit visibile caput Ecclesia, necesse est, vel neque Christum fuisse, vel Ecclesia statum mutatum esse; quippe quae prius habuerit visibile caput Christum; postea nullum habuerit.*

*Poste-*

Posterius membrum, de facta mutatione, non audeſ  
aſſerere. Aſſeris igitur, Chriſtum non fuiſſe viſibile  
caput Eccleſia. Quo poſito, ruruſum ſequitur, vel Ec-  
cleſiam à Chriſto in hac vita viſibiliter exiſtente  
fundatam non eſſe; vel ſi fundata eſt, ſine viſibili  
capite fundatam eſſe. Priori parti inſiſtis. Ecce, quò  
impellit te odium?

4. De altero ſpiritu, qui eſt amoris propria ex-  
cellentia & cupiditatis, nemo dubitat, qui te novit.  
Nulli impar, paucis par, plerique ſuperior eſſe viſ.  
Deſecto Pontifice, nulli impares: Epiſcopis par ma-  
nes. Ut reliquis omnibus ſuperior ſis; verè quidem  
ſed ambitioſè contendis, Epiſcopos preſbyteris, iure  
divino, eminentiores eſſe. Ex quo futuram ſperas,  
ut in Anglia, non niſi cum Epiſcopis pari paſſu am-  
bules: Cateri, quicunq;, illi ſint, honorem & obſequiũ  
tibi deferant. Et, ne quis audeat apoſtaſiam tibi ob-  
jicere, quod deſerto ſtatu religioſo, ad ſaculum redij-  
ſti; huic quoq;, objectioni putas abunde ſatiſfieri, ſi  
neges Apoſtatas eſſe, qui ruptis votorum vinculis,  
quibus erant aſtricti, ad ſacularem vitam profugi-  
unt. In quo, magnum patronum habes, Lutherum;  
qui & calamo & exemplo id te docuit. A quo etiam  
perſuaſus es, neg. miniſtros Eccleſia ad cœlibatũ ob-  
ligari, neg. votum continentia, quod ſacris Ordini-  
bus annexum eſt, matrimoniũ contractum dirimere  
ullo modo poſſe. Quo conceſſo, licebit tibi. jam propè  
ſexagenario, uxorem ducere, voluptati operam da-  
re, & novos, ne progenies intereat, Marcos Anto-  
nios procreare. Et tunc, cantabitur canticum can-  
ticorum, quod Apoſtata occinunt: Valete & plaudite:  
Crescite & multiplicamini.

5. Ex hoc duplici spiritu, nisi fallor, promanavit doctrina, quam prioribus quatuor libris complexus es. Caterum, quia prævides futurum, ut ex Catholicis, vel unum aliquem, vel etiā plures Antagonistas, qui te oppugnent, nactus sis, offers te quidem, ne ignavus videaris, ad certamen; sed tamen frigide, & cum his tantum conditionibus: 1. Ut non qui vis Rhetorculus aut Magistellus de trivio, sed vel Episcopus aliquis, vel certè antiquus Theologus, qui tibi par sit, tecum congrediat. 2. Ut non agat convitiis, aut confictis in te mēdaciis, aut verborum quisquiliis, sed ratione & autoritate 3. Ut non paucula quedam divirticula, quæ parùm ad rē faciūt, hinc inde arrodant aut vellicet; sed totius doctrinæ tuæ fundamenta, si potest, concutiat. Si hæ conditiones servantur, aut te non solum optare Antagonistam; sed etiam percipere, ut quisquis ille futurus est, severo & exacto examine discutiatur, quæ à te dicta sunt. Imo etiam, ut verbis tuis utar, humilibus precibus contendere ab ipso sanctissimo Romano Pontifice, ut non impediatur, sed potius urgeatur hoc examen: Neque liberos tuos igni addicat aut exterminet, sed censura doctorum hominum, præsertim Parisiensium & Patavinorum, subiciat. Parisiensium acumen, soliditatem, constantiam & libertatem, semper admiratum te esse; eo quod soliti sint, non temporibus famulari, non ad oculum servire, sed veritatem ipsam omnibus præjudiciis ac perturbationibus humanis anteferre.

6. Bono sis animo, Marce Antoni, Censura Theologorum Parisiensium, quam tanto opere urges, iam patiam promulgata est. Audi, si lubet. Ajunt doctrinam

*etrinam tuam esse hereticam, schismaticam, erroneam, falsam, periculosam, temerariam, scandalosam, seditiosam, pacis Ecclesiæ perturbativam, statui Sacerdotali & Episcopali contumeliosam, totius Ordinis Hierarchici subversivam, piarum aurium offensivam. Sic illi pro sua libertate & constantia, quam laudas. Satin severe? Tu ipse iudex esto. Sed, nec desunt alij Antagonistæ, qui instructo agmine te invadent. Ego, quia arbitror magno apparatu opus non esse, solus cum solo congredi paratus sum. Neque de conditionibus sollicitum aut perplexum te esse velim. Servabo, quas exigis. Ac primò, tametsi Episcopus non sim, sed Religiosus Societatis Jesu, qui ejusmodi dignitates, ratione instituti mei, non ambio (utinam nectum, cum in eodem statu mecum eras, importunè ambivisses) sum tamen Theologus, non planè novitiis; & cum multis hostibus, etiam in Angliâ, depugnavi. Nec pugnabo convitiis, aut confictis in te mendaciis, aut inanibus verborum quisquiliis, à quibus meritò semper abhorruî; sed ex Codice Bibliorum, ex antiquis Patribus, ex Canonibus & Conciliis, ex tuis ipsius verbis, tecum dissertabo. Et, quod caput est, ipsa doctrina tua fundamenta, quantum in me erit, conabor concutere & labefactare. Idque faciam quatuor libris sequentibus, hoc ordine:*

1. De Christo, supremo Ecclesiæ capite ac Monarcha.
2. De Primatu Petri, Vicarij Christi.
3. De Primatu Pontificis, successoris Petri.
4. De Episcopis, Presbyteris, Monachis & Apostatis,

¶ *Praefatio Martini Becani ad M. Antonium.*

7. Non defugies, opinor, hoc certamen. Erunt fortasse alij, qui strictiori jure tecum acturi sunt: Nec admissuri, ut vel ipsis, vel Romano Pontifici conditiones, in hac causa, à te praescribantur: sed in faciem tibi objecturi (quod jam passim objiciunt) nec posses, nec debere Apostatas (qualem te esse ajunt) pro suo arbitrio legem statuere illis, qui in Catholica fide ac religione firmi persistunt. Nec aequum esse affirmant, ut qui ipse conditiones à se positas non servat, ab aliis, quibus tamen imperare non potest, servari velit. Tu vis, ut à conuitiis abstineatur. Rectè. At tu ipse, quod pace tua dixerim, nō abstines. Quin imò, tam petulanter, protervè ac contumeliose, in Romanum Pontificem debacharis, ut nulli haeretico, in hoc calumniandi ac maledicendi studio cedere, sed omnibus palmam praripere velle videri possis.

8. Similiter vis, ut procul faceffant mendacia. At tu, ut alij loquuntur, mendacissimus es. Certè in exiguo libello tuo, quem de consilio fuga in Angliam scripsisti decem luculenta mendacia, ab Anno so Verimentano deprehensa ac notata sunt. Taceo de reliquis. Nec paucis suspectum est, quod spectatim excipis de confictis in te mendaciis. Nimirum, ut ipsi interpretantur, ex una parte pertimescis, ne tibi objecturi sint proditiōe, & nescio qua alia facinora, quorum te reum esse, fama est. Ex altera, ne id faciant, conaris ab hoc proposito eos absterre, insinuando te omnia pro confictis mendaciis habiturum, quacunque in hoc genere objecturi sunt. Verum ista, cum nihil ad me spectent, aliis relinquo. De doctrina tecum agam, non de moribus. Et jam aggredior.

*De Christo supremo Ecclesiæ capite  
seu Monarcha.*



**H**ic partim conuenimus, Marce Antoni, partim discrepamus. In eo conuenimus, quòd Christus sit caput seu Monarcha Ecclesiæ. Hoc enim disertè docet Apostolus Ephes. 1. 22. *Omnia subiecit sub pedibus ejus: & ipsum dedit caput supra omnem Ecclesiam, quæ est corpus ipsius.* Et cap. 4. 15. *Crescamus in illo per omnia, qui est caput Christus.* Et cap. 5. 23. *Vir caput est mulieris, sicut Christus caput est Ecclesia.* Et Coloss. 1. 18. *Et ipse est caput corporis Ecclesiæ.* In his verò discrepamus: 1. An Christus ædificauerit Ecclesiam, cujus ipse caput est. 2. Quando ceperit illius esse caput. 3. An sit caput visibile. 4. Quod sit officium ipsius, quatenus caput Ecclesiæ est. 5. An solus Christus sit caput Ecclesiæ. De quibus tu ita statuis: 1. Ecclesiam non esse ædificatam à Christo, sed ab Apostolis. 2. Christum cepisse esse caput Ecclesiæ post ascensionem. 3. Esse caput invisibile. 4. Habere unum officium invisibile; nullum visibile. 5. Nec aliud esse caput Ecclesiæ, præter Christum. Itaque regimen Ecclesiæ esse quidem Monarchicum, respectu Christi; non tamen respectu Petri aut Pontificis. Quæ omnia seorsim discutienda sunt.



## CAPUT PRIMUM.

*An Ecclesia Christi ab ipso Christo  
fundata & ædificata sit?*

1. **T**U negas, M. Antoni, L. I. c. I. n. 22. his  
 verbis: *Non est difficile in doctrina Catho-  
 lica defendere, Ecclesiam veram primitivam, post  
 Christi ascensum propriè suum ortum habuisse.* Et  
 ibidem n. 23. *Ecclesia Christi revera per Apostolos  
 fuit ædificata, post Christi ascensionem.* Unde con-  
 sequenter dicis, ut postea videbimus, Christum  
 nunquam fuisse visibile caput Ecclesiæ, sed in-  
 visibile. Nam cum in terra visibilis apparuit,  
 nondum erat Ecclesia ædificata, ex tua opi-  
 nione. Ergo tunc non potuit esse visibile illius  
 caput. Postea, quando cepit esse caput Eccle-  
 siæ non amplius visibilis apparebat.

2. Ego contrà assero, Christum in hac vi-  
 ra fundasse & ædificasse suam Ecclesiam: post-  
 ea Apostolos eandem auxisse & propagasse.  
 Prior pars assertionis variis modis probari po-  
 test: 1. Quia Christus in hac vita instituit mi-  
 nistros Ecclesiæ, nempe duodecim Apostolos,  
 & septuaginta duos discipulos; quorū hi Pres-  
 byteri fuerunt, illi Episcopi. 2. In hac vita in-  
 stituit nova Sacramenta. 3. Instituit novum  
 Sacerdotium & Sacrificium. 4. Sancivit novas  
 leges Evangelicas. 5. Condidit novum Testa-  
 mentum, cujus ipse mediator est. 6. Hæc o-  
 mnia perfecit & confirmavit per mortem in  
 cruce, cum dixit: *consummatum est.* Deinde  
 post



post resurrectionem, cum hinc discessurus esset, dixit Apostolis suis: *Accipite Spiritum sanctum: Quorum remiseritis peccata, remittuntur eis; & quorum retinueritis, retenta sunt.* Et Petro seorsim: *Pasce oves meas.* Quid amplius requiri poterat ad fundandam & ædificandam Ecclesiam?

3. Accedit Auctoritas Augustini, Tract. 50. in Joannem, propè finem, ubi sic habet: *Secundum præsentiam majestatis semper habemus Christum: Secundum præsentiam carnis, rectè dictum est Discipulis: Me autem non semper habebitis. Habuit enim illum Ecclesia, secundum præsentiam carnis paucis diebus. Modo fide tenet; oculis non videt.* Hic supponit Augustinus, Ecclesiam fundatam jam fuisse, quando Christus in hac vita secundum carnem erat præsens. Et tu ipse alibi id fateris. Nam. lib. 1. cap. 1. n. 16. sic scribis: *Facile admittimus necessitatem ministrorum, quibus uti voluit Christus, etiam dum ipse mortalis in terris, in sua Ecclesia versabatur.* Et infra n. 19. *Dicimus Apostolos omnes immediate à Christo assumptos esse, ut essent operarii, & ministri ipsius viventis adhuc & regnantis: Et in fundanda Ecclesia coadiutores.* Quid clarius? Ais Ecclesiam in hac vita à Christo, tanquam principali Authore; ab Apostolis, tanquam coadjutoribus, fundatam esse. Igitur tibi ipsi contradicis: quod & sæpè facturuses in sequentibus.

4. Sed tria objicis (lib. 1. cap. 1. n. 22. & 23.) Primò illud Psal. 2. 8. *Postula à me, & dabo tibi gentes hereditatem tuam, & possessionem tuam ter-*

*minos terra.* Nimirum postquam, *astiterunt Reges terra, & Principes convenerunt in unum, adversus Dominum, & adversus Christum ejus.* Quibus verbis promittitur Christo Ecclesia post mortem & passionem. Quo etiam pertinet illud Isaia 53.11. *Pro eo, quod laboravit anima ejus, videbit semen longævum, id est, Ecclesiam suam, te interprete.*

5. Respondeo. Aliud est, Ecclesiam fundari & ædificari; aliud augeri & propagari, ut initio dixi. Fundata & ædificata est ante Ascensionem Christi, quando Ministri illius ordinati, Sacramenta instituta, & leges sancitæ sunt. Auçta & propagata, post Ascensionem Christi, quando per orbem diffusa est, & gentiles ad illam admissi sunt. Et hoc significatur illis verbis: *Dabo tibi gentes hereditatem tuam, & possessionem tuam terminos terra.* Simile fuit de Synagoga. Nam illa quidem fundata & ædificata est prope montem Sina, quando Aaron, & filij ejus consecrati sunt Sacerdotes, quando Sacramenta & sacrificia Mosaica instituta, quando lex data, & Testamentum effusione sanguinis confirmatum est. Auçta verò & dilata, post ingressum in terram promissionis, quando per Judæam, Samariam & Galilæam fuit dispersa, & quotidie plures in eam admissi.

6. Quod citas ex Isaia, sic legendum est: *Si posuerit pro peccato animam suam, videbit semen longævum, id est, si Christus fuerit mortuus*

tuus

tūus pro peccato humani generis, videbit multos filios, quos sibi, tam ex Judæis, quàm ex gentibus, per meritum suæ passionis & mortis, acquiraturus est. Quod etiam significatur verbis sequentibus, ubi Deus Pater de Christo loquens, ait : *Ideo dissipetiam ei plurimos, & fortium dividet spolia, pro eo, quòd tradidit in mortem animam suam, & cum sceleratis reputatus est.* Neque hinc sequitur, Ecclesiam Christi post Ascensionem ab Apostolis fundatam esse. Solum sequitur, Ecclesiam sponsam Christi, quæ ab ipso fundata est, successu temporis, habituram multos filios: qui cum antea fuissent spolia Dæmonum, postea liberandi essent ab illa servitute, & cum Christo regnaturi. ( Vide Lucæ 11. 22.)

7. Secundò objicis, passim dici à Theologis, Ecclesiam de latere Christi fluxisse, id est, post passionem Christi fuisse inchoatam, ut tu interpretaris. Respondeo. Tibi probandum est, post Ascensionem Christi fuisse inchoatam. Hoc inde non probas, sed contrarium. Deinde malè interpretaris sententiam Theologorum. Nam illi nihil aliud dicunt, quàm Ecclesiam Christi, nō propriè, sed symbolicè & meritoriè fluxisse, vel formatam esse ex latere Christi. Symbolicè quidem, quia ex latere Christi fluxerunt aqua & sanguis, quæ erant signa, vel symbola, significantia Baptismum & Eucharistiam, præcipua Ecclesiæ Sacramenta. Meritoriè verò, quia  
Sacra-

Sacramenta Ecclesiæ omnem suam vim habent ex merito passionis & mortis Christi. Ita Cyrillus l. 12. in Ioannem cap. 39. Chrysostomus hom. 84. in Ioannem, Cornelius à Lapide in Commentario cap. 5. ad Ephesios vers. 20. & alij.

8. Tertiò objicis, Christum non dixisse, *super hanc petram ædifico*, sed *ædificabo Ecclesiã meam*, quod post ascensionem fecit per Apostolos, ut tu ais. Respondeo. Iterum tibi contradicis. Nam paulò ante dicebas, id factum esse in morte Christi, quando sanguis & aqua fluxerunt de ejus latere. Nunc dicis, factum esse post Ascensionem. At ego dico, tunc factum esse, quando Christus ordinavit Sacerdotes, instituit Sacramenta, sancivit leges, cōdidit testamentum, obtulit sacrificium.

9. Ad majorem explicationem, tria tempora distinguenda sunt. Primum, ante mortem Christi. Tunc simul viguit Synagoga vetus, & Ecclesia nova: Simul Baptismus & circumcisio: simul sacrificium Eucharistiæ, & sacrificia Mosaica: simul lex & Evangelium. Alterum, in morte Christi. Tunc expiravit Synagoga cum suis ceremonijs, & sacrificijs: tunc velum Templi scissum est in duas partes: tunc lex Mosaica abrogata est. (Hoc docet Augustinus Epist. 19. ad Hieronymum, & Hieronymus ipse Epist. ad Augustinum, quæ est 11. inter Epistolas Augustini, & D. Thomas in 1. 2. q. 103. art. 3. ad 2. & alij passim.) Tertium, post mortem Christi. Tunc Synagoga sepulta est:  
Tunc

Tunc ceremoniæ & sacrificia Mosaica, quæ jam antè erant mortua, ceperunt fœtere: vel ut Theologi loquuntur, ceperunt esse mortifera. An autem id factum sit statim ac immediate post mortem Christi, an verò post solennem Ævangelij promulgationem in die Pentecostes, vetus controversia est. Hieronymus tenet priorem partem; Augustinus posteriorem. Itaque secundum Augustinum, à tempore mortis Christi, usque ad diem Pentecostes, erant quidem mortua sacrificia Mosaica, id est, erant abrogata, non erant utilia ad salutem, non habebant vim & energiam, quam antea habuerant: Sed tamen nondum erant mortifera, id est, nondum adferebāt mortem spiritualem; adhuc poterāt vsurpari, sine peccato mortali. At post promulgatum Ævangelium, ceperunt mortiferum fœtorem exhalare, & qui ea tunc vsurpasset, mortali peccato se obstrinxisset.

10. Ex dictis (semota hac controversia inter Hieronymum & Augustinum) sumo efficax argumentum contra te, in hunc modum: Si Synagoga cum suis ceremonijs, sacrificijs & legibus, expiravit in morte Christi, ut omnes fatentur, vel tunc orta erat Ecclesia cum suis legibus & Sacramentis, vel non erat. Si erat orta, falsum est, quod tu asseris, primùm ortā esse post Ascensionem Christi. Si non erat orta, necesse est, Judæos deterioris fuisse conditionis post mortem Christi, quàm antè erant. Nam ante habebant Synagoga, Sacerdotes, sacrifici-

sacrificia, quæ poterant illis prodesse. Postea, hæc omnia erant abrogata, & inutilia. Nec tamen aliunde poterant habere subsidium, si nulla erat Ecclesia nova, in qua essent novi sacerdotes, nova sacramenta, novum sacrificium.

II. Maneat igitur certum ac indubitatum, Ecclesiam à Christo ædificatam esse in hac vita. Sed tamen obiter notandum est, successive, & non unico quasi instanti, ædificatam esse. Nam primò, electi sunt Apostoli & Discipuli, (Matth. 4.18.) Deinde, Baptismus præceptus est, Joan. 3.5. *Amen Amen dico vobis, nisi quis renatus fuerit ex aqua & Spiritu sancto, non poterit introire in regnum Dei.* Postea, idem Baptismus usurpatus, Joann. 4.1. *Ut autem cognovit Jesus, quia audiverunt Pharisei, quod Jesus plures Discipulos facit, & baptizat, quam Joannes (quanquam Jesus non baptizaret, sed Discipuli ejus) reliquit Judæam.* Tandem, in ultima cœna, Sacramentum, & sacrificium Eucharisticum institutum, & Apostoli Sacerdotes ordinati sunt. Denique, cruentum novi Testamenti sacrificium in ara crucis oblatum est: quo peracto, expirarunt omnia sacrificia Mosaica; quia non erant, nisi umbræ cruenti sacrificij crucis. Umbram autem, præsentem lumine, cessare necesse est. Postremò, post resurrectionem Christi, potestas absolvendi à peccatis data est omnibus Apostolis, & Petrus totius Ecclesiæ Pastor constitutus est, loco Christi (Joann. 21.

17.) Quæ autem postea contigerunt, pertinent ad alteram partem assertionis meæ, quæ jam sequitur. Igitur

12. Altera pars assertionis meæ est, Ecclesiam Christi, quæ ab ipso Christo fundata est, postea ab Apostolis auctam & propagatam esse. Quod etiam successivè factum est tribus modis. Primò, quia Apostoli, post acceptum Spiritum sanctum, solenniter promulgarunt Evangelium in Jerusalem, Act. 2. 17. Deinde, admiserunt gentiles ad fidem, & Ecclesiam Christi, Act. 10. 34. Denique, post multos annos, facta divisione, dispersi sunt per orbem terrarum, ut impleretur, quod dictum erat per Prophetam, Psal. 18. 5. *In omnem terram exivit sonus eorum, & in fines orbis verba eorum.* Et quod tunc factum est, etiam nunc fit. Nam & hoc tempore multi Apostolorum imitatores mittuntur in Indiam, Japoniam, & alias provincias, ut Ecclesia Christi novâ semper accessione augeatur & propagetur.

13. Jam vides, Marce Antoni, in Ecclesiam Christi, primò quidem admissos esse Apostolos, Discipulos, & alios plures ex populo Judæorum, vivente adhuc Christo in terris. Deinde, etiam gentiles accessisse post Ascensionem Christi, & accessuros usque in finem mûdi. Et hoc constat ex Evangelio, ubi Christus ait, Joan. 10. 14. *Ego sum Pastor bonus, & cognosco oves meas, & cognoscunt me mea.* Ergo jam tunc habebat oves in suo ovili, id est, in sua Ecclesia, nempe conversos ex populo Judæorum. Nam

de illis dicebat, *cognoscunt me mea.* Quod de Gentilibus intelligi non potest. Illi enim non cognoscebant Christum eo tempore, id est, non credebant in Christum, non erant in ovili Christi, non erant in Ecclesia. Erant tamē accessuri; quia mox sequitur: *Et alias oves habeo, quæ non sunt ex hoc ovili, & illas oportet me adducere.* Q. D. Gentiles non sunt in meo ovili, sed in ovili falsorum Deorum. Ex quo tamen eos adducam in meum ovile, per prædicationem Apostolorū. Et tunc erit unum ovile Judæorum & Gentilium; & unus utrorumque Pastor.

## CAPUT SECUNDUM.

*Quando Christus ceperit esse caput Ecclesia?*

1. **T**Uais cepisse post Ascensionem. Sice-  
nim scribis, lib. 1. cap. 1. n. 3. *Regimen super Ecclesiam videtur Christo Domino à Patre donatum post illius glorificationem, & in cælos Ascensionem.* Et hoc necessario sequitur, ex illo falso principio, quod jam refutatum est, Ecclesiam Christi, post Ascensionem ipsius ab Apostolis ædificatam esse. Nam si tunc primū ædificata est, necesse est, Christum tunc primū cepisse esse illius caput. Quod etiam confirmas ex Apostolo, Ephes. 1. 20. ubi de Deo Patre, & Christo sic ait: *Suscitans illum à mortuis, & constituens ad dextram suam in cælestibus, supra omnem principatum & potestatem, Et omnia subjecit sub*



*sub pedibus ejus, & ipsum dedit caput supra omnem Ecclesiam, quæ est corpus ipsius.* Unde concludis Christum factum esse caput Ecclesiæ, postquam constitutus est ad dextram Dei Patris. Ego contra oppono has duas conclusiones.

2. Prima conclusio. Christus cepit esse caput Ecclesiæ, cum adhuc esset in hac vita. Ratio est, quia ipse in hac vita fundavit Ecclesiam, ut jam probatum est: Ergo in hac vita cepit esse illius caput alioquin Ecclesia fuisset sine capite, quod est absurdum. Quod objicis ex Apostolo, intelligendum est eo sensu, quo illud, Philip: 2. 8. *Humiliavit semetipsum; factus obediens usque ad mortem, mortem autem crucis: propter quod & Deus exaltavit illum, & donavit illi nomen, quod est super omne nomen, ut in nomine Jesu omne genu flectatur, cælestium, terrestrium & infernorum: Et omnis lingua confiteatur, quia Dominus Jesus Christus in gloria est Dei Patris.* Quasi dicat: Christus per suam humilitatem & passionem hoc obtinuit à Patre, ut ascendens in cælum, exaltaretur super omnes creaturas, & ab omnibus palàm agnosceretur, quis & quantus esset. Hinc non sequitur, quod tunc primum ceperit esse caput Ecclesiæ militantis, ut tu perperam contendis; sed quòd ceperit ab omnibus agnosci & honorari, tanquam caput omnis Ecclesiæ, cælestium, terrestrium & infernorum. Nam antea, cum versaretur in hac vita mortali, tamen si revera esset caput & fundator Ecclesiæ, habebatur tamen abjectus & contemptibilis, ut ipsemet fatetur per Prophetam,

phetam, Psal. 21. 6. *Ego autem sum vermis, & non homo, opprobrium hominum, & abjectio plebi.* At in ipsa Ascensione cepit exaltari, & gloriosus apparere, & ab omnibus tanquam filius Dei adorari. Tunc dictum est, Psal. 23. 7. *Attollite portas principes vestras, & elevamini porta aeternales: & introibit Rex gloria. Quis est iste Rex gloria? Dominus fortis & potens. Dominus potens in praelio.* Nimirum, qui dixit: *Ego vici mundum.*

3. Habemus simile exemplum. Nā Christus ante Ascensionē, sedebat ad dextram Patris, id est, habebat æqualem cum Patre potētiā, gloriam & majestatem (ut explicant Athanasius, Basilus, Cyrillus, Chrysostomus, Damascenus, & alij apud Bellarminum l. 3. de Christo cap. 15.) Et tamen scriptura non aliter videtur loqui, quā si primū post Ascensionem cepisset sedere ad dextram Patris. Quare hoc? Quia in hac vita mortali latebat Christi potentia, gloria & majestas, & sub humana carne, tanquam sub vili pallio occultabatur. At per resurrectionem & Ascensionem, cepit fieri manifesta; non solū apud homines in terra, qui videbant illum ad cælum ascendentē (Act. 1. 9.) sed etiam apud Angelos in cælo, qui venerabundi & gratulabundi illum ad se venientem excipiebant. (Isa. 63. 1. & Philip. 2. 9.)

4. Secunda cōclusio. Christus in cælo nūc existens, adhuc manet caput Ecclesiæ militantis, & manebit usq; in finem mundi. Hoc concedis quidem, sed non eo sensu, quo nos. Nam ex tua opinione, Christus in cælo existēs, per se

se exercet omnia, quæ pertinent ad officium capitis, nec utitur operâ ullius ministri. At secundû Catholicos non exercet omnia per se, sed quædam per se, quædã per Vicarios & Ministros suos, quod c. 4. fusiùs explicandum est.

5. Disputant Scholastici: An Christus, sicut dicitur caput, sic etiam dici possit membrum Ecclesiæ? Aliqui negant; quia membrum videtur includere aliquam imperfectionem, quæ non includit caput; nempe participationem virtutis à toto corpore. Hoc autem non convenit Christo, quia nullam virtutem participat à corpore Ecclesiæ. Ita D. Thomas in 3. dist. 13. q. 2. art. 1. ad ultimum.

6. Alij utuntur hac distinctione: Ecclesiâ duobus modis spectari potest 1. Pro tota congregatione fidelium, excepto capite. 2. Pro eadem congregatione cum capite. Priori modo, sicut non est pars Ecclesiæ, ita nec membrum. Posteriori, & pars, & membrum, & caput. Ita Antisiodorensis & alij apud Vasquez. 3. p. tomo 1. disp. 48. c. 1. Et colligunt ex illo 1. Corint. 12. 27. *Vos estis corpus Christi, & membra de membris*, id est, de Christo, qui est principale membrum. Sed hæc quæstio parvi momenti est.

### CAPUT TERTIUM.

*An Christus sit caput Ecclesiæ  
visibile?*

1. **T**U ais invisibile esse, non visibile. Et quidem duplici titulo: Primò, quia Christus

stus cepit esse caput Ecclesiæ post Ascensionē. At post Ascensionem, respectu nostri, invisibilis est. Secundò, quia nullum habet actum capitis, nisi internum influxum gratiæ. At hic actus est etiam invisibilis. Verba tua paulo post citabo. Cur autem ita sentias, causa hæc est. Catholici, quando probant Pontificem esse Vicarium Christi, inter cætera, utuntur etiam hoc argumento: Christus dum esset in terris, erat visibile caput Ecclesiæ: Ergo post Ascensionem, quando desijt esse caput Ecclesiæ visibile, debuit esse aliud caput visibile, loco Christi; alioquin forma gubernandi Ecclesiam esset mutata, quod est absurdum. Hoc argumentum te pressit. Itaq; ne cogereris admittere, Pontificem esse visibile caput Ecclesiæ, negasti Christum fuisse visibile caput Ecclesiæ in terris. Quid Catholici sentiant, jam dicam.

2. Prima conclusio. Christus in hac vita existens, erat visibile caput Ecclesiæ. Quòd fuerit caput Ecclesiæ, suprà demonstratū est. Quòd fuerit visibile, dupliciter probo: Primò, quia visibiliter Ecclesiam ædificavit, instituendo nova Sacramenta, ordinando novos ministros & Sacerdotes, sanciendo novas leges, offerendo novum sacrificium in ara crucis. Secundò, quia eandem visibiliter gubernavit, docendo, monendo, increpando, corrigendo.

3. Hanc conclusionem, ut inconstans es, uno loco negas, altero admittis. Negas L. i. c. 1 n. 23. his verbis: *Christus nullum caput visibile unquam munus in sua Ecclesia exercuit*: Admittis paulo

paulo post n. 24. cùm ais: *Ego sanè in Christi visibili regimine ordinario, hac tantùm observo: Sacramenta visibilia instituire, Ministros vocare & mittere, evangelizare, Ministros suos errantes corrumpere & increpare, legem explicare, eamq. à corruptelis vindicare. Alterius generis officia, à capite Christo, ut visibilis erat, prodeuntia, ego certè non reperio.*

4. Si nunc quæram ex te, Antoni, an Christus in hac vita fuerit visibile caput Ecclesiæ, necne? Respondebis. Fuit, non fuit: Fuit, quia visibilia Sacramenta instituit, Ministros misit, legem explicavit. Non fuit, quia nullum visibilis capitis munus exercuit. Quæ est aperta contradictio. Quo vitio laborant omnes, qui ab Ecclesiæ unitate recedunt. Taceo, falsum esse, quod ais, Christum non exercuisse alia officia visibilis capitis, quàm quæ à te enumerata sunt. Nam non solum explicavit legem Mosaicam, (Matth. 5. 21.) sed etiam novas leges Evangelicæ sancivit de Baptismo & Eucharistia. Ioann. 3. 5. *Nisi quis renatus fuerit ex aqua & Spiritu sancto, non potest introire in regnum Dei.* & Ioann. 6. 53. *Nisi manducaueritis carnem filij hominis, & biberitis ejus sanguinem, non habebitis vitam in vobis.*

5. Secunda Conclusio: Christus in cælo nunc existens, est caput Ecclesiæ invisibile; quia per se non gubernat Ecclesiā visibili modo, sicut antea fecerat; sed tantùm invisibili, per internum influxum gratiæ. Hoc concedis. Ex hac & præcedenti conclusione duo colli-

guntur: 1. Ecclesiam Christi eo tempore, quo Christus vixit in terris, fuisse gubernatā à visibili capite, nempe ab ipso Christo, qui tunc visibiliter præsens erat. 2. Eandem Ecclesiam nunc etiam debere gubernari à visibili capite: alioquin forma gubernationis esset mutata; & consequenter non esset nunc eadem Ecclesia, quæ tunc fuit. Sicut non censetur manere eadem Respublica, quando forma gubernandi, prius fuit Monarchica, & postea incipit esse Aristocratica. De quo plura dicam cap. 5.

## CAPUT QUARTUM.

*Quod sit officium Christi, quatenus  
est caput Ecclesie?*

1. **C**ertum est, Christum non propriè, sed metaphoricè esse caput Ecclesiæ. Itaque explicanda est metaphora seu similitudo, quæ est inter caput & corpus; itemque inter Christum & Ecclesiam.

2. Tria spectari possunt in capite naturali, (ut notat D. Thomas 3. p. q. 8. art. 1.) nempe ordo, perfectio, & virtus. Ordo quidem, quia caput est primum seu supremum inter membra humani corporis. Perfectio autem, quia in capite vigent omnes sensus, tam interni, quam externi. Virtus denique, quia caput sua virtute gubernat reliqua membra, & vim motivam ac sensitivam illis suppeditat.

3. Hæc tria, servata proportionè, conveniunt etiam Christo, respectu Ecclesiæ, 1. Quia  
Christi-

Christus est primus & supremus inter membra Ecclesiæ. 2. In Christo est plenitudo gratiæ. 3. Christus gubernat Ecclesiam, & habet vim influendi gratiam in membra Ecclesiæ, juxta illud Joann. 1. 16. *De plenitudine ejus nos omnes accepimus.* De duobus prioribus non est inter nos contentio. De tertio est. Nam tu aliter sentis de gubernatione, quàm Catholici. Quod sic ostendo.

4. Duo sunt modi, quibus caput humanū gubernat reliqua membra. Unus, per internū influxum; qui in eo consistit, quòd ex capite, tanquam ex fonte seu principio derivantur spiritus sensitivi in reliqua membra. Unde fit, ut reliqua membra possint vitam conservare, & suas functiones exercere. Alter, per externam directionem; quæ in eo consistit, quòd caput per intellectum, voluntatem, visum, auditum, & alios sensus, qui in eo vigent, dirigat reliqua membra in externis actionibus, ne aberrarent: quo pacto per intellectum & voluntatem dirigit manus, ne quid illicitum committant: Et per visum dirigit pedes, ne in foveam incidant; & sic deinceps.

5. Hoc posito; quæstio est, An Christus, quatenus est caput Ecclesiæ, imitetur hos duos modos in gubernanda Ecclesia? Tu admittis priorem tantum modum, qui est per internum influxum gratiæ: negas posteriorem, qui est per externam directionem. Sic enim scribis L. 1. c. 1. n. 3. *Hoc regimen (Christi in Ecclesiam) totum est spirituale, nec eget corporalipra-*

*sentia sed influxu interna gratia peragitur. Et ibidem n. 12. Totum ipsius regimē ab eo, ut à capite, divinis influxibus absolvitur. Et iterum n. 16. Christus omnia munera capitis obit per se perfectissime, in quibus nullis indiget ministris. Hic excludis omnia externa munera, & cōsequenter externā gubernationē: Et solūm admittis internam, quæ est per influxum donorum gratiæ.*

6. At Catholici admittunt utrumq; modum cum D. Thoma, loco citato. Et meritò. Nam uterque modus in scriptura tam clarè explicatur, ut nullus sit dubitandi locus. Prior quidem (qui est per influxum donorum gratiæ) Rom. 12. 3. *Unicuique sicut divisit Deus mensuram fidei.* & 1. Corinth. 12. 4. *Divisiones gratiarum sunt; idem autem spiritus.* Et Ephes. 4. 7. *Unicuique nostrum data est gratia secundum mensuram donationis Christi.* Et alibi sæpissimè.

7. Posterior verò (qui est per externam gubernationem) Ephes. 5. 22. *Mulieres viris suis subdite sint sicut Domino: quoniam vir est caput mulieris, sicut Christus caput est Ecclesia.* Ex quo loco constat, Christum esse caput Ecclesiæ, non solūm eo sensu, qui jam explicatus est; sed etiam eo sensu, quo vir est caput mulieris. At vir est caput mulieris per externam gubernationem. Tenetur enim mulier in externis actionibus se dirigere juxta imperium sui viri, qui est quasi Dominus ipsius. Unde etiam Sara, virum suum Abraham, vocavit Dominum suum, Gen. 18. 21. *Dominus, inquit, meus vetulus est.* Huc spectant sequentia testimonia, Gen. 3.



16. *Sub viripotestate eris, & ipse dominabitur tui.*  
 Et 1. Corint. 13. 34. *Mulieres in Ecclesia taceant;*  
*non enim permittitur eis loqui, sed subditas esse sic-*  
*ut & lex dicit.* (loquitur de Lege ex Genesi jam  
 citata) Et 1. Timoth. 2. 11. *Mulier in silentio di-*  
*scat cum omni subjectione.* Et 1. Petri 3. 1. *Similiter*  
*& mulieres sint subditæ viris suis.*

8. Addo, nomen capitis, quando sumitur  
 metaphoricè pro eo, qui gubernat, usitatè in  
 scriptura sumi pro eo, qui gubernat per exter-  
 nam directionem, ut 1. Reg. 15. 17. *Nonne cum*  
*parvulus esses in oculis tuis, caput in tribubus Israel*  
*factus es?* loquitur de Saule, qui factus erat Rex.  
 Et Isaia 7. 8. *Caput Damasci Rasin.* Et ibidè: *Ca-*  
*put Samaria filius Romelia.* Ubi Rasin, qui erat  
 Rex Syriæ, vocatur caput Damasci; Et Phacee,  
 filius Romeliæ, qui erat Rex Israel, vocatur  
 caput Samariæ. Utroque autem loco sumitur  
 nomen capitis pro Rege, seu Principe, qui in  
 externo regimine gubernat subditos. Et Isaia  
 19. 15. *Non erit Ægypto opus, quòd faciat caput &*  
*caudam,* id est, Ægyptij non habebunt Regem,  
 cui subiecti sint. Et Jerem. 31. 7. *Exultate in lati-*  
*tia Iacob, & hinnite contra caput gentium,* id est,  
 contra Reges & Principes gentium.

9. Igitur Christus vocatur caput Eccle-  
 siæ, non tantum propter internum influxum  
 gratiæ; sed etiam propter externam guberna-  
 tionem, quo pacto vir est caput mulieris; & Saul  
 caput populi Israel; & Rasin caput Damasci;  
 & Phacee caput Samariæ; & uno verbo, Rex  
 caput regni. Licet Regis gubernatio sit politi-

B 5 1 ca;



ca; Christi Ecclesiastica. Duo tamen notanda sunt. Unum est, Christum, cum adhuc in terris esset, per se exercuisse utrumque officium capitis in Ecclesia. Nam & per se donabat fidelibus internam gratiam: & similiter per se dirigebat & gubernabat illos in externis actionibus, quæ ad Ecclesiæ statum pertinebant. At nunc cum in cœlis est, per se quidem præstat prius officium: posterius verò per Vicarium. Alterum, Christum dupliciter considerari posse. 1. Quatenus est Deus. 2. Quatenus est homo. Utroque modo, per se præstat prius officium; sed diversâ ratione. Nam quatenus est Deus, per se physicè & effectivè producit gratiam: quatenus homo, per se moraliter & meritorie illam confert. Prior modus conferendi est illi communis cum Patre & Spiritu sancto: posterior est illi proprius.

10. Hic obiter examinandæ sunt duæ Regulæ à te positæ, Lib. 1. cap. 1. n. 23. Prior est. *Quod Christus mortalis in terra visibiliter exercuit, hoc, & non aliud mortalibus hominibus, Ministris suis exercendum cōmisit.* Posterior; *Et quod ipse mortalis visibiliter non exercuit, neq; mortalibus commisit; imò nec committere debuit; sed sibi, ut vero capiti & Domino reservavit; internum videlicet spiritualem influxum.* In his regulis, & tibi contradicis ipsi, & quædam falsò asseris. Contradicis tibi, quia in posteriori supponis, Christum in hac vita mortali fuisse verū caput Ecclesiæ, & internum gratiæ influxum sibi reservasse. At alibi dicis, ut suprâ notavi, Christum post

post ascensionem cepisse esse caput Ecclesiæ. Quæ duo non cohærent inter se. Deinde falsum est, quod ais in priori regula, Christum commississe suis Ministris, quicquid ipse visibiliter in terra exercuit. Nam ipse visibiliter instituit Sacramenta, quod ministris suis non cõmisit. Similiter, è cõtrario falsum est, Christum nihil aliud cõmisisse suis discipulis, quàm quod ipse visibiliter exercuit. Nam commisit illis, ut irent in universum orbem, & baptizarent omnes gentes, quod ipse visibiliter non exercuit.

## CAPUT QUINTUM.

*An non sit aliud caput Ecclesiæ præter Christum?*

- I. **N**ON disputo jam speciatim de Petro vel Pontifice, de quibus postea dicturus sum, sed generatim inquirō, an sit aliquod visibile caput Ecclesiæ in hac vita, quod Christo sit subordinatum, & illius vicem gerat? Hic in uno consentis mecum; in altero discrepas. In eo consentis, quod nullum sit tale caput, si spectemus internum influxum gratiæ. Nam nullus hominum in hac vita est, qui per modum capitis possit internam gratiam nobis cõmunicare, sicut Christus communicat. In eo autem discrepas, quod ne quidem, quoad externam gubernationem, admittas ullum caput Ecclesiæ, loco Christi. Solum Christum absolutè vis esse caput Ecclesiæ; & præter illum, nul-

nullum alium, quicumque ille sit. In quo non solum dissenti à Catholicis, qui constanter docent, Pontificem esse caput Ecclesiæ, loco Christi; Sed etiam à Serenissimo Rege Angliæ (ad quem, tanquam ad Patronum confugisti) qui asserit Imperatorem in Imperio, & unumquemque Regem in suo regno, esse Primatem seu caput Ecclesiæ, quoad externam gubernationem.

2. Tribus argumentis te oppugnabo, quibus generatim ostendā, oportere esse aliquod caput visibile Ecclesiæ, præter Christum. Postea diluam objectiones, quas opponis. Primum sumitur ex analogia veteris ac novi testamenti hoc modo: Figura debet correspondere figurato; & umbra, seu rudis delineatio imaginis, debet correspondere ipsi imagini; alioquin illam non repræsentaret. At vetus Testamentum est figura seu umbra novi Testamenti. Ergo debet illi correspondere. Nemo dubitat. Jam vero Synagoga V. T. semper fuit gubernata ab uno visibili capite, nempe à summo Pontifice, cui reliqui omnes erant subiecti: Ergo etiam Ecclesia N. T. debet hoc modo gubernari; alioqui non esset correspondentia & analogia inter hanc & illam.

3. Hic discursus nititur triplici fundamento. Primum est, quod figura debeat correspondere figurato; & delineatio imaginis, ipsi imagini. Ad quod duo requiruntur. 1. Ut quicquid est in imagine, repræsentetur aliquo modo per delineationem imaginis: Et quicquid  
est

est in re figurata, repræsentetur aliquo modo per figuram, seu typum illius. 2. Ut delineatio imaginis, quâ talis, sit imperfectior ipsa imagine; & figura seu typus alicujus rei, quâ talis, sit imperfectior, quàm res ipsa, quæ per figuram significatur. Unde sequitur à fortiori, quòd quicquid perfectionis est in figura, debeat exactiori modo esse in re figurata. Et quicquid perfectionis est in rudi delineatione imaginis, debeat exactiori modo esse in ipsa imagine. Hoc clarum est.

4. Alterum fundamentum est, quòd verus Testamentum sit figura seu umbra Novi Testamenti. Et ea, quæ contigerunt in Veteri Testamento, sint figuræ seu umbræ eorum, quæ contingunt in Novo Testamento. Hoc expressè docet Apostolus 1. Cor. 10. 11. & Heb. 10. 1. Unde speciatim sequitur, Synagogam V. T. fuisse figuram seu umbram Ecclesiæ N. T. Et Moysen, Mediatorem V. T. (Gal. 3. 19.) fuisse figuram seu umbram Christi Mediatoris N. T. (Hebr. 8. 6. & 9. 15. & 12. 24.) quod frequenter docet Augustinus, præsertim l. 83. quæstionũ, quæst. 61. & serm. 49. de verbis Domini, cap. 6. & serm. 86. de tempore.

5. Tertium est, quòd Synagoga V. T. semper gubernata fuerit ab uno visibili capite seu Monarchâ, nimirum à Pontifice, cui reliqui omnes erant subiecti. Hoc patet ex libris Exodi, Levitici, & Deuteronomij. Ac præsertim ex illo Deuter. 17. 12. *Qui autem superbierit nolens obedire Sacerdotis imperio, morte morietur.*

Hoc

Hoc admittunt, non solum Catholici, sed etiam Lutherani & Calvinistæ. Sic enim loquuntur Magdeburgenses Centur. 1. l. 1. cap. 7. *In Ecclesia populi Iudaici unus tantum erat lege divina Sacerdos summus, quem omnes cogeantur agnoscere, eique parere.* Vide etiam Calvinum L. 4. Instit. cap. 6. §. 2.

6. Igitur ex his principiis sic concludo: Omnis perfectio, quæ est in figura vel umbra alicujus rei, debet expressius & exactius esse in re ipsa: Ergo omnis perfectio, quæ fuit in Synagoga V. T. debet expressius & exactius esse in Ecclesia N. T. At gubernari ab uno capite seu Monarcha, est quædam perfectio; & quidem major perfectio, quam gubernari à multis. Hæc autem perfectio fuit in Synagoga, ut ex dictis patet: Ergo exactiori modo debet esse in Ecclesia.

7. Quod autem major perfectio sit, gubernari ab uno capite, quam à multis; communis Doctorum sententia est, apud Card. Bellarminum L. 1. de Pontifice. cap. 2. Et confirmatur exemplo; quia perfectius est, mundum gubernari ab uno Deo, & regnum ab uno Rege, quam si aliter fieret. Nam ubi unus gubernat totam communitatem, ibi facilius servatur pax inter subditos; & major est consensus ad resistendum hosti; & regimen est magis stabile ac diuturnum. Ubi autem duo vel plures gubernant cum pari potestate, ibi facile oritur dissensio, tum inter gubernatores ipsos, quando quisque proprium sequitur judicium; tum  
etiam

etiam inter subditos, quorum aliqui sequuntur unam factionem, alij alteram: Ac proinde non potest esse tanta unio & concordia ad resistendum hosti; neque regimen esse tam stabile ac diuturnum, juxta illud Christi, Lucæ 11. 17. *Omne regnum in seipso divisum desolabitur.* Et hoc docet quotidiana experiētia apud adversarios. Nam Lutherani & Calvinistæ, quia non agnoscunt unum caput suæ religionis, cui se subdiciant, disiecti sunt in varias partes, quæ nunquam componuntur.

8. Dices, Analogia, quæ est inter Synagogam & Ecclesiam, in eo consistit, quod sicut Synagoga habuit unum caput, nempe Pontificem; ita Ecclesia habeat unum caput, nempe Christum. Respondeo. Duplex analogia assignanda est: Una, quoad internum influxum gratiæ; altera, quoad externam gubernationem. Prior in eo consistit, quod sicut Christus, per sua merita prævisa, contulit Synagogæ internam gratiam; ita per sua merita jam exhibita, multo abundantiorē gratiam conferat Ecclesiæ. Posterior in eo, quod sicut Moyses, Mediator veteris Testamenti, fuit primum caput visibile Synagogæ, quoad externum regimen, ita Christus, Mediator Novi Testamenti, fuerit primum caput visibile Ecclesiæ, in externo regimine. Rursum, sicut post mortem Moysis, semper perseveravit visibile regimen Synagogæ; ita post Ascensionem Christi semper perseveret visibile regimen Ecclesiæ.

9. Ex utraque analogia colliguntur hæc:

1. In-

1. Invisibile caput Synagogæ & Ecclesiæ, quoad internum influxum gratiæ, esse idem, nempe Christum. 2. Visibile caput Synagogæ & Ecclesiæ, quoad externam gubernationem, esse diversum. Nam visibile caput Synagogæ, ab initio fuit Moses, cui postea successerunt Pontifices legales. Visibile autem caput Ecclesiæ, ab initio fuit Christus, cujus locū postea supplevit Petrus, & ejus successores. 3. Mo- sen fuisse figuram Christi, quoad externam gubernationem. Nam sicut Moses fuit Legislator, Mediator & Princeps in Veteri Testamento; ita Christus in novo. 4. Pontifices Veteris Testamenti fuisse typum seu figurā Pontificum Novi Testamenti. Nam sicut illi, in externo regimine, præsidebant toti populo Judæorum; ita hi, toti populo Christianorum.

10. Secundum Argumentum sumitur ex ijs scripturæ testimonijs, ubi Ecclesia comparatur cum exercitu bene ordinato. (Cant. 6. 3. *Pulchra es amica mea, suavis & decora, sicut Jerusalem; terribilis ut castrorum acies ordinata.*) Item cum regno (Dan. 2. 44. *Suscitabit Deus cæli regnum, quod in æternum non dissipabitur.*) Item cum ovili (Joan. 10. 16. *Fiet unum ovile, & unus pastor*) Item cum domo (1. Timot. 3. 15. *Ut scias, quomodo oporteat te in domo Dei conversari, quæ est Ecclesia Dei vivi.*) Item cum humano corpore (1. Corinth. 12. *Sicut corpus unum est, & multa habet membra; ita & Christus.*) Si ita est, necessariò sequitur, sicut exercitus bene ordinatus regitur ab uno Imperatore; regnum ab



ab uno Rege; ovile ab uno Pastore; domus ab uno Patrefamilias corpus humanum ab uno capite; ita etiam Ecclesiam gubernari ab uno Rectore. Nec satis est, si dicas, hunc unum Rectorem esse Christum. Christus quidem Rector est, quoad internum influxum gratiæ, etiam si absens sit; sed non potest esse, quoad externam gubernationem, quando absens est. Igitur alius debet esse illius loco. Quod pater ex metaphoris jam allatis. Nam sicut in exercitu, quando procedit contra hostem, necessario debet adesse unus supremus Dux, aut in ejus absentia, aliquis illius Vicarius, qui omnia dirigat, & cui omnes reliqui obediant; sic etiam servata proportionem fieri debet in Ecclesia. Alioqui non erit unitas, sed divisio, schisma & dissensio.

11. Exemplo rem declarabo. Sint in uno exercitu duo vel tres Imperatores cum pari potestate: quorum unus decernat, pugnandum esse cum hoste; alter, quiescendum; tertius, fugiendum; quid putas facturos milites? Alij cum hoc, alij cum alio conspirabunt. Tolleitur unitas, orietur schisma; exercitus dissipabitur. Vis applicem? Sint in Ecclesia Christi, quæ unica est, plures Episcopi cum pari potestate, qui nullum in terra superiorem agnoscant; ut tu fingis. Unus eorum decernat, Ecclesiasticos non obligari ad cœlibatum; alius contrarium statuatur; tertius in dubio relinquat; quid hinc faciet populus Christianus? quid Clerici inferiores, qui Episcopis subiecti sunt? Distr-

hentur in varias sectas & dissidia. Quis rediget illos ad unitatem, si non est unus aliquis superior, cui omnes teneantur obtemperare? An tu ipse, Marce Antoni? At reliqui Episcopi non audient te unum: nec agnoscent te iudicem, sed parem. An illi potius? At neque tu illos agnosces, ut iudices, sed ut collegas, in æquali tecum potestate cōstitutos. Quis ergo? An generale Episcoporum Concilium? Sed quis illud sua autoritate indicet? Quis omnes Christiani orbis Episcopos ad cōcilium convocabit? Quis, si venire abnuant, legitimè compellet? Nemo, si omnes pares sunt. Sed veniant sanè. Quis concilio præsidebit? Quis sententiam, cui omnes acquiescere debeant, pronunciabit? Certè, vel unus aliquis, vel plures, vel omnes simul, vel nullus, Si unus aliquis, vel plures, non parebis: alioqui, cur Pontifici, & multis alijs Episcopis illi adhærentibus non pares? cur refractarius es? Si omnes simul, quid si dissentiant? Si nullus, controversia non finietur. Nullum igitur in Ecclesia, si omnes pares sunt, remedium est. Nec tu aliud præter fugam, reperisti.

12. Tertium argumentum sumitur ex institutione Christi, hoc modo. Primū regimen, quod Christus in Ecclesia instituit, fuit visibile & Monarchicum, quoad externā gubernationē. Nā ipsemet Christus, ut supra ostensum est, etiam ex tua concessione (in qua ramen inconstans es) tanquam supremum caput & Monarcha, visibiliter suam Ecclesiam fundavit & guber-

gubernavit. Vel ergo post Ascensionem Christi, mansit visibile & monarchicum regimen, vel mutatum est. Si mansit, necesse est, Ecclesiam post Christi Ascensionem, semper gubernatam fuisse ab uno visibili Capite seu Monarcha, quod nos contendimus. Si mutatum est, planè sequitur, Ecclesiam ipsam mutatam esse, nec eandem nunc esse, quæ olim fuit. Sicut enim quælibet Respublica censetur mutari, teste Philosopho, quando modus, seu forma gubernandi mutatur; sic etiam de Ecclesia statuendum est. Atqui absurdum est dicere, Ecclesiam Christi mutatam esse: Ergo absurdum & illud, ex quo hoc sequitur.

13. Hoc argumento, quo usi sunt Nicolaus Sanderus, & Cardinalis Bellarminus, sentis te premi. Et conaris dupliciter occurrere. Primò ais, semper mansisse eandem Ecclesiam, & eandem gubernandi formam. Quod declaras hac similitudine. Si Rex terrenus, peregrè proficiscens, posset suis ministris animo & consilio adesse, eosq; singulis momentis instruere ac per eos totam regni gubernationem exercere, non secus, quàm si corpore præsens esset; certè in tali casu non indigeret Vicario, sed ipse per se diceretur gubernare suum regnum, sicut prius gubernabat, cum præsens erat. Nec ullo modo censeretur facta mutatio in gubernatione. At sic fit in Ecclesia. Nam Christus, tametsi post Ascensionem corpore absens sit, animo tamè ac directione præsens est: Et non minus instruit ministros suos, quàm olim, cum præsens esset.

14. Hæc responsio non valet. Primò, quia falsum est, in tali casu, quem tu fingis, non mutari formam gubernandi. Nam prior forma est visibilis & externa: posterior invisibilis & interna. In priori, Rex per externam vocem & directionem gubernat Ministros & subditos: in posteriori, per internam inspirationē. Quæ duæ formæ valdè inter se discrepant. Nam subditi in priori, si oriatur aliqua controversia, possunt ad suum Regem visibiliter recurrere, & clarè ipsius sententiam audire. In posteriori tenentur manere suspensi; quia Ministri Regis nihil aliud possunt litigantibus respondere, quàm se, per internam inspirationē humanam, scire mentem Regis absentis; quod non sufficit ad tollendas controversias. Imo, meritò possent subditi dubitare, an Ministri Regis non sint malitiosi; & fingant se scire, quod nesciunt. Secundò, falsum quoque est, Christum absentem (sublato Vicario visibili, qui ipsius loco sit) non minus instruere suos ministros, quàm si præsens esset. Nam si præsens esset, clarè & rotundè diceret, vel M. Antonium errare in doctrina de cœlibatu; vel certè alios Episcopos, qui ab eo dissentiant. At nunc, cùm absens est, hoc non facit. Aut, si facit, quæro ex te, an te solum instruat, an alios solum Episcopos, an utrosq;? Si te solum, Monarcha es, quia solus. Si alios solos, teneris illos audire. Si utrosque, cur dissentiatis? *Non est dissensionis Deus, sed pacis.*

15. Dixi. *sublato Vicario visibili.* Nam illo  
ad-

admisso (sicut nos illum admittimus) fatemur Christum absentem non minus instruere ministros suos, quàm si præsens esset. Non quidem immediatè per se, sed mediante suo Vicario, quem in terris habet. Nam per illum ita dirigit Ministros suos, ut in doctrina errare non possint, si ipsius sententiam sequantur. Hoc sensu scribit D. Hieronymus, epist. 8. ad Demetriadem cap. 9. *Illud te pio charitatis affectu pramonendam puto, ut sancti Innocenti, qui Apostolica cathedra successor est, teneas fidem, ne peregrinam, quamvis tibi prudens callidaq; videaris, doctrinam recipias.*

16. Videbаш hanc tuam responsionem non subsistere: ideoq; aliam adhibes, quæ priorem evertit. Ais, Ecclesiam Christi ædificatam esse post Christi Ascensionem, & ab eo tempore, semper mansisse eandem formam gubernandi. Christum semper fuisse illius Monarcham seu caput invisibile, per internam directionem: nunquam visibile, per externam gubernationem. Sed hoc figmentum c. 1. satis fusè refutatum est. Nunc solum addo hoc dilemma. Vel Christus ab initio rexit suam Ecclesiam visibiliter, vel non. Si rexit visibiliter, falsa est posterior tua responsio. Si non rexit visibiliter, inanis est prior.

17. Multa objicis (lib. 1. c. 1. n. 2. & sequentibus) quorum aliqua jam refutata sunt; reliqua hîc refutanda. Primò objicis illud Rom. 12. 5. *Multi unum corpus sumus in Christo; singuli autem alter alterius membra.* Ubi Apostolus (ut

tu argumentaris) nullum aliud caput agnoscit, nisi Christum: Et inter membra corporis, non minus includit Petrum, quàm alios fideles. Imò omnes fideles vult esse membra, non solum respectu Christi, sed etiam respectu ipsorum inter se. Quod probas ex illis verbis, *Singuli autem alter alterius membra*. Igitur & Petrus, & Pontifex sunt membra corporis Ecclesiæ; non solum, si conferatur cum Christo, sed etiam si conferantur cum alijs fidelibus. Non sunt ergo caput Ecclesiæ. Respōdeo, Apostolus disertè ibi loquitur de Christo, quatenus est caput Ecclesiæ per internum influxum donorum gratiæ: Et sic verum est, omnes fideles, etiam Petrum & Pontificem, esse membra, nō caput. Omnes enim accipiūt gratiam à Christo, tanquam à capite: nullus à Petro vel Pontifice. Si autem sermo sit de Christo, quatenus est caput Ecclesiæ per externam gubernationem, tunc non solum ipse, sed etiam Petrus est caput: ille quidem primarium, & propria virtute; hic verò secundarium, & virtute ab illo participata.

18. Dices, Ergo Ecclesia erit biceps, quia habebit duo capita. Respondeo. Nihil hinc novum. Nam & Regnum Angliæ, posset hoc sensu, esse biceps, si Rex peregrè proficiscens, relinqueret domi Vicarium, qui tantisper Regnum administraret. Et de factò, Regnū Lusitanix biceps est, quia Regem absentem habet, & Proregem præsentem: Utrunque, ut caput in externo regimine; sed alterum alteri sub-

subordinatum. Idem dico de Ecclesia. Biceps est, quia habet duo capita, primarium & secundarium. Accipe aliud exemplum ex Apostolo, Ephes. 5. 23. *Vir, inquit, caput est mulieris.* At mulier præter virum, qui caput ipsius est, habet etiam naturale caput in suo corpore. Igitur biceps est. Et tu ipse, M. Antoni, tria habes capita. Unum in tuo corpore, naturale: alterum in directione spirituali, Christum: tertium in directione politica, Regem Angliæ, Nec ullum horum negare audes. Triceps igitur es. Non miraris?

19. Secundò objicis. Sicut caput & reliqua membra hominis, constituunt unum integrum corpus naturale; ita Christus & Ecclesia constituunt unum integrum corpus mysticum, quod conflatum est ex capite & membris, (1. Corinth. 12.) Ergo omnes, præter Christum, qui caput est, sunt membra corporis Ecclesiæ: Ergo nullus, præter Christum, est caput Ecclesiæ. Respondeo. Hæc objectio solvitur eodem modo, quo prior. Nam caput potest dupliciter conferri cum membris. Primò, quoad internum influxum, qui procedit à capite in reliqua membra: Et sic unius corporis unum est caput. Secundò, quoad externum regimen: Et sic unius corporis possunt esse duo capita. Quo pacto corpus mulieris habet unum caput, à quo recipit influxum spirituum sensitivorum: habet duo, à quibus regitur in externis actionibus. Nam & à proprio capite naturali, & à viro, qui caput ipsius morale est, gu-

bernatur. Idem est de Ecclesia. Habet unum caput, quoad influxū gratiæ: habet duo, quoad externam gubernationem, quorum unum supplet vices alterius. Et priori modo, solus Christus est caput; reliqui omnes sunt membra: posteriori, non solum Christus, sed etiam Petrus est caput; qui tamen priori modo erat membrum, & non caput.

20. Quando ergo objicis ex Apostolo, quod Christus & Ecclesia constituent unum integrum corpus mysticum, quod ex capite & membris conflatum est; hoc intelligi debet priori sensu. Nam Apostolus loco à te citato, disertè loquitur de Christo, quatenus est caput Ecclesiæ, quoad internam divisionem donorum gratiæ, ut in textu patet. Et sic concedo, ut jam antè concessi, omnes, præter Christum, esse membra Ecclesiæ: Et nullum, præter Christum, esse caput Ecclesiæ. Quod si similem objectionem facias de Christo, quatenus est caput Ecclesiæ per externam gubernationem; primò quidem, te ipsum oppugnabis, quia tu negas Christum esse ejusmodi caput. Deinde facillimè dissolvetur objectio ex nostra parte. Nam Christus cum suo Vicario erit Caput: reliqui omnes, membra. Sicut fit in regno Lusitaniæ. Rex cum suo Prorege est caput regni: alij membra.

21. Tertiò objicis, Patres non agnoscunt ullum caput Ecclesiæ, nisi Christum, ut Augustinus lib. de Unitate Ecclesiæ, cap. 2. & 4. & Tract. 108. in Joannem, & lib. de Pastoribus, cap.



cap.13. Gregorius in Psal.5. pœnitentialem, & lib.4.epist.38. & Chrysostomus hom.11.in Epist.ad Ephesios.Et probant ex illo Eph. 4. 15. *Crescimus in illo per omnia, qui est caput Christus: ex quo totum corpus compactum & connexum per omnem juncturam subministrationis, secundum operationem in mensuram uniuscujusque membri, augmentum corporis facit in adificationem sui in charitate.* Respondeo. Eadem est solutio. Nam Apostolus loquitur de Capite Ecclesiæ, quod internam gratiam influit in alia membra. Et tale Caput est solus Christus. Idem docent Patres à te citati. Non negant tamen, quin præter Christum sit aliud Caput visibile, quod in externo regimine gubernat Ecclesiam. Imò expresse affirmant, ut sequenti libro cap.4. videbimus.

22. Quartò objicis. Christus est sacerdos in æternum, ut passim docet scriptura, (Pl.109. 4.& Heb.7.17.) *Quid ergo necesse est, inquis, dare illi Vicarium, vel successorem in terris? Cur summum hic Pontificem quærimus, si Christus Sacerdos & Pontifex noster sempiternum habet sacerdotiũ, & Pontificatum sempiternum?* Respondeo. Si ex eo præcisè, quòd Christus dicatur esse Sacerdos in æternum, contendis probare, nullum esse Pontificem, nisi Christum, poteris similiter probare, nullum esse Sacerdotẽ, nisi Christum. Ubi ergo tuum sacerdotium? Ubi tuus Episcopatus? Sed ad rem. Apostolus loco citato ostendit Christum, qui est Sacerdos & Pontifex Novi Testamenti, dupliciter differre à

Sacerdote & Pontifice Veteris Testamenti.  
 1. Quia Pontifex Veteris Testamēti erat mortalī; Christus post Resurrectionem, immortalis. 2. Pontifex Veteris Testamenti, quando moriebatur, indigebat Successore; Christus, quia non moritur, non indiget Successore. Neque nos Catholici, ut ru invidiosè fingis, damus illi Successorem, sed Vicarium & Ministrum. Quæ duo valdè distinguuntur. Nam successor, succedit cum pari potestate; ut successor Regis in regno, successor Imperatoris in Imperio, successor Aaronis in sacerdotio legali. Nemo autem succedit Christo cum pari potestate. At Vicarius aut minister non habet parem potestatem cum eo, cujus Vicarius aut minister est, sed delegatam. Sicut ergo nō pugnat, Christum habere Sacerdotes, tanquam Ministros in oblatione sacrificij Eucharistiæ; ita non pugnat, habere Ministros & Vicarios in externa Ecclesiæ gubernatione. Inter hos ministros unus supremus est, qui dicitur Pontifex. Quid hīc mali est? Nihil penitus.

23. Ex his tuis objectionibus propono hoc dilemma: Vel aliquid probant, vel nihil. Si nihil, frustra à te adferuntur. Si aliquid, æquè procedunt de Rege, ac de Pontifice. Si ergo convincunt Pontificē non esse caput Ecclesiæ, eo quòd solus Christus sit Caput Ecclesiæ; etiam convincunt Regem non esse Caput Ecclesiæ, propter eandem causam. Si autem hoc convincunt, jam iterum tibi contradicis. Una pars contradictionis est hæc: Solus Christus, & nemo

nemo præter Christum, est Caput Ecclesiæ. Altera est hæc: Non solus Christus, sed etiam quilibet Rex in suo regno, est Caput Ecclesiæ. Priorem habes in objectionibus jam allatis. Posterio rem lib. 1. cap. 12. n. 43. his verbis: *In quolibet regno Rex potest merito, in bono sensu Catholico, dici esse Caput, id est, supremus gubernator Ecclesiæ totius regni sui.* Quod tamen negant Tookerus & Burhillus Theologi Anglicani. Vide, quid illis in Anglia respondere debeas.

24. Hæc generatim dicta sint de Capite Ecclesiæ. Ex quibus constat, Christum esse caput Ecclesiæ, tam visibile, quàm invisibile. Visibile quidem, quia vel per se, vel per Vicarium suum visibiliter gubernat Ecclesiam. Invisibile, quia per internum influxum fidei, spei, charitatis, & aliorum donorum spiritualium invisibiliter vivificat & vegetat membra Ecclesiæ.

Deinceps speciatim quærendum est, an Petrus fuerit visibile caput Ecclesiæ, præ alijs Apostolis,

De Republica Ecclesiastica  
LIBER SECUNDUS  
DE PRIMATU  
PETRI.

1. **H**æc tria, ut nosti, M. Antoni, pro eodem usurpari solent: 1. Petrus est visibile caput totius Ecclesie, loco Christi. 2. Petrus est Vicarius Christi in regimine totius Ecclesie. 3. Petrus habet Primatum totius Ecclesie. Quæ omnia bilem tibi movent: & velles sublata esse, ne cogaris Pontificem, Petri Successorem, pro tali agnoscere. Itaque sic statuis. 1. Nullum esse caput Ecclesie, præter Christum. 2. Spiritum sanctum præcipue esse Vicarium Christi in regimine Ecclesie, non Petrum. 3. Petrum non habere Primatum Ecclesie. Ne tamè planè videaris exorbitare, tribuis illi aliquem Primatum: non illum, quem nos illi tribuimus, sed alium, qui à te confectus est. Nos dicimus, Petrum habere Primatum Ecclesiasticæ potestatis & jurisdictionis. Tu dicis, habere Primatum ætatis, vocationis & fervoris. Nec alium agnoscis. Et omnia argumenta, quæ à nostris adferuntur ex Scriptura, Patribus, Conciliis, & Canonibus, pro Primatu Petri, putas per Primatum à te confectum, dissolvi, vel saltem eludi posse. Primatus autem iste, te interprete, in eo consistit, quòd Petrus omnes Apostolos præcesserit ætate, vocatione ad Apostolatam, & fervore Charitatis.

2. De primo puncto jam dictum est: & clarè demonstratum, aliud caput visibile, præter Christum, admitti oportere. De reliquis duobus hic agendum, hoc ordine. 1. Demonstrandum, Spiritum sanctum

*Auz non esse propriè Vicarium Christi, in regimine Ecclesiæ, sed Petrum cum suis successoribus. 2. Refellendus est Primatus Petri, quem tu fingis. 3. Astringendus verus Primatus ex Scriptura, Patribus, & aliunde. 4. Diluenda objectiones contraria.*

## CAPUT PRIMUM.

*Quod Spiritus sanctus propriè non sit Vicarius Christi.*

1. TU quidem, lib. 1. cap. 4. n. 2. disertè asseris, non Petrum, sed Spiritum sanctum propriè esse Vicarium Christi in Regimine Ecclesiæ, sed Theologi Parisienses hanc tuam assertionem celsent esse erroneam, periculosam, & hæresin Macedonij expressè redolentem. Et sic est. Nam Vicarius, *propriè loquendo*, (sicut tu loqueris) minor seu inferior est eo, cujus est Vicarius Si ergo asseris, Spiritum sanctum propriè esse Vicarium Christi, sicut revera asseris; consequenter debes asserere, Spiritum sanctum, esse minorem Christo. Hæc autem est hæresis Macedoniana.

2. Quòd autem Vicarius, *propriè loquendo*, minor sit eo, cujus est Vicarius, certum est ex communi hominum usu & conceptu; non solum apud Catholicos, sed etiam apud Adversarios. Nam quando Calvinus ait, Christum esse Vicarium Dei Patris; Calvinistæ hoc interpretantur de Christo, secundum humanitatem, non autem secundum Divinitatem: Ne

cogantur concedere, Christum secundū Divinitatem, minorem esse Patre, quæ est hæresis Ariana. Supponunt ergo, Vicarium propriè loquēdo, minorem esse eo, cujus est Vicarius. Quod & tu expressè supponis lib. 4. c. 1. n. 4. ubi citas testimonia quorundam Patrum, qui Pontificem appellant Vicarium Petri. Et inde concludis, Pontificem Petro inferiorem esse. Vel ergo benè concludis, vel malè. Si malè, nihil efficis. Si benè, supponis Vicarium minorem esse eo, cujus Vicarius est; & consequenter, si Spiritus sanctus propriè est Vicarius Christi, minorem esse Christo. Hic non potes evadere, nisi teipsum neges.

3. Addam duo dilemmata. Unum; vel Spiritus sanctus propriè est Vicarius Christi secundum humanitatem, vel secundum Divinitatem. Si prius, sequitur Spiritum sanctum minorem esse Christo homine: Et similiter Deum esse Vicarium hominis, quod est planè absurdum. Si posterius, sequitur Christum secundum Divinitatem, & non secundū humanitatē esse caput Ecclesiæ; quod est æquè absurdum. Est enim Caput secundū eam naturā, secundum quam meritis est exaltari, & caput Ecclesiæ agnosci, ut suprà dictum est. At meritis est exaltari secundum humanitatem. Ergo secundum humanitatem est Caput Ecclesiæ. Unde Augustinus lib. 1. de Trinitate c. 12. ait: *Christus secundum formam Dei, primogenitus omnis creatura: secundum formam servi, caput corporis Ecclesiæ.*

4. Al-

4. Alterum; Vel Spiritus sanctus propriè est Vicarius Christi in externo & visibili regimine Ecclesiæ, vel in interno & invisibili. Nō prius, quia non gubernat Ecclesiam per se visibiliter, sicut Christus in hac vita gubernavit. Nec posterius, quia internum regimen Ecclesiæ consistit in interno influxu donorum gratiæ, ut tu ipse fateris. Hunc autem influxum præstat Christus, vel meritoriè, quatenus est homo: vel physicè & effectivè, quatenus est Deus, ut lib. 1. cap. 4. §. 9 dictum est. At Spiritus sanctus neutro modo potest esse ipsius Vicarius. Non priori, quia non meretur nobis gratiam. Imò, cum purus Deus sit, mereri non potest. Nec posteriori, quia tametsi effectivè producat gratiam, tamen illa productio est cōmunis tribus personis, juxta axioma Theologorum: *Opera Trinitatis ad extra sunt indivisa*. Ergo nulla causa est, cur in tali productione Spiritus sanctus sit potius Vicarius Filij, quàm Pater, aut Filius sit Vicarius Spiritus sancti.

5. Quod sic clariùs explico. Productio donorum gratiæ non procedit à Patre, quatenus Pater est; nec à Filio, quatenus Filius est; nec à Spiritu sancto, quatenus Spiritus sanctus est: sed procedit à Patre, Filio, & Spiritu sancto, quatenus sunt unus Deus. Itaque non sunt tria principia illius productionis, sed unum. At unum principium, quā tale, nō potest dici propriè Vicarius sui ipsius. Ergo nec Spiritus sanctus, quatenus est Deus, potest propriè dici Vicarius Christi, quatenus ille similiter est Deus.

Deus. Nam uterque est unus & idem Deus.

6. Objicis illud Joan. 14. 26. *Paraclitus autem Spiritus sanctus, quem mittet Pater in nomine meo, ille vos docebit omnia, & suggeret vobis omnia, quaecumque dixerero vobis.* Et cap. 16. 7. *Si non abiero, Paraclitus non veniet ad vos: si autem abiero, mittam eum ad vos.* Hinc inferis, Spiritum sanctum missum esse, ut esset loco Christi, seu ut esset Vicarius Christi. Respondeo. Non rectè hoc inferis. Missus quidem est, ut doceret Apostolos; non tamen, ut propriè esset Christi Vicarius. Hoc satis clarè paulo antè ostensum est. Et tu ipse, ut soles esse incōstans, idem fateris lib. 1. cap. 1. n. 16. ubi de Christo, in cœlo jam existente, sic scribis: *Omnia munera capit is & Regis obit per se perfectissimè.* Certè, si omnia per se obit, non obit per Vicarium. Ecce in quantas angustias te conjicis.

7. Fortè urgebis illam particulam, *in nomine meo*, id est, ut sit Vicarius meus. Respondeo. Varia est explicatio illius particulæ. Prima, Pater mittet Spiritum sanctum, *in nomine meo*, id est, in gloriam nominis mei. Ita Theophylactus in illum locum. Et colligitur ex illo Joan. 16. 14. *Ille (Spiritus sanctus) me clarificabit; quia de meo accipiet, & annuntiabit vobis.* Altera, in nomine meo, id est, propter meritū meū. Ita Toletus annotat. 26. in cap. 14. Joannis. Quo sensu etiam dictū est. Joan. 14. 13. *Quodcumque petieritis Patrem in nomine meo, hoc faciat.* Tertia, in nomine meo, id est, ad opus vel negotium meum perficiendum. Ita Toletus ibidem.



dem. Duę priores explicationes nihil te juvāt. Circa tertiam nōtandum est, Christum multa per externam vocem dixisse Apostolis de sua passione, morte, resurrectione, & alijs mysticis, quę ipsi tunc non intelligebant (Lucę 18. 34. & alibi.) At postea, quando per internam vocem Spiritus sancti, illustrati sunt, ceperunt intelligere, & toti mundo promulgare. Et hoc est, quod ait Christus : *Spiritus sanctus, quem mittet Pater in nomine meo, ille vos docebit omnia, & suggeret vobis omnia, quaecunque dixerō vobis.* Gręce est, Quaecunque dixi vobis. Sensus est: Quę à me externa voce dicta sunt, & à vobis non intellecta, intelligetis ex interna suggestionē Spiritus sancti, qui à Patre mittendus est in nomine meo, id est, ad perficiendam doctrinam, quam ex me audistis. At hinc non sequitur, Spiritum sanctum propriè esse Vicariū Christi (non enim est minor Christo) sed perfectiori modo docuisse Apostolos per internā suggestionem, quę ipsi audierant à Christo per externam vocem.

## CAPUT SECUNDUM.

*Refellitur Primatus Petri à Marco Antonio confictus.*

1. **T**U fingis, Primatum Petri in eo consistere, quòd fuerit primus ætate, vocatione & fervore, inter omnes Apostolos. Sic enim scribis li. 1. cap. 5. n. 7. *Invenio ego Petrum*  
D                      Prima-

*Primatum aliquem, circa tamen Principatum potestativum, & jurisdictionalem, esse consecutum; nimirum ex atate, ordine vocationis, amoris fervore, & propriis virtutibus. Et n. 18. Cur itaque Petrus multa, primaria quadam authoritate, ageret aut diceret, in Primatū ipsius referunt Patres, quia nimirum primus erat atate, vocatione, ac virtute. Et n. 19. Atque hunc solum Primatum convincunt, & non alium majorem, plurima divina scriptura & sanctorum Patrum loca, quae postea recensēbimus. Et cap. 9 n. 1. in fine. Caput Apostolorum fuit Petrus, quia primus erat atate, vocatione & dignitate; non authoritate & jurisdictione. Et n. 2. Petrus & atate, & vocatione, & familiaritate cum Christo, erat primus, & quasi Apostolici Collegij Decanus, Praeses & caput. Et n. 20. Erat primus atate, primus in ordine Apostolorū, primus fervore & zelo.*

2. Ego contrā contendo. Primò, majorē illi Primatum deberi, qui cōsistit in potestate, & jurisdictione. Quod sequentibus capitibus demonstrandū est. Secundò, Primatū, quem tu fingis, partim incertum, partim falsum, partim insufficientem esse. Quod sic demonstro.

3. Primò, incertum est, an Petrus fuerit etate senior, quā alij. Nam multi putant Andream fuisse seniore, ut Epiphanius haeresi 51. Baronius tomo 1. Annalium, anno 31. §. 23. Lorinus in cap. 1. Act. 5. 13. Serarius in Tractu de Apostolis, & plures alij. Tu quidem citas pro te Cassianum & Chrysostomum, sed eos citando, non efficis rem certam, quam ego incertam dixi. Quod tu ipse fateris his verbis:

*Quis*

*Quis enim diem Nativitatis horum duorum fratrum notatum vidit? Quis interrogavit eorum parentes? Rectè. Si ergo incertum est, etiam te astipulante, an Petrus fuerit senior ætate, quàm Andreas; certè Primatus ætatis, quem tu Petro tribuis, certus esse non potest. Et æquè promptum erit mihi asserere, Andream fuisse seniore, quàm tibi, Petrum fuisse seniore. Unde sequitur, te in arena, non in petra, Primatum Petri ædificare: ac proinde, non prudentem, sed stultum architectum esse (Matth. 7. 22.)*

4. Porro Cassianus, quem tu citas, tibi contrarius est. Tametsi enim asserat, Petrum ætate seniore, non tamen Primatum Petri ponit in ætate, sed in Principatu. Sic enim scribit lib. 3. de Incarnatione Domini cap. 12: *Interrogemus, nõ incipientem aliquem puerulum, cujus institutio rudis, sed summum illum, & inter Discipulos Discipulum, & inter Magistros Magistrum, qui Romana Ecclesia gubernaculum reges, sicut fidei habuit, ita & Sacerdotij Principatum. Dic nobis ergo; Princeps Apostolorum Petre, dic quemadmodum Ecclesie credere Deum debeant; Equum est enim, ut doceas nos doctus à Domino, & aperias nobis jannam, cujus clavem accepisti. Interroganti ergo Domino, quem cum crederent Discipuli, respondit primus Apostolorum Petrus, unus utique pro omnibus. Idem enim habuit unius responsio, quod habebat omnium fides. Sed primum decuit respondere, ut idem esset ordo responsionis qui erat honoris: & ipse antecederet confessione, qui antecederat ætate. Hæc quidè postrema verba tu*  
D 2 citasti,

citasti, quia videbantur tibi patrocinari: Sed priora omisisti, quia apertè tibi contraria sunt. Nam ex illis constat, Primatum Petri, ex sententia Cassiani, non consistere in ætate, sed in sacerdotij Principatu.

5. Nec Chrysostomus à te citatus tibi favet. Nam & ille Primatum Petri non tribuit prærogativæ ætatis, sed potestatis & jurisdictionis, quod tu ipse conquereris lib. 1. cap. 9. n. 19. cum ais: *Chrysostomus plurimum inclinare videri potest in supremum Petri Principatum*, De quo plura cap. 4. & 6.

### *De Primatu vocationis.*

JAm verò de Primatu vocationis sic scribis lib. 1. cap. 5. n. 10. *De ordine vocationis neminem habemus, qui sese nobis opponat. Omnes enim facile concedunt, ad Apostolatuum primum omnium Petrum fuisse à Christo vocatū & admissum.* Quod confirmas ex Evangelio, Matth. 4. & Lucæ 5. sed triplex mendacium committis. Unum in assertione: Alterum in confirmatione: Tertiū in citatione Patrum. Quæ omnia constabunt ex ijs, quæ jam dicturus sum.

7. Triplex quasi vocatio distinguenda est. Prima, qua Andreas, Petrus, Philippus, & Nathanael, non quidem propriè vocati, sed tamen admissi sunt ad Christum, tanquam familiares auditores: non eo animo, ut cum ipso constanter manerēt; sed visuri, ubi habitaret, & quid diceret. Et in hac vocatione, vel poti⁹  
ad-

admissione, Andreas præcessit Petrum, Philippum & Nathanaelem, ut expressè habetur, Joan. 1. 41. Et omnes Patres, te etiam consentiente, idem sentiunt.

8. Secūda, qua propriè vocati sunt à Christo, tanquam Discipuli cum illo permansuri. Et sic Petrus & Andreas simul, seu, eodē tempore vocati sunt: Et post illos Jacobus & Joannes simul. Matth. 4. 18. *Ambulans autem Jesus juxta mare Galilæa, vidit duos fratres, Simonem, qui vocatur Petrus, & Andream fratrem ejus, mittentes rete in mare (erant enim piscatores) & ait illis: Venite post me, & faciam vos fieri piscatores hominum. At illi continuo, relictiis retibus, sequuti sunt eum. Et procedens inde, vidit alios duos fratres, Jacobum Zebedæi, & Joannem fratrem ejus in navi cum Zebedæo Patre eorum, reficientes retia sua: & vocavit eos. Illi autem statim, relictiis retibus, & patre secuti sunt eum.* Ex hoc loco, quem tu citas pro Primatu vocationis Petri, apertè colligitur, Petrū & Andream simul fuisse vocatos; & non prius Petrum quàm Andream. Itaq; falsò citas hoc testimonium pro Primatu Petri astruendo. Nec ullus Patrum in hac re tibi astipulatur.

9. Tertia, qua propriè vocati sunt, tanquam Apostoli: vel, quod idem est, qua ex numero Discipulorum electi sunt ad Apostolatū, veluti ad altiore gradum. Sic omnes duodecim simul, seu, eodē tempore, electi sunt. Lucæ 6. 13. *Et cū dies factus esset, vocavit Discipulos suos, & elegit duodecim ex ipsis, quos & Apostolos no-*

*minavit. Sine dubio, eodem tēpore illos elegit. Et hoc sensu Patres dicunt, omnium Apostolorum electionem fuisse parem. Melchias in Epist. ad Episcopos Campaniæ: Licet cū-  
 etorum Apostolorum par esset electio; Beato tamen Petro concessum est, ut aliis præmineret. Et Julius I. in Epist. ad Episcopos Orientales. Quoniam  
 & inter beatissimos Apostolos in similitudine honoris, fuit quadam discretio potestatis: Et cum omnium par esset electio, uni tamen datū est, ut ceteris præmineret. Certè, hi duo Patres non ponunt præ-  
 eminentiam Petri in vocatione, ut tu facis; sed in discretione potestatis. Nam in vocatione volunt omnes Apostolos esse æquales.*

10. Vides ergo, Marce Antoni, nusquā Petrum ante omnes alios, prius tempore vocatum esse. Sed objicis, id factum esse, Lucæ 5. 10. ubi Christus in navicula Petri docens turbas, & faciens miraculum in captura piscium, primò vocavit Petrū, deinde Jacobū & Joannem: Et mox additur: *Et subductis ad terram navibus, relictis omnibus sequuti sunt eum.* Respon-  
 deo. Hic locus nihil te juvat. Primò, quia tu conjungis hunc locum cum loco Matth. 4. quasi eadem historia utrobique, & apud Matthæum, & apud Lucam descripta sit. Si ita est, necessario sequitur, non Petrū solum, sed Petrum & Andreā simul, eodem tempore vocatos esse. Hoc enim expressè habet Matthæus, ut jam ante ostensum est. Quamvis ergo Lucas non exprimat nomen Andreæ, sed solius Petri, tamen quia Matthæus expressè po-  
 nit

nit utriusque nomen, consequens est, utrumque eodem tempore vocatum esse, si eadem apud Lucam & Matthæum historia est. Si autem non est eadem (quod probabilius est) nihil penitus ex loco Lucæ convinces. Nam ibi non legimus, à Christo vocatos, sed viso miraculo captorum piscium, sponte eum secutos esse, ut bene advertit Augustinus lib. 2. de cōsensu Evangelistarum cap. 17. circa finem, & Maldonatus in cap. 4. Matthæi v. 18. Nec tamen secuti sunt, ut tu loqueris, *cum perfecta adhesionem ad latus Christi*; sed cum animo revertendi ad piscationem, ut loquitur B. Pater Ignatius in libello exercitiorum spiritualium, (quem utinam melius legisses & observasses. Intelligis, quid velim.) Neq; obstant illa verba, *Relictis omnibus secuti sunt eum*; quia non significant perpetuam abdicationem rerum omnium (de qua loquitur Petrus Matth. 19. 27. *Ecce nos reliquimus omnia, & secuti sumus te*) sed temporariam sequelam; ut sensus sit, *relictis omnibus*, id est, desertis tantisper navibus ac retibus, *sequeuti sunt eum*. Quo sensu intelligitur etiam illud de muliere Samaritana Joann. 4. 28. *Reliquit ergo hydriam mulier, & abiit in civitatem, & dicit illis hominibus: Venite & videte hominem, qui dixit mihi omnia, quacumq; feci: nunquid ipse est Christus*. Vide Maldonatum in illum locum.

11. Quòd autem Patres interdum asserāt, Petrum fuisse primum in ordine Apostolorū, hoc eo sensu debet intelligi, quo illud Matth.



10.2. *Duodecim autem Apostolorum nomina sunt hæc: Primus Simon, qui dicitur Petrus, & Andreas frater ejus. Ubi particula, Primus, non significat Petrum fuisse primum ordine vocationis, sed ordine dignitatis & eminentiæ. Sicut in simili exemplo explicat Augustinus, serm. 10. de verbis Domini, cap. 3. circa illud Apostoli Pauli 1. Timoth. 1. 15. Christus venit in hunc mundum, peccatores salvos facere, quorum primus Ego sum. Sic enim loquitur: Ante Paulum non erant peccatores? Certe, vel ipse Adam ante omnes: & plena peccatoribus terra deleta diluvio. Et deinceps, quam multi? Unde ergo verum est, Ego primus sum? Primum se dixit, non peccatorum ordine, sed peccati magnitudine. Quomodo inter Advocatos primus est iste, non quia plures annos habet, ex quo causas egit, sed quia, ex quo cepit, cæteros superavit. Idem dico de Petro. Primus est Apostolorum non annorum spacio, sed officij dignitate: non quia diutius vixit in Apostolatu sed quia, ex quo cepit, cæteros superavit. Et sic sentiunt Patres.*

12. Sed objicis, quosdam Patres aliter sentire, nempe, Petrum ordine temporis fuisse vocatum ante omnes alios Apostolos. Sunt autem hi Patres, quos allegas pro hac sententia: Epiphanius, Cyprianus, Clemens, Hilarius, Gregorius, Hieronymus, Augustinus, Cyrillus, Chrysostomus. Respondeo. Ut ostendas hos Patres pro te esse, duo tibi præstanda sunt. Primò, quod dicant Petrum, ordine temporis, ante alios vocatum esse. Secundò, quòd in eo

con-



constituant Primatum Petri, ut tu facis. Si in alterutro deficis, frustra laboras, Audiamus ergo, quid dicant Patres.

13. Ex Epiphanio, hæresi 51, citas hæc verba: *Occursus Andrea primò contigit; cum minor esset Petrus tempore atatis. Postea enim rursus, quando perfecta renunciatio facta est, ipse fratrem suum præcessit.* Respondeo. Vel vera sunt, quæ hîc dicit Epiphanius, vel falsa. Si vera, jam verum est, Petrum ætate minorem esse, quam Andream, quod tu negas. Verum igitur negas. Si falsa, cur adducis? Fortè dicturus es, priorē partem, quæ tibi contraria est, falsam: posteriorem, quæ tibi favet, veram esse. Quid si ego è contrario dicam, hanc falsam, illam veram esse? Eodem jure hoc dixerim, quo tu illud. Sed non opus est, hoc effugio. Sic potius dicā. Posterior pars, quam tu urges, nihil te juvat. Primò, quia non asserit expressè, quod tu asseris, Petrum vocatum fuisse ad Apostolatū, ante Andream; sed Petrum in perfecta renunciatione præcessisse Andream. Quod commodè intelligi potest hoc sensu; Petrum externa voce, primum omnium professum esse perfectam renunciationem, cū dixit: *Ecce nos reliquimus omnia, & secuti sumus te.* Sicut etiam primus omnium, externa voce, confessus est fidem divinitatis Christi, cū dixit: *Tu es Christus Filius Dei vivi.* Nec videtur aliter intelligi posse. Nam illa perfecta renunciatio, de qua loquitur Epiphanius, non consistit in externa abdicatione rerum tēporalium quia

in illa Petrus non præcessit Andream, cum uterq; simul ac eodem tempore reliquerit sua retia, juxta illud, Matth. 4. 20. *At illi continuo, relictis retibus, secuti sunt eum.* Ergo debet consistere in sincera professione perfecta renunciationis, de qua jam dictum est. At hinc non sequitur, quod tu vis. Non enim valet hæc cōsequentia: Petrus, inter Apostolos, primus omnium professus est fidem divinitatis Christi, & perfectam renunciationem rerum temporalium: Ergo primus omnium vocatus est ad Apostolatū.

14. Sed, etsi darem, primum omnium vocatum esse, ex sententia Epiphani, non ideo Epiphanius pro te esset. Nam tu contendis, Primatum Petri consistere in primatu vocationis, quod Epiphanius non vult. Sic enim post verba, à te citata, immediatè loquitur: *Insuper autem & in hoc Deus est, qui novit vocationes cordium, & scit, quis dignus sit primo loco locari; & elegit Petrum, ut Dux esset suorum discipulorum.* Ubi distinguit internam vocationem ab externā: & asserit, Petrum electum esse Duce[m] Apostolorum, non ideo, quia primus externā vocatione à Christo vocatus est, (quæ est tua sententia) sed quia internā cordis vocatione, se dignum præstitit, ut primum locū obtineret, & fieret Dux Apostolorum; quod tuæ sententiæ contrarium est.

15. Ex eodem Epiphanio in Ancorato citas hæc verba: *Ipse Dominus constituit Petrū primum Apostolorum.* Respondeo. Hoc ipsum est, quod

quod nos asserimus. Sed lōgè diversa sunt hæc duo: Christus constituit illum primum Apostolorum; & , Christus vocavit illum ad Apostolatū, antequam alios vocaret. Prius verum est; posterius falsum. Nam Christus vocavit omnes duodecim eodem tēpore ad Apostolatū; & postea ex ipsis elegit Petrum, ut ipse esset primus, seu Dux reliquorum.

16. Ex Cypriano, tract. ad Quirinum, citas hæc: *Petrus, quem primum Dominus elegit.* Respondeo. Eodem sensu potest intelligi Cyprianus, quo Epiphanius in Ancorato. Nempe, Petrum ex duodecim Apostolis à Christo electum esse, ut esset primus, seu Princeps aliorum. Sed esto; dicat Cyprianus, Petrum esse prius tempore electum ad Apostolatū, quàm alios; non ideo dicit, Primatum Petri in eo consistere. In quo autem consistat, ex sententia Cypriani, dicendum est, cap. 4.

17. Ex Clemente epist. 1. ad Jacobum fratrem Domini, citas hæc: *Petrus, qui fuit primitiæ electionis Domini, primus Apostolorum.* Respondeo. Fuit primus Apostolorum eo sensu, quo jam sæpè dictum est. Fuit primitiæ electionis Domini, quia Christus Dominus primum fructum electionis suæ percepit ex Apostolo Petro. Nam ille primus omnium confessus est divinitatem Christi; primus omnium dixit. *Eccen nos reliquimus omnia;* primus omnium promulgavit Evangelium. Quæ omnia fusius explicanda sunt infra, ubi de prærogativis Petri agendum est.

18. Ex Hilario in Matth. can. 7. citas hæc: *Petrus primus credidit, & Apostolatus est Princeps.* Respondeo. Nihil contrarios. Esto, primus crediderit, quia primus dixit, *Tu es Christus filius Dei viui*; an ideo primus ad Apostolatatum vocatus est? Non sequitur. Similiter, esto, sit Princeps Apostolatus; an ideo ante alios Apostolus factus est? Nec hoc sequitur. Est quidē ante alios factus Princeps Apostolorum; sed non est factus ante alios Apostolus.

19. Ex Gregorio lib. 2. super Ezechielem. homil. 8. citas hæc: *Non ad memoriam revocat, quod primus in Apostolatatum vocatus sit.* Respondeo. Gregorius ibi commendat humilitatem Petri, quod cum ipse esset caput & Princeps Apostolorum, tamen æquo animo passus sit, reprehendi se à Paulo, qui erat illius subditus. Itaque illa verba, *primus in Apostolatatum vocatus est*, non habent hunc sensum, *primus ad Apostolatatum vocatus est*; sed hunc potius, *in principem Apostolatus vocatus est*: vel, ad Principatum Apostolatus vocatus est. Quem sensum ibidem explicat his verbis: *Quatenus, qui primus erat in Apostolatus culmine, esset primus & in humilitate.* Et paulo post pergit: *Ecce, à minore suoreprehenditur, & reprehendi non dedignatur. Non ad memoriam revocat, quod primus in Apostolatatum vocatus sit.* Ubi Paulum vocat minorem, respectu Petri: Et Petrum ait, primum in Apostolatatum vocatum esse, id est, primum esse in culmine Apostolatus, ut antè dixerat.

20. Ex Hieronymo Epist. 13. ad Paulinum,  
citas

citas hæc: *Paulus Apostolus novissimus in ordine, primus in meritis est.* Hinc ita concludis: Ergo è contrario sensu, quia Petrus fuit primus in ordine vocationis, hinc Primatum hunc ordinis est consequutus. Respondeo. Prius tibi probandum est, Petrum eo sensu fuisse primū in ordine vocationis, quo Paulus fuit novissimus. Concedo, Paulum fuisse novissimum, ratione temporis. Nego, Petrum fuisse primum, ratione temporis. Nondum hoc probasti. Ego ex Evangelio contrarium ostendi.

21. Ex Augustino serm. 47. de SS. Petro & Paulo, citas hæc: *Beatus Petrus, primus Apostolorum: Beatus Paulus, novissimus Apostolorum.* Et mox subdis ex tuo: *in quo ergo Paulus novissimus, in eo Petrus primus; nempe in ordine vocationis.* Respondeo. Nusquam invenio sermonem 47. de sanctis Petro & Paulo. Invenio quidem tres sermones de festo Apostolorum Petri & Pauli, nempe serm. 106. & 107. & 108. inter sermones de diversis: sed verba à te citata, non invenio inter se connexa, ut tu connectis; sed divisa. Nam initio sermonis 106. sic habet Augustinus: *Beatus Petrus Apostolorum primus.* Et postea serm. 108. circa finem, sic: *Ergo quid est Apostolus? Ipsum interroga. Ego sum, inquit, minimus Apostolorum.* At hinc non sequitur, eodem sensu Petrum esse primum, quo Paulus est minimus, aut contrà. Nam constat ex ipso Paulo, quo sensu ipse sit minimus, sic enim de se loquitur 1. Corint. 15, 9. *Ego enim sum minimus Apostolorum, qui non sum dignus vocari*

*cari Apostolus, quoniam persecutus sum Ecclesiam Dei.* Ubi non vocat se minimum, id est, ultimum in ordine vocationis (de quo ordine tu loqueris) sed minimum, id est, indignissimum, propter sua peccata.

22. Ex Cyrillo lib. 4. in Joann. cap. 28. citas hæc: *Responsio ei committitur, quia ordine major erat.* Respondeo. Apertam injuriam facis Cyrillo. Tibi probandum est, Petrum fuisse majorem ordine temporis. Vel, prius tempore vocatum esse, quam reliquos Apostolos. Hoc non dicit Cyrillus. Non enim loquitur de ordine temporis, sed de ordine prælationis & prudentiæ. Verba ejus sunt hæc: *Respondit ergo Simon Petrus: Domine, ad quem ibimus? Per unum, qui præerat, omnes respondent.* Et paulo post: *Decet enim non omnes confusè, nec prosilientes imprudenter, quasi rapta uti oratione: Sed cedere iis, qui & consilio, & ordine, præpositi sunt.* Et statim subdit: *Opus igitur erat divinitus comprobata prudentia, soli responsionem committere illi, qui ordine major erat.* Vel, ut antè dicebat, qui præerat. Nam inter illos, qui præsunt, & illos, qui subditi sunt, est quidam ordo. Unde illi superiores appellantur; hi inferiores.

23. Ex Chrysostomo homil. 2. in Epist. ad Romanos, citas hæc: *Verum, ordinis duntaxat honores est verbum id, primum; neque enim superiores partes in hoc obtinet (Judæus supra Græcum) quod majorem justitiam acceperit; sed in hoc solum honoratur, quod primus eam acceperit.* Unde infer, quando Cyrillus dixit de Petro, ordine  
major

*major erat*, locutum esse de ordine temporis, nō de ordine potestatis aut jurisdictionis. Respondeo. Frustra est. Jam ostendi, Cyrillū loqui de ordine prælationis & prudentiæ; nō de ordine temporis. Nec Chrysostomus explicat mentem Cyrilli, sed Apostoli, Rom. 1. 16. *Virtus enim Dei est, in salutem omni credenti, judæo primum & Græco.* Quærit enim, quid significet illa particula, *Primum*? Et respondet, significare ordinem temporis. Jam vide, M. Antoni, an valeat hæc consequētia, Chrysostomus dicit, judæum ordine temporis, non potestatis, præferri Græco, in susceptione fidei Evangelicæ: Ergo Cyrillus dicit, Petrum ordine temporis, non potestatis, præferri alijs Apostolis. Miseret me tui, si tam malè sani capitis es.

24. Ex eodem Chrysostomo hom. 9. citas hæc: *Petrum cum dico, petram nomino indebilem, crepidinem immobilem, Apostolum magnum, primum Discipulorum, primum vocatum & primum obedientem.* Respondeo. Hoc testimoniū videtur tibi aliquo modo patrocinari; reliqua nihil, ut ostensum est. Nam illæ duæ particule, *primum vocatum*, & *primum obedientem*, insinuant Petrum ante alios vocatū fuisse à Christo, & ante alios vocanti Christo obtemperasse. Si hoc demus, illud quidem sequitur, Petrum ex sententia Chrysostomi, habere prærogativam vocationis, ratione temporis. At non sequitur, quod tibi probandum est, Primatum Petri, ex sententia Chrysostomi, consistere in illa prærogativa, excludendo Prima-

tum

tum potestatis & jurisdictionis. Imò hunc Primatum vel maximè agnoscit Chrysostomus, ut cap. 4. videbimus.

25. Sed necesse non est, ut prædictas particulas accipiamus eo sensu, quo tu accipis. Nam idem Chrysostomus alibi, cùm ex professo agit de vocatione Petri, disertè ait, Petrum & Andream simul vocatos esse: & illos duos fuisse primos ordine vocationis, respectu aliorum Apostolorum: non autem solum Petrum fuisse primum, respectu Andreæ & reliquorum. Sic enim loquitur hom. 14. in Matthæum: *Perpende verò & fidem & obedientiam vocatorum (Petri & Andreæ) & cognosces, quàm dulcis sit piscatio: siquidem in medio ipsius operis constituti, cùm illum audissent jubentē, nihil distulerunt; nihil omnino cunctati sunt. Non dixerunt, Revertemur domum, loquemur propinquis: sed cuncta illico relinquentes, fecerunt, quod Helisæus quoque sub Helia legitur implese.* Hic nihil discernit inter vocationem ac obedientiam Petri & Andreæ; sed ambos simul vocatos, simul obedientes fuisse ostendit. Et merito. Nam id clarè constat ex Evangelio Matth. 4. 18. *Ambulans Jesus juxta mare Galilææ, vidit duos fratres Simonem & Andream: Et ait illis: Venite post me, & faciam vos fieri piscatores hominum. At illi continuo, relictis retibus, secuti sunt eum.* Ecce, simul visi; simul vocati, simul secuti. Et cùm nullus alius ante illos vocatus sit, necesse est, illos duos primos vocatos esse; etiam ex sententia Chrysostomi. Ne hoc pugnat cum eo, quod ante dixit,



dixit, Petrum primum vocatum esse. Nam si ambo primi vocati sunt, respectu reliquorum; consequens est, Petrum esse unum ex duobus primis, & hoc sensu primum appellari posse. Quod etiam dico de Andrea. Nihil ergo proficis ex Chrysostomo. Si hanc meam explanationem non admittis, cogeris fateri, Chrysostomum sibi ipsi contradicere. Si ita est, cur non liceat mihi unam partem contradictionis sequi, sicut tu alteram secutus es,

### De Primatu Charitatis.

26. **H**Astenus de Primatu vocationis, quem ostendi, fictitium esse. Sequitur Primatus Charitatis, de quo (lib. I. cap. 5 n. 14.) sic scribis: *Petrus primus merito dicitur, quia ceteros virtute, & potissimum charitate erga Christum superavit.* Hanc posteriorem partem de excellentia charitatis probas dupliciter. Primò, quia Christus, qui erat conscius, dixit Petro, *Diligis me plus his?* Secundò, quia multa extant signa ferventis illius charitatis; ut quòd Petrus ambulaverit super aquas, ut citius ad Christum perveniret: quòd exerto gladio conatus sit Christum defendere: quòd ex eodem affectu Malchia auriculam amputaverit: quòd ex fervore dixerit, *etiamsi oportuerit me mori tecum, non tenegabo*: quòd etiam dixerit, *Tu mihi lavas pedes?* quòd dixerit, *Absit à te Domine: Non erit tibi hoc*, id est, non morieris.

27. Respondeo. Tu pugnastecum ipse,  
E
ut

ut soles. Nam alibi asseris hæc duo. Primò, quòd Petrus habuerit suum Primatum, antequam illi dictum esset à Christo, *Tu es Petrus, & tibi dabo claves* (lib. 1. cap. 5. n. 3. in fine.) Secundò, quòd reliqui Apostoli magnum honorem detulerint Petro, propter Primatum; & Petrus agnoverit se ab alijs propter Primatû honorari (cap. 9. n. 2. in fine.) Unde sequitur, Primatum Petri, & ipsi Petto, & alijs Apostolis fuisse cognitum. Quod certè de Primatu charitatis dici non potest. Vel enim loqueris de interno affectu charitatis, vel de externo signo, quo se prodit internus effectus. Si de interno affectu, is non potuit esse notus vel ipsi Petro, vel alijs Apostolis. Nam neque Petrus sciebat, quantus affectus charitatis esset in Joanne; nec Joannes, quantus esset in Petro. Et sic de cæteris. Verissimû enim est, quod Theologi dicunt: *Ecclesia non judicat de occultis*. Dices, Christus manifestavit internum Petri affectum cum dixit, *Diligis me plus his?* Respondeo. Hoc factum est post Resurrectionem. Ergo antea saltem non fuit manifestatus. Et tamen antea, ex tua opinione, habuit Petrus suum Primatum. Habuit enim, ut tu asseris, antequam ipsi dictum esset, *Tu es Petrus*.

28. Si autem loqueris de externo signo charitatis, nec sic quidem poterant reliqui Apostoli certò cognoscere, Petrum habere Primatum charitatis. Nam illa signa, quæ à te allata sunt, non erant sufficientia ad hoc demonstrandum. Ratio est, quia Christus ferè semper

per reprehendit Petrum, quando hujusmodi signa exhibuit. Quod patet inductione. Nam primò, quãdo ambulavit super aquas, dictum est illi, *Modica fidei, quare dubitasti?* (Matth. 14. 31.) Secundò, quando exerto gladio voluit Christum defendere, dictum est illi, *Convertè gladium in locum suum. Omnes enim, qui acceperint gladium, gladio peribunt* (Matth. 26. 51.) Tertiò, quando dixit, *Domine, tecum parasus sum & in carcerem & in mortem ire*: Et, etiamsi oportuerit me mori tecum; non te negabo: responsum est illi, *Non cantabit hodie gallus, donec ter abneges nosse me.* (Lucæ 22. 34.) Quartò, quando dixit, *Tu mihi lavas pedes?* Et, non lavabis mihi pedes in æternum: responsum est illi, *Si non laverò te non habebis partem mecum.* (Ioannis 13. 8.) Quintò, quando dixit, *absit à te Domine, non erit tibi hoc*: responsum est illi. *Vade post me Satana; scandalum es mihi; quia non sapies ea, quæ Dei sunt, sed ea, quæ hominum* (Matth. 16. 23.) Quomodo ergo reliqui Apostoli, qui hæc audiebant, poterant certò cognoscere, Petrum charitate alios omnes antecellere? Certe, ex hujusmodi increpationibus faciliùs erat suspicari, Petrũ habere præposterum zelum, quàm syncerum charitatis affectum; & magis reprehensione quàm laude, dignum esse.

29. Tacco, quod D. Thomas in 1. partè quæst. 20. art. 4. ad 3. pro sua modestia non audent definire hanc quæstionem, an Christus plus dilexerit Petrum, quàm Joannem? Item, an Petrus plus dilexerit Christum, quàm Jo-

annes? Adfert quidem varias authorum opinionones: Quorum alij asserunt, quod Petrus plus dilexerit Christum in membris; Et ideo illi Ecclesia commissa sit: Joannes plus dilexerit Christum in se ipso; & ideo mater Christi ipsi commendata sit. Alij, quòd Petrus plus dilexerit Christum, quantum ad fervorem & promptitudinem: Joannes verò plus, quoad familiaritatem: Alij, quòd incertum sit, uter plus dilexerit illum amore charitatis. Quid i se *presumptuosum*, inquit, *videtur hoc djudicare, quia, ut dicitur Proverb. 16. 2. Spirituum ponderator est Dominus, & non alius.*

30. Quid porrò dicturus es ad authoritatem Hieronymi lib. 1. contra Jovinianum, ubi asserit, & multis titulis probat, Joannem fuisse Christo chariorem, quàm Petrum? Quid ad Tertulliani, lib. de præscriptionib. cap. 22. ubi volens probare, Apostolos nihil ignorasse eorum, quæ ad salutem erant necessaria, sic scribit: *Latuit aliquid Petrum, adificanda Ecclesia petram dictum, claves regni cælorum consecutum, & solvendi & alligandi in cælis & in terris potestatem? Latuit aliquid Joannem, dilectissimum Domino, pectori ejus incumbentem; quem, loco suo, filium Maria commendavit? Quibus verbis tribuit Petro præminentiam potestatis; Joanni prærogativam dilectionis.*

31. Sed esto; Petrus plus dilexerit Christum, quàm Joannes: quod non nego. An ideo sequitur, Primatum Petri, quem scriptura & Patres illi tribuunt, in illa dilectionis eminencia

tia consistere? Nunquam id probabis. At ego contrarium probabo, Primatum Petri consistere in prærogativa potestatis & jurisdictionis: idque ex scriptura, Patribus, Concilijs, aliunde, ut patebit in sequentibus capitibus. Nunc concludo hoc caput hac triplici assertionem. 1. Dubium est, an Petrus fuerit senior omnibus alijs Apostolis, & præsertim Andrea. Non igitur Primatus Petri in prærogativa ætatis ceterò constitui potest. 2. Falsum est, Petrum prius tempore vocatum esse ad Apostolatam, quam ceteros. Falsus igitur Primatus, qui hoc falso fundamento nititur. 3. Incertum est apud bonos authores, an Petrus plus dilexerit Christum, quàm Joannes: Incertum igitur, an habuerit eminentiam charitatis. Et si certum id esset, quod non nego, non ideo certum, Primatum Petri in eminentia charitatis consistere.

## CAPUT TERTIUM.

*Verus Petri Primatus probatur  
ex Scriptura.*

I. **M**ULTA sunt scripturæ testimonia, quibus probari solet, Petro commissam esse totius Ecclesiæ gubernationem à Christo. Ego unicum adducam, quo maximè utuntur Patres, nimirum illud Joan. 21. 17. *Pasce oves meas.* Ubi Christus committit Petro suas

oves pascendas. Et quia video te, M. Antoni, hoc testimonio valdè premi, & in varias contradictiones abire; singillatim explicanda sunt hæc quatuor: 1. An soli Petro dictum sit; *pasce oves meas*? 2. Quænam sint illæ oves? 3. Quid significet *pascere*? 4. An aliquid peculiare hoc loco concessum sit Petro, præ alijs Apostolis? in his punctis consistit tota difficultas.

2. Prima igitur quæstio est: An soli Petro dictum sit, *pasce oves meas*? Affirmant Catholici. Et probant primò ex antiquis patribus apud Bellarminum lib. 1. de Pontifice cap. 14. Deinde ex ipso textu. Nam illi dictum est, *pasce oves meas*, à quo Christus ter quæsit, *Simon Joannus diligis me plus his*? At hoc à solo Petro specialiter quæsit. Soli ergo Petro dictum est, *pasce oves meas*. Nec opus est, pluribus argumentis id probare, cum tu idem sentias lib. 1. cap. 8. n. 1. ubi ais: *Hoc loco Christum cum ipso met Petro loqui singulariter, & ei personaliter dicere, pasce oves meas, constituo tanquam certissimū*. Igitur in hoc puncto cōvenimus; etiam si postea incipias, tuo more, non nihil vacillare. Distinguendæ sunt tamen illæ duæ particulæ, quas fraudulenter connectis, *singulariter*, &, *personaliter*. Priorem cōcedo; posteriorē nego; Tametsi enim Christus, cum dixit, *pasce oves meas*, soli Petro singulariter id dixerit, excludendo reliquos Apostolos, quibus id nō dixit; non ideo concedendum est soli Petro personaliter dixisse, excludendo successores Petri; quia id falsum est. Non enim dixit Petro, ut pri-

privatæ personæ, sed ut publicæ: sicut & illud: *ego rogavi pro te, ut non deficiat fides tua.*

3. Secunda quæstio est: Quænam oves commissæ sint Petro ad pascendum? Catholici docent, omnes Christi oves, id est, omnes fideles totius mundi illi commissos esse. Tui-  
dem asseris n. 5. his verbis: *Facile consentio sub verbo: Oves, fideles omnes indefinitè totius mundi intelligi.* Rectè: sed minimè constans es. Nam paulo post, duo alia asseris, quæ & cum isto, & inter se pugnant. Unum est, omnes fideles intelligi, exceptis Apostolis. Sic enim scribis n. 6. *Illos tamen probare non possum, qui verbis illis, Pasce oves meas, Petro, etiam ipsorum Apostolorum curam censent à Christo fuisse commissam.* Alterū est, solos Judæos seu Israelitas intelligi. Hoc tradis n. 10. his verbis. *Tertiò dici potest, quod etiam paulo antè attigi, Petro singulariter Christum dicere, Pasce oves meas, id est, Israelitas, qui tunc soli erant Christi oves.*

4. Vide obsecro, M. Antoni, quàm vagus & inconstans sis. Nos constanter asserimus, omnes fideles etiam Apostoles, nomine ovium significari. Quod facile probari potest. Primò, authoritate Patrum, qui unanimi consensu id docent. Secundò, ex verbis Christi: Nam cum dixit, *Pasce oves meas*, hoc voluit dicere, pasce gregem meum, pasce Ecclesiam meam: At reliqui Apostoli, sine dubio, pertinebant ad gregem & Ecclesiam Christi. Tertiò, quia Christus non dixit: *Pasce has oves*, aut illas, sed sine ulla restrictione, *Pasce oves meas.* Ergo o-

innes suas oves illi commisit; Ergo & Apostolos. Quod eleganter expressit S. Bernardus lib. 2. de consideratione ad Eugenium cap. 8. *Tues, inquit, cui claves tradita, cui oves credita sunt. Sunt quidem & alij cælij janitores, & gregum pastores, sed tu tanto gloriosius, quanto & differentius utrunque præ cæteris nomen hæreditasti. Habent illi sibi assignatos greges, singuli singulos: tibi universi crediti, uni unus: Nec modò ovium, sed & pastorum tu unus omnium pastor. Unde id prober, quaris: Ex verbo Domini; Cui enim; non dico, Episcoporum, sed etiam Apostolorum, sic absolute & indiscretè tota commissæ sunt oves? Si me amas Petre, Pasce oves meas. Quas? Illius vel illius populi, civitatis aut regionis, aut certi regni? Oves meas, inquit Cui non planum, non designasse aliquas, sed assignasse omnes? Nihil excipitur, ubi distinguitur nihil. Plura Patrum testimonia citabo sequenti capite,*

5. *Objicis: Apostoli non indigebant Petro Pastore. Ad quid obsecro? Fortasse ad ipsorum confessiones audiendas? An ad ipsos docendos & instruendos? An ad corrigendos & puniendos? Respondedo. Vel ironicè hæc quæris, vel seriò. Si ironicè, non es dignus responso; Si seriò, dicam seriò quod res est. Apostoli indigebant Petro Pastore in eum finem, ob quem Christus voluit illum esse Pastorem. Nimirum ut in Ecclesia esset unum Caput visibile, cui reliqui omnes obedirent; & sic servata & stabilita unitate capitis, tolleretur occasio schismatis & dissensionis, quæ facile oritur in communica-*  
te, in



te, in qua non est unum caput, cui cæteri adhæreant, & subiecti sint. An autem indiguerint pastore, propter confessionem, instructionem, aut punitionem, parùm ad rem facit. Nō enim necesse est, omnes & singulos subditos huiusmodi præsidij indigere. Utinam nullus indigeret. Utinam omnes à peccato, ignorantia, & reatu immunes essent, Non ideo desinerent esse subditi,

6. Tertia quæstio est: Quid significet illa vox *pascere*? Hic iterum inconstans es. Nam n. 4. ais; *posset aliquis nec fortasse immeritò ad solam pasturam, id est, prædicationem restringere.* Et citat illud Bernardi lib. 4. de consideratione c. 3. *Evangelizare, pascere est.* At n. 5. longè aliter: *Contineat, inquis, in se verbum pascendi quamcunque & quantamcunque auctoritatem & potestatem, non pugno.* Item, *non pugno, si verbo pascendi tota potestas Ecclesiastica claudatur.* Nihil certum fixumq; apud te est, mi homo. Dic rotundè & sine ambagibus, quid est *pascere*? Relinque illud, *fortasse*: illud, *non pugno*: illud, *quamcunque & quantamcunque.*

7. Nos (sine fortasse) asserimus, *pascere* idem esse, quod officium pastorale exercere. Nemo ambigit. Officium autem pastorale includit tres actus principales, ut ex scriptura patet. Primus est, pabulum præbere, & ad pascua ducere; Ezech. 34. 2. *Va pastoribus Israel, qui pasciebant semetipsos; Nonne greges à pastoribus pascuntur?* Et Plal. 22. 1. *Dominus regit me* (Græcè est, pascit me) & *nihil mihi deerit: in loco pascuæ ibi me collocavit.*

8. Secundus est, infirmas oves sanare, dispersas colligere, errantes reducere, contra lupos defendere, Ezech. 34. 5. *Dispersa sunt oves mee, eo quod non esset pastor: & facta sunt in devorationem omnium bestiarum agri, & dispersa sunt. Erraverunt greges mei, & non erat, qui requireret. Et infra v. 15. Ego pascam oves meas, & ego accubare faciam, ait Dominus Deus. Quod perierat, requiram; & quod abjectum erat, reducam; & quod confractum erat, alligabo; & quod infirmum fuerat, consolidabo; & quod pingue & forte, custodiam.*

9. Tertius est, præesse, regere, gubernare, judicare, discernere, castigare. 2. Reg. 5. 2. *Tu pascas populum meum Israel, id est, gubernabis, ut patet ex verbis sequentibus: Et tu eris Dux super Israel. Et Plal. 2. 9. Reges eos in virga ferrea. Græcè est, ποιμανῖς αὐτῶς, id est, pasces eos. Et Ezech. 34. 17. Vos autem greges mei, hac dicit Dominus Deus: Ecce ego judico inter pecus & pecus arietum & hircorum. Et v. 20. Ecce ego ipse judico inter pecus pingue & macilentum.*

10. Unde sic concludo: Christus cum dixit Petro, *Pasce oves meas*, commisit illi officium pastorale, respectu omnium Christianorum (nullum enim, ut dixi, excepit. Ergo dedit illi potestatem exercendi officium pastorale. Officium autem pastorale est, oves ad pascua ducere, infirmas curare, dispersas colligere, inter sanas & vitiosas judicare, contumaces cogere & ad ovile compellere, lupos arcere (quæ omnia, ut patet ex scripturis citatis, & potissimum

mun ex Ezechiele, non tantum intelliguntur de pastore brutarum ovium, sed multo magis de Pastore fidelium.) Ergo Petrus habuit potestatem hæc omnia præstandi, respectu omnium Christianorum. Potuit igitur, ratione officij pastoralis, ubique Evangelium prædicare, Sacramenta administrare, peccātes corrigere, errantes reducere, inter veram & falsam doctrinam discernere, ad unitatem Ecclesiæ compellere, hostes arcere: sive per se, sive per alios sibi subordinatos. Et sic explicant antiqui Patres, quorum verba referemus sequenti capite.

II. Quarta quæstio est: An aliquid peculiariter concessum sit Petro per illa verba, *Pasce oves meas*, præ alijs Apostolis? Tu ais, nihil præ alijs concessum illi esse: Alios non minus fuisse Pastores, quàm Petrum. Sic enim scribis lib. 1. cap. 8. n. 3. *Quamvis verissimum sit, illa verba, Pasce oves meas, seorsim soli Petro fuisse dicta, etiā alijs Apostolis presentibus, nihilominus in solo Petro ea effectum suum habuisse, dici nullo modo potest. Nonne ipsemet Christus dedit quosdam quidē Apostolos, alios Doctores & Pastores? Non ergo solus Petrus Pastor. Et rursum n. 4. Prius omnibus Apostolis simul cum Petro dictum est à Christo: Sicut misit me Pater, & ego mitto vos: Et postea dictum est Petro, Pasce oves meas. Neque video, quomodo affirmari possit aliquid amplius dari Petro seorsim his verbis, quàm datum fuerit ceteris omnibus illis. Et iterum n. 5. Illud contendo, nullā verbo pascendi contineri potestatem, qua non melius & amplius*

con-

*contineatur in illis Christi dictis. sicut misit me pater, & ego mitto vos. Et illis: Euntes docete &c.*

12. Hic plane exorbitas, mi Antoni. Et pugnas non solum cum antiquis Patribus, qui docent Petro plus datum esse, quam reliquis Apostolis; sed etiam cum Evangelio & recta ratione. Nam si Petro nihil datum est amplius per illa verba, *Pasce oves meas*, quam quod antea datum erat per illa: *Sicut misit me Pater, & ego mitto vos*; jam nihil novi accepit per illud; *Pasce*, quod antea non habuerit meliori & ampliori modo ( ut tu interpretaris ) per illud, *Mitto vos*. Quid ergo necesse fuit, Christum uti tot ceremonijs circa Petrum, si nihil peculiare voluit illi dare? Quorsum illa trina interrogatio: *Simon Joannis diligis me plus his? Simon Joannis diligis me? Simon Joannis amas me?* Quorsum triplex illa commissio, *Pasce agnos meos, Pasce agnos meos, Pasce oves meas?* Otiosè hæc omnia facta esse necesse est, si nihil datū est Petro, quod antea datum non fuit. Imo, si quod antea meliori & ampliori potestate datū fuit, postea deteriori & restrictiori concessum est.

13. Ais, nihil otiosè hic factum esse, sed multa mysteria in hoc uno facto contineri. *Primum*, inquis, *mysterium est unitatis collegij Apostolici, ne ipsum collegium dissolveretur. Cum enim Petrus solus ex duodecim Apostolis negasset Christum expressè, poterant reliqui meritò illum excludere, vitare, abjicere, & consequenter dissolvere unitatem illam collegij Apostolici. Igitur, ne hoc fieret, dictum est Petro, coram alijs Apostolis, Pasce*  
*oves*

*oves meas*, id est, mane in collegio Apostolorū, & fac quod illi faciunt. Pro hac interpretatione citas Optatum Milevitanum & Augustinum. Sed malâ fide. Nam illi duo, sicut & alij Patres, multo aliter explicant hoc mysterium unitatis. Ajunt in eo consistere, quod Christus voluerit servare unitatem in Ecclesia, quæ vix servari potest, nisi constituto uno capite, cui reliqui omnes subjecti sint. Itaque Petrum à Christo constitutum esse, cum illi dictum est, *Pasce oves meas*, id est, gubernare Ecclesiam meam.

14. Audiamus Patres. Optatus lib. 2. contra Parmenianum, non longè à principio, sic scribit: *In qua (Romana cathedra) sedit omnium Apostolorum caput, Petrus. Unde & Cephass appellatus est. In qua una cathedra, unitas ab omnibus servaretur, ne cateri Apostoli singulas sibi quisq. defenderent: Ut jam schismaticus & peccator esset, qui contra singularem cathedram, alteram collocaret. Ergo cathedra unica est &c.*

15. Augustinus lib. de Pastorib. cap. 13. Imo verò & in ipso Petro unitatem commendavit. Multi erant Apostoli, & uni dicitur, *Pasce oves meas*. Quod clarius explicat Hieronymus lib. i. contra Jovinianum, cum ait: *Propterea inter duodecim unus eligitur, ut capite constituto, schismatis tollatur occasio. Et Cyprianus lib. de simplicitate Prælatorum: Petro post resurrectionem suam dicit, Pasce oves meas. Et quamvis Apostolis omnibus post Resurrectionem suam, parem potestatem tribuat, & dicat: Sicut me misit Pater, & ego*  
mit: o

mitto vos: Tamen ut unitatem manifestaret, unitatis ejusdem originem ab uno incipientem, sua auctoritate disposuit. Hinc apparet, non sincerè; sed fraudulentè, à te citatos esse Patres, pro mysterio unitatis, quod commentus es.

16. Secundum mysterium sic explicas (ibidem n. 9. in fine) Petro soli dictum est à Christo; *Pasce oves meas*, quia tum Petrus erat figura, & representabat omnes Ecclesiæ Prælatos; Et ut omnium procurator generalis omnium nomine accepit curam pastorem. Et producis Augustinum, lib. de Agone Christiano cap. 30. & alibi. Sed & tibi, & Augustino contrarius es. Tibi quidem, quia paulo antè dicebas, Christum ideo dixisse Petro, coram alijs Apostolis, *Pasce oves meas*, ut alij non excluderent eum à suo collegio propter peccatum negationis, sed scirent restitutum esse in suum locum. Hic dicis, ideo factum esse, quia Petrus representabat omnes Ecclesiæ Prælatos, & erat generalis Procurator, qui omnium nomine accipiebat curam pastorem. Hæc inter se pugnant. Nam si Christus loquebatur cum Petro, tanquam cum privato reo, qui propter privatum peccatum excludendus erat à collegio Apostolorum; certè nō loquebatur cum illo, tanquam cum generali Procuratore, qui omnium nomine curam pastorem accipiebat. Non enim coherent hæc duo: Petro tanquam privato reo dicitur, *Pasce oves meas*. Et, Petro tanquam generali Procuratori dicitur, *Pasce oves meas*. Similiter Augustino contrarius es. Nam ille, loco à te citato, alle-

asserit, Petro, ut totam Ecclesiam repræsentanti, dictum esse, *Pasce*. Tu asseris lib. 1. cap. 8. n. 1. Petro *singulariter & personaliter* dictum esse, *Pasce*. De qua repugnantia dicam iterum cap. 7. §. 21.

17. Deinde quæro exte: Si Petrus fuit generalis Procurator omnium Prælatorum, an fuerit omnium Prælatorum absolutè, etiam Apostolorum; an omnium, exceptis Apostolis. Si prius, necesse est, Apostolos non per se, sed per Procuratorem accepisse curam pastorem. At hoc antea negasti, asserens, eos accepisse per se, quando ipsis dictum est, *Mitto vos*. Si posterius, sequitur Petro plus aliquid datum esse, quàm alijs Apostolis, quod ante negasti. Nam illi datum est, ut esset generalis Procurator omnium Prælatorum Ecclesiæ, quod alijs non fuit datum.

18. Tertium mysterium sic proponis: *Tertio dici potest, Petro singulariter Christum dicere. Pasce oves meas, hoc est, Israelitas, qui tunc soli erant Christi oves. Unde & dicebat Matth. 10. 6. Ite ad oves, quæ perierunt, domus Israel. & Matth. 23. 24. Non sum missus, nisi ad oves, quæ perierunt, domus Israel.* At ego hîc nullum video mysterium, sed mendacium & ignorantiam. Mendacium est, solos Israelitas fuisse tunc Christi oves. Nam ipsemet dixit, Joan. 10. 16. *Alias oves habeo, quæ non sunt ex hoc ovili, & illas oportet me adducere.* Ubi apertè loquitur de gentilibus. Igitur non soli Israelitæ, sed etiam gentiles erant ipsius oves. Et alij quidem jam coti-

versu

versi ad fidem Christi, ut tres Magi, qui illum in stabulo adoraverant: alij deinceps convertendi. Miror ignorantiam tuam, si hæc nescis.

19. Sed esto: verum sit, quod falso asseris; Quid obsecro hîc mysterij est? Quæram enim quod suprâ quæsi, si Petro nihil novi collatum est per illud, *Pasce*, quod non prius collatū erat per illud, *Mitto vos, & Euntes in mundum universum*: Quid necesse fuit iterum dicere, *Pasce oves meas*? Tu respondes; quia per oves intelliguntur soli Israelitæ. Magnum scilicet mysterium. Imo magnum delirium. Nam si antea dictum est omnibus, *Ite in mundum universum, & per hoc acceperūt potestatem prædicandi Evangelium omnibus Gentibus*; certè cū postea dictū est Petro, *Pasce oves meas*, id est solos Israelitas, necesse est, priorem potestatem, quæ erat amplissima, revocatā esse, & ad solos judæos restrictam. Itane vero?

20. Testimonia scripturæ, quæ adducis, vel non intelligis, vel malitiosè abuteris. Nam initio quidem dictum est Apostolis: *Ite ad oves, quæ perierunt domus Israel*: sed postea laxata fuit potestas, cū dictum est, *Euntes in mundum universum &c.* Illud porrò, *Non sum missus, nisi ad oves, quæ perierunt, domus Israel*, sic debet intelligi, Christum nō esse missum, ut suam præsentiam corporalem, prædicationem & miracula exhiberet, nisi ad Judæos; quia illis solis, propter fidem Abrahamæ, facta est promissio de adventu Messia, ut rectè notat Augustinus tract.



tract. 31. in Joannem, circa finem. Nihilominus erat etiam missus ad gētiles, ut suo sanguine illos redimeret, & per prædicationem Apostolorum ad suum ovile perduceret. Rom. 10. 11. *Non enim est distinctio Judæi & Græci: nam idem Dominus omnium.* Et 2. Corint. 5. 15. *Pro omnibus mortuus est Christus.* Et 1. Timoth. 2. 6. *qui dedit Redemptionem semetipsum pro omnibus.*

21. Quartum mysterium est: *Christus ideo seorsim dixit Petro, Pasce oves meas, ut eidem Petro & quasi satisfactionem injungeret erroris trina negationis, & simul etiam eidem animos adderet, ne suis fædis negationibus nimium confusus, in barathrum desperationis laberetur.* Pro hoc mysterio citas Augustinum, Cyrillum, Nazianzenum & Chrysostomum. Ineptè omnia. Primò, quia pastoralis cura ovium Christi, non est satisfactio erroris vel culpæ, sed est dignitas Prælati Ecclesiæ. Et, si verum est, quod in secundo mysterio dixisti, Petrus nomine omnium Prælatorum, tanquam generalis Procurator, accepit hanc dignitatem, seu curam pastorem. At absurdum est dicere, Petrum nomine omnium Prælatorū, satisfecisse pro suo errore trina negationis. Nā trina negatio erat solius Petri, non aliorū Apostolorū aut Prælatorum.

22. Deinde, nullum erat periculum desperationis, ut tu invidiosè fingis. Nam antequam Christus diceret Petro, *Pasce oves meas*, multa alia præcesserant, quæ ad depellendam desperationem abundè sufficerent. Primò, quia Christus, statim post peccatum negationis,

nis, benignè aspexit Petrum (Lucæ 22.61.) Secundò, ex hoc aspectu secuta est vera cōtritio & pœnitentia Petri (Matth. 26.75. *Etegressus foras, flevit amare.*) Tertiò, post Resurrectionē sæpè apparuit Petro: semel quidem soli, (Luc. 24.34.) Deinde, Petro & alijs simul (Ib. v.36.) Quartò, ter dixit illi & alijs Apostolis, *Pax vobis* (Joan. 20.19. & seqq.) Quintò, dixit illi & alijs, *Accipite Spiritum sanctum. Et, Euntes docete omnes gentes.* Et, *Ecce ego vobiscum sum omnibus diebus usque ad consummationem seculi.* Quibus omnibus ita confirmatus fuit Petrus, ut in pi-  
scatione, quæ facta est post Resurrectionem, cum magna fiducia miserit se in mare, ut ad Christum in littore expectantem, natando citiùs perveniret, quàm alii navigando, (Joann. 21.7.) Et tu, post hæc omnia fingis barathrum desperationis? Magnam injuriam illi facis.

23. Patres, quos citasti, non asserunt, quod tu asseris. Primò, quia nullam faciunt mentionem desperationis. Secundò, nec ajunt, satisfactionem seu compensationem, quæ Petro injuncta est, propter peccatum trine negationis, consistere in eo, *Pasce oves meas*, ut tu comminisceris; sed in eo, *Diligis me plus his?* Nam quia Petrus ter Christum negaverat ex timore, vicissim exigit ab illo Christus trinam confessionem amoris. Sic enim scribit Augustinus (quem tu citas) tract. 123. in Joannem: *Redditur negationi trina terna confessio.* Et serm. 49. de verbis Domini: *Ut trina confessione amoris deleat trina negationem timoris.* Eodem modo Cy-

do Cyrillus (quem etiam adducis) lib. 12. in Joannem cap. 64. *Quoniam Petrus, inquit, ter in tempore passionis negavit, jure nunc ab eo terna dilectionis confessio petitur, ut terna negatio aquali confessionis numero compensetur.* Igitur hæc tria hîc distinguenda sunt: 1. trina negatio, quæ est peccatum. 2. trina confessio, quæ est compensatio seu satisfactio pro peccato. 3. pastura ovium, quæ est præmiû & dignitas Ecclesiastica.

24. Quintum mysterium est: *Christus ideo cum solo Petro locutus est, & seorsim illi pasturam ovium commendavit, quia sicut ipse præcipuus erat ex undecim; ita præcipuam curam prædicationis ipsi commisit, qui maxime omnium, qui tunc aderant, debebat in ipsius Domini vinea laborare.* Pro hoc mysterio citas Leonem, Gelasium, Nicolaum & Lanfrancum.

25. Hîc aliquid verè asseris ex Patribus, aliquid affingis ex tuo capite. Verum est, Petrum fuisse præcipuum Apostolorum, & pasturam ovium illi commendatam: Falsum est, illam Petri eminentiam positam fuisse in eo, quòd maxime omnium, qui tunc aderant, debuerit in vinea Domini laborare. Hoc enim intelligis de labore itineris, prædicationis, & adversitatis, in quo constat Paulum præ cæteris excelluisse (2. Corinth. 11. 23.) Et ideo, ut relinqueres Paulo hanc prærogativam, dixisti, *Maxime omnium, qui tunc aderant.*

26. De hoc labore nihil dicunt citati à te Patres. Nam Leo Epist. 87. ad Episcopos Provinciæ Viennensis, sic scribit: *Cui, cum præ ca-*

teris solvendi & ligandi potestas tradita sit, pascendarum tamen ovium cura specialius mandata. Et serm. i. de Ascensione; Beato Apostolo Petro supra ceteros, post regni claves, ovilis Dominici cura demandatur. Hic notandæ sunt istæ particulæ, *Præ ceteris, &, supra ceteros*, quæ non significant, ut tu falsò asseris, Petrum præ ceteris vel supra ceteros debuisse laborare, excepto Paulo: Sed illi præ ceteris & supra ceteros traditam esse potestatem ligandi, & demandatam curam Ecclesiæ. Quod etiam asserunt reliqui Patres à te citati.

27. Videnunc, Marce Antoni, quid mysterij lateat in tuis mysterijs, quæ lectori obtrudis. Nihil aliud ex illis colligo, nisi tuam inconstantiam, mendacium, contradictionē. Deinceps videamus, quid antiqui Patres, quorum auctoritatem simulas te magnificare, sentiant de Primatu Petri. Ne tamen ex ijs, quæ à te allata sunt, videar aliquid præteriisse, respondendum est ad illud, quod objicis ex Apostolo, Ephes. 4. 11. *Et ipse dedit quidem quosdam Apostolos, quosdam autem Prophetas, alios verò Evangelistas, alios autem Pastores.* Hinc inferis, non solum Petrum fuisse Pastorem, sed etiam alios. Facilis responsio. Plures sunt Pastores particularium Ecclesiarum: Unus est pastor Ecclesiæ universalis, nempe Christus, & ejus loco, Petrus, vel Successor Petri. Unde vocatur Pastor Pastorum, ut suprà dixi ex Bernardo, & cap. sequenti iterum dicturus sum.

## CAPUT QUARTUM.

*Primatus Petri probatur ex  
Patribus.*

1. **A**Ntiqui Patres tam clarè, disertè, & rotundè loquuntur de Primatu Petri, ut clariùs, disertius, & rotundiùs loqui non possint. Nam aliqui expressè vocant illum *Vicariũ Christi*, ut Ambrosius ad cap. 24. Lucæ. Anselmus ad cap. 16. Matthæi. Bernardus lib. 2. de consideratione ad Eugenium. Genadius Scholarius, de Primatu Papæ. Sect. 2.

Alij *Caput Ecclesiæ*, ut Hieronymus in Psal.

13. Chrysostomus homil. 11. in Matthæum, Philo Carphatius in cantica.

Alij *Caput fidelium & Pastorem Gregis dominici*, ut Augustinus (vel quisquis autor est) in lib. quæstionum. Veteris ac Novi Testamenti, quæst. 75.

Alij *Caput omnium Apostolorum*, ut, Optatus Milevitanus lib. 2, contra Parmenianum, Cyrillus Alexandrinus lib. 12. in Joannem c. 64.

Alij *Principem Apostolorum*, ut Cyrillus Hierosolymitanus catech. 2. & 11. Basiliius in Proæmio præceptionum latius disputatarũ, Hieronymus in catalogo scriptorum Ecclesiasticorum.

Alij *Pastorem pastorum*, ut Eucherius Lugdunensis in vigilia S. Petri, Bernardus lib. 2. de consideratione ad Eugenium.

Alij *Coryphæum Apostolorum*, ut Dorotheus Tyrius in Synopsi, Isidorus Pelusiota lib. 1. E-

pist. 142. Andreas Cæsariensis ad c. 13. Apocal.

Alij *verticem Apostolorum*, ut Origenes Homil. 2. in diversos locos Nøvi Testamenti, Chrysostomus in Homil. in Petrum Apostolum & Heliam Prophetam.

Alij *Apicem Apostolorum*, ut Cyrillus Alexandrinus lib. 14. thesauri cap. 2.

Alij *Antesignanum Apostolorum*, ut Isidorus Pelusiota lib. 2. epist. 58.

Alij *Petram & Crepidinem Ecclesie Catholicae, & rectæ fidei fundamentum*, ut Synodus Chalcedonensis Act. 3.

Alij *Principem Ecclesie Christianorum*, ut Ephrem Syrus, serm. de transfiguratione Domini.

Alij *Ducem Discipulorum Christi*, ut Epiphanius Hæresi 51.

2. Ecce, qui & quanti tituli soli Petro præ alijs tribuuntur. Quos tu quidem lib. 1. cap. 4. & 5. agnoscis, quia negare non potes; sed tamē respondes hoc modo: 1. Titulum Vicarij perfectissime convenire Spiritui sancto, quem Christus suo loco milit post Ascensionem. 2. Eundem convenire etiam Apostolis, sed nō magis Petro, quā alijs. 3. Titulum Principis Apostolorum communem esse Petro & Paulo. 4. Reliquos titulos, quotquot sunt, concessos esse Petro, propter Primatum ætatis, vocationis & charitatis; non autem propter Primatum potestatis aut jurisdictionis. Hæc tria posteriora discutienda sunt. Nam primum, de Spiritu sancto, jam antè refutatum est.

3. Pri-

3. Prima ergo quaestio est : An omnes Apostoli quæ fuerint Vicarij Christi, ita ut Petrus in hoc officio, nullam prærogativam habuerit præ alijs? Tu affirmas cap. 4 n. 3. & seqq. At falsò. Nam etsi reliqui Apostoli fuerint etiam Vicarij Christi (quod non nego) non tamẽ ex officio fuerunt illius Vicarij in regimine totius Ecclesiæ, sicut Petrus. Petro tota Ecclesia, totum ovile, omnes Christi oves commissæ sunt; reliquis non item. Quod tamen si præcedenti capite satis probatum sit, hîc tamen obiter probandum est ex Patribus, quorum auctoritate contra nos pugnas.

4. Igitur Anselmus Archiepiscopus Cantuariensis (quem Anglia meritò veneratur) ad cap. 16. Matthæi, sic scribit: *Eam potestatem, ideo uni Petro concessit specialiter, ut ad unitatem nos invitaret. Ideo enim cum Principem Apostolorum instituit, ut Ecclesia, quasi unum principalem Vicarium Christi haberet, ad quem diversa Ecclesiæ membra recurrerent, si foris inter se dissentirent. Quoniam si diversa essent capita in Ecclesia, unitatis vinculum rumperetur per diversa schismata. Quid clarius dici poterat? aut, quæ efficacior ratio ad persuadendum adhiberi?*

5. Et Sanctus Bernardus lib. 2. de consideratione ad Eugenium: *Inde est, quòd Petrus altera vice, instar Domini, gradiens super aquas, unicum se Christi Vicarium designavit, qui non uni populo sed cunctis præesse deberet.* Ecce, Petrum vocat unicum Christi Vicarium, non quòd reliqui Apostoli non fuerint Vicarij, sed quod

non fuerint generales Vicarij, respectu totius Ecclesiæ, sicut Petrus. Plura testimonia paulo post citabo.

6. Sed objicis alios Patres. Primo Augustinum lib. 2. contra Gaudentium, cap. 12. ubi citans illud Christi ad Apostolos, Aet. 1. 8. *Eritis mihi testes in Jerusalem, & in totam Judæam & Samariam, & usque ad terminos terra*, sic scribit; *Hoc tanto tenacius, quanto posterius audientium mentibus fixit. Hanc sponsam suis amicis sponsus abiens commendavit.* Ex his verbis colligis primò, Christum in suo discessu ex hoc mundo, commississe Apostolis officium prædicandi Evangelium in totum mundum. Secundo, omnes & singulos Apostolos indifferenter accepisse curam totius mundi, absque ulla limitatione. Tertiò, Ecclesiam, quæ Christi sponsa est, æquè omnibus Apostolis, tanquam Vicarijs, à Christo commendatam. Quattò, Petro nihil amplius præ cæteris collatum esse.

7. Respondeo. Erras primò in citatione. Augustinus non habet illa verba, loco à te citato, sed lib. 1. cap. 20. Deinde erras in re ipsa: nam etsi eo loco & tempore nihil peculiare Petro collatum sit, præ alijs Apostolis, tamen jam antea fuerat illi collata Præfectura totius ovilis Christi, per illa verba, *Pasce oves meas.* Et præterea, firmitas seu constantia fidei in ipso, & successoribus, per illa, *Ego rogavi pro te Petre, ut non deficiat fides tua.* Neque necesse est, omnia uno loco & tempore conferri. Alioqui sequeretur, Apostolis nihil aliud collatum esse à



se à Christo, quàm officium prædicandi; non autem officium baptizandi, & remittendi peccata. Nam in suo discessu ex hoc mundo, quādo dixit, *Eritis mihi testes in Jerusalem*, non fecit mentionem baptismi aut clavium, sed tantum prædicationis Evangelij.

8. Quod addis, Christum in discessu suo, omnibus & singulis Apostolis indifferenter dedisse curam totius mundi, absque ulla limitatione, falsum est. Nam, ut dixi, per illa verba, *Eritis mihi testes*, solum commisit illis officium prædicandi; non autem officium gubernandi Ecclesiam: Ergo ex illis verbis non potest colligi, omnes Apostolos in gubernatione Ecclesiæ fuisse æquales. Deinde, sensus verborum Christi non est, ut singuli Apostoli, nullo ordine aut respectu, prædicarent Evangelium per totum terrarum orbem (quia hoc moraliter fuisset impossibile) sed ut singuli, facta distributione, singulas partes peragrarent; Et sic ab omnibus, non tamen à singulis, Evangelium toto orbe promulgaretur. Idque fieret, partim per ipsos Apostolos, partim per ipsorum successores. Quod etiam eventus docuit. Nam post aliquot annos à Christi discessu, facta est divisio Apostolorum, & singulis certa civitas, vel provincia, vel Regnum assignatum. Solus Petrus habebat generalem curam universalis Ecclesiæ, ut jam sæpè ex Patribus ostendi, ac deinceps ostensurus sum.

9. Nec aliter fieri potuit. Nam sicut Christus dixit, *Eritis mihi testes, usq; ad terminos ter-*

ra; ita antea dixerat, *Euntes in mundum universum, predicate Evangelium omni creatura, baptizantes eos in nomine Patris &c.* At hoc non potuit sic intelligi, quòd singuli debuerint id præstare; alioqui si unus prædicasset Evangelium, & baptizasset omnes in universo mundo, quid reliqui eodem tempore fecissent? An eosdem iterum baptizassent? Nullo modo. Est ergo, non conjunctim, sed divisim intelligendum, hoc modo: Ite divisi in diversas partes mundi, & unus hîc, alius aliibi prædicet Evangelium, baptizet, & similia officia exerceat. Nosti simile exemplum in nostra Societate. Mittimur in universum orbem terrarum: non ut singuli universum occupent, sed ut quisque in certo loco, sibi assignato, obeat officium hominis religiosi. Neq; valet hæc consequentia: Omnes sacerdotes Societatis habent potestatem eundi in universum mundum, & ubique Evangelium prædicandi: Ergo omnes sunt inter se æquales, & Præpositus generalis nihil plus habet, quàm reliqui. Similis est consequentia, quam tu facis de Apostolis.

10. Secundò objicis Ambrosium, qui in Psalm. 38, sic scribit: *Ascende ergo homo in cælum, & videbis verum illum & æternum, atque perpetuum Sacerdotem, cujus hic imagines videbas, Petrum, Paulum, Joannem, Jacobum, Matthæum, Thomam.* Hinc inferis, non solum Petrum, sed omnes Apostolos æquè repræsentasse Christum; ac proinde, æquè fuisse Vicarios Christi. Respondeo. Verum est, quod dicit Ambrosi-

us: Falsum, quod tu inferis. Nam omnes Apostoli, quatenus erant Sacerdotes, fuerunt imagines Christi, supremi & æterni Sacerdotis. Idem dici potest de omnibus alijs Sacerdotibus Novi Testamenti. Omnes ratione sacerdotij, sunt imagines Christi. An ideo omnes æquales? Ne tu quidem hoc dixeris. Nam fateris Episcopos, ex divina Christi institutione, majores ac eminentiores esse Presbyteris.

II. Sed ut planius constet de mente Ambrosij, ponam antecedentia ipsius verba, quæ sic habent: *Primum igitur umbra præcessit; secuta est imago; erit veritas. Umbra in lege; imago verò in Evangelio; veritas in cælestibus. Umbra Evangelij & Ecclesiæ in Lege; imago futura veritatis in Evangelio; veritas in judicio Dei.* Hæc est Thesis Ambrosij. Sub qua thesi descendit ad hanc hypothesein: Sacerdotes legis Mosaicæ erant umbrae, respectu Christi: Sacerdotes Evangelij sunt imagines, respectu ejusdem: Christus in cælo, est veritas. Nempe, in ratione sacerdotij. At, sicut hinc non sequitur, omnes Sacerdotes legis Mosaicæ fuisse inter se æquales, ita nec sequitur, omnes Sacerdotes Evangelij inter se esse æquales. Et vicissim, sicut omnes Sacerdotes Mosaici fuerunt umbrae Christi; Et tamen, eo non obstante, Pontifex erat major alijs; ita omnes Sacerdotes Evangelici sunt imagines Christi; & tamen, eo non obstante, Pontifex est major alijs. Si hæc exempla non sufficiunt, dabo aliud. Constat ex scriptura, hominem creatum esse ad imaginem Dei

Dei (Genes. 1. 26.) Et hoc sensu omnes homines appellari posse imagines Dei. An hinc inferes, omnes in potestate & jurisdictione inter se esse æquales, nec plus habere Reges & Principes, quam alios? Absit. Hæretica & scandalosa esset hæc illatio.

12. Tertio objicis eundem Ambrosium, qui alibi omnes Apostolos expresse vocat Vicarios Christi, ut in c. 1. Epist. ad Rom. & in c. 3. prioris ad Corinth. Respondeo. Nemo hoc negat. Sed quæstio est, an omnes eodem sensu, & æquali potestate sint Vicarij Christi? Si hoc assereret Ambrosius, pro te esset. At contrarium asserit. Nam in c. 12. posterioris ad Corinth. sic scribit: *Prior secutus est Andreas Salvatorem, quam Petrus; Et tamen Primatum non accepit Andreas, sed Petrus.* Non ergo omnes Apostoli æquales, ut tu fingis. Nā Petrus accepit Primatum, quem Andreas non accepit. Et serm. 46. de pœnitentia Petri in fine: *Videte ergo quantum fletus profuerit Petro. Antequam fletet, lapsus est: postquam flevit, electus est. Et qui ante lachrymas pravaricator extitit, post lachrymas pastor assumptus est: Et alios regendos accepit, qui prius seipsum non rexit.* Ecce, Petrus post fletum electus est. Sed ad quid electus? Non ad Apostolatam, quia jam antea erat Apostolus. Ad quid ergo? Ad officium Pastoris; ad regimen aliorum. Hoc ergo ante non habuit. Nec igitur reliqui Apostoli, quia Apostoli, id habebant. Solus igitur Petrus habuit.

13. Quartò objicis Chrysostomum, Homil.

mil. 11. in poster. ad Corinth. ubi explicans illū versiculum Pauli, *Pro Christo legatione fungimur*, sic scribit: *Misit filium Pater, exhortari, & legatione fungi apud humanum genus pro se: Quoniam autem ille occisus abiit, nos legationem suscepimus, & pro illo & Patre, exhortamur vos.* Et infra: *Igitur pro Christo legatione fungimur, id est, illius loco. Nam nos, quæ illius officij sunt, suscepimus.* Ex utroque testimonio sic argumentaris: Legatus repræsentat suum principalem, & ab eo immediate mittitur, & vices ipsius, ubi ille abest, supplet. Omnes & singuli Apostoli sunt tales. Omnes igitur & singuli suppleant vices Christi; nec magis Petrus, quam reliqui.

14. Respondeo. Hoc testimonium contrate ipsum profers. Primo, quia Chrysostomus supponit, Christū in hac vita per seipsum exercuisse officium Capitis, Pastoris, Monarchæ; & postea id fecisse per Vicarios. At tu negas Christū in hac vita fuisse Caput Ecclesiæ, aut exercuisse ullum officium Capitis, ut lib. 1. c. 1. & seqq. ostensum est. Secundo, Chrysostomus dicit, non solum Apostolos, sed etiam Christum legatione functum esse pro Deo: & tamen agnoscit Christum esse majorem legatum, quam Apostolos. At tu, ex eo, quia Apostoli fuerunt legati Christi, inferis, omnes æquales fuisse in Legatione, quod Chrysostomus non infert. Alioqui etiam Christus fuisset æqualis Apostolis. Tertiò, Chrysostomus dicit, Apostolos suscepisse, quæ erant officij Christi. Vel hoc interpretaris absolute dictū  
• etc.

esse, vel cū limitatione. Si absolutè, falsum est. Nam Apostoli non susceperunt omnia, quæ erant officij Christi. Officium enim illius fuit, redimere genus humanum, & institutæ Sacramenta. Hoc Apostoli non susceperunt. Si cum limitatione, verum quidem est, sed contra te. Nam si Apostoli nō susceperunt omnia, quæ erant officij Christi, sed aliqua tantum, non potest interri, quod tu inferis, omnes in legatione fuisse æquales. Fieri enim potuit, ut alij plura, alij pauciora susciperent. Vel, ut alij cum majori, alij cum minori limitatione susciperent, quæ erant officij Christi. Habemus exemplum notissimum. Legati Apostolici, qui à Pontifice mittuntur in provincias, verè ipsius Legati sunt; sed cum limitatione accipiunt, quæ sunt officij Pontificis: & alius plus, alius minus accipit. Non enim omnes æquales sunt. Idem dico de Legatis Regum & Imperatorum. Omnes quidem legati sunt, sed alius cum majori potestate fungitur legatione; alius cum minori. Res nota est.

15. Tertia quæstio est. An titulus Principis Apostolorum cōmunis sit Petro & Paulo? Tu affirmas lib. 1. cap. 5. n. 2. Et probas ex Hieronymo & quibusdam alijs, qui Petrum & Paulum vocant Principes Apostolorum. Respondeo. Verum est: sed longè alio sensu. Nam quando Petrus seorsim vocatur Princeps Apostolorum, tunc intelligitur esse Princeps respectu omnium Apostolorum, etiam respectu Pauli; quia respectu omnium habet curam & gu-

& gubernationem pastorem. Nemo enim excipitur ab eo, quod illi dictum est, *Pasce oves meas*. Quando autem Petrus & Paulus simul vocantur Principes Apostolorum, hoc intelligendum est, non de vero Principatu aut gubernatione pastorali; sed de eminentia laborum ac molestiarum, in quibus illi duo præcelluere. Itaque magna est differentia inter Petrum & Paulum. Primò, quia Petrus duplici titulo vocatur Princeps Apostolorum: tum propter eminentiam potestatis seu præfecturæ; tum propter eminentiam laboris. At Paulus, posteriori tantum. Secundò, Petrus, & seorsim solus, & conjunctim cum Paulo vocatur Princeps. At Paulus seorsim nunquam; quod benè notandum est. Unde Hieronymus, quem tu citas, quando de utroque simul loquitur, appellat Principes Apostolorum: quando seorsim de alterutro, Petrum quidem vocat Principem Apostolorum, non tamen Paulum; ut patet in catalogo de scriptoribus Ecclesiasticis.

16. Idem confirmo ex alijs Patribus. Nam Cyrillus Hierosolymitanus catech. II. sic habet: *Omnibus Apostolis reticentibus, Petrus Princeps Apostolorum, & supremus Ecclesiæ Præco dicitur ad ipsum*. Ubi Petrum vocat Principem, respectu omnium Apostolorum; & ut clarius explicet, quo sensu sit Princeps, ait esse supremum Ecclesiæ Præconem. De Paulo id nunquam invenies.

17. Et Ephreem Syrus in serm. de transfiguratione.

guratione Domini: Sicut *Moyſes Societatis illius & conjunctionis Hebræorum, juffu Dei, Princeps fuit: Ita Petrus Eccleſia Chriſtianorum. Atq;* ut ille Veteris, ita hic Novi Teſtamenti Princeps. Pulchra collatio, & ad noſtrū inſtitutum accommodata Conſtat autem Moyſen fuiſſe Principem Hebræorum, ratione poteſtatis & juridiſtionis. Ergo eodem ſenſu, Petrus fuit Princeps Chriſtianorum. Quis hoc vnquam dixit de Paulo?

18. Et Caſſianus lib. 3. de incarnatione Domini cap. 12. *Interrogemus ſummum illum, & inter Diſcipulos Diſcipulum, & inter Magiſtros Magiſtrum, qui Romana Eccleſia gubernaculum regens, ſicut fidei habuit, ita & Sacerdotij Principatum. Dic nobis ergo, dic nobis Princeps Apoſtolorum Petre. Hic etiam Petrus vocatur Princeps Apoſtolorum, quia erat ſummus inter Apoſtolos, & præ alijs habebat Sacerdotij Principatum. De Paulo, nihil ejuſmodi.*

19. Et Maximus Conſtantinopolitanus Patriarcha in Epiſt. ad Orientales: *Hunc enim ex cæteris mortalibus de toto orbe Conditor orbis elegit, cui cathedram Magiſterij principaliter poſſidendam tenere, perpetuo privilegij jure conceſſit. Vbi vides, Petrum ideo vocari Principem omnium Apoſtolorum, quia principaliter poſſidet cathedram Magiſterij, quæ illi perpetuo privilegij jure conceſſa eſt. At nullum eſſet Privilegium, ſi non principaliter, ſed æqualiter cum alijs Apoſtolis illam cathedram poſſideret.*



20. Et Leo Imperator, dictus Sapiens, in serm. de Petro: *Post resurrectionem ter Petrum Dominus percunctatus, an ab eo diligeretur, Principem Apostolorum constituit. Et paulo post: Petrus verò, cum intelligeret, Principatum eum magnum esse, & magnis indigentem viribus, videretq; Joannem sequentem, illum dico, quem Jesus vehementer amabat: Hic, inquit, quid? Quod perinde erat, quasi diceret: Mene præsici vis Caput Discipulis? Hunc vero à te dilectum, qui voluit sedere ad dextram, hunc, inquam, quid facere jubes? Et iterum: Tu me sequere, id est, sequere me hoc baculo pastoralis: & sicut ego, cum eram vobiscum, servabam vos, ut Pater, & Caput & Magister, vigilans pro vobis: sic tu esto meo loco, & sequere me Principatu ac potestate tua fratres tuos confirmans. Te enim volo esse meo loco. Unde manet in hodiernum usq; diem Petrus sequens Christum in successore suo. Magnum hoc testimonium.*

21. Et Hugo Victorinus serm. 64. de Apostolis Petro & Paulo: *Petrus ceteris cminet excellentia potestatis: Paulus excellentia predicationis. Petrus, Sol: Paulus, Luna. Petrus Sol, per collatam sibi divinitus potentiam: Paulus Luna, per collatam sibi cœlitus sapientiam. Et infra: Petro soli inter ceteros, & præ ceteris, à Domino cura pastoralis principaliter & specialiter injuncta est, ubi dicitur: Pascite agnos meos. Hæc sufficiant de titulo Principis, qui aliter Petro, aliter Paulo concessus est.*

22. Quarta quæstio: An reliqui tituli (§. 1. enumerati) concessi sint Petro, propter Primatum ætatis, vocationis & charitatis; an vero

G

propter



propter Primatum potestatis & jurisdictionis. Tu asseris priorem partem; ego posteriorem. Nec opus est novis Argumentis. Jam ante ostendi, Primatum ætatis, vocationis & charitatis, vel incertum, vel fictitium esse. Primò quia incertum est, an Petrus fuerit ætate senior, quàm omnes reliqui Apostoli. Secundò, falsum est, vocatum esse ad Apostolatum, antequam reliqui vocarentur. Tertiò, de Primatu charitatis diversæ sunt authorum opiniones. Alij tribuunt illum Petro; alij Joanni.

23. Deinde, multi ex supradictis titulis, plus aliquid significant, quàm prærogativam ætatis aut vocationis. Sunt enim duplices tituli. Aliqui tribuuntur Petro, respectu aliorum Apostolorum; ut cum dicitur Apostolorum Princeps, Caput, Coryphæus, Apex, Vertex, Antesignanus. Alij respectu Christi, vel totius Ecclesiæ, vel omnium fidelium; ut cum dicitur Universalis Vicarius Christi, Caput & Princeps Ecclesiæ, Caput fidelium, Pastor gregis Dominici. Priores fortè possent illi accommodari propter Primatum ætatis & vocationis, quem tu fingis: non tamen posteriores. Hoc ostendam in Exemplo à te allato. Dicit Petrum fuisse quasi primogenitum inter Apostolos; ac proinde, sicut quilibet alius primogenitus, ratione ætatis, potest vocari Caput aut Princeps suorum fratrum; sic etiam de Petro statuendum esse. Sit ita. At vicissim ego retorqueo: Sicut ex eo præcisè, quòd aliquis est primogenitus inter fratres, non potest vocari

uari Caput aut Princeps Reipublicæ, Caput aut Princeps civium, Vicarius Regis aut Imperatoris : Sic in simili casu, ex eo præcisè, quòd Petrus est primogenitus inter fratres suos Apostolos, non potest vocari Caput Ecclesiæ, Princeps fidelium, Vicarius Christi. Alia ergo causa est horum titulorum, quàm prærogativa ætatis & vocationis.

24. Denique falsum est, Patres non agnovisse alium Primatum in Petro, quam qui à te fingitur. Primò, quia aliqui, ut ex dictis patet, negant illum fuisse seniore ætate & vocatione. Ergo illi saltem vel agnoscunt alium Primatum, vel nullum. Utrunque contra te est. Secundò, verba ac sententiæ Patrum non salvantur, per Primatum ætatis & vocationis. Audi quid scribant, & quomodo loquantur.

25. Chrysostomus Homil. 80. ad populū Antiochenum, ante medium : *Nónne, inquit, ter Petrus negavit ? Nónne cum juramento ter ? Quid ergo ? Multúmne temporis fuit illi necessariū ad pænitentiam ? Nequaquam. Sed eadem nocte lapsus est, & resurrexit. Post illum enim gravem casum, (negationi namq. nullum est malum æquale) rursus eum ad priorem honorem reduxit pænitentia, & ei per totum orbem terrarum Ecclesia præsentiam tradidit.*

Et orat. 5. adversus Judæos, longè ante medium : *Petrus post illam nefariam abjuratorem, quoniam celeriter suum ipsius peccatum recordatus est, nulloque accusante dixit peccatum, flevitque amare; adeo abluit illam negationem, ut etiam Pri-*

*mus Apostolorum fuerit factus, ac terrarum orbem totum subjecerit.*

Hæc duo testimonia non possunt intelligi de Primatu ætatis aut vocationis; quia illū Primatum, ut tu ipse fateris, habuit Petrus ante peccatum negationis, per hoc præcisè, quòd esset senior ætate, & primus à Christo ad Apostolatū vocatus: Sed debent intelligi de Primatu, qui post factam pœnitentiam Petro cōcessus est, ut ex verbis Chrysostomi constar. Quis 2. Primatus ille sit, colligi potest ex duabus illis particulis. 1. *Ecclesia Præsidentia per totū terrarum orbem.* 2. *Subiectio totius orbis terrarum.* Porro hic Primatus, qui tunc illi datus est, distinguui debet ab honore, ad quem ait Petrum reducūm esse per pœnitentiam.

26. Eodem modo ac sensu loquitur Maximus Taurinensis (qui vixit circa tempora Augustini) Homil. 3. in natali Apostolorū Petri & Pauli: *Quanti, inquit, meriti apud Dominū suum Petrus erat, ut ei post navicula parva remigiū, totius Ecclesiæ gubernacula traderentur?* Certè, per gubernacula totius Ecclesiæ, non significatur Primatus ætatis aut vocationis, sed dignitatis & jurisdictionis. Nec video, quomodo clarius explicari possit potestas jurisdictionis, quàm hîc explicata est: Nam perinde est, ac si dicas in simili casu: totius Imperij gubernacula Matthiæ Austriaco tradita sunt. Vel totius regni Galliæ gubernacula Ludovico undecimo tradita sunt. Quis hic locus dubitandi aut tergiversandi?

27. Similiter Hieronymus lib. 1. contra Jovinianum: *Inter duodecim unus eligitur, ut Capite constituto, schismatis tolleretur occasio. Sed cur non Joannes electus est virgo? atati delatum est, quia Petrus senior erat, ne adhuc adolescens ac pene puer progressæ ætatis hominibus præferretur.* Hinc tria coligo. Primò, solum Petrum ex duodecim Apostolis electum esse in Caput Ecclesiæ. At si electus est ex duodecim Apostolis, jam antea non erat ratione ætatis & vocationis. Aut si antea erat, electus non est. Secundò, ideò electum esse, ut constituto Capite, schismatis tolleretur occasio. Ergo non est electus pro sua tantum persona, sed etiam pro Successoribus; quia si tempore Apostolorum, quando Ecclesia erat exigua, debuit esse unum Caput ad vitandum schisma, multo magis post tempora Apostolorum, quando Ecclesia fuit diffusa per totum orbem terrarum. Tertiò, ideò potius Petrum, quam Joannem electum esse in Caput, quia non decebat Joannem pene puerum præferri senioribus. Certè si Hieronymus putasset, quod tu fingis, Primatum Petri in eo solum consistere, quod reliquis ætate & vocatione seniore esset; vel frustra, vel stultè quæsiisset, quare Joannes non esset electus ad Primatum: id est, quare non esset electus, ut fieret senior ætate & vocatione?

28. Item Leo Papa (qui propter doctrinam & virtutem dictus est Leo Magnus) serm. 3. de Assumptione sua ad Pontificatum: *Unus de toto mundo Petrus eligitur, qui & universarum*

gentium vocationi, & omnibus Apostolis, cunctisque Ecclesie Patribus proponatur; ut quamvis in populo Dei multi Sacerdotes sint, multique Pastores, omnes tamen propriè regat Petrus, quos principaliter regit & Christus.

Et Epist. 87. ad Episcopos provinciæ Viennensis, cap. 1. *Sed hujus muneris Sacramentum ita Dominus ad omnium Apostolorum officium pertinere voluit, ut in beatissimo Petro, Apostolorum omnium summo principaliter collocaret: Ut ab ipso, quasi quodam Capite, dona sua velut in corpus omne diffunderet, ut exortem se mysterij divini intelligeret esse, qui ausus fuisset à Petri soliditate recedere. Hunc enim in consortium individua unitatis assumptum, id quod ipse erat, voluit nominari, dicendo, Tu es Petrus.*

Ex hoc utroque Leonis testimonio habemus hæc tria: Primò, quod Petrus regat omnes, quos principaliter regit Christus; etiam omnes alios Ecclesie Pastores & Apostolos. Secundò, quòd à Petro, tanquam à Capite diffundantur dona Dei in omnia membra Ecclesie. Tertiò, quòd Petrus à Christo in consortium individuae unitatis assumptus sit.

29. Quid tu verò, Marce Antoni, ad hæc respondes? Primò fateris, quod res est, Leonē admittere Primatum Petri super totam Ecclesiam. Hoc accipio. Vixit autem Leo circa Annum Christi 440. Igitur ab eo tempore, id est, ab Annis mille ducentis, Primatus Petri fuit agnitus & concessus in Ecclesia. Secundò ais, Leonem oratorio more, voluisse Petri dignita-

gnita-

gnitatem amplificare, ut hac ratione suam dignitatem Pontificalem extolleret. An putas tibi similem fuisse, qui studio ambitionis, veritati à se agnitæ contradixerit? At scias in Sāctorum Catalogum ab Ecclesia relatum esse. Tertiò ais, Leonem in eo exorbitasse, quòd dixerit, Petrum in consortium individuae unitatis à Christo assumptum esse. Hoc probas, quia individua unitas in Christo erat sola cum Patre & Spiritu sancto in natura & essentia divinitatis. *Qualem unitatem, inquis, quis asserat in Christum & Petrum? Nisi Petrum faciamus unum ex Trinitate, quæ est blasphemia horrendissima.* Audi, mi frater. Nulla est hîc blasphemia: Sed quod bene à Leone dictum est, tu vel non intelligis, vel malè interpretaris. Non dixit Leo, Christum assumpsisse Petrum in consortium individuae unitatis, ratione naturæ aut substantiæ divinæ, ut tu falsò imaginaris; sed ratione nominis ac dignitatis. Nam Christus voluit illum vocari Petram & fundamentum Ecclesiæ, sicut ipse vocabatur. Verba Leonis aperta sunt. Quæ etiam repetuntur à Nicolao Papa, & citantur in jure canonico, cap. *Fundamentum*, De electione & electi potestate in 6.

30. Addam adhuc unum aut alterum è Patribus. Gregorius lib. 4. Epist. 32. ad Mauritium Augustum, sic scribit: *Cunctis Evangelium scientibus liquet, quòd voce Dominica Sancto & omnium Apostolorum Principi Petro, totius Ecclesiæ cura commissæ est. Ipsi quippe dicitur, Pasce oves meas.*



31. Et Arnobius Romanus (qui vixit circa tempora Augustini) ad Psal. 138. *Ecce Apostolo Petro pœnitenti succurritur, qui est Episcopus Episcoporum, & major gradus redditur ploranti, quàm sublatus est deneganti. Quod ut doceam, illud ostendo, quòd nullus Apostolorum nomen Pastoris accepit. Solus enim Dominus Jesus Christus dicebat: Ego sum Pastor bonus. Hoc ergo nomen Sanctum, & ipsius nominis potestatem, post Resurrectionem suam Petro pœnitenti concessit, & ternegatus, negatori suo, hanc, quam solus habuit, tribuit potestatem: Ut non solum recuperasse, quod amiserat, probaretur; verum etiam & multo amplius pœnitendo, quàm negando perdiderat, acquisisse,*

32. Et Eucherius Lugdunensis in vigilia sancti Petri: *Dicit ei, Pasce oves meas. Prius agnos, deinde oves commisit ei; quia non solum Pastorem, sed Pastorum Pastorem eum constituit. Pascit igitur Petrus agnos, pascit & oves: Pascit filios, pascit & matres: regit & Subditos & Prælatos. Omnium igitur Pastor est, quia præter agnos & oves in Ecclesia nihil est.*

33. Piures Patres, etiam antiquissimos, citabo postea, cum diluam objectiones tuas. Ac simul ostendam, eos ipsos, quorum auctoritatem nobis objicis, maximè nobis patrocinari.

Nunc Augustini sententia, quæ multum ponderis habet, seorsim discutienda est.





## CAPUT QUINTUM.

*Primatus Petri probatur ex  
Augustino.*

1. **A**ugustini sententiam conaris tua interpretatione in alium sensum detorquere. Ais, nihil eum agnoscere in Petro peculiare, præter hæc duo. Primò, quòd primus fuerit admissus in Apostolatum: Et hinc habuerit aliquam præminentiam seu Primatū. Secundò, quòd ex hac præminentia & Primatu (qui totus consistit in prioritate vocacionis) secutum sit, ut figuram totius Ecclesiæ gestaverit. Sic tu, totidem ferè verbis, lib. 1. cap. 10, n. 21, & alibi.

2. Ego contrà assero, Augustinum hæc tria agnoscere in Petro. Primò, quòd verè habuerit Primatum seu Principatum totius Ecclesiæ, non ratione ætatis, aut vocationis præcisè, sed ratione potestatis à Christo ipsi concessæ. Secundò, quòd propter hunc Primatū seu Principatum, sustinuerit personam totius Ecclesiæ, & consequenter etiam Apostolorū ac aliorum fidelium. Sicut Imperator, aut Rex, aut Consul, sustinet personam totius imperij, aut regni, aut civitatis: Et consequenter omnium subditorum, qui in imperio, vel regno, vel civitate sunt. Tertiò, quòd sicut Imperator, aut Rex, aut Consul, quia sustinet personam subditorum, potest eorum nomine, vel respondere, vel pacisci, vel aliud quid facere, juxta juris concessionem; Sic etiam Pe-

trus, quia sustinebat personam totius Ecclesię, solitus sit unus ipse pro omnibus respondere. Hęc tria perspicuè ostendam ex clarissimis Augustini testimonijs.

3. Ac Primò quidem, de Primatu Petri disertè agit lib. 2. de Baptismo contra Donatistas cap. 1. Ubi recenset hęc verba Cypriani: *Nam nec Petrus, quem primum Dominus elegit, & super quem adificavit Ecclesiam suam, cum secum Paulus de circumcisione disceptaret, postmodum vendicavit sibi aliquid insolenter, aut arroganter assumpsit, ut diceret se Primatum tenere, & obtemperari à novellis & posteris sibi potius oportere: nec despexit Paulum, quòd Ecclesię prius persecutor fuisset, sed consilium veritatis admisit, &c.* Deinde, ex sua sententia mox subjicit: *Ecce ubi commemorat Cyprianus, quod nos etiam in scripturis sanctis didicimus, Apostolum Petrum, in quo Primatus Apostolorum tam excellenti gratia præeminet, aliter quàm veritas postulabat, de circumcisione agere solitum, à posteriore Apostolo Paulo esse correctum.* Et infra ibidem: *Puto, quòd sine ulla sui contumelia Cyprianus Episcopus Petro Apostolo comparatur, quantum attinet ad martyrij coronam. Caterum magis vereri debeo, ne in Petrum contumeliosus existam. Quis enim nescit illum Apostolatus Principatum cuilibet Episcopatu præferendū? Sed et si distat cathedrarum gratia, una est tamen martyrij gloria.*

4. Hic duo notanda sunt: Primò, quod Cyprianus supponat, Petrum habuisse quidò Primatum supra Apostolos, qui in eo consistebat,



bat, quòd omnes tenerentur ipsi obtemperare: Sed tamen, nec insolenter, nec arroganter usum fuisse illo Primatu, cùm à Paulo corriperebatur; ut daret nobis Exemplum modestiæ & humilitatis, juxta illud Christi, Matth. 20. 28. & Luc. 22. 26. *Qui major est in vobis fiat sicut minor; & qui praeceptor est, sicut ministrator. Sicut filius hominis non venit ministrari, sed ministrare.* Secundò, quòd Augustinus eundem Primatū tripliciter confirmet. Primò his verbis: *In quo Primatus Apostolorum tam excellenti gratia praeminet.* Quæ est illa tam excellens gratia? Certè nō sola vocationis antiquitas, ut tu vis. Quid enim excellens est, si dicam Petrum uno aut altero die citiùs vocatum esse ad Apostolatū, quàm Andream? Quanquam, ut suprà dixi, id falsum est. Deinde illis verbis: *quis nescit illum Apostolatus Primatum cuilibet Episcopatu præferendum?* non ergo omnes Episcopi Petro æquales sunt. Imò Augustinus ait, se vereri, ne sit contumeliosus in Petrum, si illum cōferat cum Cypriano Episcopo, quoad dignitatem Ecclesiasticam. Denique illis verbis: *distat cathedrarum gratia*, id est, major est cathedra Petri quàm Cypriani: major Pontificis, quàm cujusvis alterius Episcopi.

5. Tu respondes, per cathedram Petri, non intelligi cathedram Romanam, sed Petri Apostolatū: eumque particularium Episcoporum cathedris præstare. Si enim, inquis, quicumque Apostolatus excedit potestate quamcunque particularem cathedram, cū Apostolus quilibet in

*toto mundo possit suum Apostolatum exercere, quod Episcopi jam non possunt, nisi in limitatis Diocesibus, sive provinciis aut regnis; quanto magis Primi & precipui Apostoli, aliorum pluribus nominibus Principis, Apostolatus, singularem quamcunque, cathedram excedet? Hac responsione te ipsum jugulas. Primò, quia concedis Petrum potestate Ecclesiastica (de hac n. sermo est) excedere Cyprianum, & omnes alios Episcopos Ecclesiarum particularium. Major igitur, ex tua concessione est potestas Ecclesiastica in Petro, quam in alijs Episcopis. At hoc est, quod nos contendimus.*

6. Secundò concedis, eundem Petrum potestate Ecclesiastica excedere alios Apostolos. Sic enim argumentaris: Si alij Apostoli potestate Ecclesiastica excedunt Episcopos, Ergo multo magis Petrus. Quæ consequentia non valeret, nisi Petrus eadem potestate excederet alios Apostolos. Sicut patet in simili exemplo. Nam qui sic infert: Si aer excedit calore terram & aquam; Ergo multo magis ignis: Sine dubio supponit, ignem habere plus caloris, quam aerem. At hunc excessum potestatis in Petro nos urgemus. Si ergo illum concedis, non nobis, sed tibi contrarius es.

7. Tertiò affirmas, quemlibet Apostolum ecclesiast. potestate excedere quemlibet Episcopum, cum quilibet Apostolus in toto mundo possit suum Apostolatum exercere, quod Episcopus non potest, nisi in limitato regno aut provincia. At alibi contrarium asseris, nempe Apostolos & Episcopos in potestate & jurisdictione

risdictione æquales esse : Et non differre, nisi  
accidente. Sic n. scribis l. 2. c. 1. n. 3. *Quoscunque*  
*igitur Apostoli eligeant, & ad Ecclesias regendas*  
*mittebant, ij proculdubio, parem cum ipsis Apostolis*  
*potestatem accipiebant, si vim ipsam institutionis*  
*spectemus.* Et ibidem n. 5. *Neg, ego invenio inter*  
*verum Apostolum, ac Episcopum, aliud discrimen,*  
*nisi quod Apostolus sit, qui Christum prædicat, tan-*  
*quam testis oculatus, ab ipso met Christo immediatè*  
*missus Episcopus verò sit, qui eundem prædicat, ut*  
*testis instructus, & fide illuminatus, ac missus à*  
*Christi ministris.* Et iterum n. 7. in fine : *Apostoli,*  
*dum alios ad fundandas vel regendas Ecclesias mit-*  
*tebant, eos ad Episcopatum evehebant : totumque*  
*ipsorum officium, cum tota potestate ministeriali,*  
*eis committebant : Una illa propria personali di-*  
*gnitate excepta, quod essent testes oculati vitæ &*  
*Resurrectionis Christi; ab eoque immediatè vocati*  
*& missi ad Evangelizandum.*

8. Vides, opinor, contradictionem in hac  
duplici tua assertionem. Una, Apostoli excedūt  
potestate Episcopos. Altera, Episcopi ab Apo-  
stolis parem potestatem accipiebant. Vel Apo-  
stoli Episcopis à se missis cōmittebant totum  
suum officium cum tota potestate. Responde-  
bis fortè, utramque veram esse diverso sensu.  
Apostolos enim & Episcopos habere parem  
potestatem in habitu ; non tamen parem in a-  
ctū. Igitur priorem assertionem veram esse de  
potestate in actū; posteriorem, de potestate in  
habitu. Sed hanc ipsam responsionem tu ipse  
evertis. Nam lib. 2. c. 5. n. 26. sic habes. *Prædi-*  
*candi*

candi potestatem in toto terrarum orbe, sicut Apostoli non habebant, nisi habitu; Actū verò ibi, ubi jam inter se convenerant, seu ubi eos Spiritus sanctus esse volebat: Ita Episcopi habitu habent eandem universalem potestatem jure divino, eo ipso, quo sunt facti ritè Episcopi: Actū tamen non sunt Episcopi, nisi sua particularis Ecclesia in qua illos Spiritus sanctus posuit.

Et ibidem: Ita & jurisdictio in habitu est universalis iure divino, in unoquoque Episcopo: in actū verò non est, nisi particularis, sicut erat etiam in Apostolis. Hic planè idem statuis de Episcopis & Apostolis: tum quoad potestatem & jurisditionem in habitu, quæ in utrisq; universalis & illimitata est; tum quoad potestatem & jurisditionem in actū, quæ in utrisque particularis & limitata est. Nihil ergo discernis. Manet igitur vera contradictio, quam posui.

9. Addo, ex tuis verbis manifestè colligi duo alia absurda. Unum est, Paulum nec Apostolum fuisse, nec Episcopum. Non Apostolum, quia non fuit oculatus testis vitæ & Resurrectionis Christi. Nec Episcopum, quia non est immediatè missus à ministris Christi, sed ab ipso Christo. Alterum, aliquos Episcopos habere majorem potestatem & jurisditionem, quàm Apostolos, si non in habitu, saltè in actū. Nam Apostoli, ut jam dixisti, non habebant jurisditionem in actū, nisi particularem & limitatam. At aliqui Episcopi habent indifferentem, & non limitatam, ut fateris lib. 2. cap. 1, n. 11, his verbis: *Quicumque ab Apostolis*  
Episco-

*Episcopi fiebant, ij eandem cum ipsis Apostolis in solidum auctoritatem accipiebant; & sanè universalem in habitu & illimitatam: In actu verò aliqui indifferenter, quocunque eos Spiritus sanctus, aut Apostoli dirigebant, terrarum orbem circumibant: alij verò certis locis consistere jubebantur. Hic distinguis inter Episcopos: Aliqui habent potestatem in actu, limitatam ad certum locum: alij indifferenter ad totum orbem terrarum. At Apostoli, ex tua sententia, non habebant nisi particularem. Minus igitur habebant, quàm aliqui Episcopi ab ipsis ordinati & missi.*

10. Ecce, Marce Antoni, in quantas angustias te conjicis, dum sententiam Augustini, qui clarè explicat Primatum Petri, conaris obscurare, & per ineptas ambages pervertere. Dic rotundè, quod dixit Augustinus, in Petro Primatum Apostolorum excellenter præminere: Hunc Primatum cuilibet Episcopatu præferendū esse. Sed, ne dubites, adducā alia tria Augustini testimonia pro eodem Primatu.

Primum habetur Epist. 108. ad Seleucianā, statim ab initio, ubi sic ait: *Quòd autem dicitur Petrum egisse pœnitentiam, cavendum est, ne ita putetur egisse, quomodo agunt in Ecclesia, qui propriè pœnitescentes vocantur. Et quis hoc ferat, ut primum Apostolorum inter tales pœnitescentes numerandum putemus?* Quasi dicat: Qui agunt pœnitentiam in Ecclesia, subjecti sunt Prælati Ecclesiæ, & ex illorum arbitrio puniuntur, tanto vel tanto tempore, prout ipsis visum est. At Petrus, tametsi gravissimè peccaverit, negando

do Christum, non tamen erat subiectus Præ-  
latis Ecclesiæ, cùm ipse potius esset Caput &  
Princeps Ecclesiæ; & neminem haberet, ex-  
cepto Christo, à quo puniretur. Nō igitur debet  
inter pœnitētes Ecclesiæ numerari. Quòd hic  
sit sensus Augustini, colligitur ex alijs ipsius li-  
bris, ubi agit de pœnitentia Ecclesiastica, præ-  
sertim in Enchiridio c. 65. ubi sic scribit: *Reclē  
constituuntur ab iis, qui Ecclesia præsumt, tempora  
pœnitētia, ut fiat etiam satis Ecclesia, in qua remit-  
tuntur ipsa peccata: Extra eā quippe non remittun-  
tur. Et Homil. 27. de utilitate pœnitentiæ, di-  
stinguit triplicem pœnitentiam: Unam acce-  
dentium ad baptismum: alteram quotidianā:  
tertiam Ecclesiasticam. De hac ita scribit: Est  
pœnitentia gravior atque luctuosior, in qua propriè  
vocantur in Ecclesia pœnitentes; etiam remoti à Sa-  
cramento Altaris participandi. Huiusmodi pœ-  
nitentem negat fuisse Petrum, quia non erat  
subiectus Ecclesiæ, ac proinde Ecclesia non  
poterat illum remove a Sacramento Altaris.*

11. Alterum Augustini testimonium ha-  
betur serm. 124. de tempore, ubi agens de ne-  
gatione Petri, sic scribit: *Ideo B. Petrum paululū  
Dominus subdeservit, ut in illo totum genus huma-  
num posset agnoscere nihil se sine Dei gratia prava-  
lere. Et ut Ecclesia Reclōri futuro, ignoscendi pec-  
cātibus quadam regula poneretur. Credenda enim  
erant Petro Apostolo claves Ecclesiæ. Credenda erat  
ei populorum innumera multitudo, quæ esset pro sua  
natura vitiis, passionibus, culpis, involuta atq; pec-  
catū. Et infra: Totius corporis morbum in ipso Ca-*  
*pite*



pite curat Ecclesia; & in ipso vertice componit membrorum omnium sanitatem, in ipsa confessionis Christi crepidine, in ipso immobilis fidei fundamento, in Petro scilicet illo, qui dixerat. *Etiam si me oporteat mori tecum, non te negabo.* Et ibidem: *Quid agis, ô Petre, future Reſtor Eccleſiæ, quid loqueris?* Verba clara ſunt. Petrus vocatur Reſtor Eccleſiæ, cui infinita populorum multitudo credita eſt. Vocatur Caput totius corporis Eccleſiæ: Vertex omnium membrorum Eccleſiæ: Immobilis fidei fundamentum. Quid quæris amplius?

12. Tertium testimoniũ habetur in Quæſtionibus Veteris ac Novi Testamenti, q. 75. Quamvis enim autor fortasse non eſt Auguſt. eſt tamen autor antiquus, & ipſi Auguſtino equalis, aut antiquior. *Dicunt exactores didrachma ad Petrum Apoſtolum: Magiſter veſter non ſolvit didrachmam. Quo dicto, Magiſtrum, ut pro omnibus Diſcipulis ſolveret, convenerunt. Salvator autem cum pro ſe & Petro dari jubet, pro omnibus exſolviſſe videtur: quia ſicut in Salvatore erant omnes cauſa Magiſterij, ita & poſt Salvatorem, in Petro omnes continentur. Ipſum enim conſtituit eſſe Caput eorum, ut Paſtor eſſet gregis Dominici. Et ibidem: *Maniſeſtum eſt in Petro omnes contineri. Rogans enim pro Petro, pro omnibus rogasse dignoſcitur. Semper enim in Præpoſito populus, aut corripitur, aut laudatur.**

13. Jam verò (quod ſecundo loco probandum erat ex Auguſtino) Petrum ratione ſui Primatus, geſſiſſe perſonam totius Eccleſiæ, &

omnium fidelium, docet idem Augustinus, E-  
narratione prima in Psalm. 108. statim in prin-  
cipio, ubi docet, Multa in Psalmo illo dici de  
Juda proditore, quę illi conveniunt, quatenus  
gerit personam Judæorum, Christi hostium:  
sicut etiam multa cōveniunt Petro, quatenus  
gerit Personam Ecclesię. Verba Augustini  
sunt hæc: *Sicut enim quadam dicuntur, quę ad A-*  
*postolum Petrum proprię pertinere videantur; nec*  
*tamen habent illustrem intellectum, nisi cum refe-*  
*runtur ad Ecclesiam, cujus ille agnoscitur in figura*  
*gestasse personam, propter Primatum, quem in Di-*  
*scipulis habuit &c.* Ita Judas personam quodam-  
modo sustinet inimicorum Christi judæorum &c.  
Ubi adverte, non eodem sensu, Petrum & Ju-  
dam sustinere personam cōmunitatis. Nam  
Judas propter nefariam prodicionem Christi,  
sustinet personam hostium Christi. Petrus  
propter Primatum Ecclesię, sustinet perso-  
nam ejusdem Ecclesię.

14. Et tract. 124. in Joannem, post medium,  
recitans illa verba ex Evangelio, *Dimitte nobis*  
*debita nostra, sicut & nos dimittimus debitoribus*  
*nostris;* mox subdit: *Hoc agit Ecclesia, spe beata in*  
*hac vita ærumnosa: cujus Ecclesia Petrus Apostolus,*  
*propter Apostolatus sui Primatum, gerebat figura-*  
*ta generalitate Personam. Quod enim ad ipsum*  
*proprię pertinet, naturā unus homo erat, gratiā u-*  
*nus Christianus, abundantiore gratia unus idem-*  
*que Apostolus. Sed quando ei dictum est: Tibi dabo*  
*claves regni Cælorum, universalem significabat*  
*Ecclesiam.* Hic quędam attribuit Petro, tan-  
quam

quam privato homini; ut quod fuerit naturâ unus homo; gratiâ unus Christianus; abundantiore gratia, unus Apostolus. Quædam verò, tanquam personæ publicæ; ut quod habuerit Primatum Ecclesiæ; quod ratione Primatus, gesserit personam Ecclesiæ, non particularis, sed generalis seu universalis; quod in persona Ecclesiæ universalis, acceperit claves regni cælorum. At tu, Marce Antoni, contra Augustinum doces, Primatum Ecclesiæ, qui à te confingitur, convenire Petro, tanquam privato homini, ratione ætatis & vocationis.

15. Et in lib. de Agone Christiano cap. 30. *Nusquam tam vigere debent viscera misericordiæ, quam in Catholica Ecclesia; ut tanquam vera Mater, nec peccantibus filius superbe insultet; nec correctis difficile ignoscatur. Non enim sine causa inter omnes Apostolos hujus Ecclesiæ Catholica personam sustinet Petrus. Huic enim Ecclesiæ claves regni cælorum data sunt, cum Petro data sunt. Et cum ei dicitur, ad omnes dicitur, Amas me? Pasce oves meas. Debet igitur Ecclesia Catholica correctis & pietatē firmatis filiis libenter ignoscere, cum ipsi Petro personam ejus gestanti; videamus veniam esse concessam. Ecce, Petrus sustinet personam Ecclesiæ Catholicæ. Et cum Petro datæ sunt claves non datæ sunt ipsi in privatum usum, sed pro bono totius Ecclesiæ. Et cum illi dictum est, Pasce oves meas, non illi soli, ut privato homini; sed omnibus illius successoribus dictum est.*

16. Denique, quod Petrus, quia sustinebat personam totius Ecclesiæ, solitus sit pro omni-

bus respondere, docet idem Augustinus serm. 31. de verbis Apostoli c. 2. *Respondit*, inquit, *Petrus unus pro omnibus, quia unitas in omnibus*. Et serm. 13. de verbis Domini c. 1. *Ipse enim Petrus, in Apostolorum ordine Primus, in Christi amore promptissimus, saepe unus respondit pro omnibus*. Ubi per illam particulam; In Apostolorum ordine Primus, intelligit Primatum Petri, non ratione ætatis aut vocationis, sed authoritatis & Præfecturæ, ut ipsemet ibidem explicat c. 2. cum ait: *Idem ergo Petrus à Petra cognominatus beatus, Ecclesia figuram portans, Apostolatus Principatum tenens*. De hac re dicam plura cap. sequenti. §. 16.

17. Ex dictis satis constat de sententia Augustini; nec quicquā video objici posse, quàm quòd lib. 1. c. 5. n. 10. objicis, illum dixisse serm. 47. de Sanctis Petro & Paulo: *Beatus Petrus Primus Apostolorum: Beatus Paulus novissimus Apostolorum*. Ex quo inferis, sicut Paulus fuit novissimus vocatione; ita Petrum fuisse primum vocatione: Ac proinde Primatum Petri nihil aliud esse, quàm Primatum vocationis. Sed jam suprà responsum est, c. 2. §. 21. Nam ibi dixi, Augustinum non connectere illa verba; sed uno loco asserere, Petrum esse Primum Apostolorum; altero, Paulum esse minimum Apostolorum. Non igitur necesse esse, ut quo sensu, unus dicitur minimus, eodem alter dicatur primus. Paulum vocari minimum, id est. indignissimum, propter sua peccata: Petrum vocari Primum, i. e. Principem, ratione Primatus seu præfecturæ.

18. Sed

18. Sed esto, dixerit Augustinus per modū connexionis, Petrum esse Primū, Paulum novissimum; non sequitur; eodem sensu utrumq; dictum esse. Dabo simile exemplum. Christus Marci 9.34. dixit: *Si quis vult primus esse, erit omnium novissimus, & omnium minister.* Ubi primus & novissimus in eadem sententia connectuntur; & tamen non sumuntur eodem sensu. Nam sensus est: si quis inter vos vult esse primus in gradu vel Prælatura, fiat novissimus, id est, humillimus in ministerio.

## CAPUT SEXTUM.

*Primatus Petri probatur ex  
prærogativis Petri.*

1. **C**Atholici assignant varia privilegia seu prærogativas Petri, ex quibus colligūt ipsius Primatum & eminentiam supra alios Apostolos: Non quòd unaquæque prærogativa per se sufficiens sit, ad astringendum Primatum; sed quòd omnes simul sumptæ id faciant. Sunt autē hæ præcipuè: 1. Quòd Christus soli Petro inter omnes Apostolos, proprium nomen mutaverit. 2. Quòd quando in Evangelio recēsentur nomina Apostolorum, semper primo loco ponatur Petrus. 3. Quòd scriptura loquatur de Petro, tãquam de Principe; de alijs Apostolis, tanquam de subditis. 4. Quòd Petrus sæpè loquatur nomine omnium Apostolorum, tanquam illorum Antesignanus.

gnanus. 5. Quod inter omnes Apostolos, soli Petro facta sit prima revelatio divinitatis Christi. 6. Quod soli Petro inter Apostolos promissa sit stabilitas fidei & cathedre. 7. Quod Christus pro solo Petro & seipso voluerit tributum solvi in Capharnaum. 8. Quod post Resurrectionē, inter omnes Apostolos, soli Petro primum apparuerit. 9. Quod Petrus sua auctoritate vocaverit alios ad electionem novi Apostoli, in locum Judæ proditoris. 10. Quod primus promulgaverit Judæis Evangelium, post acceptum Spiritum sanctum. 11. Quod primū miraculum apud Judæos fecerit, in confirmationem Evangelij. 12. Quod etiam primus predicaverit gentibus Evangelium: & quod ipsi soli oblata sit visio cœlestis de vocatione gentium. 13. Quod primus in Concilio Hierosolymitano sententiam dixerit.

2. Certè, hæ prærogativæ, ut alias omit-  
tā, manifestè ostendūt, aliquid peculiare fuisse in Petro, quod in alijs Apostolis non fuerit. Quid a. illud sit, in eo dissentimus. Tu nihil aliud agnoscis, quàm Primatū ætatis, vocationis & fervoris. Nec putas aliud colligi posse ex prærogativis jã enumeratis. Sed erras, ut sæpe dixi. Primò, quia incertum est, an Petrus ætate omnes alios superaverit. Secundò, nec probare potes ex Evangelio, prius Petrum, quam reliquos ad Apostolatū vocatos esse. Tertiò, nec solus fervor charitatis fuit causa omnium istarū prærogativarū. Quæ omnia clarius patebunt, si singulas prærogativas expendamus.

*Prima*

*Prima Prærogativa Petri.*

3. **I**gitur prima Petri Prærogativa est, quòd Christus soli ipsi, inter omnes Apostolos, proprium nomen mutaverit. Nam cùm antea vocaretur Simon, postea vocatus est Cephass, id est, Petra (Joan. 1. 42.) quæ prærogativa illi communis est cum Abrahamo, qui cùm antea vocaretur Abram, id est, Pater excelsus, postea vocatus est Abraham, id est, pater multitudinis, seu multarum gentium (Genes. 17. 5.) Major tamẽ est Petri prærogativa, quàm Abrahami. Nam Petrus, idem nomen sortitus est, quod Christus. Cephass enim, & Syriacè, & Græcè sumi potest, teste Optato lib. 2. contra Parmenianum. Syriacè significat petram vel lapidem: Græcè, caput. Utroque nomine appellatus est Christus. Petra quidem seu lapis, super quem fundata est Ecclesia (Matth. 21. 24.) Caput verò, à quo regitur Ecclesia, sicut mulier à viro (Ephes. 5. 23.) Itaque per hanc nominis mutationem voluit Christus significare Petrum fore Caput & fundamentum Ecclesiæ, sicut ipse erat. Sed diversimodè. Nam Christus est Caput & fundamentum primarium; Petrus secundarium.

4. Tu respondes (lib. 1. c. 9. n. 1.) Ex hac nominis mutatione, non posse colligi Primatum. Primò, quia non solius Petri, sed etiam aliorum nomina mutata esse legimus. Secundò, quia alij Apostoli nō minus fuerunt petræ seu fundamenta Ecclesiæ, quàm Petrus, juxta il-

Iud Ephes. 2. 20. *Superadificati superfundamentum Apostolorum & Prophetarum, ipso summo angulari lapide, Christo Jesu.* Tertiò, quia quòd Petrus fuerit Caput aliorum, non arguit Primatum potestatis aut jurisdictionis, sed tantum ætatis aut vocationis. Fuit enim Caput illorum, eo sensu, quo primogenitus est caput suorum fratrum.

5. Hęc responsio nulla est. Non n. dicimus, ex sola nominis mutatione, colligi Primatum Petri, sed ex omnibus prærogativis simul sumptis. Deinde falsum est, aliorum Apostolorum propria nomina à Christo mutata esse. Tamen enim duo filij Zebedæi, Jacobus & Joannes, vocati sint à Christo Boanerges, id est, filij tonitruï, hoc tamen nomen non erat propriū, sed ambobus commune. Quod autem Matthæus vocatus sit Levi, & similiter Judas vocatus sit Thadaeus; non est factum per mutationem, sed per primam nominis impositionem.

6. Ubi obiter hæc duo distinguenda sunt: 1. Impositio vel mutatio nominis ab hominib. facta. 2. Impositio vel mutatio nominis à Deo facta. Et quidem homines ferè solent tripliciter mutare vel imponere nomina. 1. ex eventu; & sic fere factum est in lege naturæ. 2. ex nominibus parentum vel cognatorum; & sic factum fuisse in lege Mosaica, colligitur ex illo Luca 1. 61. *Nemo est in cognatione tua, qui vocetur hoc nomine.* 3. ex nominibus, vel parentum, vel cognatorum, vel Sanctorum in cælo existentium; & sic passim fit hoc tempore.



7. At Deus non solet alicui imponere vel dare nomen, nisi ad significandū aliquod mysterium, quod paucis contingit. In Novo Testamento contigit Christo, Joanni Baptista, & Petro. Nescio an alicui alteri. De Christo legimus Luc. 1. 30. *Et ait Angelus ei: Ne timeas Maria: invenisti enim gratiam apud Deum. Ecce concipies in utero, & paries filium, & vocabis nomen ejus Jesum: Hic erit magnus.* De Joanne Baptista ibidem v. 13. *Ait autem ad illum Angelus: Ne timeas Zacharia, quoniam exaudita est deprecatio tua: Et uxor tua Elisabeth pariet tibi filium, & vocabis nomen ejus Joannem, &c. Hic erit magnus coram Domino.* Denique de Petro, Joan. 1. 42. *Intuitus eum Jesus dixit: Tu es Simon filius Jona: Tu vocaberis Cephas, quod interpretatur Petrus.* Ubi etiam, ut in duobus præcedentibus exemplis vel addi, vel intelligi debet: *Et eris magnus.*

8. Et quidem de mysterio, quod latebat in impositione nominis Jesu & Joannis, nihil dicam hoc loco. Res nota est, & alibi tractanda. De mysterio autem, quod Catholici agnoscunt, in mutatione nominis Petri, scribit Augustinus tract. 7. in Joannem, post medium his verbis: *Magnum, quia mutavit ei nomen, & fecit de Simone Petrum.* Et infra: *Si hoc antè Petrus vocaretur, non ita videres mysterium Petra, & putares casu eum sic vocari, non providentia Dei. Ideo voluit eum aliud prius vocari, ut ex ipsa commutatione nominis, Sacramenti vivacitas commendaretur.* Et Leo Magnus Epist. 87. ad Episcopos provinciae Viennensis, de Petro sic loquitur:

*Hunc enim in consortium individue unitatis assumptū, id quod ipse erat, voluit nominari, dicēdo, Tu es Petrus, & super hanc Petram edificabo Ecclesiam meam* (quæ verba cap. 4. explicata sunt.) Et serm. 3. de Assumptione sua ad Pontificatū, introducit Christum loquentem ad Petrum: *Sicut meus Pater tibi manifestavit divinitatem meam; ita & ego tibi notam facio excellentiam tuam, quia tu es Petrus, id est, cum ego sim inviolabilis petra, ego lapis angularis, qui facio utraque unū; ego fundamentum, prater quod nemo potest aliud ponere: tamen tu quoque petra es, quia mea virtute solidatus, ut quæ mihi, potestate sunt propria, sint tibi mecum participatione communia.* Et Prosper Aquitanicus lib. 2. de vocatione gentium, cap. 28. *Quis ergo ambigat, quis ignoret, hanc fortissimam petram, quæ ab illâ principali Petra communionem, & virtutis sumpsit, & nominis? &c.*

9. Hic vides, Marce Antoni, quid Patres sentiant: Et quæ in longè absis ab illorum sententia, qui mylterium, quod illi Magnum agnoscunt, parvi æstimas. Porro quod addis, alios Apostolos non minus esse petras seu fundamenta Ecclesiæ, quàm Petrum, temerarium est. Audi. Constat ex Scriptura, & Christum, & Petrum, & reliquos Apostolos vocari fundamentum seu petram, super quam Ecclesia edificata est; sed diverso modo. Solus Christus est fundamentum primarium, quod sua firmitate consistit, juxta illud 1. Corinth. 3. 11. *Fundamentum aliud nemo potest ponere, prater id, quod positum est, quod est Christus Jesus.* Præter Christum,

stum, Prophetæ & Apostoli sunt fundamenta secundaria, Ephes. 2. 20. *Superedificati super fundamentum Apostolorum & Prophetarum, ipso summo angulari lapide, Christo Jesu.* Nam illi, per prædicationem fidei & doctrinæ Christianæ, sustentant Ecclesiam: Vel, quod idem est, illorum doctrinæ & prædicationi incumbit Ecclesia. Et reliqui Christiani super illorum fidē & doctrinam superædificantur. Inter secundaria verò, primum locum tenet Petrus, cui speciatim dictum est, *Tu es Petrus, & super hanc Petram ædificabo Ecclesiam meam, & porta inferi non prævalebunt adversus eam.* Ubi aliquid peculiare illi promittitur, quod alijs Apostolis promissum non est. Nimirum firmitas, constantia, & stabilitas, quæ per petram significatur. Quæ etiam alibi alijs verbis illi promissa est, Luc. 22. 32. *Ego pro te rogavi Petre, ut non deficiat fides tua, & tu aliquando conversus, confirma fratres tuos.*

10. Igitur Christus est fundamentum Ecclesiæ primarium, & (ut loquitur Augustinus in Psalm. 86.) *fundamentum fundamentorum.* Est lapis angularis, qui connectit inter se duos parietes, id est, Judæos & gentiles (Ephes. 2. 12. & seqq.) est ostium seu janua, per quam ingredimur in Ecclesiam, (Joann. 10. 9.) Apostoli & Prophetæ sunt fundamentum secundarium, quia illorum doctrina & prædicatione fundatur in Christo: quem Prophetæ futurum prædixerunt; Apostoli præsentem annunciarunt. Hoc peculiare habet Petrus, quod ipse cum

fuis Successoribus habeat prærogativam constantiæ & firmitatis in fide, quam reliqui Apostoli cum suis successoribus non habuerunt. Ipsi quidem in suis proprijs personis manserunt constantes (excepto Juda) sed in Successoribus defecerunt. Sola Cathedra Petri habet hoc privilegium. De quo plura dicturus sum in sexta prærogativa.

11. Jam verò, quod tertio loco objicis, ex eo, quod Petrus fuit Caput Apostolorum, non posse colligi Primatum potestatis, sed tantum ætatis aut vocationis; & frivolum est, & sæpè refutatum. Non audes negare, quod omnes boni authores asserunt, Petrum fuisse Caput Apostolorum. Quid ergo? Fingis ideo Caput fuisse, quia erat ætate senior, vocatione antiquior. Nimirum, ut tollas Primatum, qui certus est; excogitas alium, qui incertus est.

### *Secunda Prærogativa.*

12. **A**ltera prærogativa est, quod quando in Evangelio recensentur nomina Apostolorum, semper primo loco ponatur Petrus, tanquam Princeps & Antesignanus, ut Matth. 10. 2. *Duodecim Apostolorum nomina sunt hæc: Primus, Simon qui dicitur Petrus, &c.* Idem fit Marc. 3. 16. & Luc. 6. 14. & Act. 1. 13. Tu respondes, ut soles, (lib. 1. cap. 9. n. 2.) Petrum primo loco nominari, quia erat primus ætate & vocatione. Nondum id probasti. At ego facile probem, fuisse Primum autoritate & jurisdictione.

risdictione: sic enim Patres explicant illā particulam, *Primus*. Et ratio sumitur ex ipso contextu. Nam si Petrus, in ista enumeratione Apostolorū, diceretur *Primus* ordine ætatis aut vocationis; tunc reliqui, qui ponūtur post Petrum, ponerentur etiam, juxta ordinem ætatis aut vocationis. At hoc falsum est. Imò, nullus ferè inter eos, servatur ordo. Nam apud Matthæum, post Petrum, nominatur Andreas: apud Marcum, non Andreas, sed Jacobus: apud Lucam in Actibus, Joannes. Idē fit in reliquis Apostolis. Aliquando Matthæus præponitur Thomæ, aliquando postponitur. Et sic deinceps. Debet ergo assignari causa, quare Petrus semper nominetur primo loco; reliqui nullo certo ordine. Nec potest alia dari, quam quod Petrus nominetur, ut superior; reliqui, ut inter se æquales, & solo Petro inferiores.

13. Et sanè, quod Petrus, ratione ætatis, non ponatur primo loco (etiam si demus fuisse seniore omnibus, quod tamen non damus) facile convincam ex tua ipsius concessione. Fateris, Petrum, quia Senior erat, fuisse quasi primogenitum inter Apostolos; Ac proinde, sicut primogenitus solet primo loco numerari inter fratres, ratione primogenituræ; ita de Petro statuendum esse. At contrarium ostendam ex scriptura. Nam Ruben (quo exemplo tu uteris) fuit primogenitus inter duodecim filios Jacob: Et tamen non semper nominatur primo loco, ut patet Apoc. 7. 5. ubi Judas illi præponitur. Nec defunt similia Exempla. In-

ter filios Isai, primogenitus fuit Eliab, & præfertur illi David (1. Reg. 16.) Rursum inter filios David, Adonias fuit senior Salomone, & tamen præfertur ei Salomon (4. Reg. 2.) Ergo ex eo, quod aliquis ætate senior est, non statim sequitur, alijs præferendum esse. Unde ergo probas, Petrum, eo titulo, quia senior erat, primum locum inter Apostolos obtinuisse? Non video.

### *Tertia Prærogativa.*

14. **T**ertia prærogativa est, quòd scriptura loquatur de Petro, tanquam de Principe; & de alijs Apostolis tanquam de subditis. Marc. 1. 36. *Et persecutus est eum Simon; & qui cum ipso erant.* Et Luc. 8. 45. *Dixit Petrus, & qui cum illo erant.* Et Luc. 9. 32. *Petrus verò, & qui cum illo erant.* Et Act. 2. 14. *Stans Petrus cum undecim.* Et alibi sæpius. Quimodus loquendi usitatus est in scriptura, & significat Principem cum suis subditis, ut manifestè constat ex sequentibus testimonijs. 1. Reg. 30. 4. *David, & populus, qui erat cum eo.* Et infra v. 9. *David & sexcenti viri, quierant cum eo.* Et 2. Macchab. 8. 1. *Judas Macchabeus, & qui cum illo erant.* Et cap. 10. 1. *Macchabeus autem, & qui cum eo erant.* Et cap. 11. 6. *Ut autem Macchabeus, & qui cum eo erant.* Et Apoc. 12. 7. *Michael & Angeli ejus praeliabatur.* Sicut ergo ex hac loquendi forma rectè colligimus, Davidem, Judam Macchabæum, & Michaellem Archangelum fuisse Principes respectu eorum qui cum ipsis erant: Sic etiam

col-

colligimus ex simili loquendi forma, Petrum fuisse Principem Apostolorum.

15. Hic iterum repetis tuam cantilenam, non alium Primatum ex hac prerogativa colligi posse, quam ætatis & vocationis. At jam ostendi, ex modo loquendi scripturæ, plus colligi posse ac debere. Nisi forte existimes, etiam Michaellem, Davidem, & Judam Macchabæum, non alio titulo, quam ætatis aut vocationis suos socios præcessisse. Quod ridiculum est. Nam inter Angelos, alius alio senior non est, nec unquam probabis ex scriptura, Michaellem ante alios ad officium Angelorum à Deo vocatum esse. Idem dico de Davide & Macchabæo. Non probabis, utrunque, & ætate, & vocatione ad militiam, suos socios superasse. Sicut nec de Petro id hætenus probare potuisti. Mera figmenta sunt, quæ adfers.

#### *Quarta Prærogativa.*

16. **Q**uarta prærogativa est, quod Petrus sæpè loquatur nomine omnium Apostolorum, tanquam illorum Antesignanus, ut Matth. 16.  
 15. Dicit illis Jesus: vos autem, quem me esse dicitis? Respondens Simon Petrus, dixit: Tu es Christus filius Dei vivi. Et Matth. 19. 27. Ecce nos reliquimus omnia & secuti sumus te Et Luc. 12. 41. Domine, ad nos dicit hanc parabolam, an ad omnes? Et Joan. 6. 68. Dixit ergo Jesus ad duodecim: nūquid & vos vultis abire? Respondit ei Simon Petrus: Domine, ad quem ibimus? Verba vita æterna habes.

17. Ex his Patres colligunt Primatum Petri

tri Cyrillus Alexandrinus lib. 4. in Joannem. c. 18. *Per unum, qui praeerat, omnes respondent. Et lib. 12. c. 64. Cum Salvator à Discipulis quareret: Vires autem, quem me esse dicitis? Petrus ut Princeps Caputque ceterorum, primus exclamavit. Tu es Christus filius Dei vivi. Et aliter Cyrillus Hierosolymitanus, catech. 11. Omnibus Apostolis reticentibus (supra vires enim erat hac doctrina) Petrus Princeps Apostolorum, & supremus Ecclesiae Præco, dicit ad ipsum, Tu es Christus filius Dei vivi. Et Paulus Emissenus Homil. de Christi Nativitate: Nonne Petrus, Apostolorum Coryphaeus, eorundemq; os respondit, Tu es Christus filius Dei vivi. Et Cyprianus lib. 1. Epist. 3. ad Cornelium, longè ante medium: Petrus tamen, super quem aedificata ab eodem Domino fuerat Ecclesia, unus pro omnibus loquens, & Ecclesiae voce respondens ait: Domine, ad quem ibimus? Augustinus idem sentit, ut cap. præcedenti ostensum est.*

18. Habemus similia exempla in scriptura. Nā Christus, quia erat supremus Princeps omnium, sepè loquebatur pro alijs. Verbi gratia. Quando Pharisei quærebant ex Apostolis: *Quare cum publicanis & peccatoribus manducat Magister vester?* Respondit Christus ipso- rum nomine: *Non est opus valentibus medicus, sed male habentibus* (Matth. 9. 11.) Item cum ijdem Pharisei Apostolis spicas Sabbatho vellentibus dicerent: *Quid facitis, quod non licet in Sabbathis?* Respondit pro illis Christus: *Nec hoc legistis, quod fecit David cum esurisset ipse, &c. (Luc. 6. 2.)* Et sic deinceps.



## Quinta Prærogativa.

19. Quinta est, quòd inter omnes Apostolos, soli Petro facta sit primà revelatio Divinitatis Christi Matth. 16. 17. *Beatus es Simon Barjona, quia caro & sanguis nō revelavit tibi, sed Pater meus, qui in cælis est. Quare præ cæteris beatus? Quia præ cæteris, à Patre cœlesti revelatum illi erat, Tu es Christus filius Dei vivi.* Magnum sine dubio privilegium. De quo Hilarius in Ps. 131. Athanasius serm. 4. contra Ariános, Augustinus serm. 124. de tempore, Leo serm. 3. de Assumptione sua ad Pontificatum.

20. Tu tamen, tuo more, conaris hoc Petri Privilegium extenuare (lib. 1. cap. 9. n. 4.) & tria objicis. Primò, Nathanaëlem citiùs quàm Petrum, confessum esse Divinitatem Christi, cùm dixit Joann. 1. 49. *Rabbi tu es filius Dei, tu es Rex Israel* Secundò, Joannem Baptistam, & citiùs, & meliùs, quàm Petrum id fecisse. Joan. 3. 30. *Illum oportet crescere, me autem minui.* Denique ipsum Petrum, antequam faceret hanc confessionem, *Tu es Christus filius Dei vivi*, jam antea cum alijs Apostolis agnovisse Christi Divinitatem, Joan. 6. 70. *Et nos credidimus, & cognovimus, quia tu es Christus filius Dei.*

21. Nihil efficis, Marce Antoni. Nam primò, quod adfers de Nathanaële, incertum est, an ipse eodem sensu, quo Petrus, dixerit, *Tu es Christus filius Dei.* Multi negant, asserentes Petrum locutum esse de Filio Dei naturali; Nathanaëlem de Filio Dei adoptivo. Plus igitur

Petrum confessum esse, quàm Nathanaëlem. Hunc, solam sanctitatem & justitiam: Illū, Divinitatem confessum esse. Ita Chrysostomus Homil. 20. in Joannem, Theophylactus & Eutymius in c. 21. Joannis. Quos sequitur Cardinalis Bellarminus. Tu contrā sentis, utrumq; tam Nathanaëlem, quàm Petrum, confessum esse Christi Divinitatem. Et probas autoritate Augustini tract. 7. in Joannem, Chrysostomi Homil. 19. in Joannem, & Cyrilli lib. 12. thesauri cap. 15.

22. Sed falsò. Nam Chrysostomus Homil. 19. (quam tu citas) nihil habet, quod juvare te possit. At Homil. 10. (quam ego cito) planè cōtra te est. Verba ejus sunt hæc: *Et si iſdē verbis, & Petrus, & Nathanael uſi ſint, non tamen idē ambo ſenſerunt: Sed Petrus Filium Dei, tanquam verū Deum, Nathanael, tanquam hominem tantū cōſeſſus eſt, quod ex conſequentibus conſtat. Addit enim, Tu es Rex Iſrael. Filius a. Dei, non modò Iſrael, ſed univerſi orbis terrarum Rex eſt. Quod etiam inde oſtenditur, quòd Petro nihil amplius addidit Chriſtus, ſed tãquam perfectò in fide, Eccleſiam ſuā ejus teſtimonio adificaturum pollicitus eſt Nathanaeli a. tanquã potiori in parte deficienti ſubdidit: Amen Amen dico vobis, amodo videbitis cælum apertum, & Angelos Dei aſcendentes & descendentes ſuper filium hominis. Animadvertis, quomodo cum à terra paulatim erigit? quomodo animum excitat, ne amplius ſimplicem hominem conjeſtetur? Cui n. Angeli miniſtrant, & ſuper quem aſcendunt & descendunt, quonam pacto hominem eſſe exiſtimabitur?*

23. Nunc

23. Nunc vides imposturam tuam in citando Chrysostomō. Certe Chrysostomus nō solum asserit, quod Bellarminus asserit, sed etiam validis argumentis confirmat. Quod etiā facit Theophylactus in cap. 1: Joannis, ubi sic scribit: *Nathanael igitur, auditis illis, cepit sentire magnitudinem Domini; quantum tunc possibile erat, & fatetur illum filium Dei. Veruntamen, quāvis filium Dei fateatur, non tamen sicut Petrus. Nā Petrus quidem confessus est Filium Dei: ideo & beatus pradicatur, & Ecclesia ei concreditur. Nathanael verò, ut hominem nudū quidem cum fatetur; gratia autem propter virtutem; adoptatum in Filium Dei. Et hoc manifestum est ex eo, quod subditur: Tu es ille Rex Israel. Vides, quod nondum venerat ad perfectam cognitionem vera Deitatis Unigeniti. Etenim quasi amicum Dei, & quasi Regem Israel, eum credit esse. Quod si verē eum Deum esset confessus, non dixisset, eum Regem Israel, sed Regem Universi. Unde non pradicatur beatus, sicut Petrus. Et Dominus corrigens eum, & inducens ad cognoscendum quiddam dignum sua Deitate; Videbitis, inquit, Angelos Dei ascendentes & descendentes super filium hominis. Ne enim, inquit, suspiceris nudum hominem, sed Dominum Angelorum. Cui enim Angeli ministrant, is utique non fuerit purus homo, sed verus Deus.*

24. Eadem fraude usus es in citando Augustinō. Nam ille quidem loco citato, sic scribit de Nathanaele: *Talem vocem protulit, Tu es Filius Dei; Tu es Rex Israel: Qualem tantū post Petrus, quando ei Dominus ait: Beatus es Simon*

*Barjona, quia caro & sanguis non revelavit tibi, sed Pater meus, qui in cælis est.* Hic nihil aliud dicit, quàm Nathanaëlem protulisse talem vocem, qualem Petrus protulit: quod etiam dicit Chrysostomus. An autem eo sensu protulerit, non dicit tibi Augustinus. Cur ergo fingis hoc illum dicere? Audi verò, quid dicat, serm. 124. de tempore: *Hic est Petrus, inquit, qui divina revelatione, prior omnium veritatē meruit confiteri, dicens Tu es Christus Filius Dei.* Ubi nota particulam illam, *Prior omnium.* Quam etiam ponit Athanasius serm. 4. contra Arrianos.

25. Sed esto: Demus tibi (quod necesse nō est) Nathanaelem prius, quàm Petrum, confessum esse Christi Divinitatem: demus etiam Joannem Baptistam (de quo certius est) idem fecisse. An ideo sublatum putas Petro suum privilegiū? Nullo modo. Manet illi suum Privilegium commune quidem cum Joanne & Nathanaele, sed tamen proprium, respectu Apostolorum, cum quibus illum hoc loco conferimus. Nam ille prius quàm alij Apostoli, confessus est Christi Divinitatem: Ille præ alijs Apostolis meruit audire à Christo, *Beatus es Simon Bar Jona.* Nec obstat, quòd idem Petrus, ante illam confessionem, de se & alijs Apostolis dixerit: *Nos credidimus & cognovimus, quia Tu es Christus Filius Dei vivi;* nam etiā inde colligitur, Petrum, sicut præ alijs loquebatur, ita ante alios credidisse, & cōfessum esse Christi Divinitatem. Quod tu ipse concedis lib. 1. c. 5. n. 4. ubi cum Ambrosio tribuis Petro Pri-

matum

matum confessionis, & Primatum fidei. Unde etiam manifestè constat, te, studio contradi-  
cendi Catholicis, tibi ipsi contrarium esse:  
Nam loco citato contendis contra Catholi-  
cos, Petrum non habere Primatum potestatis  
aut jurisdictionis, sed fidei & confessionis. At  
cap. 9. n. 4. ubi contra Catholicos oppugnas  
Privilegia Petri, negas Petrum Primum esse  
inter Apostolos, qui Christi Divinitatem cre-  
diderit, & confessus sit. Hoc solenne tibi est.

26. Queritur hîc, non à te, sed ab alijs bo-  
nis authoribus: Cùm Petrus bis confessus fue-  
rit Christi Divinitatem; semel Joan. 6. 70. *Nos  
credidimus; quia tu es filius Dei;* & semel Matth.  
16. 16. *Tu es Christus Filius Dei vivi;* cur priori  
loco nullam meritis sit laudem à Christo; po-  
steriori verò dictum illi sit, *Beatus es Simon Bar-  
Jona?* Respondeo. Hoc ideo factum est, quia  
priori loco multi ex discipulis discedebant à  
Christo, & non credebant, quæ ab ipso dice-  
bantur de manducanda sua carne, & bibendo  
suo sanguine. Unde postea dicebat, *Nunquid  
& vos vultis abire?* Tunc respondit Petrus: *Nos  
credidimus & cognovimus, quia tu es Christus Fi-  
lius Dei.* Ne ergo Petrus, si à Christo laudare-  
tur, præferret se alijs, qui recesserant à Chri-  
sto, & sibi de sua perseverantia blandiretur;  
noluit illum Christus laudare. At posteriori  
loco, non erat occasio Superbiæ; ideoque di-  
xit illi Christus, *Beatus es Simon BarJona.* Vide  
Theophylactum & Toletum in c. 1. Joannis.

## Sexta Prærogativa.

27. **S**exta est; quòd soli Petro, inter omnes Apostolos promissa sit constantia fidei, & cathedræ. Et quidem duobus locis. Primò, Matth. 16. 18. *Tu es Petrus, & super hanc Petram ædificabo Ecclesiam meam, & porta inferi non prævalebunt adversus eam.* Deinde, Lucæ 22. 32. *Ego pro te rogavi Petre, ut non deficiat fides tua.* Quòd ad priorem promissionem attinet, juxta Hebraicum textum, quo Matthæus scripsit Evāgelium, non est illa generis differentia inter Petrum & Petram, sed utrobique eodem genere dicitur: *Tu es Petra, & super hanc Petram ædificabo Ecclesiam meam.* Perinde ac si dicas: *Tu es Petra, supra quam ædificabo Ecclesiam meā.* Unde manifestum est, per petram non posse aliud intelligi, quàm ipsum Apostolum Petrum, qui est quasi lapis, seu petra fundamentalis, super quam ædificata est Ecclesia. Et quamvis non solus Petrus, sed etiam reliqui Apostoli sint lapides fundamentales, ita ut simul sint Duodecim (juxta illud Apoc. 21. 14. *Et murus civitatis, id est, Ecclesiæ, habens fundamenta duodecim, & in ipsis duodecim nomina duodecim Apostolorum Agni*) tamen reliquis Apostolis, & illorum Successoribus, non est promissa constantia & firmitas, quæ Petro & illius Successoribus promissa est. Unde Cathedra Petri & Successorum ejus adhuc firma consistit, nec in ea hætenus defecit fides Catholica, ut benè advertit Augustinus in Psalmo, contra partem

tem Donati, ubi ait: *Numerate Sacerdotes, vel ab ipsa Petri Sede: Et in ordine illo Patrum, quis cui successit, videte Ipsa est Petra, quam non vincunt superbi inferorum portæ.* At Cathedræ aliorum Apostolorum, quia non habuerunt hanc promissionem in Successoribus, pridem collapsæ sunt, ut Cathedra Jacobi Hierosolymitana; Cathedra Joannis Ephesina; Cathedra Matthæi Æthiopica; Cathedra Andreæ Scythica.

28. Quod autem per petram, super quam Ecclesia ædificata est, debeat intelligi Petrus Apostolus, docent antiqui Patres. Origenes Homil. 5. in Exodum: *Vide, magno illi Ecclesiæ fundamento & Petra solidissima, super quam Christus fundavit Ecclesiam, quid dicatur à Domino.* Et in Psalm. 1. *Petrus, super quem Christi Ecclesia ædificata est, contra quam inferorum portæ non prevalebunt.*

Et Basilii Magnus ad cap. 2. Isaia: *Unus ex his montibus fuit Petrus, quem Petram appellavit, propter maximam firmitatem fidei, propter infractum animi robur ad non cedendum inflictis plagis tentationum: super quam Petram promisit ædificare Ecclesiam suam.* Et lib. 2. contra Eunomium: statim ex hac voce, *Petra*, intelligimus Petrum Joannæ filium, qui fuit ex Bethsaida, Andreæ fratrem, qui quoniam fide præstabat, Ecclesia sibi commissam ædificationem suscepit.

Et Epiphanius in Ancorato: *Ipse Dominus constituit Petrum Primum Apostolorum, Petram firmam, super quam Ecclesia Dei ædificata est, & portæ inferorum non valebunt adversus illam.*

Et Chrysostomus Homil. in Petrum & Heliam: *Sed vide, cuiusmodi peccato permisit subiici Petrum, illum talem ac tantum virum Apostolorum verticem, fundamentum immobile, & petram stabilem, qua non posset concuti.*

Et Cyrillus lib. 2. in Joannem cap. 12. *Intuitus autem eum Iesus dixit: Tu es Simon filius Jona, tu vocaberis Cephas, &c. Vocabulo ipso commodè significans, quod in eo, tanquam in Petra lapideque firmissimo, suam esset adificaturus Ecclesiam.*

Et Theophylactus ad cap. 16. Matthæi. *Remunerat Petrum Dominus, mercedem illi dans magnam, quod super eum adificavit Ecclesiam.* Et ad cap. 22. Lucæ. *Tu verò conversus confirma fratres tuos. Planus hujus intellectus hic est: Quia te habeo, ut Principem Discipulorum, postquam negato me flevieris, & ad pœnitentiam veneris, confirma ceteros. Hoc enim te decet, qui post me Ecclesiæ petra es, & fundamentum.*

Et Hieronymus in cap. 16. Matthæi: *Secundum Metaphoram Petra, rectè dicitur ei, Adificabo Ecclesiam meam super te.*

Et Cyprianus lib. 4. Epist. 9. ad Pupianum, post medium: *Loquitur illic Petrus, super quem adificanda fuerat Ecclesia.*

Et Augustinus serm. 15. de Sanctis. *Petrum itaq; fundamentum Ecclesiæ Dominus nominavit, & ideo dignè fundamētum hoc Ecclesiæ colit, supra quod Ecclesiastici adificij altitudo consurgit.*

29. Ex horum Patrum autoritate constat, Petrum esse fundamentum Ecclesiæ, esse Petram solidam firmam, stabilem, immobile, super



superquam Ecclesia Christi fundata est. At objicis, non deesse alios Patres, qui per petrā non intelligunt ipsum Petrum, sed fidem seu confessionem Petri. Respondeo. Utrumque intelligunt, & Petrum ipsum, & confessionē Petri. Nam cum asserunt, Ecclesiam fundatā esse super fidem & confessionem Petri, volūt significare, fundatam esse super Petrum, propter illius fidem & confessionem, ut rectē notat Cardinalis Bellarminus lib. 1. de Pontifice c. 10. circa finem, & Maldonatus ad c. 16. Matthæi. Et modus ille loquendi utilitatus est. Usitatē enim dicimus, in unius hominis prudentia & fidelitate fundatam esse Rempublicam, id est, in uno homine, propter ipsius prudentiam & fidelitatem. Item, valetudinem Imperatoris pendere à peritia unius medici, i. e. ab uno Medico, propter insignem illius peritiam.

30. Sed iterum objicis (lib. 1. cap. 6. n. 14. & seqq.) hanc explicationem non esse secundū mentem illorum Patrum. Nam illos loqui de fide, abstrahendo à persona Petri. Et sic omnino loquendum esse, probas hac ratione: *Fides in Petro, vel est ratio finalis, cur Petrus sit fundamentum; & sic ubique, ubi erit illa fides, erit fundamentum: vel est tantum conditio, sine qua Petrus non esset fundamentum; & sic locutio est valde impropria.* Respondeo. Apertē pugnas cum scriptura, quæ Christum, Apostolos, & Prophetas vocat fundamenta Ecclesiæ, ut dictum est. Si ergo Christus est fundamentum, si Apostoli & Prophetæ sunt, cur Petrus esse non possit?

Et, si super Christum, Apostolos, & Prophetas ædificata est Ecclesia, cur supra Petrum ædificari non potuit? Aut è contrario, si fundamentum Ecclesiæ non est Petrus, sed fides separata à persona Petri; cur non simili modo dicis, nec Christum, nec Prophetas, nec Apostolos esse fundamentum Ecclesiæ, sed aliquid aliud separatum ab illorum persona? Hic responde, si potes.

31. Ratio, quam adfers, nihil efficit. Primo, quia non sequitur, quod inferis in priori membro; Si fides in Petro est finis, propter quem Petrus est fundamentum: Ergo ubicunque est fides, ibi erit fundamentum. Sicut in simili non sequitur; Si sanitas est finis, propter quem sumitur medicina: Ergo ubicunque est sanitas, ibi est medicina. Sed suspicor mēdum esse in tuo exemplari, & pro illa particula, *Ratio finalis*, ponendam esse istam, *Ratio formalis*. Sed tunc, omisso priori membro, negandum est quod inferis in posteriori, de impropria locutione. Jam enim ostendi, usitatè dici posse, Petrus est Petra Ecclesiæ propter confessionem fidei. Denique, præter duo membra, quæ assumis, datur tertium, nempe, confessio fidei est causa moralis, propter quam Petrus est Petra Ecclesiæ. Sicut virtus est causa moralis, propter quam aliquis eligitur in Episcopum. Et meritum Christi est causa moralis nostræ justificationis: Et intercessio Principis est causa moralis, propter quam quis admittitur in aulam Imperatoris. Nam Petrus per  
con-

confessionē fidei, quodammodo meritus est, ut fieret Petra Ecclesiæ. Et hoc sensu loquuntur Patres. Maximus Taurinensis Homil. 3. in natali Apostolorum Petri & Pauli: *Quanti, inquit, meriti apud Dominum suum Petrus erat, ut ei totius Ecclesiæ gubernacula traderentur.* Et Theophylactus ad cap. 16. Matthæi: *Remunerat Petrum Dominus, mercedem illi dans magnam, quod super eum edificavit Ecclesiam.* Et alij.

32. Sed ut magis percipias, quā inepta sit tua ratio, duo quærā ex te: Unum, si fides, abstrahendo à Personā Petri, est fundamentum Ecclesiæ, ut tu vis; vel abstrahis illam à solo Petro, vel ab omnibus universim. Si à solo Petro, & non ab alijs, quid causæ? Si ab omnibus, non erit ratio, cur Apostoli potius dicantur fundamenta Ecclesiæ, quàm alij Christiani. Quæ enim esse potest, si fides est fundamentum, abstrahendo ab omnibus? Alterum, quo sensu Christus dicatur esse fundamentum? An agnoscis aliquid in Christo, quod sit fundamentum Ecclesiæ, abstrahendo à persona Christi? An verò aliquid, quod sit ratio formalis vel conditio, sine qua Christus non esset fundamentum? Hic credit tua quæstio. Ad quam responde. Sin minus, paulo post ego respondebo.

33. Quod objicis, Patres loqui de fide separata à Petro, partim falsum est; partim illorum sententiam non assequeris. Falsum est de ijs, qui apertè asserunt, Petrum esse fundamentum Ecclesiæ propter confessionem fidei. Reliquos non intelligis. Ut intel-  
ligas,

ligas, explicandum est, quomodo Christus, quomodo Petrus, quomodo reliqui Apostoli, quomodo item fides dicatur esse fundamentum Ecclesiæ. Igitur hæc tria distinguenda sunt. Primò, fides in Christum, quæ in eo consistit, ut credas Christum esse filium Dei, verum Deum ac verum hominem. Secundò, confessio illius fidei, de qua Apostolus Rom. 10. 10. *Corde creditur ad justitiam, ore autem confessio fit ad salutem.* Tertiò, prædicatio ejusdem fidei, de qua ibidem vers. 14. *Quomodo credent ei, quæ non audierunt? Quomodo autem audient sine prædicante? Quomodo vero prædicabunt nisi mittantur?* Juxta hanc distinctionem, hæc tres propositiones veræ sunt. Prima Christus est primum fundamentum Ecclesiæ, ratione fidei circa ipsius Divinitatem & incarnationem. Secunda, Petrus est secundarium fundamentum Ecclesiæ, ratione confessionis illius fidei, quæ fecit dicendo: *Tu es Christus Filius Dei vivi*: habens annexam promissionem stabilitatis pro se & suis Successoribus. Tertia, Apostoli sunt secundaria fundamenta Ecclesiæ post Petrū, ratione prædicationis ejusdem fidei in Christum: non habentes annexam promissionem stabilitatis in suis Successoribus.

34. Juxta primam propositionem intelligendum est illud 1. Corinth. 3. 11. *Fundamentum aliud nemo potest ponere, præter id, quod positum est, quod est Christus Jesus.* Ubi Christus dicitur fundamentum, ratione fidei circa ipsius Divinitatem, ut explicat Gregorius lib. 7. Epist.

pist. 47. Anshelmus, Cornelius de Lapide, & alij in commentario illius loci: Quod intelligunt de fide viva, quæ per charitatem operatur, ut loquitur idem Apostolus ad Galat. 5. 6. Verba Gregorij sunt hæc: *Fundamentum aliud nemo potest ponere &c. Quisquis ergo in dilectione Dei & proximi fidei, qua in Christo est, firmitatem tenet, eundem Jesum Christum, Dei & hominis filium, apud se posuit fundamentum.*

35. Juxta secundam intelligendum est illud Matth. 16. 17. *Beatus es Simon Bar-jona, propter confessionem fidei, quam Deo Patri inspirante fecisti, dicens: Tu es Christus filius Dei vivi.* Propter hanc confessionem, *super te, tanquam petram firmam ac stabilem, ædificabo Ecclesiam meam: Et porta inferi non prævalebunt adversus eam.* Quare? quia confessio fidei, quam fecisti, nunquam defectura est in te & Successoribus tuis. Ex enim pro te rogavi, ut non deficiat fides tua.

36. Juxta tertiam intelligendum est illud Ephes. 2. 20. *Super ædificati super fundamentum Apostolorum & Prophetarum, id est, super Apostolos & Prophetas, qui propter prædicationem fidei in Christum sunt fundamenta Ecclesiæ secundaria.* Et super hæc fundamenta proximè & immediatè superædificantur alij Christiani, qui per illorum prædicationem ad fidem Christi convertuntur. Vide Cornelium de Lapide ibidem.

37. Ex dictis facile intelligi & conciliari possunt Patres, quos adduxisti. Nam aliqui loquun-

loquuntur de fide Christi, juxta primam propositionem. Et sic fides separari potest à Petro, non tamen à Christo, qui est principale objectum illius fidei. Sic loquitur Bernardus Epist. 194. cum ait: *Testante Apostolo, sicut unus Deus, una fides esse dignoscitur, in qua, tanquam immobili fundamento, præter quod, nemo aliud potest ponere, firmitas Ecclesie Catholice inviolata consistit.* Alij loquuntur de confessione fidei, juxta secundam propositionem: Et sic fides non potest separari à Petro, quia solus Petrus est, qui propter hanc fidei confessionem meritus est appellari Petra seu fundamentum Ecclesie. Sic loquitur Stephanus Papa à te citatus ex Baronio: *Catholica, inquit, Christi & Dei nostri Ecclesia, fundata super firmam Petram, Apostoli videlicet Petri confessionem.* Et plures alij.

38. Maneat igitur certum fixumque, sextam Petri Prærogativam in eo consistere, quod ipsi soli cum suis Successoribus, non autem reliquis Apostolis cum suis Successoribus, promissa sit constantia fidei & cathedræ: Et quòd ideo dicatur firma petra, super quam ædificata est Ecclesia nunquam ruitura.

### Septima Prærogativa.

39. **S**eptima est, quòd Christus pro solo Petro & seipso, non pro alijs Apostolis, voluerit tributum, nempe staterem seu didrachmum solvi in Capharnaum Matth. 17. 26. *Da eis pro me & te.* Nimirum, ut ostenderet, Petrum alijs præferendum esse, & ipsum solum cum  
Chri-

Christo, tanquam Vicarium cum suo Domino sociandum, ut explicant Augustinus lib. quæstionum Veteris ac Novi Testamenti q. 75. Hieronymus ad cap. 18. Matthæi, circa initium, Theophylactus ibidem, Chrysostomus Homil. 59. in Matthæum, & alij plures. Ponam illorum verba.

40. Augustinus sic scribit: *Salvator autem, cum pro se & Petro dare jubet didrachma, pro omnibus exsoluisse videtur; quia sicut in Salvatore erant omnes causæ Magisterij, ita & post Salvatorem in Petro omnes continentur. Ipsum enim constituit Caput eorum, ut esset Pastor gregis Dominici.*

Hieronymus sic: *Post inventum staterem, post tributa reddita, quid sibi vult Apostolorum repentina interrogatio: Quis putas major est in regno cælorum? Quia viderant pro Petro & Domino idem tributum redditum, ex aequalitate pretij arbitrati sunt, Petrum omnibus aliis Apostolis esse prelatum; qui in redditione tributi, Domino fuerat comparatus. Ideo interrogant: Quis major sit in Regno cælorum?*

Theophylactus sic: *Quia viderant Petrum à Christo honoratum, (honoratus enim erat hic, dando staterem pro Christo & pro se) & propterea humanum quiddam passi, invidiaque accensi, obliquè accedunt interrogantes Dominum, quis maximus esset?*

Chrysostomus circa illa verba, *Da eis pro me & te*, sic subjicit. *Vidisti honoris excellentiam. Vide nunc, quanta Philosophia utitur Petrus. Hunc enim locum Marcus, qui Petri Discipulus fuit, id-*

eo videtur non scripsisse, quoniam ingens hinc honor Magistro deferbatur. Sed negationem quidem ille diligentissime scripsit: Hac verò, qua ad Augustini laudem pertinent, ipso forte ita volente, omnino siluit. Et paulo post: humanum quid passi Discipuli sunt, quod Evangelista quoque significavit dicens: In illa hora, quando sc. illis omnibus Petrum prætulit. Nam cum & Jacobus & Joannes primogeniti essent, nihil tamen tale pro ipsis fecisse videtur. Et paulo post: Quando certos præferri conspexerunt, (ut in transfiguratione Petrum, Jacobum & Joannem) nihil tale passi sunt. Cum verò ad unum delatus est honor, tunc mirum doluerunt. Quamvis non ex hac re solum, sed ex aliis quoque multis inflammati fuerunt: tum, quia dixit illi, Dabo tibi claves regni cælorum: tum, quia, Beatus es Simon Barjona, tum etiam hic, Da eis pro me & te: tum denique, quia libenter cum multis cum Christo colloqui conspiciebant.

41. Quid tu verò ad hæc omnia, Marce Antoni? Primò, repetis solennem tuam responsionem, nihil aliud hinc colligi posse, quam Petrum propter Primatum ætatis & vocationis, fuisse alijs prælatum. Agnoscis ergo prælatum esse. Erras tamen, ut sæpe dixi, id factum esse propter Primatum ætatis & vocationis. Nam incertum est, an Petrus fuerit Primus omnium ætate. Et falsum est, ante alios omnes vocatum esse ad Apostolatam.

42. Deinde, sigillatim hæc dicis de Augustino, Hieronymo & Chrysostomo. Primò, incertum esse, an Augustinus sit autor illius libri.



libri. Autorem verò; quisquis sit, nihil aliud voluisse, quàm Petrum fuisse Caput, id est. Primum & quasi Procuratorem cæterorum: Aut, si plus voluit, audiendum nō esse. At plus voluit sine dubio. Voluit Petrū esse Caput & Pastore gregis Dominici. Voluit omnes causas Magisterij, quæ erant in Christo, fuisse etiā in Petro. An ideo, quia hoc voluit, audiendus non est? Vide ne tu audiendus non sis.

43. Secundò ais, Hieronymum, post verba superius citata, addidisse etiam hæc: *Videntique Jesus cogitationes eorum; & causas errorum intelligens, vult desiderium gloriæ, humilitatis contentione sanare.* Itaque ex Hieronymi sententia, errasse Apostolos, existimantes Petrum sibi prælatum, tanquam verè Dominum, Principem & Monarcham. Respondeo. Apostoli in uno errabant; in altero non errabant. Non errabant in eo, quòd putarent Petrū sibi præferri. Hoc enim manifestè constabat ex varijs signis, quæ Chrysostomus paulò ante attigit. At in eo errabant, quòd putarent illum, nō solum eo tempore sibi præferri, sed etiam postea in temporali Messie regno, quod somniabant, fore præferendum. Atque hæc est Bellarmini sententia, quam tu frustra oppugnas.

44. Ut autem melius intelligatur, notandum est Apostolos ter, ut minimum, contendisse de Primatu. Primò, in via, quando post transfigurationem ibant Capharnaum. Secundò, postquam venissent Capharnaum. Terriò, quando postea ibant Hierosolymam.

De prima contentione scribit Marcus cap. 9. 32. *Et venerunt Capharnaum. Quicum domies-  
sent, interrogabat eos: Quid in via tractabatis? At  
illi tacebant. Si quidem in via inter se disputave-  
rant, quis eorum major esset.* Fortasse ex ea occa-  
sione, quod Petrus, Joannes, & Jacobus, non  
item reliqui, fuissent cum Christo seorsim in  
transfiguratione. De secunda scribit Matthæ-  
us cap. 18. 1. *In illa hora (cùm solutum erat tri-  
butum pro Christo & Petro) accesserunt Disci-  
puli ad Jesum dicentes: Quis putas major est in re-  
gno cælorum? Jam nova erat occasio, propter  
solutionem tributi in qua Petrus videbatur om-  
nibus alijs præferri.* De tertia scribit idem  
Matthæus cap. 20. 20. *Tunc accessit ad eum ma-  
ter filiorum Zebedæi cum filiis suis, adorans & pe-  
tens aliquid ab eo. Qui dixit ei: Quid vis? At illi:  
Dic ut sedeant hi duo filij mei, unus ad dextram  
tuam, & unus ad sinistram in regno tuo.* Et infra:  
*Et audientes decem, indignati sunt de duobus fra-  
tribus. Jesus autem vocavit eos ad se, & ait: Scitis,  
quia Principes gentium dominantur eorum &c.  
Non ita erit inter vos. Sed quicumque voluerit in-  
ter vos major fieri, sit vester minister, &c.*

45. Nunc quæstio est, de quo Primatu to-  
ties contenderint Apostoli? Tu putas conten-  
disse de Primatu Ecclesiastico; quis scilicet eo-  
rum, post mortem Christi, futurus esset ipsius  
Vicarius, qui omnibus alijs despoticè præf-  
set. Et in eo ipsos errasse, & à Christo correctos  
esse, cùm talis Primatus nulli conferendus es-  
set, sed omnes futuri essent æquales. Hoc tuū  
figmen-

figmentum est, mi frater, quo conaris Primatum Petri suspectum facere apud lectorem. Meliores autores, quam tu es, aliter sentiunt: Nimirum, putasse Apostolos, temporale Christi regnum, quod ipsi imaginabantur, jam appropinquare; & in eo cum ipso se regnatos: ideoque disputasse, quis in illo regno proximus post Christum futurus esset. Et quia in eo errabant, à Christo correctos esse. Quam dixi esse Bellarmini sententiam lib. 1. de Pontifice. c. 19. in fine. Et tu ipse, ut soles esse inconstans; eandem sequeris lib. 1. c. 11. n. 1:

46. Et probatur Primo, ex illis verbis: *Dic, ut sedent hi duo filij mei, unus ad dextram tuam, & unus ad sinistram, in regno tuo.* Vel, ut Marcus habet, *in gloria tua.* Per regnum Christi intelligebant regnum hujus vitæ, quo putabant Christum potiturum, ut explicat Chrysostomus Homil. 66. in Matthæum, ubi ait: *Quid porro est, quod petunt? aliud te docebit Evangelista.* Nam quoniam, inquit, prope Jerusalem erant, credebantque regnum Dei jam jam eventurum, quod hujus vitæ ac seculare opinabantur; hac postulabant, ut ob honorem facilius etiam omnia pericula possent evitare. Propterea Christus ab his eos cogitationibus abducens, pericula, sanguinem necemque ipsam expetendam esse jubet. Potestis, inquit, bibere calicem, quem ego bibo? Et infra: Volabant autem, ut ego conjicio, quoniam super duodecim sedes sessuros Discipulos audierunt, primatum hujus concessus impetrare: Et praponi quidem se ceteris, praterquam Petro, sciebant, quem formidantes,

*dicere ausi sunt, Dic ut unus à dextris, alter à sinistris sedeat Quid igitur ipse? ut significaret nihil eos pectere Spirituale, sed nec scire quidem quid postulerent; nescitis, ait, quid petatis.*

47. Similiter Theophylactus in cap. 20. Matthæi: *Opinabantur filij Zebedæi, quòd vadens Hierosolymam Dominus, regnaturus esset regno quodam temporali. Audierant enim eum sæpe dicentem: Ecce ascendimus Hierosolymam.*

Et Hieronymus (de cuius sententia disputamus) in cap. 20. Matthæi: *Unde opinionem regni habet mater filiorum Zebedæi, ut cum Dominus dixerit (Filius hominis tradetur Principibus Sacerdotum & Scribis, & cõdemnabunt eum morte, & tradent ad illudendum, & flagellandum, & crucifigendum) & ignominiam passionis timentibus Discipulis nunciaret; illa gloriam postulet triumphantis: Hac, ut reor, ex causa. Quia post omnia dixerat Dominus: (& tertia die resurget) putavit eum mulier post Resurrectionem ilico regnaturum. Vides, Marce Antoni, Hieronymum loqui de regno temporali, non secus ac Chrysostomum & Theophylactum. In eo solum ab ijs differre; quòd ipsi regnum illud temporale, ex opinione Apostolorum, interpretentur ante mortem Christi: Hieronymus. post Resurrectionem.*

48. At unde conceperant Apostoli hanc opinionem de instante temporali regno Christi? Ex duplici, ut apparet, Christi testimonio. Unum est, Matth. 16. 27. Marc. 8. 39. & Luc. 9. 27. *Amen dico vobis; sunt quidam de hic stantibus, qui non gustabunt mortem, donec videant Filium homi-*

*hominis venientem in regno suo.* Alterum, Matt. 20. 18. Marc. 10. 33. & Luc. 9. 44. *Ecce ascendimus Hierosolymam, & Filius hominis tradetur Principibus Sacerdotum, &c.* Ex priori colligebant, regnum Christi jam proximè instare. Et quia putabant sedem regni debere esse Hierosolymæ, ubi David & alij Reges habitaverant; simulatque Christus dixit; *Ecce ascendimus Hierosolymam*, persuasi sunt, jam jam regnum Hierosolymæ inchoandum esse, & in eo regno, se varia officia habituros. Contendebant igitur, quis supremum habiturus esset.

49. Dicit fortè aliquis, Apostolos ex posteriori testimonio, contrarium debuisse colligere, nempe Christum Hierosolymæ moriturum, non regnaturum; quia de morte sua clarè loquebatur, nulla facta regni temporalis mentione. Respondeo. Id quidem debuissent colligere Apostoli, si intellexissent sensum verborum Christi. At non intellexerunt, ut fateatur Lucas loco citato, cum ait: *At illi ignorabant verbum istud, & erat velatum ante eos.* Loquitur de illo verbo, *Filius hominis tradetur Principibus Sacerdotum*; ubi de morte & passione Christi agitur. Igitur ex ignoratione hujus verbi, ortus est error Apostolorum, existimantium, Christum ascendere Hierosolymam ad possidendum regnum temporale, de quo putabant illū antea locutum esse, cum dixerat: *Sunt aliqui de hic stantibus, qui non gustabunt mortem, donec videant filium hominis venientem in regno suo.*

50. Tertiò ais, Hieronymum, cum dixit;

*Ex aequalitate pretij, arbitrati sunt Apostoli, Petrum ipsis prælatum; videri supponere, etiam pro cæteris Apostolis tributum fuisse solutum, sed minus, quam pro Christo & Petro. Contra quod dictum tria objicis: 1. non constare, pro cæteris solutum esse. 2. nec etiam constare, alios plus, alios minus, pro dignitate personarum, solitos esse solvere. 3. Imo constare, omnes omnino, cujuscunque ætatis ac conditionis essent, debuisse æquale pretium persolvere, juxta illud præceptum Domini, Exod. 30. 5. *Dives non addet ad medium Sicli, & pauper nihil minuet.* Nam ex hoc præcepto pendere solutionem didrachmæ, juxta communem opinionem.*

§ 1. Similiter reprehendis Chrysostomum triplici titulo: 1. Quòd unum præceptum pro alio per errorem sumplerit, nempe præceptum Siclorum pro primogenitis solvendorum, pro præcepto didrachmi. 2. Quòd *in sua leviuscula inadvertentia perseverans*, prælaturam Petri super alios, colligat ex eo, quia tributum primogenituræ pro ipso est solutum, nõ pro alijs. 3. Quòd dixerit Jacobum & Joannem fuisse primogenitos, cum tamen fuerint fratres, qui simul primogeniti esse non possunt.

§ 2. Quæ hîc objicis contra hos Patres, parum ad rem faciunt. Solùm quæritur hoc loco, an Petrus in solutione didrachmi fuerit prælatus alijs Apostolis? Isti Patres nobiscum affirmant. Quid vis amplius? Ex quo autem præcepto jussu sit dari didrachmum, nihil pertinet ad hanc quæstionem. Sed tamen,  
quia

quia litem de hac re moves, dicam. Invenio triplex tributum, quod ex præcepto debebant Judæi persolvere. Unum, quod tenebātur dare in usum templi. Exod. 30. 13. Alterum, quod dabant pro primogenitis, Num. 3. 46. Tertiū, quod Augustus Imperator illis imposuit, cū jussit, ut universus orbis describeretur. Luc. 2. 1. Igitur tu affirmas solutionem didrachmi pertinere ad primum præceptum. Ego contrā assero, ad tertium pertinere. Mecum sentiunt Hieronymus, Beda, Maldonatus.

### Octava Prærogativa.

53. **O**ctava est, quod Christus post Resurrectionem, inter omnes Apostolos, soli Petro primū apparuerit. Sed duo objicis. Primò, id non adeò esse certum, quin negari possit. Ego contrā, adeò certum esse contendo, ut negari, nisi ab Apostata, non possit. Primo, quia reliqui Apostoli id fatentur, coram Discipulis duobus redeuntibus ex Emmaus, Luc. 22. 34. *Surrexit Dominus verè, & apparuit Simoni.* Certè, si ipsis etiam apparuisset, dixissent sine dubio, *Apparuit nobis.* Et clarissimè Paulus, 1. Corinth. 15. 4. *Resurrexit tertia die secundum scripturas, & visus est Cepha, & post hoc undecim.* Quasi dicat, primū visus est ipsi Cepha, & postea, alio tempore, visus est alijs. Et tu ausis hoc negare? Audi Chrysostomum in illum locum: *Itaque Petro primū apparet. Nam qui Christum primus confessus*

*fessus erat, non abs re primus etiam resurgentem videt. Et ibidem: Itaque non omnibus initio visus est, nec pluribus simul, sed unitantum, & ei Principi, & fide maxime digno.*

54. Secundò ais, Christum duplici de causa, inter Apostolos, primùm apparuisse Petro: 1. quia Petrus erat primus ordine, vocatione, & ætate, inter Apostolos. 2. Quia maximè omnium indigebat consolatione, propter ingentem dolorem ex trina negatione conceptum. Sed quæro: An quod hic asseris, adeò certum sit, ut negari non possit? Si negari potest, nihil efficis. Si negari non potest, nec illud negari potest, primam apparitionem, inter Apostolos, soli Petro factam esse. Cur ergo paulo antè dixisti, negari posse? Nihil apud te constans est. Deinde, sit ita. Christus apparuerit primùm Petro propter causas à te assignatas; An idèò prærogativa non est? At non tanta, inquires, ut ex ea Primatus Ecclesiasticus colligi possit. Neque nos ex hac sola prærogativa Primatum colligimus, ut initio dixi; & jam clariùs explicabo.

### *Reliqua Prærogativa.*

55. **H**Actenus adduxi eas prærogativas, quæ præcesserunt Primatum Petri: nunc reliquas adducam, quæ secutæ sunt. Priores, vel erant signa futuri Primatus, vel dispositiones præviæ, vel promissiones ad eundem obtinendum. Reliquæ sunt effectus, & quasi exercitia Primatus jam obtenti. Unde apparet, te priores



res non rectè oppugnare ex eo, quòd ex singulis seorsim sumptis, non possit evidenter convinci Primatus. Non necesse id est. Sufficit, si vel singulæ, vel omnes simul sumptæ, sint quædam signa, vel dispositiones ad futurum Primatum. Accipe simile exemplum. Quando Rex, vel Imperator vult alicui dare supremam Aulæ præfecturam, non solet reipsa dare, nisi prius illum præ alijs habuerit commēdatum, tum in familiari conversatione, tum in officijs regni vel Imperij, tum in legationibus & similibus Prærogativis. Quare hoc? Quia per hujusmodi præambula, partim vult illum dispo- nere ad supremam præfecturam; partim signifi- care, se illum præ alijs magnificare, & ad su- premam dignitatem promovere velle: Ne, si subitò, & quasi ex abrupto id faciat, videatur temere sine consilio, & cum invidia aliorum, facere. Sic fecit Christus. Voluit Petro dare supremam Ecclesiæ præfecturam: Sed non voluit sine prævijs signis & dispositionibus, ut in simili jam explicatum est.

56. Ex hac declaratione manifestè con- stat, quo sensu nos Catholici colligamus Pri- matum Petri ex prærogativis, quæ Primatum præcesserunt. Planè eo sensu, quo id faciunt prudentes viri in simili casu. Sic enim illi so- lent ratiocinari. Rex noster cogitat de supre- mo aulæ Præfecto constituendo. Quis ille fu- turus est? Certè non alius, ut apparet, quàm Eustachius. Nam præ reliquis, illi uni familia- ris est; soli sua consilia communicat; solum ad

legationes obeundas adhibet; soli promissionem facit; denique in omnibus primum locū illi tribuit. Nō possumus aliud statuere, quā quòd illum unicum, & non alium ad supremā præfecturam destinaverit. Res vulgo nota est. Et miror, si hīc velistergiversari.

57. Sed notior fiet ex alijs prærogativis, quæ ex Primatu, tanquam effectus ex sua causa, vel quasi functiones consecutæ sunt. Nam Petrus, postquam suprema Ecclesiæ præfectura illi commissæ est, per illa verba, *Pasce oves meas*, mox cœpit illam ad praxin applicare, & varios ejus actus exercere. Ac 1. convocavit omnes Discipulos ad electionem novi Apostoli in locum Judæ proditoris. 2. Primus promulgavit Evangelium Hierosolymis. 3. Primus fecit miraculum Hierosolymis ad confirmandum Evangelium à se promulgatum. 4. Primus etiam prædicavit gentibus Evangelium. 5. Primus sententiam dixit in concilio Hierosolymitano. Quæ omnia fecit ex auctoritate sibi à Christo concessa. Et propter hanc causam Paulus Apostolus venit Hierosolymam, ut Petrum, tanquam universalis Ecclesiæ Pastorem, coram videret, ut ipsemet de se fatetur in Epist. ad Galat. cap. 1. 18. De his singulis etiam aliquid dicendum est. Igitur, ut in eo, quem cœpimus, ordine, persistamus.

## Nona Prærogativa.

58. **N**ona prærogativa est, quòd Petrus cõvocaverit omnes Discipulos ad electionem novi Apostoli, Act. 1. 15. *In diebus illis, exsurgens Petrus in medio fratrum, dixit. Viri fratres, oportet impleri scripturam, &c.* Hic est primus actus præfecturæ Petri. De quo Chrysostomus Hom. 3. in Acta: *Quàm est fervidus Petrus: Quàm agnoscit creditum à Christo gregem: Quàm in hoc choro Princeps est: Et ubique Primus omnium incipit loqui.* Et infra ibid: *Merito primus omnium auctoritatem usurpat in negotio, ut qui omnes habeat in manu.* Et Occumenius ad cap. 1. Acto- rum: *Surgit Petrus, non Jacobus, ut is, cui præsentia Discipulorum commissæ erat. Neq; ullus orationi Petri contradixit, sed mox ad ejus præceptum constituerunt duos, quos dignissimos eo gradu existimabant, ut unum eorum Deus ipse designaret.*

59. Hic multa objicis contra illos duos Patres, quos vides tibi adversari. Nam illi dicunt, Petrum fuisse Principem eorum omniũ, qui aderant in electione Matthiæ; habuisse eos in manu sua; agnovisse illos tanquam gregem à Christo sibi concreditum; usurpasse in eos auctoritatem; eos vicissim ad illius præceptum fuisse promptos & expeditos. Hæc omnia tibi desipiunt, mi Antoni. Quare? Quia astruunt Primatum Petri, quem tu ferre non potes. Quid ergò consilij? aggredieris ipsos Patres, & quos ratione superare non potes, calumnijs opprimendos censes. Igitur

60. Primò objicis: Chrysostomum oratoricè magis, quàm Theologicè locutum esse. Sed dic obsecro, verum an falsum locutus est? Si verum, quid murmuras? Si falsum, cur apertè non dicis? nisi fortè, quicumque oratoricè loquitur, falsum: qui Theologicè, verum loqui censerì debeat.

61. Secundò objicis, illa verba Chrysostomi, *Petrus agnoscit creditum à Christo gregem*, frustra & otiose ab eo dicta esse; quia Petrus tantum agebat ibi de adimplendo numero collegij Apostolici. Hoc autem collegium nò pertinebat ad gregem Petro concreditum. Erras, mi frater. Nam sub ista voce, *Pasce oves meas*, qua Petro grex Christi concreditus est, comprehenduntur etiam Discipuli Christi. Igitur & illi Petro concrediti sunt. De qua re suprà actum est: Et simul obiter notata tua levitas ac inconstantia, qui modò omnes Christi fideles, modò omnes exceptis Apostolis, modò solos Israelitas, ovium nomine comprehensos esse, commentus es.

62. Tertiò objicis, Actum Petri, quo convocavit Discipulos ad electionem novi Apostoli, non fuisse Actum pasturæ; & ideo etiam ex hac parte, Chrysostomum impertinenter dixisse illa verba, *Petrus agnoscit gregem sibi creditum*. Iterum erras. Actus pasturæ varij sunt, ut cap. 3. ex Ezechiele demonstratum est. Eò te remitto.

63. Quartò objicis, Chrysostomum sibi ipsi contradicere. Quod sic ostendis. Ex una parte

parte dicit, Petrum fuisse Principem in choro Discipulorum: Ex alia proponit hanc quaestio- nem: *Cur Petrus non postulaverit solus à Christo, ut ipsi daret aliquem in locum Judæ substituendum?* Et eam paucis his verbis solvit: *Jam Petrus erat seipso factus melior.* Ex quibus tu, miro artificio, connectis has argutias: *Ergo Petrus, ex sententia Chrysostomi, fuisset arrogans, si hoc praesumpsisset. At factus melior Christi reprehensionibus, & proprio casu, noluit tantum audere. Arrogantia tamē & praesumptio non fuisset, si Petrus relictus fuisset à Christo Monarcha totius Ecclesiae: ad ipsum enim spectasset ministrorū ordinatio.* Unde inferis, Petrum ex sententia Chrysostomi, nō esse supremum totius Ecclesiae Pastorem, ideoq; Chrysostomum sibi ipsi contradicere. Sed, ut candidè dicam, quod res est, fingis Chymæras ex tuo capite, de quibus ne quidem somniavit Chrysostomus. Quaestio Chrysostomi hæc est: *Quare Petrus convocavit omnes Discipulos, ut communi orationis suffragio postularent aliquem à Christo, in locum Judæ substituendum? Quare non ipse solus postulavit?* Respō- sio est: *Quia Petrus erat seipso factus melior.* Quasi dicat, Quo quis melior est, eò humilior: Quò humilior, minoris se æstimat: Ac proinde, si aliquid à Deo petendum est, plus fidit communi omnium orationi, quàm suæ solius privatæ. Quamvis ergo Petrus potuisset solus à Deo postulare substituendum, maluit tamē communi aliorum suffragio id facere. Quid hīc mali est? Nihil, præter tuas ineptias.

64. Quintò objicis aliam Chrysoſtomi contradictionem, ex illis ipſius verbis: *Iam & illud considera, quàm Petrus agit omnia ex communi Discipulorum omnium ſententia; nihil auctoritate ſua, nihil cum imperio.* Unde inferſ; Petrum non fuiſſe Principem Discipulorum, quod tamen antea dixerat Chryſoſtomus; ac proinde Chryſoſtomum ſibi iterum contradicere. Rectius dicam, te iterum Chymæras fingere. Sane ex verbis Chryſoſtomi apertè colligitur, Petrum fuiſſe Principē; ſed Principem modèſtum, qui cū poſſet ſua auctoritate & imperio agere, malit tamen Chriſti exemplum imitari. Si hoc non capis, accipe domeſticum exemplum. Si quis laudaret Regem Angliæ, & diceret, omnia illum agere ex communi Episcoporum omniū ſententia; nihil auctoritate ſua, nihil cū imperio: an tu ſtatim inferres: Ergo Rex non eſt? Cave ne feceris. Modeſtia Regum & Principum non obſtat, quo minus poſſint agere ex auctoritate & imperio, ſi neceſſe ſit.

65. Sextò objicis, Oecumenium improprie locutum eſſe, cū dixit: *Mox ad ejus præceptum conſtituerunt duos* Odiſti hanc vocem; *Præceptum.* Et paulo poſt addis: *Oecumenius de ſolo Primatu personali Petri eſt intelligendus*, id eſt, de Primatu ætatis & vocationis. Non ita eſt. Debet intelligi de eo Primatu, quem ipſemet clarè explicat. De eo, inquam, Primatu, cui conveniunt hæc duo: *Præſidentia Discipulorum, & Præceptum.* Expreſſè enim aſſerit, Petro commiſſam eſſe præſidentiam Discipulorum;

& Discipulos fecisse, quod à Petro præceptum erat. Quòd ais, improprie locutum esse, non credimus. Omitto similes tuas nugas.

### *Decima Prærogativa.*

66. **D**ecima Prærogativa est, Quòd Petrus post acceptum Spiritum sanctum, primus omnium promulgaverit Judæis Evangelium, Act. 2. 14. Sicut Moyses in Veteri Testamento primus omnium promulgavit legem Decalogi & Deuteronomium. Uterq; Actus pertinet ad Primatum. Nam sicut Moyses habebat Primatum Synagogæ, & ideo prælatus est alijs in promulgatione legis; ita Petrus habebat Primatum Ecclesiæ, & ideo prælatus est alijs in promulgatione Evangelij.

### *Vndecima Prærogativa.*

67. **U**ndecima est, Quòd Petrus primum miraculum fecerit in cōfirmationem Evangelij à se promulgati, sanando claudum ex utero matris, Actor. 3. 6. *In nomine Jesu Christi Nazareni, surge & ambula.* Quæ prærogativa non consistit in eo, quòd Petrus miraculum fecerit in confirmationem fidei, quia hoc omnes Apostoli fecerunt, Marc. 16. 20. *Illi autem profecti predicaverunt ubique, Domino cooperante, & sermonem confirmante, sequentibus signis:* sed consistit in alijs duobus. Primò in eo, quòd primum miraculum fecerit post promulgationem Evangelij. Hic non potes confugere ad Primatum ætatis & vocationis,

tionis, ut soles; quia ille Primatus nil facit ad patrandum miraculum: sed necessariò id tribuendum est Primatui autoritatis & potestatis, quem Christus voluit ostendere in Petro per primi miraculi patratiònem. Sicut etiam in Veteri Testamento, miraculo confirmavit Primatum Moyfis (Num. 16.) Ac deinde Primatum Aaronis (Num. 17.) Secundo in eo, quòd fecerit miraculum, non qualecunque, sed quòd claudum sanaverit, pedes ipsius consolidando. Hoc enim non caret mysterio, ut notat Ambrosius serm. 66. Nam per hoc, quòd pedes infirmi hominis firmavit ac consolidavit, significatum est, ipsum esse firmum ac solidum fundamentum Ecclesiæ.

### *Duodecima Prærogativa.*

68. **D**uodecima est, Quòd Petrus non solum apud Judæos, sed etiam apud gentiles, primus omnium promulgaverit Evangelium, & baptismum administraverit (Act. 10. 34.) Huic prærogativæ annexa est alia, quòd soli Petro ostensa sit visio, qua jubebatur gentilibus Christum annunciare (Act. 10. 10.) *Parantibus autem illis, cecidit super eum mentis excessus. Et vidit cælum apertum, & descendens vas quoddam, velut linteum magnum, quatuor initiis submitti de cælo in terrā, in quo erant omnia, quadrupedia, & serpentia & volatilia cæli. Et facta est vox ad eum: Surge Petre, occide, & manduca.*

69. Hic unum dicis de priori parte prærogativæ: duo de posteriori, nempe de visione Petro



Petrò exhibita. De priori, fateris insignē fuisse prærogativā Petri, quod primus annuncia-  
verit gentibus Evangelium: non tamen præ-  
rogativam Principatus, sed sollicitudinis ac  
diligentiæ, qua ceteros omnes superavit. At a-  
libi asseris, Paulum superasse omnes præroga-  
tiva sollicitudinis ac diligentia. Paulus autem  
jam erat Apostolus eo tempore, quo Petrus  
prædicavit Gentibus Evangelium. Ergo si illa  
fuit insignis prærogativa Petri, non fuit dili-  
gentiæ, sed Principatus.

70. De posteriori pronuncias hæc duo,  
quæ directè inter se pugnant. Primò, visionem  
illam fuisse privilegium, quo Petrus, tanquam  
senior & ferventior inter Apostolos, meruit  
decorari. Secundo, non fuisse privilegium, sed  
potius increpationem, quia cum Petrus esset  
nimium refractarius, & vix posset adduci ad  
vocationem Gentium, necesse fuit, ut per vi-  
sionem illam quasi compelleretur ad officiū.  
Itane, Marce Antoni? Jam antè dixisti, Petrū  
omnes alios superasse sollicitudine, diligen-  
tia, & fervore. Nunc dicis, fuisse refractarium  
& propterea increpatum ac reprehensum à  
Deo. Nusquam es constans.

71. Et ne conqueraris injuriam tibi à me  
factam esse, recitabo verba tua, quibus hanc  
contradictionem involvis. Sunt autem hæc:  
*Fuit insignis Petri sollicitudinis prærogativa; qua  
sollicitudine & indefessa diligentia Petrus ceteros  
facile superavit. Et mox de visione sic pergis:  
Fuit privilegium, quo primus & maximus natus ex*

L.

Aposto.

*Apostolis, & ferventissimus executor, meruit condecorari* Deinde, facta digressionem contra Bellarminum, quasi immemor verborum tuorum, sic concludis: *Hac visio plus simplicis instructionis, & quasi cujusdam increpationis, quam laudis & prerogative in Petro videtur innuere. Is enim Judaismo addictissimus, vix poterat in Gentilium vocationem ad divina filiationis gratiam inclinare. A qua illum aversione, ut Christus amoveret, nimium legalibus addictum, visione hac occurrit, non sine illa redargutione: Quod Deus purificavit, tu commune ne dixeris. Ac ne ipse, nimium fortasse in hoc refractarius videretur, ter visio illa, aut saltem hac vox repetita est. Jam vide, quomodo inter se cohæreant, quæ hic asseris.*

72. Taceo de injuria, quam Petro irrogas. Ais, fuisse Judaismo addictissimum; vix potuisse in gentilium vocationem inclinare; fuisse refractarium. Unde probas? Ex falsa scripturæ interpretatione: quasi ob hanc causam reprehensus fuerit his verbis: *Quod Deus purificavit tu commune ne dixeris.* Non ita est. Nam Petrus audita hac voce: *Occide & manduca;* respondit: *Absit Domine, quia nunquam manduca vi omne commune & immundum.* Deinde sequitur: *Quod Deus purificavit, tu commune ne dixeris.* Hoc tu interpretaris, quasi Petrus noluerit consentire in vocationem gentium, & quodammodo tueri refractarius. Absit. Nihil adhuc cogitabat de gentilibus; Quia nōdum intelligebat mysterium visionis. Solum asserbat, se nunquam comedisse animalia immunda,

da, quæ secundum legem Mosaicam, erant prohibita. Nec sciebat, per animalia immunda significari gentiles: Hoc postea intellexit: Et postquam intellexit, nunquam ostendit se refractarium circa gentium vocationem, sed promptum & expeditum.

### Decimatertia Prærogativa.

73. **D**ecima tertia est; Quod Petrus primo loco sententiam dixerit in concilio Hierosolymitano, Act. 15. 7. *Cum autem magna inquisitio fieret, surgens Petrus dixit ad eos: Viri fratres, &c.* Et quod omnes sententiam illius secuti fuerint: De quo Divus Hieronymus in Epistola ad Augustinum (quæ est undecima inter Epistolas Augustini) sic scribit: *In sententiâ ejus Jacobus Apostolus, & omnes simul Presbyteri transierunt.* Et Theodoretus in Epistola ad Leonein. *Paulus præco veritatis, tuba sanctissimi Spiritus, ad magnum Petrum cucurrit, ut iis, qui Antiochia de legalibus institutis contendeabant, ab ipso adferret solutionem.* Utique ab ipso, tanquam controversiarum judice.

74. Tria objicis. Primò, Petrum primo loco sententiam dixisse, tanquam Decanum collegij: idque ratione ætatis, non jurisdictionis. At, mi homo, Decanus collegij Canonico-  
rum (saltem in Germania) non est nomen ætatis, sed dignitatis: Et solet præsidere Capitulo, nō tanquam senior ætate (cū sæpe sit junior) sed tanquam superior jurisdictione.

75. Secundò objicis, Jacobum in Conci-

lio Hierosolymitano aliquid amplius decrevisse, quod Petrus non decreverat, nempe ab-  
 stinentiam à contaminationibus simulachro-  
 rum, & fornicatione, & suffocatis & sanguine.  
 Distinguo. Nihil amplius decrevit circa quæ-  
 stionem in concilio propositam: aliquid tamē  
 amplius circa alia, quæ non erant proposita.  
 Quæstio proposita erat hæc: An circumcisio  
 esset necessaria ad salutem ijs, qui ex Genti-  
 bus convertebantur ad fidem Christi? Re-  
 spondit Petrus non esse. Nec aliud respondit;  
 quia aliud non quærebatur. Quod etiam ser-  
 vatur à iudicibus secularium controversiarū.  
 Putant se abundè satisfecisse suo officio, si cla-  
 rè & directè respondeant ad id, quod à liti-  
 gantibus proponitur. Nihil ergo obstat, quod  
 Jacobus aliqua adjecerit, quæ à litigantibus  
 non erant proposita.

76. Tertiò objicis, Decretum in illo con-  
 cilio factum, non prodijisse nomine solius Pe-  
 tri, sed totius concilij, ut patet ex inscriptione:  
*Apostoli & seniores fratres, his qui sunt Antiochia.*  
 Respondeo. Si quæstio soli Petro fuisset pro-  
 posita, prodijisset decretum nomine solius Pe-  
 tri, sed quia toti cōcilio fuit proposita, debuit  
 prodire nomine totius cōcilij, cui Petrus præ-  
 sidebat. Idem fit in concilijs & Parlamentis se-  
 cularibus. Nam Decreta, quæ ibi fiunt non  
 prodeunt nomine solius Præsidis, sed nomine  
 Concilij vel Parlamenti.

77. Hæc sufficiant de prærogativis Petri:  
 quarum aliquæ, ut dixi, præcesserunt ipsius  
 Prima-

Primatum, tanquam signa vel dispositiones præviæ: aliæ secutæ sunt, tanquam effectus & executiones Primatus jam obtenti. Deinceps diluendæ sunt objectiones, quas magno studio ex alijs adversarijs transcripsisti, ut Petri & Pontificis auctoritati derogares. Impium hoc studium est, & à rebellibus usurpatum. Utinam in proximorum salutem id contulisses.

## CAPUT SEPTIMUM.

*Diluuntur objectiones Marci Antonij contra Primatum Petri.*

1. **M**ulta objicis, Marce Antoni, contra Primatum Petri: non quidem studio veritatis, quam agnitam oppugnas; sed Spiritu ambitionis, quo video te ad scribendum impulsus esse. Sunt autem hæc potissimum objectiones. 1. Ecclesia Apostolis omnibus æquæ à Christo commendata est. 2. Evangelium reprobatur Primatum inter Apostolos. 3. Ipsi Apostoli in Petro non agnoverunt Primatum. 4. Nec Petrus illum unquam exercuit. 5. Pauli reprehensio, qua Petrum objurgavit, destruit Primatum Petri. 6. Idem colligitur ex scriptis Pauli. 7. Et ex comparatione Petri & Pauli: Hæc est summa tuarum objectionum, quas ferè ex Bellarmino suffuratus es. Primam proponis lib. 1. cap. 3. Reliquas cap. 11. singulas eo ordine, quo propositæ sunt, discutiam.

## I. OBJECTIO.

*Ecclesia Apostolis omnibus fuit æquè à Christo commendata.*

2. **H**Oc probas dupliciter. 1. Ex Scriptura. 2. Ex Patribus. Ex scriptura sic: Christus dixit omnibus Apostolis: *Sicut me misit Pater, & ego mitto vos. Item, Euntes docete omnes gentes.* Omnibus ergo suam Ecclesiam commendavit. Quòd autem æquè omnibus, inde colligis, quia omnes æquè docuit & instruxit; omnibus æquè misit Spiritū sanctum in die Pentecostes. Respondeo. Prior pars argumenti vera est, quòd Christus commendaverit suam Ecclesiam omnibus Apostolis: posterior falsa est, quòd omnibus æquè commendaverit. Nā soli Petro dixit: *Pasce oves meas.* Igitur pastura omnium ovium, soli Petro, non alijs commēdata est. De quo suprā. Nec valet hæc tua consequentia: Omnes æquè instructi sunt, & æquè Spiritum sanctum acceperunt. Ergo unus non habet majorem jurisdictionem quàm alius. Nam aliud est loqui de doctrina & sanctitate; aliud de jurisdictione. Non omnes, qui pares sunt in doctrina & sanctitate, sunt etiam pares in jurisdictione. Alioqui Rex in regno, si non haberet majorem doctrinam & sanctitatem, quàm subditi, non haberet etiam majorem jurisdictionem. Nec tu, Marce Antoni, si haberes Sacellanum pari doctrina & sanctitate, nō esses illo superior, quoad jurisdictionem. Que  
omnia

omnia absurda sunt. Et ratio à priori est, quia jurisdictio per se non pendet à majori doctrina & sanctitate.

3. Nec fortasse verum est, quod asseris de æquali instructione. Nam Paulus Apostolus fuit raptus in tertium cælum, & audivit arcana verba, quæ non licet homini loqui. Quid si ille magis instructus fuerit, quàm reliqui Apostoli? Certè id admodum verisimile est. An ideo majorem habuit jurisdictionem, quàm alij Apostoli? Hactenus nemo id dixit.

4. Ex Patribus, pro æqualitate Apostolorum, adducis primo loco Cyprianum tract. de simplicitate Prælatorū, sive de unitate Ecclesiæ, ubi sic habet: *Hoc erant utique & ceteri Apostoli quod fuit Petrus, pari consortio præditi, & honoris & potestatis; Sed exordium ab unitate proficiscitur, ut Ecclesia una mōstretur.* Hunc locum valdè urges; in quo continentur duæ propositiones. Una de paritate Apostolorum: Altera de unitate. Et putas priorem secundum litteram non posse aliter explicari, quàm quòd omnes Apostoli fuerint pares in honore & potestate; ac proinde Petrus non habuerit plus potestatis, quàm ceteri. Si autem Catholici, inquis, volunt ex posteriori contrarium probare, videant, quomodo defendant Cyprianum à contradictione. Respondeo. Et prior, & posterior propositio vera est, sine ulla contradictione. Nam verum est, omnes Apostolos, antequam Petrus totius Ecclesiæ præfectus constitueretur per illa verba, *Pasce oves*

*meas*, fuisse inter se æquales in honore & potestate. Verum quoq; est, eundem Petrum, postquam præfecturâ Ecclesiæ accepit, fuisse majorem reliquis in honore & potestate. Et hoc significatur per *Exordium ab unitate*. Itaq; hic loc<sup>o</sup> Cypriani, nō tibi, sed nobis patrocinator.

5. Quod ut clarè percipias, scopus & intentio Cypriani explicanda est. Igitur hæc eo loco docet Cyprianus. Primo, Diabolum, post idololatriam, per Christi advētum sublatam, occulta quadam astutia circumvenire Christianos, ut possit illos in suas partes pertrahere: non jam iterum per idololatriam, sed per hæreses & schismata, quæ ab ipso in Ecclesia excitantur. *Quid verò, inquit, astutius, quidve subtilius, quàm ut Christi adventu deicēlus ac prostratus inimicus, &c. Videns idola derelicta, & per nimium credentium populum, sedes suas ac templa deserta, excogitaverit novam fraudem, ut sub isto Christiani nominis titulo fallat incautos? Hæreses invenit & schismata, quibus subverteret fidem, veritatem corrumperet, scinderet unitatem. Quos detinere non potest in via veteris cecitate, circumscribit & decipit novi itineris errore. Rapt de ipsa Ecclesia homines, & dum sibi appropinquasse jam lumini ac evasisse noctem seculi videntur, alias nescientibus tenebras rursus infundit, ut cum Evangelio Christi & cum observatione ejus & lege non stantes, Christianos se vocent, & ambulantes in tenebris, habere se lumen existiment, blandiente adversario atque fallente, &c.*

6. Secundo docet, ideo multos per astutiam



piam Diaboli fieri hæreticos & schismaticos, quia non conjungunt se Capiti & Pastori Ecclesiæ, à quo est origo veritatis. Relicto enim hoc Capite, necessarium esse, ut à veritate recedatur. *Hoc eo fit, inquit, fratres dilectissimi, dū ad veritatis originem non reditur, nec Caput quaeritur, nec Magistri cælestis doctrina servatur.*

7. Tertiū ait, se brevi compendio velle ostendere ex doctrina cælestis Magistri, quodnam sit hoc Caput, à quo est origo veritatis. Nam ostenso & retento hoc Capite, non erit amplius periculum recedendi à veritate. Ostendit autem ex verbis Christi, Petrum cum suis Successoribus esse hoc Caput. *Que si quis consideret, inquit, & examinet, tractatu longo atque argumento opus non est. Probatio est ad fidem facili compendio veritatis. Loquitur Dominus ad Petrum: Ego tibi dico, quia tu es Petrus, & super istam petram ædificabo Ecclesiam meam, & portæ inferorum non vincent eam. Tibi dabo claves regni cælorum &c. Et eidem post Resurrectionem suam dicit: Pasce oves meas.*

8. Mox objicit sibi ipsi in hunc modum: Christus omnibus Apostolis dedit æqualem potestatem: Ergo Petrus non est Caput Ecclesiæ. Et respondet, dedisse quidem omnibus æqualem potestatem, sed postea ex omnibus æquali potestate præditi, elegisse Petrum, ut esset Caput seu Monarcha Ecclesiæ; ut hac ratione caverentur schismata, quæ faciliè oriri solent inter æquales; & servaretur pax & unitas in Ecclesia, quæ facilius servatur, quando

est unum Caput, à quo omnes dependent. *Et quamvis*, inquit, *Apostolis omnibus post Resurrectionem suam, parem potestatem tribuat, & dicat: Sicut misit me Pater, & ego mitto vos: Accipite Spiritum sanctum &c.* tamen ut unitatem manifestaret, unitatis ejusdem originem ab uno incipientem, sua autoritate disposuit.

9. Hoc ipsum magis confirmat sequentibus verbis: *Hoc erant utique & ceteri Apostoli, quod fuit Petrus, pari consortio pradi, & honoris & potestatis; sed exordium ab unitate proficiscitur, ut Ecclesia una monstretur.* Quasi dicat: Omnes Apostoli, ante electionem Capitis (quæ facta est per illa verba, *Pasce oves meas*) erant quidem æquales; sed tamen Christus, quia voluit exordium Ecclesiæ sumere ab unitate Capitis, & regimen Ecclesiæ esse monarchicum, ex omnibus elegit Petrum, ut ipse esset Caput Ecclesiæ. Nam si in Ecclesia non esset unum Caput, cui reliqua membra obtemperarent; non posset Ecclesiæ corpus esse unum, sed membra sine Capite inter se dissiderent ac distraherentur.

10. Hinc infert Cyprianus, eos non habere veram fidem, sed fieri hæreticos & schismaticos, qui ab hac Capitis & corporis unitate recedunt. *Hanc*, inquit, *Ecclesia unitatem, qui non tenet, tenere se fidem credit? Qui Ecclesiæ renititur & resistit, in Ecclesia se esse confidit? Quod declarat per similia exempla. Nam sicut sunt multi radij solis, sed unum lumen: multi rami arboris, sed una radix: multi rivi*  
fontis

fontis, sed una origo; ita multa sunt membra Ecclesiæ, sed unum Caput. (Intelligit Petrum, de quo supra.) Et rursum, sicut radius solis avulsus ab unitate luminis, disparet: ramus à radice fractus, non germinat: rivus à fonte præcisus arefcit; ita schismatici & hæretici, qui se separant à Capite Ecclesiæ, id est, à Petro & illius Successoribus, non possunt retinere veram fidem & Charitatem. Ecclesia, inquit, una est, quæ in multitudinem latius incremento fecunditatis extenditur: quomodo Solus multi radij, sed lumen unum: & rami arboris multi, sed robur unum tenaci radice fundatum. Et cum de fonte uno rivus plurimi defluunt, numerositas licet diffusa videatur exundantis copia largitate, unitas tamen servatur in origine. Avelle radium solis à corpore, divisionem lucis unitas non capit. Ab arbore frange ramum, fractus germinare non poterit. A fonte præcide rivum, præcisus arefcet: Sic & Ecclesia Domini luce perfusa per orbem totum radios suos porrigit, unum tamen lumen est, quod ubique diffunditur, nec unitas corporis separatur: ramos suos in universam terram copia ubertatis extendit: profluentes largiter rivus latius expandit, unum tamen Caput est, & origo una, & una mater fecunditatis successibus copiosa. Illius fœtu nascimur, illius lacte nutrimur, Spiritus ejus animamur. Adulterari non potest sponsa Christi, incorrupta est & pudica. Unam domum novit, unius cubiculi sanctitatem casto pudore custodit. Hæc nos Deo servat, hæc filios regno, quos generavit, assignat. Quisquis ab Ecclesia segregatus adultera jungitur,

gitur, à promissis Ecclesia separatur. Nec pertinet ad Christi pramiam, qui relinquit Ecclesiam Christi. Alienus est, profanus est, hostis est. Habere jam nō potest Deū Patrem, qui Ecclesiam non habet matrem.

11. Ex hoc Cypriani discursu tria colligo: Primò, Apostolos quidem fuisse inter se & quales, antequam unum Caput à Christo constitueretur; sed illo semel constituto, nō amplius mansisse pares. Secundò, omnes recedere à veritate fidei, & fieri hæreticos ac schismaticos, qui recedunt à Capite, quod à Christo constitutum est. Tertiò, nec opus esse magno tractatu ad disquirendum, quæ sit vera fides. Nā illam esse veram fidē, quæ à Capite, tanquam ab origine (ex Christi institutione) in reliqua membra derivatur. Si hæc intelligis, Marce Antoni, redi ad unitatem capitis, à qua recessisti; & non eris hæreticus aut schismaticus.

12. Secundo loco adducis Hieronymum lib. 1. contra Jovinianum, circa medium, ubi de æqualitate Apostolorum sic scribit: *Ex æquo super eos Ecclesiæ fortitudo solidatur.* Respondéo. Hieronymus ibi confert inter se Petrum & Joannem; & dicit Joannem, quia virgo erat, fuisse Christo chariorem quàm Petrum, qui non erat virgo: Ut ostēdat virginitatem matrimonio præferendam esse, quod negabat Jovinianus. Et postea subjungit: *Si autem obnixè contēderit (Jovinianus) Joannem virginem non fuisse, & nos amoris præcipui causam virginitatem diximus; exponat ille, si virgo non fuit, cur ceteris Apostolis plus amatus sit? At dicis: Super Petrum funda-*  
tur

tur Ecclesia: licet id ipsum in alio loco super omnes Apostolos fiat, & cuncti claves regni cætorum accipiant, & ex aquo super eos Ecclesia fortitudo solidetur: tamen propterea inter duodecim unus eligitur, ut Capite constituto, schismatis tollatur occasio. Sed cur non Joannes electus est virgo? Ætati delatum est, quia Petrus senior erat; ne adhuc adolescens, ac pene puer, progressæ ætatis hominibus præferretur.

13. Ex his verbis constat, Hieronymum, quem pro te citas, in multis tibi cōtrarium esse. Primò, Hieronymus asserit, Joannem plus cæteris Apostolis amatū fuisse à Christo. Unde sequitur, Joannem vicissim plus cæteris amasse Christum. Quod sic probo: Deus plus diligit meliores, ut docet Divus Thomas 1. part. quæst. 20. art. 4. Si ergo plus diligit Joannem, quàm alios Apostolos, sequitur Joannē esse meliorem, quàm alij Apostoli. Ergo etiam melior est Petro: Ergo plus diligit Deum, quàm Petrus. At hoc contra te est, quia tu asseris, Petrum habere Primatum charitatis præ alijs Apostolis.

14. Secundò, Hieronymus asserit, solum Petrum ex duodecim Apostolis electum esse, ut esset Caput Ecclesiæ, & cæteris præferretur. At si electus est, jam antea nō erat Caput, ratione ætatis aut vocationis, ut tu contendis: Aut, si antea erat, ratione ætatis aut vocationis, electus non est.

15. Tertiò, Hieronymus dicit, ideò electum esse, ut constituto Capite, schismatis occasio tolleretur. Ergo non est electus pro sua

tantum persona, ut tu vis, sed etiam pro suis Successoribus. Nam si tempore Apostolorum, quando Ecclesia erat exigua, debuit esse unum Caput ad cavendum schisma; multo magis post tempora Apostolorum, quando Ecclesia fuit diffusa per totum orbem terrarum.

16. Quartò, Hieronymus dicit, Petrum potius electum esse in Caput, quàm Joannem quia non decebat, ut Joannes, qui penè puer erat, præferretur senioribus. Certè, si putaret Hieronymus, quod tu fingis, Petrum esse Caput propter Primatū ætatis & vocationis, stultè disputaret, quare nō potius Joannes sit electus in Caput, quàm Petrus. Nā hoc esset disputare, quare non potius Joannes sit electus, ut fieret senior ætate & vocatione, quam Petrus. Quæ est stulta disputatio.

17. Sed objicis, Hieronymum in eo nobis contrarium esse, quòd asserat æqualitatem Apostolorum. Respondeo. Si hoc dārem, nihil aliud sequeretur, quàm & tibi, & nobis cōtrarium esse; sed tamen tibi magis, quàm nobis. Faciamus ita esse; Jam quæro ex te, an sententia ipsius vera sit, an falsa? Si vera est, tuam falsam esse oportet, quæ illi contraria est. Si falsa, cur præsidium ab ea petis? Si partim vera, partim falsa, quis inter veram & falsam discernet? Non admitto te judicem.

18. Sed non necesse est, ad has angustias confugere. Nego Hieronymum nobis contrarium esse, nisi sibi ipsi contrarius sit. Quod ostendo ex ipsa disceptatione; quam habet  
cum

cum Joviniano, in hunc modum. *Hieronymus*. Joannes plus fuit amatus à Christo propter virginitatem, quàm Petrus, qui non erat virgo. Virginitas igitur præstat matrimonio. *Jovinianus*. Nego Joannem fuisse virginem. *Hieronymus*. Si virgo non fuit, cur plus amatus fuit, quàm alij? *Jovinianus*. Petrus plus fuit amatus, quia super Petrum fundata est Ecclesia. *Hieronymus*. Si spectes doctrinam Apostolorum, super omnes æquè fundata est Ecclesia, quia una est doctrina omnium. Si spectes jurisdictionem, fateor Petrum præ cæteris electum esse, ut esset Caput Ecclesiæ. At hinc non sequitur, plus dilectum fuisse à Christo, quia jurisdictione non necessario supponit majorem sanctitatem. *Jovinianus*. Cur non potius Joannes fuit electus, si erat virgo, ut tu contendis? *Hieronymus*. Propter defectum ætatis. Erat enim adhuc adolescens, ac pene puer. Non decebat autem, ut puer, cum potestate præficeretur senioribus.

19. Si hic est discursus Hieronymi cum Joviniano, ut esse verisimile est; nihil ex eo præsidij habes, præter confusionem. Si alius est, cur dissimulas? Sed iterum objicis alia Hieronymi verba contra eundem Jovinianum: Joannes, inquit, & Jacobus, quia plus cæteris petierunt, non impetraverunt: Et tamen non est dignitas eorum imminuta, quia reliquis Apostolis æquales fuerunt. Respondeo. Hoc contigit ante electionem Capitis. Tunc omnes Apostoli erant æquales. At postquam dictum est Petro,

tro, *Pasce oves meas*, desierunt esse æquales, & Petrus cæpit esse Princeps aliorum, ac universalis Ecclesiæ Pastor.

20. Ex eodem Hieronymo, Epist. 58. ad Damasum Pontificem objicis hæc verba: *Ut qui Apostolos honore sequeris, sequaris & merito.* Non dicit, inquis, qui Petrum; sed, qui Apostolos honore sequeris; quia honor Petri & aliorum fuit æqualis. Respondeo. Hieronymus scripsit duas breves Epistolas ad Damasum ex Syria, de eodem argumento, in quibus consulit illum, tanquam judicem omnium controversiarum, *An salva fide, concedi possit, tres esse in Deo hypostascs?* In priori, sic alloquitur Damasum: *Quoniam vetusto Oriens inter se populorum furore collisus, indiscissam Domini tunicam, & de super textam, minutatim per frustra discerpit &c.* Ideò mihi Cathedram Petri, & fidem Apostolico ore laudatam consui consulendam. Hic Pontificè Petri successorè, agnoscit pro judice. Et paulo post: *Apud vos solos incorrupta Patrum servatur hereditas*, id est, apud solos Successores Petri, & qui illis adhærent. Et iterum: *Quamquam igitur tui meterreat magnitudo, invitat tamen humanitas. A Sacerdote viclimam salutis, à Pastore præsidium ovis flagito.* Agnoscit se ovem: Damasum, pastorem. At non erat ovis Damasi, ratione particularis Ecclesiæ Romanæ; sed ratione universalis Ecclesiæ, quæ Damaso erat subiecta. Et rursum: *Ego nullum primum, nisi Christum sequens, beatitudinituæ, id est, Cathedra Petri cōmunione consocior: super illam Petram adificatam*  
Eccle-



*Ecclesiam scio. Quicumque extra hanc domum agnum comederit, profanus est.* Hoc non dicit de Cathedra aliorum Apostolorum. Et infra: *Quicumque tecum non colligit, spargit, hoc est, Qui Christi non est, AntiChristi est.* De nullo alio Episcopo hoc dicit, sed de Petri successore. Ex quibus omnibus manifestum est, Petrum ex sententia Hieronymi, non æqualem, sed superiorem fuisse alijs Apostolis. Cum ergo in altera Epistola dicit: *Ut qui Apostolos honore sequeris, sequaris & merito;* non vult significare, omnes Apostolos honore ac dignitate æquales esse, ut tu falsò interpretaris: sed rogat Damasum, ut sicut ipse est successor Apostolorum in honore, sic etiã conetur successor esse in virtute & merito. Quod potest commodè intelligi, etiã si honor omnium Apostolorum non fuerit æqualis. Alioqui si inde conficeres, æqualem fuisse omnium honorem, conficeres etiã, æquale fuisse omnium meritum. Imo, tibi ipsi contradiceres. Nam lib. 1. c. 5. & 9. ultro fateris, Petrum reliquos Discipulos honore ac dignitate superasse.

21. Tercio loco adducis Augustinum lib. de agone Christiano cap. 30. ubi ait: *Non enim sine causa inter Apostolos omnes, hujus Ecclesiæ Catholica personam sustinet Petrus. Huic enim Ecclesiæ, claves regni cælorum datae sunt, cum Petro datae sunt. Et cum ei dicitur, ad omnes dicitur: Pasce oves meas.* Ex hoc, & similibus Augustini testimonijs colligis, quæ Petro committuntur, non illi soli, sed omnibus committi; ideoque omnes

æquales esse. Respondeo. Hoc potius collige: Cùm solus Petrus sustineat personā Ecclesiæ Catholicæ, non item reliqui Apostoli (quia de reliquis hoc nunquam affirmat Augustinus) Petrum hoc nomine reliquis Apostolis præferendū esse; ac proinde ex hac parte, nō omnes esse Petro æquales. Deinde collige Augustinū tibi adversari. Nam Augustinus ait; *cū Petro dictum est, Pascere oves meas, omnibus dictum esse.* Tu lib. 1. c. 8. n. 1. contendis, non omnibus, sed soli Petro dictum esse. Sic enim scribis: *Ac primum quidem hoc loco Christum cum ipsomet Petro loqui singulariter, & ei personaliter dici: Pascere oves meas; constituo tanquam certissimum.* Si illi dicitur personaliter & singulariter, Ergo dicitur illi tanquam privatæ personæ. Non igitur quatenus sustinet personam Ecclesiæ. Hoc autem asserit Augustinus: Ergo tu aliter sentis, quā Augustinus. Quid nos de hac re sentiamus, explicatum est c. 3. §. 2. Nam hæc propositio; *Soli Petro dictum est, Pascere oves meas;* potest dupliciter intelligi: Primò, excludēdo reliquos Apostolos; ut sensus sit: Nulli alteri Apostolo, sed soli Petro dictum est, *Pascere oves meas.* Sic verum est. Secundò, excludendo successores Petri; ut sensus sit, soli Petro, & non Successoribus ejus dictum est, *Pascere oves meas.* Sic falsum est.

22. Ex eodem Augustino lib. 50. Homiliarum, Hom. 43. adducis hæc verba: *Sed fortè Apostoli sancti, primi, summi arietes, pastoris membra, pastores ipsi, fortè non habebant peccatum?* Hinc inters æqualitatem Apostolorum. Respon-

ſpondeo. Ex quâ particulâ inferſ? An ex eo; quod fuerint ſancti? At tu contendis, Petrum præ alijs habuiſſe Primatum charitatis & aliarum virtutum. Igitur ex hac parte cōcedis inæqualitatem. An ex eo, quòd fuerint primi? At tu ſimiliter contendis, Petrum præ reliquis fuiſſe primum ætate, vocatione & multis alijs prærogativis. An ex eo, quòd fuerint ſummi arietes? At ſicut inter primos, ſic etiam inter ſummos datur ordo & inæqualitas, ut Num. 23.9. *De ſummis ſilicibus videbo eam.* At inter ſummos ſilices, aliud potèſt eſſe aliud altiòr. An ex eo, quòd fuerint membra paſtoris? At non omnia membra ſunt æqualia; vel magnitudi-  
ne, vel honore. 1. Corinth. 12. 23. *Quæ putamus ignobiliora membra eſſe corporis, hiſ honorem abundantiore circumdamus.* An denique ex eo; quòd fuerint paſtores ipſi? At ſicut Chriſtus eſt ſupra alios Paſtores; ita inter hos potèſt eſſe diſcretio honoris & poteſtatis. Vide quàm Auguſtinus nihil pro te faciat.

23. Quattò; adducis Ambroſium in c. 6. Apocalyptis; ubi ait: *Primogenita gregis ſunt Apoſtoli, quos primos genuit Eccleſia, & ex quibus Eccleſia nata eſt.* Reſpondeo: Non ſunt verba Ambroſij; ſed alterius, ut benè inſinuas. Neque nobis officiunt; ſed tibi. Primò; quia alibi diſertè ais, Petrum eſſe primogenitum inter Apoſtolos (lib. 1. c. 5. nu. 13. & 17.) & ideo primum locum illi deberi. Agnoſcis igitur aliquam in hac parte inæqualitatem? Cum igitur

hoc loco contendis, omnes simul esse primogenitos, ideoque omnes inter se æquales; tibi ipsi contradicis. Secundò, alibi ais, Ecclesiam ædificatam esse ab Apostolis post Ascensionem Christi. Quomodo ergo verum est, quod hinc ais, Apostolos esse primogenitos Ecclesiæ? Nā si sunt primogeniti Ecclesiæ, necesse est, Ecclesiam esse illorum matrē: Si mater est, quomodo ab ipsis, qui filij sunt, ædificata?

24. Quintò adducis aliquos Patres, qui asserunt, Paulum fuisse æqualem Petro. Inter quos & Chrysostomus in cap. 1. Epist. ad Gal. ubi cōsiderans officium Pauli in inviscendo Petro, sic scribit: *Quid hoc animo possit esse modestius? post tanta taliaq; benefacta, cum nihil opus haberet Petro, nec illius egeret voce sed honore par esset illi (nihil n. hic dicam amplius) tamen ascendit velut ad maiorem & seniore.* Et Ambrosius lib. 2. de Spiritu sancto: *Una gratia fulgebat in his, quos Spiritus unus elegerat. Nec Paulus inferior Petro.* Et Leo Serm. 1. de Natali Petri & Pauli: *Quos gratia Dei in tantum apicem inter omnia Ecclesia membra provexit, ut eos in corpore, cuius Caput est Christus, quasi geminum constitueret lumen oculorum. De quorum meritis atq; virtutibus, quæ omnem loquendi superant facultatem, nihil diversum, nihil debemus sentire discretū, quia illos & electio pares, & labor similes, & finis fecit æquales.*

25. Respondeo. Hinc multa contra te sunt; contra nos nihil. Ac primò contra te est, quod ait Chrysostomus, Paulum honore parem esse Petro. Nam tu dicis (lib. 1. c. 5. nu. 13.) Petrum,

utpo-

utpote primogenitum omnium Apostolorū, honore omnes præcedere. Secundò, quod ait Ambrosius, Paulum non esse inferiorem Petro. At tu dicis (lib. 1. c. 9. per totum) Petrum habere multas prærogativas, quibus reliquos Apostolos excellit. Tertiò, quod ait Leo, Petrum & Paulum esse pares electione: quod tu negas lib. 1. c. 5. n. 10. & seqq.

26. Quòd autem supradicti Patres nihil contra nos habeant, facile ostendam. Nam duplex potest institui comparatio inter Petrū & Paulum. Una, quoad sapientiam, sanctitatem, laborem, zelum, & honorem qui ex illis consequitur: Et sic Paulus potuit esse par Petro. Quod manifestè significat Leo, cum ait: *De quorum meritis atq. virtutibus nihil debemus sentire discretum.* Altera, quoad jurisdictionē: Et sic Petrus erat major Paulo, ut sæpè ostensum est.

## II. OBJECTIO.

### *Evangelium reprobatur Primatum inter Apostolos.*

27. **H**OC probas ex contentione Apostolorum de Primatu, & responsione Christi, (lib. 1. c. 11. n. 1. & 2.) Nam cum Apostoli cōtenderent, quisnam illorum esset major? Respondit Christus: Luc. 22. 25. *Reges gentium dominātur eorum. & qui potestatem habent super eos, benefici vocantur. Vos autem non sic: sed qui major*

*est in vobis fiat sicut minor.* Hinc ita concluditur: Omnes Apostoli, etiam Petrus, contēdebant de Primatu: At si Petrus erat promissus Primatus, cur contendit? Secundo, Christus omnibus eripit cogitationem de Primatu temporali, cum ait: *Vos autem non sic.* Similiter de Primatu & jurisdictione spirituali, cum ait: *Qui major est in vobis, fiat sicut minor.*

28. Respondeo. Hic notanda est duplex contradictio in tuis verbis. Una est, quia hoc loco dicis, Apostolos contendisse de Primatu temporali, quis scilicet illorum futurus esset primus in regno Christi temporali, quod somniabant. Verba tua sunt hæc: *Appetit naturalis humanus propria excellentiæ, & in alios dominatus, Apostolorum animos adhuc imperfectos, nec parum, nec raro titillavit.* Quia enim Messiam dominatione temporali Regem Israel in mundo regnaturum, ex sacris scripturis non bene intellectis, & communi Hebræorum intelligentiæ existimabant, magnas sibi apud Christum, quem Messiam agnoverant, dignitates pollicebantur; quippe qui ipsius primi essent affecla & familiares. Et cum duodecim essent, inter ipsos etiam unum aliquem primum locum habiturum autumabant. Et infra: *Debuit quidem animos eorum a temporalibus dignitatibus abducere, quas etiā sibi somniabant, &c.* At cap. 9. n. 6. planè contrarium asseris his verbis: *Respondet Bellarminus, ex asse quidem Apostolos, quia temporalem principatum somniabant; & hunc errorem Dominum sæpè correxisse. De hoc tamen temporali mundi hujus princi-*

patu, Apostolos tunc nihil cogitasse, sed de ~~summa~~ *præ-*  
*latione Petri supra ipsos Apostolos, satis est apertum.*  
 Quomodo cohærent hæc duo: Apostoli nihil  
 cogitabant de temporali principatu: Et, Apo-  
 stoli existimabant Messiam dominatione tem-  
 porali in mundo regnaturum, & magnas sibi  
 apud illum dignitates pollicebantur.

29. Altera est: quia hoc loco in summa  
 capitis 11. sic habes: *Christus nudum ministerium,*  
*sine jurisdictione dedit Apostolis.* At cap. 3. n. 31.  
 contrarium asserebas his verbis: *Christus imme-*  
*diatè concessit Apostolis potestatem ordinis, & ju-*  
*risdictionem plenissimam.* Nonne hæc aperta  
 contradictio est, Dare nudum ministerium si-  
 ne jurisdictione: Et, Dare plenissimam jurisdi-  
 ctionem? Et quamvis in priori loco videaris  
 loqui de jurisdictione humana, hoc tamen nõ  
 obstat. Vel enim loqueris de humana, id est, à  
 puro homine accepta; & sic nihil ad rem: Vel  
 de humana, id est, homini à Christo concessa;  
 & sic manet contradictio.

30. Objectio tua, quam à Lutheranis ac-  
 cepisti, nullius momenti est, & iam pridem à  
 Cardinale Bellarmino & alijs Catholicis re-  
 futata. Ad illos te remitto. Obiter tamen at-  
 tingam, quid respondendum sit. Apostoli cogi-  
 tabant de Primatu aliquo temporali, quem  
 apud Christum essent habituri. Hoc suprà  
 cap. 6. prærogativa septima, ostensum est. Et  
 tu paulo antè fassus es. Christus eripit illis  
 hanc cogitationem, his verbis: *Vos autem non*  
*sic.* Et simul suo exemplo hortatur, ut quis-



quis inter ipsos habiturus esset Primatum Ecclesiasticum, servaret modestiam ac humilitatem; nec se superbè efferret super alios. *Qui, inquit, major est in vobis, fiat sicut minor.* Simile monitionem habemus de Primatu Regis in Veteri Testamento, Deut. 17. 18. *Postquam sederit in solio regni sui, describet sibi Deuteronomiꝝ legis hujus in volumine.* Et paulo post: *Nec eleve-  
tur cor ejus in superbiam super fratres suos.* Sicut ergo hinc non possumus inferre, Regem Veteris Testamenti non habuisse jurisdictionem in suos fratres, quia debebat servare modestiam, & non elevare se super fratres suos, quod solent facere Reges gentiles: Ita in simili, non possumus inferre, Petrum non habuisse jurisdictionem Ecclesiasticam in suos fratres, quia debebat illis servire & ministrare. Alioqui, quid dicemus de Christo? Habuit certè plenissimam jurisdictionem in Apostolos, & tamen ministrabat illis. (*Ego autem in medio vestrum sum, sicut qui ministrat.*) Cum ergo suo exemplo hortatur Prælatos Ecclesiæ ad simile ministerium, non tollit ab illis jurisdictionem, sed humilitatem commendat.

### III. OBJECTIO.

*Ipsi Apostoli in Petro non agnoverunt Primatum.*

31. **H**OC sic probas, c. 11. n. 7. Apostoli, postquam Petro dictum esset, *Tu es Petrus,*  
&



& Tibi dabo claves regni cælorum; adhuc contendebant de Primatu: Ergo nō agnoverunt, Petro per illa verba promissum esse Primatū; alioqui desuissent contendere. Respondeo. Apostoli ex una parte persuasi erant regnum Christi fore temporale: ex altera audiverant Christum moriturum, & Petrum ipsius loco habiturum claves regni cælestis, id est, Primitum Ecclesiasticum. Sed prior cogitatio erat magis ipsis infixæ, quàm posterior. Imò nec Petrus, nec alij Apostoli credebant, Christum moriturum, tametsi clarissimè hoc ipsis esset significatum. Matth. 16. 21. Exinde capit Jesus ostendere Discipulis suis, quia oporteret eum ire Hierosolymam, & multa pati à senioribus, & Scribis, & Principibus Sacerdotum, & occidi, & tertia die resurgere. Et assumens cum Petrus, capit increpare illum dicens: Absit à te Domine: Non erit tibi hoc. Et Luc. 9. 44. Filius hominis, futurum est, ut tradatur in manus hominum: At illi ignorabant verbum istud, & erat velatum ante eos. Certè, si vel non credebant, vel non intelligebant, Christū esse moriturum, quod tam clarè ipsis dicebatur; quid mirum est, si non multum solliciti fuerint de futuro Petri primatu post mortem Christi: præsertim cum altera cogitatio de regno Christi temporali prævaleret.

32. Si hoc non capis, Marce Antoni, exemplum sume à teipso. Promissio tibi facta erat in statu religioso, cum abdicabas te rebus temporalibus: *Omnis, qui reliquerit domum, vel fratres, aut sorores, aut patrem, aut matrem, aut a-*

*gros propter nomen meum centuplum accipiet, & vitam eternam possidebit.* Quæ sanè promissio erat clarissima. Et tamen, magis insedit tibi cogitatio de Episcopatu: ideoque relictò itatu religioso, & parum sollicitus de tam insigni promissione, ad seculum, cui renunciaveras, redijsti, & dignitatem Episcopalem importunè impetrasti. Non tam crassè hallucinati sunt Apostoli. Nunc quæro, an hæc consequentia bona sit? Marcus Antonius, postquam dictum est illi, *Centuplum accipies, & vitam eternam possidebis*, adhuc cogitavit de honore & dignitate Episcopali: Ergo non agnovit promissionem à Deo sibi factam. At similis est hæc, quam tu facis: Apostoli, postquam dictum est Petro, *tibi dabo claves*, adhuc cogitabant de regno temporali; Ergo non agnoverunt promissionem Petro factam de Primatu spirituali.

#### IV. OBJECTIO.

*Petrus nunquam exercuit Primatum.*

33. **H**OC tripliciter probas, cap. 11. nu. 10. & seqq. Primò, quia non solus Petrus, sed alij etiam Apostoli instituerunt primos Diaconos (Act. 6. 2.) Secundò, quia Apostoli miserunt Petrum & Joannem in Samariam: Ergo Petrus non erat supra Apostolos, sed ad illorum arbitrium mittebatur. (Actor. 8. 14.) Tertiò, quia Paulus & Barnabas detulerunt quæ-

quæstionem de circumcissione, non ad solum Petrum, sed ad omnes Apostolos ac Seniores. Debuissent autem ad solum Petrum deferre, si ille fuisset supremus Rector Ecclesiæ, & Judex controversiarum.

34. Respondeo. Hæc omnia desumpisti ex Lutheranis & Calvinistis. Sed cur dissimulas alia multa, quæ Petrus gessit in suo Primatu? Solus sua autoritate convocavit omnes Discipulos ad electionem novi Apostoli. Primus promulgavit Evangelium Hierosolymæ. Primus item prædicavit gentibus Evangelium. Primus sententiam dixit in Concilio Hierosolymitano, Hæc omnia omittis. Quæ autem objicis, nullius ponderis sunt. Ad singula sic respondeo.

35. Ad 1. non valet hæc consequentia: Omnes Apostoli instituerunt primos Diaconos, & non solus Petrus: Ergo Petrus non habebat Primatum. Sicut neque hæc: Omnes Principes Angliæ sanxerunt legem de juramento fidelitatis, & non solus Rex; Ergo Rex non habet Primatum. Neque item hæc: Omnes Episcopi Dalmatiæ fecerunt, hunc aut illum Actum jurisdictionis Ecclesiasticæ, & non solus Marcus Antonius: Ergo Marcus Antonius non fuit Primas Dalmatiæ. Non enim necesse est, solum Regem in suo regno; solum Imperatorem in suo imperio, solum Archiepiscopum in sua provincia exercere quosvis actus jurisdictionis & potestatis, sine aliorum ope & auxilio. Multo minus  
valem

valet hæc consequentia: Petrus in illo actu, quo constituebantur primi Diaconi, non exercuit Primatum Ecclesiasticum: Ergo nunquam exercuit. Et tamen mirificè tibi places in his & similibus tuis argutiis. Quanquam non argutia, sed stupiditates sunt.

36. Ad 2. Triplex potest esse missio. Prima ex imperio. Sic Rex, aut Princeps, aut Dominus mittit subditum aut servum. Secunda, ex consensu. Sic Deus Pater mittit Filium in hunc mundum; & Filius Spiritum sanctum. Tertia, ex consilio & directione. Sic consiliarii mittunt Regem ad bellum. Igitur Petrus missus est, non ex imperio, sed ex consensu & consilio Apostolorum. Ex qua missione non sequitur, Petrum vel æqualem vel inferiorem Apostolis fuisse. Nam superior potest hoc modo mitti ab inferioribus.

37. Ad 3. Hæc illatio nulla est: Quæstio de circumcissione non fuit delata ad solum Petrum, sed ad concilium Apostolorum & Seniorum: Ergo Petrus non habebat Primatum Ecclesiæ. Annon plurimæ controversiæ civiles deferuntur ad Parlamentum Parisiense? Annon plurimæ ad Senatum regium in Angliæ? Nec ideo sequitur, Regem Galliæ aut Angliæ non habere Primatum in suo regno. Audi Antonium, quod res est. Sicut in regno Angliæ possunt controversiæ civiles deferri, vel ad solum Regem, vel ad Senatum Regis, præsentem Rege: Sic etiam in Ecclesia possunt controversiæ Ecclesiasticæ deferri, vel ad ipsum Põtificem,  
vel

vel ad concilium, cui præest Pontifex. Sicut ergo non destruitur autoritas concilij, per hoc præcisè, quòd aliqua controversia deferatur ad solum Pontificem; ita vicissim non destruitur autoritas Pontificis per hoc, quòd aliqua controversia deferatur ad concilium, cui præest Pontifex, & non ad solum Pontificem. Res clara est. Sed cur illa controversia de circumcissione potius fuit delata ad concilium, quàm ad solum Petrum? Facilis responsio: Ut decisio fieret cum majori partium satisfactione. Nam partes litigantes facilius acquiescunt, quando constat controversiam ex communi Ecclesiæ consensu decisam esse.

## V. OBJECTIO.

*Pauli reprehensio destruit Primatum Petri.*

38. **H**Oc sic probas: Paulus in Epist. ad Gal. cap. 2. 11. scribit, se in faciem restitisse Petro, quia reprehensibilis erat: Ergo Petrus non fuit Caput Ecclesiæ; alioqui Paulus fuisset arrogans & procax, quod Capiti Ecclesiæ ausus esset resistere. Hoc argumentum fusè persequeris, adductis multorum Patrum testimonijs, ad confirmandum Petri errorem, & justam Pauli objurgationem. Respondco. Nō opus est tot testimonijs. Fatemur Petrum errasse: non quidem in aliquo fidei articulo, in quo errare non poterat, juxta illam Christi pro-

promissionem; *Rogavi pro te Petre, ut non deficiat fides tua*: sed in facto, quia incautè simulabatur Judaïsmum; cum aliquo scandalo & offensione gentilium. Fatemur etiam, Paulum apertè illi restituisse, quia meritò iudicabat ejusmodi simulationem non esse tolerandam, eo quòd esset scandalosa. At tux consequentiæ, quas hinc nectis, non valent. Non enim sequitur: Petrus fuit à Paulo reprehensus: Ergo non habuit Primatum Ecclesiæ. Sicut in simili non sequitur: David fuit reprehensus à Joab (2. Regum 19.5.) Ergo non habuit Primatum regni. Imò multi Patres ex hac ipsa Petri reprehensione docent, superiores posse corrigi ab inferioribus, quando fit cum debita humilitate & charitate, ut Augustinus Epist. 19. ad Hieronymum, Cyprianus Epist. ad Quirinum, de Hæreticis rebaptizandis; Gregorius Hom. 18. In Ezechielem; Divus Thomas in 2. secundæ quæst. 33. art. 4. ad 2.

39. Similiter non sequitur, Paulum fuisse arrogantem & procacem, quòd ausus sit Capiti Ecclesiæ in faciem resistere; quia fecit hoc bono zelo, ad tollendum scandalum, quod ortum erat ex incauta Petri simulatione. Sicut nec ipse Joab censetur fuisse procax & arrogans, quòd ausus sit suum Regem ob ipsius peccatum arguere & objurgare. Et aliunde constabat Paulo, Petrum propter modestiam & humilitatem, qua erat præditus, non ægrè laturum fraternam correptionem, quam sciebat ex bona intentione provenire.

40. De hoc Petri & Pauli facto sic scribit Augustinus loco citato: *Ipsè Petrus, quòd à Paulo fiebat utiliter libertate charitatis, sancta ac benigna pietate humilitatis accepit: Atque ita rarius ac sanctius Exemplum posteris prabuit, quo nò dedignarentur, sicubi fortè recti tramitem reliquissent, etiam à posterioribus corrigi; quam Paulus, quo confidenter auderent, etiam minores majoribus, pro defendenda Evangelica veritate, salva fraterna charitate, resistere.*

41. Et certè Paulus, non tantùm suo exemplo, sed etiam scripto docuit, superiores aliquando moneri & corrigi posse ab inferioribus, servata semper debita charitate ac subjectione. Sic enim scribit ad Colossenses cap. 4. 17. *Dicite Archippo: vide ministerium, quod accepisti à Domino ut illud impleas.* Erat Archippus ille Colossensium Episcopus, successor Epaphræ, qui tunc captivus Romæ tenebatur in vinculis, ut scribit idem Paulus in Epist. ad Philemonem vers. 23. *Salutat te Epaphras concaptivus meus in Christo Jesu.* Si ergo Paulus mandat Colossensibus, ut moneant Episcopum sui officij; quid mirum est, si alij quoq; subditi possint aliquando suos Prælatos, vel monere, vel reprehendere, si necesse sit?

42. Et recta ratio hoc dictat. Nam laudabile est, opera misericordiæ, sive corporalia, sive spiritualia, servato debito modo ac ordine, præstare indigentibus: At peccantes corrigere, est opus misericordiæ spirituales,



le; Ergo laudabile est, servato debito modo ac ordine, hoc opus præstare indigentibus. At nō minus Prælati; quàm subditi, possunt indigere correptione: & sæpè magis, quia sunt in altiori & periculosiori loco, ut rectè notat Augustinus in Regula ad servos Dei; circa finem, cū ait: *Non solum vestri, sed etiam Prælati misere mini quia inter vos, quanto loco superiore, tanto in periculo majore versatur.*

43. Hoc argumentum pulchrè explicat Divus Thomas in 2. secundæ, quæst. 33 art. 4. in hunc ferè modum: Duplex est correctio: Una justitiæ; quæ fit per inflictionem legitimæ pœnæ: Altera charitatis, quæ fit per fraternam correptionem. Prior convenit solis Prælati, respectu subditorum; quia requirit jurisdictionem, quæ in solis Prælati est. Posterior convenit tam subditis, quàm Prælati; quia est actus charitatis, quæ ad omnes proximos, sive Prælatos, sive subditos, se extendit. Tenemur n. omnes ex charitate diligere; ac proinde omnes peccantes corripere, servatis ijs circumstantiis, quas charitas exigit. Non exigit autè charitas, ut eadem libertate & autoritate corripiamus Prælatos, quæ subditos: Sed exigit, ut Prælatos cum reverentia & subjectione; subditos cum mansuetudine & patientia, quantum fieri potest, objurgemus.

44. Nondum acquiescis; mi Antoni. Ais Patres sic argumentari: Paulus non reprehendisset Petrum, si agnovisset illum pro supremo Ecclesiæ Capite seu Monarcha. Et citas ex

Hic-



Hieronymo, apud Gratianum 2. q. 7. c. Paulus hæc verba: *Paulus Petrum reprehendit: quod non auderet, nisi se non imparem sciret.* Et ex Ambrosio, ad cap. 2. Epist. ad Galat. *Quis eorum auderet Petro primo Apostolo, cui claves regni cælorum Dominus dedit, resistere, nisi alius talis, qui fiducia electionis suæ sciens se non imparem, constanter improbareret, quod ille sine consilio fecerat.*

45. Respondeo. Tū pervertis sensum illorum Patrum. Nam Gratianus disertè monet, Paulum dupliciter conferri posse cum Petro. Primò, quoad Ecclesiasticam dignitatem. Secundò, quoad puritatem vitæ & conversationis. Priori modo; Paulum fuisse imparem, seu inferiorem: Posteriori, non imparē. Quod declarat duplici exemplo. Uno Augustini, qui scribit, se majorem esse Hieronymo, ratione Episcopatus: minorem, ratione virtutum. Altero ejusdem, qui alibi scribit, Cyprianum fuisse æqualem Petro in martyrio; minorem in potestate. Igitur ex sententiâ Gratiani, sic argumentandum est: Paulus non auderet Petrum reprehendere, nisi sciret se non imparem in puritate vitæ & conversationis. Non autem sic.: Nisi sciret se non imparem in Ecclesiastica potestate. Ratio est, quia qui alium reprehendit, debet esse immunis ab illo vitio, de quo illum reprehendit: At Paulus reprehendebat Petrum de mala cōversatione cum Judæis & gentibus: Ergo non ausus fuisset illum reprehendere, nisi scivisset se esse immunem ab hoc vitio; & in puritate cōversationis

nis Petro non imparem, sed superiorem. Jam advertis, opinor, imposturam tuam.

46. Idem crimen committis in citando Ambrosio. Nam ille similem adhibet distinctionem. Confert Petrum cum Paulo dupliciter. 1. ratione potestatis. 2. ratione electionis. Priori modo præfert Petrum, quia vocat illum *Primum Apostolum, cui claves regni cælorum data sunt*, insinuans Petrum ex hoc capite reliquos omnes antecellere. Posteriori, Paulum facit Petro equalem; quia sicut Petrus immediatè à Christo electus est ad Apostolatam; ita etiam Paulus, ipso attestante Gal. 1.1. *Paulus Apostolus, non ab hominibus, neq; per homines, sed per Jesum Christum.*

47. Tandem, quia vides te argumentis nihil proficere, convertis te ad scommata & sarcasmos; quæ sita occasione ex illis Gregorij verbis, Hom. 18. in Ezechielem: *Ecce Paulus in Epistolis suis scripsit, Petrum reprehensibilem: Et ecce, Petrus in Epistolis suis asserit, Paulum in ijs, qua scripserat, admirandum. Certè enim, nisi legisset Petrus Pauli Epistolas, non laudasset. Si autem legit, quia illic esse reprehensibilis dicitur, invenit. Amicus ergo veritatis laudavit etiam, quod reprehensus est.* Hanc Gregorij sententiam mirificè laudas. Et meritò. Sed venena inde colligis, non mella; quod malum est. Sic enim subnectis: *Mirum verò, quod Petrus, hoc est, summus Ecclesia Monarcha, & supremus Christi ac Dei Vicarius, illam Pauli Epistolam ad Galatas in Indicem expur-*

expurgatorium statim non conjecerit, quippe ipsum primum & supremum Papam, adeo deprimentem, & ipsius errores exaggerantem. Certè Petri Successores tales Epistolas & libros, qui ipsorum errata & reprehensiones rationabiles continent, jam ferre nolunt, proscribunt eos, & diris devovent. Expectandum profectò, ut si planè nostri Pape viderint, ex Evangelio canonico Papatum destrui, Evangelium etiam ipsum in librorum prohibitorum Indictam detradant.

48. Hic apparet verum esse, quod Christus dicit in Evangelio: *Ex abundantia cordis os loquitur.* Et, *malus homo de malo thesauro cordis sui profert malum.* Multiplex malum ex thesauro tuo profers. Primò, Petrum Apostolum, per ironiam ac derisum, vocas summum Ecclesiæ Monarcham, & supremum Christi Vicarium. Si non volebas parcere Pontifici, perpercisses saltem Petro, qui in Evangelio ab ipso Christo laudatus est: *Beatus es Simon Barjona.*

Secundò, aliam injuriam illi facis, quia insinuas, tui similem, ac vindictæ appetentem esse. Tu certè, quia à Pontifice reprehensus es, vindictam paras, & de Sede Apostolica conaris illum deturbare. At Petrus meliori animo est. Reprehensus fuit à Paulo: non indignatur: non ægrè fert: non stringit calamum, ut tu facis:

Tertiò, etiam Paulo injuriam irrogas; quasi ipse depresso Petrum; & ipsius errores exaggeraverit, Invidiosa sunt hæc verba. Non voluit

illum deprimere, sed à lapsu erigere : non errores exaggerare, sed errorem corrigere.

Quartò, similem labem aspergis Petri successoribus; quasi ipsi nolint sua errata corrigi; nolint moneri officij sui: sed eos, qui hoc tenterint, proscribant ac citis devoveant. Temerarium hoc judicium & falsum est.

Quintò, auges hanc injuriam Antoniano prælagio; quasi Pontifices Romani eò dementia tandem sint progressuri, ut ipsum quoque Evangelium in librorum prohibitorum indicem detrudant. Vide, ne hoc prælagium in te impleatur.

49. Hæc omnia eò spectant; ut tibi, homini Apostata ac rebeli, impune liceat scribere, quod lubet: Et non liceat Pontifici facere, quod sui officij est. Nunquam hoc obtinebis. Proscribet tuas, & tuis similes calumnias, hæreses; & schismata: sicut olim, & pij Imperatores, & boni Pontifices fecerunt. Sicut etiam nuper à Theologis Parisiensibus factum est; qui gravi censura tuos libros perstrinxêre. Sed quia precibus illam censuram extorsisti, non est, quod ipsis succenseas.

\* \*  
\* \*

## VI. OBJECTIO.

*Pauli scripta destruunt Primatum Petri.*

50. **Q**Uod sic probas. Primò, quia quando Paulus nominat insigniores Apostolos, Petrum alijs postponit, ut Gal. 2. 9. *Jacobus & Cephas, & Joannes*. Secundò, quia ibidem nò de solo Petro, sed etiam de Jacobo & Joanne dicit: *qui videbantur columnæ esse*. Ergo Jacobum & Joannem Petro exæquat. Tertiò, quia Jacobus, Petrus, & Joannes dederunt dextras Societatis Paulo & Barnabæ; ut hi in gentes, illi verò in circumcisionem ferrent Evangelium. (ibidem) At istæ dextræ Societatis repugnant Primatui Petri. Quartò, quia Paulus 2. Cor. 12. 11. scribit: *Nihil minus fui ab iis, qui sunt supra modum Apostoli*. Quæ verba magnum præjudicium faciunt Primatui Petri. Sic tu.

51. Respondeo. Piget in istis quisquilijs hæreret. Sed tamen, ut est in Proverbijs, *respondendum est stulto juxta stultitiam suam, ne sibi sapiens esse videatur*. Ac primò, non est certum, Petrum medio, non primo loco, positum esse à Paulo. Nam, ut benè notatum est à Cardinale Bellarmino, multi Patres, præsertim Ambrosius, Chrysostomus, Augustinus, & Hieronymus, primum locum illi assignant. Esto tamen; medio loco inter Jacobum & Joannem positus sit. Cur in eo vim facis? Cur non potius in eo, quòd non semel, sed sæpius in Evangelio positus sit primo loco, quando omnes Apo-

stoli simul recensentur? conferamus hæc dua inter se. Tu ais, semel non esse positum primo loco: Ego, sæpè positum esse primo loco. Tu, semel positum esse post unum: Ego, sæpè positum esse ante omnes. Tibi multi cōtradiciunt, ut Ambrosius, Chrysostomus, Augustinus, Hieronymus: Mihi, nullus: ne tu quidem. Uter ergo melioris causæ patronus est?

52. Addo, nec Paulum, quocunq; loco, posuerit Petrum, tibi patrocinari. Nam in eadē Epistola ad Galat. c. 1. diferte scribit, se venisse Hierosolymam, ut videret Petrum, & quindecim diebus apud eum mansisse. Cur nō venit ad Jacobum & Joannem? Nimirum, quia pluris Petrum, quàm illos æstimabat. Unde Ambrosius circa illum locum: *Dignum fuit, inquit, ut cuperet videre Petrum, quia Primus erat inter Apostolos, cui delegaverat Salvator curam Ecclesiarum.* Et Hieronymus in Epist. ad Augustinum (quæ est undecima inter Epistolas Augustini) *Tanta Petrus auctoritatis fuit, ut Paulus in Epistola sua scripserit: Deinde post annos tres veni Hierosolymam videre Petrum.* Et Chrysostomus Homil. 87. in Joannem: *Oserat Apostolorū & Princeps: propterea & Paulus cum præter alios visurus ascendit.* Et Theodoretus in c. 1. ad Galatas: *Etenim cum humana doctrina nō indigeret, ut qui ab universorum Deo eam accepiisset Apostolorum Principi, quem par est, honorem detulit.* Et Oecumenius ibidem: *Post tot tantaq; certamina abiit, ut videret Petrum, tanquam majorem. Ut autem etiam maneret, causa honoris, quem Petrus deferbat, factum est.*

53. Jam verò ex eo, quod Paulus scribit de Petro, Jacobo & Joanne; *Qui videbantur columna esse*, non rectè infer, duos illos Petro fuisse æquatos. Nam inter plures columnas una potest esse sublimior, quàm altera. Sicut suprà monui in simili casu, inter plures summos, unum posse altiorè esse, quàm reliquos. Et habemus manifestum exemplum in scriptura, Proverb. 9. 1. *Sapientia edificavit sibi domum, excidit columnas septem.* Ubi, juxta interpretes, per septem coluunas, vel intelliguntur Doctores Ecclesiæ, vel Sacramenta, vel dona Spiritus sancti. Et tamen non sequitur, vel omnes Doctores, vel omnia Sacramenta, vel omnia dona Spiritus sancti esse inter se æqualia. Imò constat, ubiq; esse magnam differentiam. Nam de Doctoribus legimus, Dan. 13. 3. *Qui docti fuerint fulgebunt quasi splendor firmamenti: Et qui ad justitiam erudiunt multos, quasi stella in perpetuas æternitates.* Jam verò, ut loquitur Apostolus, 1. Corinth. 15. 41. *Stella differt à stella in claritate.* Similiter certum est, inter Sacramenta, præcipuum esse Baptismum, quoad necessitatem: Eucharistiam, quoad præstantiam. Denique dona Spiritus sancti (quæ septem enumerantur ab Isaia, cap. 11. 2. nempe Sapientia, Intellectus, Consilium, fortitudo, scientia, pietas, timor Domini) nō sunt omnia inter se paria. Quomodo ergo ex eo præcisè, quòd tres Apostoli vocantur columnæ, putas convinci posse, æquales inter se esse? Nihil minus.

§4. Quod tertio loco objicis, Petrum, Jacobum & Joannem dedisse dextras Societatis Paulo & Barnabæ, verissimum quidem est; sed non rectè inde concludis, unum alteri non esse præferendum. Quasi verò, quicumq; dextras societatis sibi mutuo porrigunt, pares esse necesse sit. Nō ita est. Primò, quia societas potest esse inter inæquales, ut patet ex illo, 1. Joan. 1.3. *Ut & vos societatem habeatis nobiscum, & societas nostra sit cum Patre & cum Filio ejus Jesu Christo.* Deinde, multi porrigunt sibi invicē dextras, qui honore & autoritate inter se differunt. Nam Jehu Rex dicit Jonadab, filio Rechab, 4. Reg. 10. 15. *Nunquid est cor tuum rectū, sicut cor meum cum corde tuo? Et ait Jonadab: Est. Si est, inquit, da manum tuam. Qui dedit ei manū suam.* An ideo Jehu & Jonadab æquales? Nullo modo. Nam alter Rex erat; alter homo privatus.

§5. Illud denique; *Nihil minus fui ab iis, qui sunt supra modum Apostoli*, non intelligitur de jurisdictione, quasi velit dicere, se nulli Apostolorū cedere in potestate jurisdictionis, ut tu perperam contendis, sed partim de revelationibus, partim de laboribus & miseriis pro Christo susceptis, partim de prodigijs & miraculis ab eo patratis: In quibus omnibus se ait nemini imparem esse. Hoc patet ex ipso cōtextu. Nam de revelationibus sic loquitur: *Si gloriari oportet (non expedit quidem), veniam autem ad visiones & revelationes Domini.* Et postea pergit: *Propter quod placeo mihi in infirmitatibus*



tibus meis, in contumeliis, in necessitatibus, in persecutionibus, in angustiis pro Christo. Cum enim infirmor, tunc potens sum. Factus sum insipiens: vos me coegistis. Ego enim à vobis debui commendari: Nihil enim minus fui abiis, qui sunt supra modum Apostoli, tametsi nihil sum: Signa tamen Apostolatus mei sunt super vos in omni patientia, in signis & prodigijs & virtutibus. Nulla hic mentio jurisdictionis. Sed tu, Marce Antoni, ut hæretici solent, detorques omnia ad tuum sensum. Pudeat imposturæ.

## VII. OBJECTIO.

### *Ex comparatione Petri & Pauli.*

56. **H**anc comparationem instituis ex scriptura, & Patribus. Ex scriptura sic. Sicut Petro dictum est, *Pasce oves meas*, id est, cōmendo tibi ovile meum, Ecclesiam meam: ita Paulus de seipso dicit, 2. Cor. 11. 11. 28. se premi cura & sollicitudine omnium Ecclesiarum; Ergo non minus Paulo, quàm Petro totius Ecclesiæ cura commissa est.

57. Respondeo. Cura & sollicitudo Ecclesiarum duplex est. Una oritur ex justitia: altera ex zelo & charitate. Prior debet esse in Prælati Ecclesiæ, qui habent jurisdictionem Ecclesiasticam. Posterior potest esse in omnibus, qui charitate præditi sunt. Igitur Petrus habuit curam Ecclesiæ ex justitia, quia habuit jurisdictionem in totam Ecclesiam: Quæ ju-

rifdictio significatur per verbum, *Pasce*, ut cap. 3. explicatum est. Paulus verò loquitur de posteriori cura & sollicitudine, quæ oritur ex charitate. Cùm enim recensuisset labores, carceres, plagas, famem, sitim, & alias miseras, quas pro Christo sustinebat; mox subjicit: *Præter illa, quæ extrinsecus sunt, instans mea quotidiana, sollicitudo omnium Ecclesiarum. Quis infirmatur, & ego non infirmor? Quis scandalizatur, & ego non uror?* His posterioribus verbis explicat, unde oriatur illa sollicitudo. Nempe ex duobus actibus charitatis. Primò, ex dolore charitatis, quem percipiebat ex miseria proximi. *Quis, inquit, infirmatur, & ego non infirmor?* Quasi dicat: Infirmor cum infirmantibus, doleo cum dolentibus, lugeo cum lugentibus. Secundò, ex amore & zelo charitatis, quo accensus urebatur. *Quis, inquit, scandalizatur, & ego non uror?* Quasi dicat: Quando aliquis patitur scandalum, tanto zelo & amore accenditur ad tollendum illud scandalum, ut quodammodo uri videar.

§8. Non igitur cura Ecclesiarum, de qua Paulus loquitur, oriebatur ex obligatione iustitiæ; sed ex duplici actu charitatis, dolore scilicet & amore. Quod etiam tuo exemplo facile confirmabo. Nam in expositione consilij perfectionis tuæ, disertè scribis te (quasi alterum Paulum) *semper habuisse desiderium unionis omnium Christi Ecclesiarum: & anxie perspexisse, an possit aliqua excogitari via, omnes Christi Ecclesias ad veram antiquam unionem componendi.*

di. Unde hoc tantum desiderium, mi Antoni? An ex obligatione justitiæ? Non opinor te id dicturum. An ex zelo & fervore charitatis? Hoc dabis, sine dubio. Sed quæro, an hinc inferes, quod de Paulo inferebas, non minus tibi, quàm Petro, totius Ecclesiæ curam à Christo commendatam esse? Non, si sapias.

59. Nec obstat, quod Paulus de seipso scribit 1. Cor. 9. 16. *Si Evangelizavero, non est mihi gloria: necessitas enim mihi incumbit. Vt enim mihi est, si non Evangelizavero.* Non enim loquitur de necessitate justitiæ, sed obedientiæ: Neque de regimine Ecclesiæ, sed de Evangelij prædicatione. Nam ex obligatione præcepti tenebatur apud Gentiles prædicare Evangelium: sicut etiam hoc tempore tenentur Patres Societatis, quando ex virtute obedientiæ mittuntur à Romano Pontifice. At non tenebatur ex obligatione justitiæ gubernare totam Ecclesiam, quia hoc nusquam erat illi commissum: sicut etiam hoc tempore non committitur Patribus Societatis. Utor hoc exemplo, quia tibi notum est. Si tamen vis, aliud accipe. Archiepiscopus Cantuariensis, si obedientiam illi promitteres, posset tibi mandare, ut per totum ipsius Archiepiscopatum, conciones ad populū haberes. An ideo totius Archiepiscopatus Ecclesiarum regimen tibi committeret? Nullo modo. Et tamen non malè diceres: *Vt mihi est, si non Evangelizavero: necessitas enim mihi incumbit.* Quæ necessitas? Non justitiæ, sed obedientiæ & Præcepti. Jam capis mysterium.

60. Non successit ex scriptura comparatio Petri & Pauli, quam urges. Videamus quid ad eandem astruendam adferas ex Patribus, Patrum testimonia, quæ adducis sunt hæc. Irenæus lib. 3. contra hæreses, ca. 13. *Ipsius (Dei) Petrus erat Apostolus, cujus & Paulus.* Ubi Petrum reducit ad paritatem cum Paulo: non tamen eum præfert Paulo.

Clemens lib. 7. constit. Apost. c. 1. inducit Apostolos de Petro sic loquentes: *Ananias & Saphira, Petri coapostoli nostri sententia, morte sunt affecti.* Non vocant illum Principem aut Monarcham, sed coapostolum, tanquam parem.

Gelasius in Tomo de vinculo anathematis, statim in initio, Paulum vocat *coapostolū Petri.*

Augustinus lib. 2. de Baptis. contra Donatistas, c. 4. vocat *collegam Petri.* Et lib. 2. de peccatorum meritis & remiss. c. 13. de Paulo sic loquitur: *Verum etiam in ipso Evangelio, ubi & tanti Apostolatus meruit principatum.* Et in Psal. 130. *Paulus Apostolus, quamvis ex persecutore factus sit predicator, abundantior gratiam consecutus est in omni labore Apostolico, quam ceteri Apostoli.*

Origenes lib. 1. contra Celsum, Paulū vocat *fundatorem Ecclesiarū, post Christum, præcipuum.*

Nazianzenus in Apolog. circa medium, ait Petrum & Paulum, *Verbi & Sapientia & gubernationis gratiam à Christo percipere meruisse.* Et numerans eos, qui populo præfuerunt in Testamento Novo, ponit primum Joannem Baptistam: proximè verò duodecim Apostolos.

Cyrillus Hierosolymitanus catech. 6. Er-

rorem (Simonis Magi) latius se proferentem coarguerunt duo viri boni huc perlati, Petrus & Paulus, Ecclesia Praefecti.

Ambrosius lib. 2. de Spirit. sanct. in fine: Una enim gratia fulgebat in his, quos Spiritus unus elegerat. Nec Paulus inferior Petro, quamvis ille Ecclesiae fundamentum, & hic sapiens architectus, sciens vestigia credentium fundare populorum. Nec Paulus indignius Apostolorum collegio, cum primo facile conferendus, & nulli secundus. Nam qui se in parem nescit, facit aequalem.

Idem Ambrosius serm. 66: de Natali Petri & Pauli. Beati Petrus & Paulus eminent inter universos Apostolos, & peculiari quadam prerogativa prae cellunt. Verum inter ipsos, quis cui praeponatur, incertum est. Puto enim eos aequales esse meritis, qui aequales sunt passione.

Leo Papa serm. i. in Natali Sancti Petri & Pauli. Quos gratia Dei in tantum apicem inter omnia Ecclesia membra provexit, ut eos in corpore, cui Caput est Christus, quasi geminum constituerit lumen oculorum.

Chrysostomus, quicquid tribuitur Petro, tribuit etiam Paulo. Petro tribuitur, quod fuerit *petra* & *fundamentum Ecclesiae*. At Chrysostomus Homil. 2. in Epist. ad Roman. tribuit Paulo, quod fuerit *columna Ecclesiae*, *petra*, *ferro* & *adamante firmior*. Petro tribuitur; quod fuerit *Coryphaeus Apostolorum*. Chrysostomus Homil. 18. ad Roman. idem dicit de Paulo. Petro dicitur Ecclesia commissa. Chrysost. Homil. ultima, dicit Paulum electum à Deo, cui res or-  
bis

*bis, mysteria cuncta, universamque dispensationem concederet.*

Idem Chrysostomus plus tribuit Paulo quā Petro. Nam Homil. 12. in posteriore ad Corinth. sic scribit de Paulo: *Ille non solum, quæ suæ curabat cū sollicitudine, sed etiam, quæ totius mundi.* Et ibidem: *Duplex illi cura erat pro orbe terrarum: & quomodo necessaria non depererent, & quomodo spiritualia abundarent.* Hæc tu hætenus, Marce Antoni.

61. Respōdeo. Vel agis de iurisdictione Petri & Pauli, vel de virtutibus, laborib. & meritis eorum. Si agis de iurisdictione (de qua inter nos disputatio est) non rectè citasti hos Patres. Nam aliqui illorū dicunt, Paulum Petro præcellere: alij æqualem esse: alij dubiū esse, uter præcellat. Quod de iurisdictione intelligi non potest. Alioqui Patres inter se essent contrarij. Non n. cohærent inter se hæc tria. 1. Paulus præcellit Petro iurisdictione. 2. Paulus par est Petro iurisdictione. 3. Dubiū est, uter præcellat iurisdictione. Si a. agis de eorum virtutibus, laboribus, & meritis, tunc quidem rectè citasti hos Patres: sed nihil ad rem, de qua disputamus. Non n. inter nos quæstio est de virtutibus & meritis, sed de sola iurisdictione. Igitur extra rem omnia sunt, quæ adducis. Patres tamen non pugnant inter se. Nam benè cohærent inter se hæc tria. 1. Paulus in laboribus & ærumnis præcellit Petro. 2. Paulus est par Petro, quia uterq; est Apostolus Christi. 3. Incertum est nobis, uter alteri præcellat meritis apud Deum.

62. Hinc

62. Hinc omnia testimonia, quæ adduxisti, facile conciliantur & explicantur. Nam Irenæus, Clemens, & Gelasius faciunt Paulum Petro æqualem, si præcisè spectes Apostolatum. Uterque enim fuit Apostolus Christi. Rectè igitur Paulum vocant coapostolum Petri; & Petrum coapostolum aliorum. Eodè sensu Augustinus Paulum vocat collegam Petri. Quando verò idem Augustinus præfert Paulum, loquitur de laboribus, ut ipse se explicat. *Abundantiorum, inquit, gratiam consecutus est in omni labore Apostolico, quam ceteri Apostoli.* Quod etiam Paulus de se fatetur, 2. Corinth. 11. 23. *Ministri Christi sunt: plus ego, in laboribus plurimis, in carceribus abundantius, in plagis supra modum &c.*

63. Origenes tibi contrarius est, non nobis. Nam cum ait: Paulum esse præcipuum fundatorem Ecclesiarum post Christum; apertè insinuat Christum esse principalem Ecclesiæ fundatorem, quod tu negas. Contendis enim Ecclesiam, non à Christo, sed ab Apostolis fundatam esse post Christi ascensionem, ut lib. 1. c. 1. ostensum est. In eo a. quòd Paulum constituit proximum post Christum, præferendo illum alijs Apostolis in fundatione Ecclesiarum; non contradicit nobis. Fatemur enim, Paulum plus laborasse, quàm Petrum; & plures Ecclesias particulares ab illo per prædicationem Evangelij fundatas esse, quàm à Petro.

64. Nazianzenus sic habet: *Hunc morbum (id est studium inanis gloriæ) curare ac sistere Petri*

*Petri alicujus est aut Pauli, magnificorum Christi Discipulorum, eorum videlicet, qui una cum sermonis dispensatione, etiam charisma acceperunt, & omnibus omnia fiunt, ut omnes lucrifaciant. An hinc putas colligi posse, Paulum Petro fuisse æqualem in jurisdictione? Parum sanus es, si hoc putas. Addit Nazianzenus: quoniam autem Pauli, & illi similium mentionem fecimus, relictis reliquis omnibus, qui vel secundum legislationem, vel prophetiam, vel militarem ducatum, vel aliam consimilem dispensationem populo præfuerunt, quales fuerunt Moyses, Aaron, Josue, Helias, Helisæus, Indices, Samuel, David, Multitudo Prophetarum, Joannes, duodecim Discipuli, & qui illos sunt subsequuti, &c. his, inquam, relictis omnibus, solum Paulum exempli gratia proponamus. Non video, quid ex his verbis velis extundere. Fateor, quosdam ex illis præfuisse populo secundum legislationem; quosdam secundum prophetiam; alios secundum ducatum militarem; alios secundum aliam dispensationem. Sed quid tum? An ideo Petrus & Paulus æquales erant in potestate & jurisdictione? Non sequitur.*

65. At, Cyrillus Petrum & Paulum præfectos Ecclesiæ vocat. Et hoc fateor. Addo, etiam Timotheum; Titum, Polycarpum fuisse Ecclesiæ præfectos. An igitur omnes in eo genere æquales? Non sequitur. Nisi valeat hæc similis consequentia: Omnes Episcopi in Anglia sunt præfecti Ecclesiæ: Ergo omnes sunt æquales: Ergo Archiepiscopus Cantuariensis nihil habet præ cæteris. Tu ipse vide, an hoc legitimè sequatur.



66. Ambrosius cum dicit: *Una enim gratia fulgebat in his quos Spiritus unus elegerat*: loquitur de Paulo & Barnaba, qui simul à Spiritu sancto electi erant ad ministerium. Act. 13. 2. *Ministrantibus autem illis Domino & jejunantibus, dixit illis Spiritus sanctus: Segregate mihi Saulum & Barnabam in opus, ad quod assumpsi eos.* Quod testimonium explicans Ambrosius sic scribit: *Paruerunt ergo Paulus & Barnabas Spiritui sancto imperanti.* Et post pauca subdit: *Una enim gratia fulgebat in his, quos Spiritus unus elegerat.* Facta hac collatione inter Paulum & Barnabam, pergit conferre Paulum cum Petro, his verbis: *Nec Paulus inferior Petro, quamvis ille Ecclesie fundamentum & hic sapiens Architectus, &c ubi Petrum & Paulum facit æquales in Apostolatu, non tamen in jurisdictione Ecclesiastica.* Pergit: *Nec Paulus indignus Apostolorum collegio, cum primo facile conferendus, & nulli secundus. Nam qui se imparem nescit, facit æqualem.* Loquitur de laboribus, in quibus Paulus nullo fuit inferior, 2. Corinth. 11. 23.

67. Leo Papa nihil aliud dicit, quàm Petrum & Paulum esse duo Ecclesie lumina. Quis negat? At inter lumina, unum alio potest esse majus. Quod etiam fatetur Leo serm. 3. de Assumptione sua ad Pontificatum, ubi aperte asserit, *Petrum omnibus Apostolis, & cunctis Ecclesie Patribus præponi.*

68. Chrysostomus aliqua ex ijs, quæ tribuuntur Petro; tribuit etiam Paulo; sed non omnia. Nam ipsemet tribuit Petro Primatum

Ecclesiæ, quem Paulo non tribuit. Verba ejus cap. 4. citata sunt. De cura omnium Ecclesiarum, quàm tribuit Paulo, dictum est ad initium hujus objectionis.

69. Exijs, quæ hætenus dicta sunt, duo colligo. Primo, Patres in astruendo Petri Primatu, nobis adstipulari. Secundò, te, qui oppugnas Primatum Petri cum alijs rebellibus, sæpè tibi ipsi contrarium esse: nunc hoc, nunc illud asserere, prout occasio fert; non prout veritatis studium exigit. Deinceps de Pontifice Petri Successore dicendum est.



## LIBER TERTIUS

## DE PRIMATU ROMANI Pontificis.



*Hinc Primatum magno conatu ac studio oppugnans toto libro quarto. Et in eo oppugnando, plus laboris ac operæ videris suscepisse, quàm fortasse pro anima tuâ salute suscepturus es. Sed frustra. Nam defenso semel ac stabilitò Primatu Petri, facile erit Primatum Pontificis, qui Petri successor est, defendere ac stabilire. Sunt autem hæc potissimum, quæ oppugnas. 1. Ecclesia Romana. 2. Pontifex Romanus. 3. Cardinales. 4. Nuncij Apostolici, qui in diversas provincias à Pontifice mittuntur. De Cardinalibus & nuncijs nihil dicam. Solum de Primatu Romana Ecclesiæ & Pontificis agendum est, ex quo reliquæ dependent: Et, quo salvo, reliquæ salva sunt. Agendum autem hoc ordine. 1. An Ecclesia Romana à Petro fundata sit? 2. An Petrus fuerit Episcopus illius Ecclesiæ à se fundata? 3. An Pontifex sit successor Petri in eadem Ecclesia? 4. An sit Caput seu Pastor totius Ecclesiæ, sicut Petrus fuit. In his ferè dissentiens à Catholicis.*

*An Ecclesia Romana à Petro fundata sit?*

1. **S**olent hîc multa disputari de Petro. 1. An fuerit Romæ. 2. An mortuus sit Romæ. 3. An ibi Ecclesiam primus fundaverit. 4. An fuerit ibi Episcopus Ecclesiæ à se fundatæ. Aliqui ex Lutheranis negant hæc omnia. Tu, cū Calvino, concedis duo priora, propter consensum Patrum: Verba Calvini lib. 4. Institut. c. 6. §. 15. sunt hæc: *Propter hunc scriptorum consensum, non pugno, quin illic mortuus fuerit.* Tua verò, lib. 4. c. 1. n. 2. sunt hæc: *Petrus Roma martyrio coronatū fuisse, malo assentiri, quàm reluctari, ob plurimorum sanctorum Patrum consensum.*

2. Reliqua duo, partim hoc capite, partim sequenti discutienda sunt. Ac primo, *An Ecclesia Romana primum à Petro fundata sit?* Vel quod idem est; *An Petrus Roma Evangelium primus prædicaverit, & Romanos ad fidem Christi converterit?* Tu Paulo potius hanc laudem tribuis, quàm Petro. Nam loco citato n. 9. sic scribis: *Si itaq; fundatio Romana Ecclesiæ spectetur, eam aut magis, aut non minus Paulo deberi, quàm Petro affirmamus.* Par enim fuit, ut Civitas, quæ erat Caput Gentium, à Doctore Gentium primum institueretur.

3. Duplex hic error est. Alter Romanos à Doctore gentium, id est, à Paulo, primùm institutos esse in fide Christi. Quod est contra ipsum Paulum, Romanorum 1.8. ubi ait: *Fides vestra annuntiatur in universo mūdo*. Et tamen, cum hoc scriberet, nondum fuerat Romæ. Nam mox subdit: *Desidero videre vos*. Et infra ibidem: *Sape proposui venire ad vos, & prohibitus sum usq; adhuc*. Ergo Romani jam erant fideles, antequam Paulus ad eos veniret. Non igitur per illum primò facti sunt fideles, ut tu fingis in odium Petri.

4. Alter est, foundationem Romanæ Ecclesiæ, vel magis, vel non minus deberi Paulo, quàm Petro. Quod est contra consensum Patrum, qui illam Petro potius tribuunt, quàm Paulo. Theodoretus in illud. Rom. 1.11. *Desidero videre vos, ut aliquid impertiar vobis gratia spiritualis, ad confirmandos vos*; sic scribit: *Quia Petrus primus Evangelij doctrinā illis tradiderat, subjungit: ad confirmandos vos. Quod perinde est, ac si diceret: Non aliam doctrinam vobis trado, sed traditam confirmare volo*. Igitur Petrus, ex sententia Theodoreti, primus fuit, qui Romanos ad fidem convertit: Paulus verò conversos confirmavit. Quid autem sit confirmare, dicam postea ex ipso Paulo. Et Paulus Orosius lib. 7. Hist. c. 6. *Exordio regni Claudij, Petrus Apostolus Domini nostri Jesu Christi Romam venit, & salutarem cunctis fidem, fideli verbo docuit, potentissimisq; virtutibus approbavit: Atq; exinde Christiani Romæ esse cæperunt*. Nota, Exinde cæperunt

esse Christiani. Ergo ante Petri adventum, non erant Christiani. Falsum igitur, quod asseris, à Paulo primum institutos esse; & illi potius, quàm Petro conversionem illorum deberi.

Et Lco Papa Sermon 1. de Natal. Apost. Petri & Pauli: *Cum Apostoli imbuendum Evangelio mundum, distributis sibi terrarum partibus, suscepissent, beatissimus Petrus, Princeps Apostolici ordinis, ad arcem Romani destinatur imperij. Nimirum, ut illam partem Evangelio imbueret. Et Epist. 60. ad Maximum Antiochenum Episcopum: Oportet dilectionem tuam ejus meminisse doctrinae, quam precipuus Apostolorum omnium beatus Petrus, per totum mundum quidem, uniformi predicatione, sed speciali magisterio in Antiochena & Romana urbe fundavit. Quid est hoc, Speciali magisterio? Agnoscis, opinor, quid velim.*

Et Theodosius Imperator Cod. de Summ. Trinit. & fid. Cathol. *Cunctos populos, quos clementia nostra regit imperium, in tali volumus religione versari, quam Divum Petrum Apostolum tradidisse Romanis, religionisque adhuc ab ipso insinuata declarat.*

Et Gregorius Turonensis lib. 1. Hist. Francorum, cap. 25. *Beatus Petrus Apostolus sub Imperatore Claudio Romam aggreditur, ibique, predicans in multis virtutibus, manifestissime Christum esse Dei filium comprobavit. Ab illis n. diebus, Christiani apud civitatem Romanam esse ceperunt.*

5. Idem scribunt Eusebius lib. 2. Histor. cap. 14. Arnobius lib. 2. cont. Gentes, & alij.

Cui

Cum his omnibus cōtradictis: Cum antea quærebatur, An Petrus Romæ mortuus sit? dicebas: *malo assentiri ob plurimorum Patrum consensum, quàm reluctari.* Jam verò, cùm quæritur, An Petrus Romanos ad fidem primus convertit? contrarium dicis: *Malo reluctari in odium Papa, quàm ob plurimorum Patrum consensum assentiri.* Ne tamen temerè videaris reluctari, multa objicis sine ordine, ut lectori fucum facias: quæ breviter perstringam.

6. Primò, objicis illud, Act. 19. 21. *Hic autem expletis, proposuit Paulus in Spiritu, transire Macedonia & Achaia, ire Hierosolymam, dicens: Quoniam postquam fuero ibi, oportet me & Romam videre.* Ex quo colligis, Paulum fuisse anxium de Romanorum cōversione, & ab eo primùm conversos esse. Respondeo. Non fuit anxius de illorum cōversione, quia jam erant conversi ad fidem, ut ex ipso Paulo ostensum est; sed de cōfirmatione. Sic enim de se scribit Rom. 1. 10. *Obsecrans, si quomodo tandem aliquando prosperum iter habeam in volūtate Dei veniendi ad vos. Desidero enim videre vos, ut aliquid impertiar vobis gratia Spiritualis ad confirmandas vos, id est, simul consolari in vobis per eam, quæ invicem est, fidem vestram atq; meam.* Hic vide, cur desideret videre Romam. Nempe, ut tam ipse, quàm Romani percipiant aliquam consolationem ex mutua fidei communicatione, & sic in fide magis confirmentur. Erant ergo jam conversi ad fidem.

7. Sed urges: *Cur Paulus tam sollicitus est*

*de videnda Roma; si jam Romæ erat Petrus? Jam dixi; Propter consolationem, quam Romani ab ipso, & vicissim ipse à Romanis, ex mutua fide erat percepturus. Nec præsentia Petri obstare potuit. Imò, si Petrus Romæ erat, major fuit occasio, cur sollicitus esset de videnda Roma: Nempe, ut & Petrum videret. Quod debbas colligere ex illo, Gal. 1. 18. *Post tres annos veni Hierosulymam, videre Petrum.* Cur non veniat Romam, videre Petrum, si Petrus Romæ erat?*

8. Secundò, objicis illud Act. 23. 1. *Sequenti nocte, assistens ei Dominus ait: Constans esto: Sicut enim testificatus es de me in Hierusalem, sic te oportet & Romæ testificari.* Ex quo etiam vis convincere, Paulum propterea ivisse Romam, ut primus Evangelium ibi prædicaret. Respondéo. Non rectè. Nam utrobique est eadem formula loquendi: *testificari in Ierusalem, & testificari Romæ.* At ex hac formula, *Paulus testificatus est in Ierusalem de Christo* non sequitur, Paulum fuisse primum, qui in Ierusalem prædicaverit Evangelium; cum constet, Petrum fuisse primum. Ergo similiter, ex ista formula, *Paulus testificatus est Romæ de Christo*, non sequitur, fuisse primum, qui id fecerit. Non nego quidem, utroque loco testificatum esse, & multos ad fidem convertisse; sed nego, primum ante alios id fecisse.

9. Tertiò objicis; Scriptura nihil dicit de Petro, quod spectet ad Romanorum conversionem. At de Paulo legimus, Rom. 1. 14. *Græ-*

*cis*



*etis ac barbaris, sapientibus & insipientibus debitor sum. Ita (quod in me) promptum est & vobis, qui Roma estis, Evangelizare. Respondeo. Sicut Scriptura nihil dicit de Petro, quod spectet ad primam Romanorum conversionem; ita etiam nihil de Paulo. Igitur ex hac parte est par ratio. Rursum, sicut ex scriptura constat, Paulum fuisse Romam; sic etiam constat, Petrum fuisse Romam. Nam in 1. Epistola canonica, c. 5. v. 13. sic scribit: *Salutat vos Ecclesia, quæ est in Babylone collecta, & Marcus filius meus.* Ubi, nomine Babylonis, intelligit Romam, ut interpretantur Patres, Eusebius lib. 2. Hist. c. 15. Hieronymus in catal. script. Eccles. in Marco, & alij passim. Et tu ipse fateris, lib. 4. c. 3. n. 26. & alibi. Est igitur & hic par ratio Petri & Pauli. In eo solum est disparitas; quod scriptura expressè dicat, Paulum Romam Evangelizasse; quod de Petro expressè non dicit. Sed quid refert? Ex eo nihil convinci potest contra nos. Non enim sequitur: Scriptura hoc non dicit de Petro: Ergo factum non est. Sicut non sequitur: Scriptura non dicit Petrum & Paulum Romam martyrium passos esse: Ergo ibi passi non sunt. Nec item: Scriptura non dicit Apostolos symbolum fidei condidisse: Ergo non condiderunt. Notum est illud apud Theologos; *Argumentum ab auctoritate negativa non valet.* Denique, huic disparitati oppono aliam in majoris momenti; quæ est hujusmodi: Antiqui Patres communi consensu tradunt, Petrum Romanos primo ad fidem convertisse; quod de Paulo non tradunt. Hanc digere, si potes.*

10. Quartò objicis: Ipsemet Paulus testatur, Romanos accepisse ab ipso fidem. Et Evangelium Rom. 16. 25. *Ei autem, qui potens est vos confirmare juxta Evangelium meum, & prædicationem Jesu Christi, &c.* Respondéo. Paulus non loquitur de Evangelio suo, quod ipse Romæ viva voce præsens prædicaverat (quia nondum fuerat Romæ, cum hoc scriberet, ut supra ostendi) sed de Evangelio, quod per Epistolam ipsis tradiderat. Est igitur hic sensus: Ei autem, qui potest vos in cæpto confirmare, juxta Evangelium meum, quod in hac Epistola ad vos scripsi, sit honor in sæcula sæculorum. Nam in illa Epistola scripserat, omnes, etiam gentiles & paganos, justificari ex fide Christi: Et quidem gratis, sine ullis ipsorum meritis præcedentibus. Ex qua re poterant confirmari in fide semel suscepta.

11. Sed instas: Paulus loquitur de Evangelio, quod ipse prædicaverat Romanis, non quidem per se, sed per Discipulos suos, antequam ipse personaliter veniret Romam. Et hoc probas ex eodem cap. 16. ubi multos nominatim salutat, ut Priscillam & Aquilam, Andronicum & Juniam. Respondéo. Nec assertio tua vera est, nec probatio valet. Non enim sequitur: Paulus salutat Priscillam, Aquilam, Andronicum & Juniam, Romæ existens: Ergo per Discipulos suos convertit Romanos ad fidem. Prius probanda sunt hæc tria. 1. Illos fuisse Discipulos Pauli. 2. Missos esse à Paulo Romam, ut Romanos converterent. 3. Eos id

præ-

præstitisse. Nihil istorum probas. Quid si ego contrarium probem? Quod facile est. Nam de Andronico & Junia sic legimus Roman. 16. 7. *Salutate Andronicum & Juniam cognatos & comparios meos: qui sunt Nobiles in Apostolis: Qui & ante me fuerunt in Christo.* Certè si fuerunt Christiani, antequam Paulus fieret Christianus; & quidem præcipui inter Apostolos; id est, inter Doctores Evangelij (ut interpretatur Chrysostomus, Theodoretus, Cornelius à Lapide) non est probabile, fuisse Pauli Discipulos.

12. Similiter de Priscilla & Aquila sic legimus: Roman. 16. 3. *Salutate Priscam & Aquilam adjuutores meos in Christo Jesu.* Et Actorum 18. 1. *post hac Paulus egressus Athenis, venit Corinthum: Et inveniens quendam Judæum, nomine Aquilam, Ponticum genere, qui nuper venerat ab Italia, & Priscillam uxorem ejus (eò quòd præcepisset Claudius decedere omnes Judæos à Roma) accessit ad eos. Et quia ejusdem erat artis, manebat apud eos, & operabatur. Erant autem Scenofactoria artis. Et infra versic. 24. Judæus autem quidam, Apollo nomine, Alexandrinus genere, vir eloquens, devenit Ephesum potens in scripturis, &c. Hic ergo capit fiducialiter agere in Synagoga. Quem cum audissent Priscilla & Aquila, assumpserunt eum, & diligentius exposuerunt ei viam Domini.* Ex quibus hæc colligo. 1. Quòd Aquila & Priscilla habitaverint Romæ, tempore Claudij Imperatoris. 2. Quod ab eodem Claudio cum aliis Judæis, Romæ expulsi fuerint (Anno Christi

51. ut refert Paulus Orosius. ) 3. Quòd post expulsiõem, venerint Corinthum, & ibi primum à Paulo visi & cogniti sint. 4. Quòd postea cum Paulo profecti sint Ephesum, & ibi in Christiana fide perfectè instruxerint quendam Judæum, nomine Apollo. 5. Quòd ob hanc instructionem, vocati sint adjutores Pauli in Christo Jesu. 6. Quòd post hæc omnia Romam reversi sint, & ibi habitaverint eo tempore, quo Paulus scripsit Epistolam ad Romanos, id est, Anno Christi 58. At, quòd fuerint Discipuli Pauli, ex nullo horum constare potest; Tu hoc fingis sine fundamento.

13. Quintò, objicis illud 2. Tim. 4. 16: *Interea prima defensione nemo mihi adfuit, sed omnes a me relinquerunt: Non illi imputetur. Dominus autem mihi assistit, & confortavit me, ut per me prædicatio impleatur, & audiant omnes gentes. Et liberatus sum de ore leonis.* Ubi, inquis, per leonem intelligit Neronem, à quo tantisper liberatus, Romanæ Ecclesiæ fundandæ egregiam uavavit operam. Et hæc est, inquis, illa prædicatio, *ut audiant omnes gentes.* Quia cum Roma esset Caput omnium gentium, inde facilè fides in omnes gentes erat penetratura. Sic tu interpretaris. Respondeo. Vera interpretatio consistit in his punctis. Primò, Paulus bis fuit Romæ in carcere sub Nerone. Priori vice liberatus est: posteriori, martyrio affectus. Igitur hoc loco agit de defensione sua, quam habuit in priori carcere, quando scilicet secundo anno Neronis, Hierosolymæ captus, ad eun-

eundem Romam missus est, ibique per biennium mansit, (Actor. 28. 30.) Secundò, in illa defensione desertus est à suis, quia non audebant illi assistere, propter crudelitatem Neronis, quam metuebant. Nihilominus. Deum habuit adiutorem, qui eum corda Regum habeat in sua manu, ita promovit & flexit cor Neronis, ut Paulum è carcere dimiserit. Tertiò, hoc id eo factum est à Deo, ut Paulus, qui jam Romæ biennio in carcere prædicaverat Evangelium, etiam in Hispania & alibi prædicaret. Quod etiam contigit. Nam liberatus ex carcere, statim profectus est in Hispaniam, & vicinas provincias, ibique per aliquot annos fidem Christi prædicavit. Postea Romam rediens, iterum captus est, & martyrio coronatus.

14. Hæc interpretatio desumitur ex communi Patrum sententia, apud Toletum, Pererium, & Cornelium de Lapide, in c. 15. Epistolæ ad Romanos, v. 24. Discrepat autem à tua interpretatione. Tu dicis, Paulum post liberationem ex carcere, Romanæ Ecclesiæ fundandæ operam navasse: Et prædicationem Evangelij, de qua loquitur Paulus, Romæ cōtigisse. Nos dicimus Paulum biennio quidem in carcere prædicasse Evangelium (ut expressè habetur Act. 28. 30.) sed liberatum ex carcere, non mansisse Romæ, sed in Hispaniam ivisse: Ac proinde prædicationem, de qua loquitur Paulus, non Romæ, sed in Hispania factam esse. Et hoc probatur ex ipso Paulo, Roman. 15. 24. *Cum, inquit, in Hispaniam proficisci*

cepe-

tepero, spero, quòd prateriens videam vos, & à vò-  
bis deducar illuc, si vobis primum ex parte fructus  
fuero. Ubi fatetur, se tantum in transitu voluisse  
Romam videre, & rectà in Hispaniam contē-  
dere. Ut significet, Romanos nō indigere prę-  
dicatione illius, quippe quibus Evangelium  
jam antea erat annunciatum. Hispanos autē  
indigere, qui vix audiverant aliquid de Chri-  
sto. Ita Toletus in illum locum. Et consenti-  
unt Patres ab illo citati.

15. Sextò objicis (n. 13) illud Romanorum  
15.20. *Si autem predicavi Evangelium hoc, non  
ubi nominatus est Christus, ne super alienum fun-  
damentum aedificarem: Sed sicut scriptum est: Qui-  
bus non est annuntiatum de eo, videbunt: Et qui  
non audierunt, intelligent.* Ex quo loco conaris  
Batonium refellere, qui asserit, Petrum posu-  
isse fundamentum Ecclesię Romanę; ac de-  
inde Paulum superædificasse. Tu contrā con-  
tendis, Paulum non solere prædicare Evan-  
gelium, nisi ubi antè prædicatum non est. Rę-  
spondeo. Iterum tibi contradicis. Nam antea  
dixisti, Discipulos Pauli posuisse fundamen-  
tum Ecclesię Romanę; ac deinde Paulum  
perfecisse. Hic dicis Paulum non solere præ-  
dicare Evangelium, nisi ubi antea prædica-  
tum non est. Quę duo inter se pugnant. Dein-  
de, falsò interpretaris mentem Pauli. Non e-  
nim universè asserit, nusquam se prædicasse,  
vel prædicare Evangelium, nisi in ijs locis, ubi  
Christus nominatus non est: Sed se hæctenus  
prædicasse Evangelium apud multos genti-  
les,

lēs, qui nihil audierant de Christo, juxta illud vaticinium Isaia: *Quibus non est annunciatum de eo, videbunt; & qui non audierunt, intelligent.* Igitur hæc est propositio Pauli: Ego prædica- vi Evangelium in Arabia, Seleucia, Cipro, Pamphilia, Lycaonia, Phrygia, Galatia, A- chaia, & alijs gentilium provincijs, ubi nihil antea auditum erat de Christo. Quæ verissima est, ut patet Act. 13. & seqq. Tu fingis hanc esse: Paulus nunquam prædicavit Evangelium in aliquo loco, nisi ubi antea prædicatum non est. Quæ est falsa. Nam prædicavit Hieroso- lymis, ubi antea prædicatum erat à Petro. Quod etiam de Roma dicendum est.

16. Septimò objicis (n. 14.) Paulus arguit imperfectionem fidei à Romanis susceptæ, Rom. I. 11. *Desidero videre vos, ut aliquid im- pertiar vobis gratia spiritualis ad confirmandos vos.* Quod non fecisset, si à Petro fuissent e- docti. Respondeo. Hoc argumentum sic re- torqueo: Quod non fecisset, si à Discipulis Pauli fuissent edocti, ut tu asseris. Quid re- spondes, Antoni? Deinde falsum est, quod as- sumis. Non arguit, sed laudat illorum fidem. *Primum*, inquit, *gratias ago Deo meo per Jesum Christum pro omnibus vobis, quia fides vestra an- nunciatur in universo mundo.* Certè, non age- ret Deo gratias propter eorum fidem, si esset imperfecta & reprehensione digna. Nec diceret Hieronymus libr. 3. contra Ruffinum, cap. 4. *Ad Romanos Apostolico ore laudatos perfi- dia non habet accessum.* Ubi, & cujus ore lau- dados?



datos? Pauli, cum dixit: *Fides vestra annuntiatur in universo mundo.* Nec obstat illud, quod tu imperitè adducis: *Ut aliquid impertiar vobis gratia spiritualis ad confirmandos vos.* Nam ibi nullum est verbum, quod arguat imperfectiōnem fidei. Imò contrarium colligitur ex ipso textu, qui sic habet: *Ad confirmandos vos, id est simul consolari in vobis per eam, qua invicem est, fidem vestram atque meam.* At quæ esset consolatio ex parte Pauli, si videret Romanos habere fidem imperfectam?

17. Octavo objicis (n. 15.) Paulus in Epistola ad Rom. non salutatur Petrum, cum tamē multos alios inferioris ordinis salutet: Ergo signum est, Petrum non fuisse tunc Romæ, alioqui & illum salutasset. Respondeo. Hoc argumentum sumpsisti ex Illyrico Lutherano. Et duplex in eo vitium est: Unum, quia non sequitur: Paulus scribens ad Romanos, non salutatur Petrum: Ergo Petrus non erat tunc Romæ. Sicut non sequitur: Paulus scribens ad Ephesios, non salutatur Joannem: Ergo Joannes non fuit Ephesi. Item, scribens ad Hebræos, non salutatur Jacobum: Ergo Jacobus non erat Hierosolymis. Quod necesse sit, omnes notos salutare, qui alicubi sunt. Alterum, quia multo minus sequitur: Petrus tunc non erat Romæ: Ergo antea non prædicaverat ibi Evāgelium. Potest enim fieri, ut antea fuerit Romæ, & postea circa illud tempus, quo Paulus scripsit Epistolam, non fuerit. Habemus exemplum in ipso Paulo. Fuit Romæ per biennium in vinculis.



culis. Deinde profectus est in Hispaniā. Postea iterum redijt Romam. Quare similiter non potuisset Petrus, quando Romæ prædicaverat Evangelium, & Ecclesiam ibi fundaverat, parum secedere, ac deinde ad Ecclesiam, à se fundatam rēdire? Et ita factū esse, tradunt magni Autores. Vide Bellar. lib. 2. de Pontif. c. 7.

18. Nonò objicis (n. 15.) Romani dixerunt Paulo Romam venienti Actor. 28. 21. *Nos neque literas accepimus de te à Judæa, neque adveniens aliquis fratrum nunciavit aut locutus est quid de te malum. Rogamus autem à te audire, quæ sentis. Nam de secta hac notum est nobis, quia ubique ei contradicatur.* Ex quo loco sic ratiocinaris: Si Petrum habuissent præsentem, & ejus prædicationes audivissent, non essent adeò novi & rudes, neque opus haberent, ut Paulus aliquam eis pleniorē novæ illius sectæ notitiā traderet. Respondeo. Hoc argumentum æquè tibi, ac nobis, solvendum est. Nam sicut nos dicimus, Petrum, antequam Paulus Romam veniret, prædicasse Romanis Evangelium: Sic tu dicis, Discipulos Pauli id fecisse, non Petrū. Si ergo valet hæc consequentia: Romani cupiebant à Paulo audire pleniorē notitiā fidei Christianæ: Ergo non habebant Petrum præsentem, nec Petrus ipsis prædicaverat: Valebit etiam hæc: Ergo non habebant Discipulos Pauli præsentēs, nec Discipuli Pauli ipsis prædicaverant. Aut si hæc non valet, cur ista valeat? Hic responde, quod vis. Nam quicquid dixeris pro te, dixeris etiam pro nobis: Et vi-

cissim, quicquid contra nos, etiam contra te.

19. Addo, Romæ tum temporis fuisse non solum gentiles, sed etiam Judæos: Utrosque à Petro quidem audivisse Evangelium, sed non omnes fuisse conversos; Multos adhuc mansisse, vel in sua gentilitate, vel in Judaismo: multos dubitasse; multos ex curiositate voluisse audire, quid Paulus de Evangelio sentiret. Sicut etiam cōtigit Christo in Judæa prædicanti. Nam aliqui ex Judæis credebant illi; alij non credebant; alij dubitabant. Idem factum est Iconij, cum ibi Paulus & Barnabas prædicarent Evangelium. Act. 14. 1. *Factum est autem Iconij, ut simul introirent in Synagogam Judæorum, & loquerentur, ita ut crederet Judæorum & Græcorum copiosa multitudo. Qui verò increduli fuerunt Judæi, suscitaverunt, &c.* Et infra: *Divisa est autem multitudo Civitatis: & quidam quidem erant cum Judæis, quidam verò cum Apostolis.* Similia contigerunt Thessalonicæ, Berræ, Athenis, Corinthi, Ephesi, & alibi, Act. 17. & seqq. Cur non similiter potuit fieri Romæ? sicut revera factum est.

20. Decimò objicis (n. 16. & seqq.) Petrus non poterat venire Romam ante Paulum. Hoc probas ex Chronologia, quam proponis. Respondeo. Illa Chronologia à te conficta est: Et in multis discrepat à Chronologia aliorum autorum tam veterum, quàm recentiorum. Cur tibi potius credam, quàm illis? Illi dicunt: Petrum venisse Romam circa Annum secundum Claudij Imperatoris, ut Irenæus,

Reus, Tertullianus, Cyprianus, Arnobius, Lactantius, Optatus, Hieronymus, Ambrosius, Augustinus, & alij quam plurimi apud Baronium Tomo 1. Annalium, Anno Christi 44. At constat, Paulum venisse Romam anno tertio Neronis, ut tu ipse fateris. Igitur necesse est, Petrum, ut minimum, tredecim annis prius venisse, quam Paulum. Si tu aliter sentis, per me licet. Nunquam tamen efficies, ut relicto Christiani orbis consensu, tibi assentiar, homini novo & inconstanti, qui non veritatis studio, sed ambitionis æstu ad scribendum, ut sæpè dixi, impulsus es.

21. Undecimò objicis (n. 10.) multi Patres conversionem Romanorum æquè Petro & Paulo tribuunt, ut Irenæus, Cajus, Dionysius Corinthiorum Episcopus, Lucius Papa, Tertullianus; Cyrillus Hierosolymitanus; Chrysostomus, Gregorius, Bernardus, Innocentius. Respondeo. Duo tibi probanda sunt. Primò, Paulum fuisse primum; qui Romanos ad fidem cōvertit. Quod nunquam probabis. Nec ullus illorum Patrum id asserit. Secundò, Paulum vel magis, vel non minus, quam Petrum fundasse Ecclesiam Romanam: Neque hoc asserunt citati Patres. Quid ergo? Aliqui dicunt, Petrum & Paulum id fecisse per prædicationem Evangelij: non tamen addunt, quod tu addis, Paulum vel magis, vel non minus, quam Petrum; id fecisse. Ita Irenæus lib. 3. contra hæreses cap. i. his verbis: *Matthæus in Hebrais, ipsorum lingua scripturam*

*edidit Evangelij, cum Petrus & Paulus Romæ Evangelizarent, & fundarent Ecclesiam. Quod non est contra nos. Fatemur utrumq; fuisse Romæ, & ibi Evangelium prædicasse; sed prius Petrū, quàm Paulum, id fecisse. Alij dicunt, Petrum & Paulum reliquisse Romanis Evangelium suo sanguine signatum, ut Tertullianus lib. 4. contra Marcionem c. 5. Quibus, inquit, (Romanis) Evangelium Petrus & Paulus sanguine quoque suo signatum reliquerunt. Neq; hoc negamus. Alij deniq; Petrum prædicasse Romæ Evangelium, antequam Paulus eo veniret, ut Chrysostomus Homil. 2. in Epist. ad Roman. post initium, cum ait: Atqui Petrus prædicaverat Romæ. Verum, quæ ille gesserat, Paulus pro suis reputat. Hoc contra te est.*

## CAPUT SECUNDUM.

*An Petrus fuerit Episcopus Romana Ecclesie.*

1. **O** Stensum est ex communi Patrum sententia, Petrum circa annum secundum Claudij venisse Romam, & ibi sua prædicatione multos convertisse ad fidem; atque ita Romanam Ecclesiam fundasse. Nūc quæstio est; *An etiam fuerit Episcopus illius Ecclesie? vel, An sederit in cathedra Romana Ecclesie à se fundata?* Tu nihil peculiariter illi tribuis in hac re, præ Paulo. Nam c. 1. n. 8. asseris hæc tria. Primò, Petrum non aliquo peculiari

culiati titulo fuisse Episcopum Romanæ Ecclesiæ, sed solum ratione sui Apostolatus. Secundò, eodem sensu Paulum fuisse ibidem Episcopum. Tertiò utrumq; tam diu fuisse ibi Episcopum, quamdiu quisque actu exercuit ibi officium Apostoli, id est, officium prædicandi Evangelium. Nihil igitur in hoc negotio plus habere Petrum, quam Paulum.

2. At Patres longè aliter sentiunt. Eusebius in Chronico, Anno 44. sic scribit: *Petrus natione Galilaus, Christianorum Pontifex Primus, cum primum Antiochenam Ecclesiam fundasset, Romam proficiscitur, ubi Evangelium prædicans, viginti quinque annis ejusdem urbis Episcopus perseverat.*

Hicronymus in Catal. script. Eccles. *Petrus Roma viginti quinque annis cathedram sacerdotale tenuit. Et in Epist. ad Damasum: cum successore Piscatoris, & Discipulo crucis loquor: Ego beatitudini tua, i. e. Cathedra Petri, communionem cõsocior.*

Severus Sulpitius lib. 2. Hist. *Namq; eo tempore, divina apud urbem religio invaluerat, Petro ibidem Episcopatum gerente: & Paulo, postquam ab injusto præsidis judicio Casarem appellaverat, Romam deducto.*

Cyprianus lib. 4. Epist. 2. ad Antonianum: *Factus est Cornelius Episcopus, cum Fabiani locus, id est, cum locus Petri, & gradus Cathedra sacerdotalis vacaret.*

Optatus Milevitanus lib. 2. contra Parmenianum: *Negare non potes, scire te in urbe Roma, Petro primo Cathedram Episcopale esse collocatam,*

in qua sederit omnium Apostolorum Caput. Petrus.

Augustinus lib. 2. contra literas Petiliani c. 51. *Cathedratibi quid fecit Ecclesia Romana, in qua Petrus sedit, in qua nunc Anastasius sedet? Et in Psalmo contra partem Donati: Numerate Sacerdotes, vel ab ipsa Petri sede: Ipsa est petra, quam non vincunt superba inferorum porta.*

Gregorius in Psalm. 5. pœnitentialem: *In tantum autem suæ temeritatem extendit vesania, ut Caput omnium Ecclesiarum Romanam Ecclesiam sibi vendicet, & in domina gentium terra jus potestatus usurpet. Quod omnino ille fieri prohibuit, qui hanc beato Petro Apostolo specialiter commisit.*

3. Ex his testimonijs (ut multa alia omit-  
tam) notanda sunt hæc: 1. Petrus primus Pon-  
tifex Christianorum. 2. Petrus viginti quinque  
annis Romanæ urbis Episcopus fuit. 3. Petrus  
Romæ viginti quinque annis Cathedram sa-  
cerdotalem tenuit. 4. Petrus Romæ Episcopa-  
tum gessit. 5. Petro cathedra Episcopalis pri-  
mo Romæ omnium collocata est. 6. Petrus se-  
dit in cathedra Romanæ Ecclesiæ. 7. Romana  
Ecclesia est Petri sedes. 8. Romana Ecclesia  
Petro specialiter commissa est. Nihil horum  
dicitur de Paulo. Et tu tamen, Marce Antoni,  
contra communem horum Patrum consen-  
sum, audes asserere, Paulum æquè fuisse Ro-  
mæ Episcopum, ac Petrum? Imò prius Romam  
venisse, quam Petrum? Prius Ecclesiam ibi fuisse,  
prius Episcopum Ecclesiæ fuisse?

4. Multa objicis (n. 11. & 12.) Primò, Linus  
& Clemens, qui primi successerunt Apostolis  
in

in Ecclesia Romana, fuerunt discipuli Pauli: Ergo signum est, magis paulum, quàm petrū, fuisse Romæ Episcopum. Respondeo. Unde probas fuisse pauli Discipulos? Sed fuerint: An ideo sequitur, paulum magis, quàm petrum, fuisse Romanæ Ecclesiæ Episcopum? miror te sic desipere. Omnes, qui scribunt catalogum Romanorum pontificum seu Episcoporum, incipiunt à petro, & pergunt ad Linum, Clementem, & alios deinceps. Tu fingis novum catalogum, in quo oporteat incipere à paulo, & progredi ad Linum, Clementem, & alios succellores. Parum prudenter.

5. Secundò objicis: Multi pontifices Romani testantur se accepisse auctoritatem à principibus Apostolorum, petro & paulo: Et se multa agere ex eorum auctoritate. Ergo non minus paulus, quàm petrus, fuit Romæ Episcopus. Respondeo. Pontifices dicunt se multa facere ex auctoritate petri & pauli, quia petrus & paulus sua prædicatione & sanguine fundarunt Ecclesiam Romanam. In ea tamen fundanda, petrus paulum antecessit, ut probatum est. Nam Romani primò conversi sunt à petro, ac deinde à paulo in fide confirmati. Et uterque quidem fuit Apostolus Romanorum; Sed petrus peculiari ratione Episcopus, cui alij Episcopi successerunt. Hoc patet ex patribus jam citatis.

6. Tertiò objicis: pontifices dicuntur Vicarij petri & pauli, ut patet ex quadam Synodo sub Joanne 8. Ubi Episcopi illius Synodi i-

ta loquuntur ad Carolum Imperatorem: *Jam quia divina pietas vos beatorum Principum Apostolorum, Petri & Pauli interventione, per Vicariū ipsorum, Dominum videlicet Joannem, summum Pontificem & universalem Papam, specialemq; Patrem nostrum, &c.* Respondeo. Vel admittis illam Synodum, vel respuis. Si admittis, necesse est te admittere, Pontificem esse universalem Papam. Si respuis, nihil ex ea, tuo judicio, potes convincere.

7. Quartò objicis: Romæ in plumbeo sigillo, Paulus Petro ad dextrā collocatur. Respondeo. Hæc objectio pridē soluta est à Cardinale Bellarmino. Si solutio bona est, cur nō acquiescis? Si mala, cur non refellis? Summa solutionis est hæc: Aliquando Petrus ponitur ad dextram, aliquando Paulus: Quia sicut Petrus excellit potestate in Ecclesia; ita Paulus sapientia & labore. Plus enim laboravit, quàm reliqui: plures gentiles ad fidem convertit; plures provincias peragravit. Sicut ergo Ecclesia plus honorat Petrum, ratione potestatis; ita plus Paulum ratione sapientiæ & laboris. Nec id novum. Plus etiā honorat D. Thomam, Franciscum, Dominicum, Benedictum, quàm multos Pontifices & Episcopos; quia licet hi potestate excelluerint, illi tamen plus boni Ecclesiæ præstiterunt.

8. Quintò objicis: Nunquam fit officium de Petro, quin fiat commemoratio de Paulo; & vice versa: Ergo pares sunt. Respondeo. Mirus homo es. In præcedente objectionem con-

tende.



tendebas, Paulum præferendum esse Petro: Nunc vis pares esse, Audi. Pares sunt in Apostolatu: impares in alijs. Nam Petrus, ut dixi, potestate excellit; Paulus labore & sapientia, Ecclesia utrumque magni facit; & utrique tribuit, quod ipsis debetur.

CAPUT TERTIUM,

*An Pontifex sit Successor Petri?*

I. **D**E hac re disputas lib. 4. c. 6. Et asseris Pontificem non esse propriè peculiarem Petri successorem. At Patres contrarium asserunt, quibus potius, quàm tibi credendum est. Sic enim scribit Optatus Milevitanus lib. 2. contra Parmenianum: *Petro successit Linus, Lino Clemens, Clementi Anacletus, &c.* Augustinus Epist. 165. ad Generosum: *Si ordo Episcoporum sibi succedentium considerandus est, quanto certius, & verè salubriter ab ipso Petro numeramus, cui totius Ecclesia figuram gerenti, Dominus ait: Super hanc petram edificabo Ecclesiam meam. Petro enim successit Linus, Lino Clemens, Clementi Anacletus, Anacleto Evaristus, &c.* Et Philippus Presbyter in Concilio Ephesino, Tom. 2. c. 16. *Nulli dubium, imò seculis omnibus notum est, Sanctum Petrum Apostolorum Principem & Caput, Ecclesie Catholica fundamentum, per successores suos hucusque semper vivere, causasque decernere, semperque victurum esse. Hujus itaque ordinarius successor Papa Cælestinus nos ad hanc Synodum misit. Ommitto reliquos omnes, qui vel Chronica, vel*

martyrologia, vel vitas Pontificum conscripserunt. Omnes incipiunt à Petro: Et Pontifices faciunt Petri Successores.

2. Et ratio evidens sumitur ex principiis jam positis. Primum est, Christum in hac vita fuisse visibile Caput Ecclesiæ in externa gubernatione, sicut vir est Caput mulieris. Alterum, hanc gubernandi formam non esse mutatam post Ascensionem Christi; ac proinde etiam nunc opus esse visibili Capite Ecclesiæ in externa gubernatione. Tertium hoc Caput, non aliud fuisse post Christum, quàm Petrum, cui dictum est, *Pasce oves meas*. Cum ergo post mortem Petri non sit facta mutatio in regimine Ecclesiæ, necesse est, Petro successisse aliquem, qui eodem modo, quo Petrus Ecclesiam gubernaverit. Nec alius assignari potest, quam Pontifex.

4. Secundò objicis: Nulli Apostolo datur personaliter pro sua singularitate successio: Ergo nec Petro. Respondeo. Antecedens potest dupliciter intelligi. Primò absolutè, quòd nullus Apostolorum habuerit particularem successorem in Ecclesia aliqua particulari. Sic falsum est. Nam Jacobo in Ecclesia Hierosolymitana successit Simeon Cleophae filius. (Apud Eusebium lib. 3. Hist. c. 11.) Secundò cum hac limitatione, quòd nullus Apostolorum habuerit perpetuam successionem in sua Ecclesia. Sic verum est de omnibus Apostolis, excepto Petro. Ille solus in sua Ecclesia Romana habet perpetuam successionem, & in

eo impletur promissio Christi: *Ego rogavi pro te Petre, ut non deficiat fides tua.*

5. Tertiò objicis: Omnes Episcopi sunt omnium Apostolorum, etiam Petri in solidū successores, ut faterur Leo serm. 3. de Assumptione sua ad Pontificat. ubi ait: *Ecclesiasticam potestatem, quam Petrus habuit, ad omnes Ecclesie Principes, id est, Episcopos commeasse.* Respondeo. Falsum est, quod assumis, omnes Episcopos in solidum esse Successores Petri. Solus Pontifex in solidum illi succedit: reliqui in partem. Nec Leo tibi, sed nobis patrocinator. Nam loco à te citato, sic habet: *Unus de toto mundo Petrus eligitur, qui & univrsarum gentium vocationi, & omnibus Apostolis, cunctisque Ecclesie Patribus praponatur, ut quamvis in populo Dei multi Sacerdotes sint, multique Pastores, omnes tamen propriè regat Petrus, quos principaliter regit & Christus.* Hæc verba omisisti, quia contra te sunt. Non longè pòst, sic pergit Leo: *Propter quod dicit beatissimo Petro: Tibi dabo claves. Transiuit quidem etiam in alios Apostolos vis potestatis illius, & ad omnes Ecclesie Principes decreti hujus constitutio, commeavit, sed non frustra uni commēdatur, quod omnibus intimetur.* Hæc verba citasti, sed mala fide. Nam Leo non dicit, quod tu dicis, potestatem Ecclesiasticam à Petro in omnes Episcopos in solidum commeasse: Vel omnes Episcopos in solidū esse Successores Petri, Alioqui sibi ipsi contradiceret. Nam in priori sentētia, quam citavi, contrarium assererat. Unus, inquit, *Petrus eligitur, qui omnibus Apostolis, cunctisque*

*Etique Ecclesia Patribus præponatur.* Hæc præpositura seu eminentia, non potuit in solidum commeari in omnes Episcopos; quia impossibile est, ut omnes & singuli Episcopi præponantur omnibus alijs Episcopis.

6. Quartò objicis: Nulla Ecclesia, tempore Apostolorum, habuit proprium & specialem Episcopum; sed præcipuè quæquæ Ecclesiæ à pluribus simul Episcopis in solidū regerantur: Ergo Romanus Episcopus nō potest dicere, se alicujus certi ac specialis Apostoli successorem esse. Respondeo. Negatur Antecedens. Nam in Ecclesia Hierosolymitana, proprius & specialis Episcopus fuit Jacobus, ut omnes fatentur. In Ephesina, Timotheus, (teste Eusebio lib. 3. c. 4.) In Cretensi, Titus, (eodem teste, ibidem.) Et quid obsecro dicturus es de septem Ecclesijs Asiæ, de quibus Joannes in Apoc. Certe singulæ habuerunt proprios ac peculiare Episcopos, quorum virtutes & vitia ibi describuntur, c. 2 & 3.

7. Quintò objicis: Petrus eo modo fuit Episcopus Romanus, quo Antiochenus: Ergo non est ratio, cur magis Romani Episcopi, quàm Antiocheni, dicantur esse Petri Successores. Respondeo. Verum est. Petrum fuisse & Antiochenum & Romanum Episcopum: Et utrobique habuisse suos successores; sed diverso modo. Nam Antiochiæ habuit Successores in Ecclesia tantum particulari: Romæ, in Ecclesia universali. Ratio est, quia ipse fuit à Christo constitutus Pastor universalis Ecclesiæ; per illud,

illud, *Pasce oves meas*, ut suprà dictum est. Hęc curam pastorem universalis Ecclesię, non amisit per mutationem loci, sed per mortem. At Romę mortuus est, non Antiochię: Ergo Romę illā amisit, ac p̄inde Romę habuit Successorē in pastorali cura universalis Ecclesię.

8. Sextò objicis: Si Romanus Pontifex peculiaris Petri Successor est, sequitur Petrum fuisse specialem Episcopum Romanę Ecclesię, & consequenter non fuisse Episcopum universalem. Respondeo. Posterior consequentia neganda est. Nam Petrus non solum fuit Episcopus Romanę Ecclesię particularis, sed etiam Romanę Ecclesię universalis. Scis quid velim. Ecclesia Romana dupliciter accipitur. Prīmò, pro illa sola Ecclesia particulari, quę olim Romę fuit, & nunc est. Secūdò, pro collectione omnium fidelium, qui toto orbe dispersi, adhęrebant olim Romano Pontifici, & nunc etiam adhęrent. Et hoc posteriori sensu habet varia nomina. 1. Dicitur Catholica seu universalis, quia toto orbe diffusa. 2. Pontificia, quia Pontifici subiecta. 3. Romana, à nobiliori sui parte. Petrus ergò fuit Episcopus Ecclesię Romanę utroque modo acceptę.

9. Septimò objicis: Paulus non minus fūdavit Ecclesiam Romanam, nec minus fuit Episcopus Ecclesię Romanę, quàm Petrus: Ergo non est ratio, cur Pontifex potius dicatur Successor Petri, quàm Pauli. Respondeo. Antecedens falsum est, ut cap. 1. & 2. demonstravi. Nam Petrus fuit primus, qui Romanos ad fidem

fidem convertit, & Romæ sedem ac cathedrâ obtinuit, ut constat ex antiqua Patrum traditione, quam negare non potes.

10. Octavo objicis: Adhuc disputatur, an Pontifex, ut Pontifex, debeat eligi à clero tantum Romano, an verò ab universali Ecclesia, vel generali concilio, Ecclesiam universalem representante. Si debet eligi à Clero tantum Romano, jam non eligitur, ut Caput universalis Ecclesiæ. Si a, debet eligi ab universali Ecclesia, jam non eligitur, ut Episcopus Romanus, & Successor Petri in Romana Ecclesia. Nam universalis Ecclesia potest eligere, quemcumque vult, non alligando illum ad hanc vel illâ Ecclesiam particularem. Respondeo. Pontifex eligitur à Cardinalibus, Cardinales autem possunt dupliciter spectari. Primò, quatenus sunt clerici Ecclesiæ Romanæ particularis. Secundò, quatenus sunt Procuratores, & ministri totius Ecclesiæ. Et hoc modo eligunt Pontificem. An autem possint eligere Pontificem, qui non simul esset Episcopus Romanus, sed vel Parisiensis, vel Viennensis, vel nullius loci Episcopus particularis, alia quæstio est.

#### CAPUT QUARTUM.

*An Pontifex sit Caput seu Pastor universalis Ecclesiæ?*

1. **T**U id negas, lib. 4. c. 7. & seqq. Ne tamen planè videaris omnem illi auctoritatem dero-

derogare, afferis hæc duo: Primò, Pontificem Romanum non habere ullum privilegium jure divino, supra alios Episcopos. Secundò, habuisse tamen aliqua privilegia jure Ecclesiastico, quæ nunc in abusum abierunt. Nimirum hæc quinque. 1. curam quandam & superintendentiam generalem super universam Ecclesiam, quæ speciali quadam ratione, præ alijs Episcopis, illi concessa fuerit. 2. Privilegiū appellationis in judicijs Ecclesiasticis. Nam omnes Episcopi totius orbis, qui sentiebant se gravari ab Episcopis aut Synodis provincialibus, poterant confugere ad Romanum Pontificem, & ibi suam causam defendere, & innocentiam demonstrare. 3. Privilegium communionis in fide. Nam quando grassabatur aliqua hæresis, & occupabat multas Ecclesias, ut hæresis Arriana; tunc Pontifex erat quasi Dux & Arbiter Catholicæ communionis: Et cui ipse dabat vel adimebat suam communionem, reliqui etiam dabant vel adimebant. 4. Privilegium definiendi ac decernendi. Nihil enim grave in Ecclesia universali, nisi consulto prius & consentiente Romano Pontifice, poterat tractari, decerni, aut definiri. Non ut definitio robur haberet à Pontifice, sed ut majus robur haberet, quàm alioqui habitura esset. 5. Privilegium perfugij. Nam afflicti Episcopi, & persecutionem ab hæreticis vel tyrannis patientes, confugiebant ad Pontificem, & ab eo juvabantur. Hæc quinque privilegia concedis,

&amp;



& explicas cap. 9. per totum. Nec ullum aliud agnoscis.

2. Ego contrà statuo, & hæc, & plura alia Privilegia Pontifici concessa esse, non tantum jure Ecclesiastico, sed etiam divino, & ex peculiari Christi institutione. Et quidem, omisso quinto privilegio, quod tu proponis, reliqua proponam hoc ordine. 1. Tota Ecclesia Pontifici gubernanda concessa est. Ex hoc ferè pendent alia, quæ sequuntur. 2. Omnes Episcopi, in judicijs Ecclesiasticis possunt appellare ad Pontificem. 3. Omnes Christiani, in controversijs fidei, debent adhærere Pontifici & Ecclesiæ Romanæ. 4. Nullum decretum potest statui pro tota Ecclesia, nisi consulto & consentiente Pontifice. 5. Pontifex potest leges Ecclesiasticas præscribere, quæ obligent universam Ecclesiam. 6. Potest Episcopos, Reges & Principes, propter grave delictum & contumaciam, excommunicare, aut alia pœna Ecclesiastica punire. De his, ut alia omittam, sigillatim agendum est.

#### PRIMUM PRIVILEGIUM.

*Tota Ecclesia Pontifici gubernanda  
commissa est.*

3. **H**Oc probo tribus modis. 1. Ex jure institutionis. 2. Ex jure successionis. 3. Ex Concilijs & Patribus. Primò igitur, ex jure institutionis sic: Forma gubernandi Ecclesiam debet



debet nunc esse talis, qualis ab initio fuit, ex Christi institutione: At ab initio, ex Christi institutione, gubernabatur Ecclesia ab uno visibili Capite, nempe ab ipso Christo: Ergo etiā nunc debet gubernari ab uno visibili Capite, quod nō est aliud, quā Pontifex. Hoc argumentum fusè tractatum est, lib. 2. cap. 3. 4. & 5. Hic obiter ex tua cōcessionē cōfirmari potest.

4. Ac primo; quod talis nunc debeat esse forma gubernandi Ecclesiam, qualis ab initio fuit ex Christi institutione, concedis lib. 1. c. 1. n. 21. his verbis: *Nam sicut Ecclesia eadem prorsus est, non alia similis: ita gubernatio eadem perseverat, non alia similis.* Item, quod Ecclesia ab initio gubernata fuerit ab uno visibili Capite, nempe ab ipso Christo, concedis ibidem n. 24. his verbis: *Ego sanè in Christi visibili regimine ordinario hac tantum observo: Sacramenta visibilia instituire; Ministros vocare & mittere; Evangelizare; Ministros suos errantes corripere & increpare; legem explicare, eamq; à corruptelis vindicare. Alterius generis officia à Capite Christo, ut visibilis erat, prodeuntia, ego certè non reperio.* Igitur ex utraque tua concessione, & major & minor propositio syllogismi nostri vera est. Vera igitur conclusio.

5. Secundò, ex jure successionis sic: Pontifex succedit Petro cum pari potestate: At Petro totius Ecclesiæ gubernatio fuit commissa: Ergo etiam Pontifici committitur. Minor lib. 2. de Primatu Petri probata est. Majorem probo autoritate Patrum, quos præ-

Q

cedenti

cedenti capite recensui, & paulò post iterum recensebo. Deinde ratione. Nam si Pontifex non succederet Petro cum pari potestate, jam mutata esset forma gubernandi Ecclesiam. Nam tēpore Petri gubernata fuit ab uno visibili Capite: nunc non gubernaretur ab aliquo visibili Capite. Hanc mutationem non admittis. Ergo fateri debes, Pontificem habere Primatum Ecclesiæ, sicut Petrus habuit.

6. Respondes (c. 6. n. 8.) Etiam si ex divino jure successionis deberet aliquis Petro succedere in Primatu Ecclesiæ, adhuc tamen negandum esse, Romanum Pontificem fore successorem. Mira pertinacia. Quis ergo foret? An tu, Marce Antoni? An aliquis alius? Designa si potes. Aut constringam te hoc modo: Aliquis jure divino debet succedere Petro in Primatu, ex suppositione. Negas Pontificem esse, quod omnes antiqui Patres affirmant. Dicis, alium esse debere, quod hactenus nemo dixit. Quis tibi credet? Nec tu ipse tibi.

7. Sed quo jure, inquires, Romanus Pontifex potius succedit, quàm quivis alius Episcopus? Dicam, Antoni. Jure divino, seu ex institutione Christi. Nam quia Christus semel instituit, ut Ecclesia semper gubernetur ab uno visibili Capite, seu pastore, necesse est, ex vi illius institutionis, ut moriente uno pastore, succedat alius in ejus locum, sicut in Veteri Testamento factum est, (Hebr. 7. 23.) Alioquin nisi alter alteri succederet, non servaretur institutio Christi, qua voluit, ut Ecclesia

fiat, ut per haberet unum visibilem Pastorem, cui diceret, quod Petro dixit, *Pasce oves meas*. At unde constat, Pontificem debere esse hunc successorem? Et hoc dicam. Constat ex traditione. Scis, Antoni, quæ sunt juris aut institutionis divinæ, dupliciter nobis innotescere: Vel ex scriptura; vel ex traditione. Sicut ergo ex scriptura constat, Christum fuisse visibile Caput Ecclesiæ; & Petrum constitutum Christi Vicarium, per illud, *Pasce*; ita constat ex traditione, Pontificem esse Petri successorem. Hanc traditionem accepimus ab antiquis Concilijs & Patribus, de quibus jam dicendum est.

8. Tertiò, accedit consensus Patrum & conciliorum. Ex quibus dupliciter probo Primatum Pontificis, respectu totius Ecclesiæ. 1. Ex titulis, quos illi tribuunt. 2. Ex alijs ipsorum sententijs. Recensebo tres titulos, & totidem sententias, ne prolixus sim. Plures videri poterunt apud Bellarminum, Coccium, & alios. Igitur.

Primus titulus est: *Caput universalis Ecclesiæ*. Qui titulus habetur in Epistola Palchasi Episcopi, & aliorum de damnatione Dioscori, tom. 2. concil. in fine concilij Chalcedonensis, ubi leguntur hæc verba: *Unde sanctissimus & beatissimus Papa; Caput universalis Ecclesiæ Leo, per nos. ut legatos suos, sancta Synodus consentiente, Petri Apostoli præditus dignitate; qui Ecclesiæ fundamentum & petra fidei, & cæle-*

stis regni janitor nūcupatur, Episcopali cum dignitate nudavit. Ubi tria dicuntur de Pontifice Leone. 1. Quòd sit Caput universalis Ecclesiæ. 2. Quòd sit præditus dignitate Petri Apostoli. Vel, ut nos loquimur, quòd sit successor Petri cum pari potestate. 3. Quòd Dioscorum Episcopum Alexandrinum privaverit dignitate Episcopali. Ex primo & tertio colligimus, amplitudinem potestatis ipsius. Ex secundo, quòd illam potestatem habeat jure divino, sicut Petrus habuit.

9. Simili titulo usi sunt Patres Concilij Chalcedonensis in Epist. ad Leonem, quæ extat in eodem concilio in fine, sub hoc titulo: *Relatio Sanctæ Synodi Chalcedonensis ad beatum Papam Leonem de omnibus gestis generalær.* Ubi inter cætera, sic scribūt: *Si enim, ubi duo aut tres sunt congregati in nomine ejus, ibi se in medio eorū fore perhibuit: Quantam circa Sacerdotes pecnitiaritatē potuit demonstrare, qui & patriæ & labori suæ confessionis notitiā prætulērunt? Quibus tu quidem, sicut membris Caput præeras.* Ecce, tatentur Episcopi in concilio cōgregati, Leonem Pontificem ipsis præfuisse, sicut caput præest membris. Erat autem concilium generale, quod repræsentabat totam Ecclesiā. Igitur agnoscunt Leonem fuisse Caput totius Ecclesiæ.

10. Secundus titulus est: *Papa universalis Ecclesiæ.* Quo utuntur Athanasius & Episcopi Ægypti in Epistol. ad Marcum Papam: (si modo Athanasio ascribenda sit illa epistola)

Domi.

*Domino, inquit, sancto, & Apostolici culminis venerando Marco, sancta Romana & Apostolica Sedis, atq; universalis Ecclesia Papa, Athanasius & universi Egyptiorum Episcopi salutem. Cui similis est hic titulus: Pastor & custos ovilis Christi. Quo utuntur Ambrosius, Bassianus, & cæteri Episcopi in Epistola ad Siricium Papam. Quæ est Epist. 81. inter Epistolas Ambrosij. Item hic: Custos vinea Salvatoris. Quo utitur concilium Chalcedonense in citata relatione ad Leonem Papam, cum ait: Et post hac omnia, insuper & contra ipsum, cui vinea custodia à Salvatore commissæ est, extendit insaniam, id est, contra tuam quoq; Apostolicam sanctitatem. Loquitur de Dioscoreo, qui primò quidem cõtra Flavianum & Eusebium Episcopos; deinde contra Leonem Pontificem se opposuit. Est igitur hic sensus: Postquam opposuit se Episcopis, audet etiã se opponere Pontifici, cui totius Ecclesiæ custodia commissæ est. Nam per vineam Salvatoris intelligendam esse Christi Ecclesiam, constat passim ex Evangelio.*

11. Tertijs titulus est: *Summus Pontifex: Summus Papa: Summus Sacerdos: Princeps Sacerdotum: Summus omniũ presulum Pontifex, Quæ illi tribuunt Bernardus in suis Epistolis ad Romanos Pontifices, Hieronymus in præfat. Evangeliorum ad Damasum, Sexta Synodus Act. 18. in Serm. acclamatorio, Valentinus in Epist. ad Theodosium, quæ habetur tom. 1. concil. Et Stephanus Archiepiscopus Carthaginensis in Epist. ad Damasum Papam, quam scripsit*

nomine trium conciliorum Africæ, in qua sic legimus: *Beatissimo Domino & Apostolico culmine sublimato Damaso Papæ, & summo omnium præsulum Pontifici.*

12. Addo trium celeberrimorum Patrum sententias, Ambrosij, Hieronymi, Augustini. Ambrosius Epist. 81. ad Siriciûm Papam: *Recognovimus literis sanctuatu tua, boni pastoris excubias, qui fideliter tibi commissam januam servas, & pia sollicitudine Christi ovile custodias, dignus quem oves Domini audiant, & sequantur. Et ideo, quia nosti oviculas Christi, lupos facile deprehendes & occurreas quasi providus pastor, ne isti morsibus perfidia sua, feræque ululatu Domini-cum ovile dispergant.* Hic non aliter loquitur de Pontifice, quàm de Petro. Nam vocat illum bonum pastorem: non tantum respectu ovium, quæ tunc erant in particulari Ecclesia Romana, sed quæ erant in tota Christi Ecclesia. Hoc enim significat illæ particulæ. 1. Christi ovile. 2. Oves Domini. 3. Oviculæ Christi. 4. Dominicum ovile. Unde constat, Pontificem ex sententia Ambrosij, eodem jure esse pastorem ovilis Christi, quò Petrus fuit; quia omnia, quæ tribui solent Petro, tribuit etiam Pontifici, tanquam legitimo Petri successori. At Petrus, jure divino fuit pastor ovilis Christi, ut lib. 2. ostensum est; Ergo eodem jure Pontifex est pastor ovilis Christi.

13. Eodem sensu scribit Hieronymus Epist. 57. ad Damasum Papam: *Quamquam tui mettereat magnitudo, invitat tamen humanitas. A*  
Sacer-

*Sacerdote victimam salutis, à pastore presidium ovibus flagito. Et infra: Beatitudini tuæ, id est, cathedra Petri communionem confocior. Ubi tria aperte insinuat. 1. Pontificem esse Successorem Petri, vel sedere in cathedra Petri. 2. Pontificem esse pastorem, sicut Petrus fuit. 3. Se esse ovem illius pastoris. At non erat ovis pertinens ad particulare ovile, quod Romæ erat; sed pertinens ad universale ovile Christi, quod toto orbe erat dispersum. Ergo Pontifex, ex sententia Hieronymi, est pastor omnium Christi ovium, eo jure, quo Petrus fuit, quia sedet in cathedra Petri.*

14. Augustinus multa scribit in eandem sententiam. Et quidem in lib. cont. Epist. Manichæi, quam fundamentalem vocant, c. 4. sic habet: *Multa sunt alia, quæ in Catholica Ecclesia gremio me justissime teneant. Tenet consensus populorum atque gentium: tenet autoritas miraculis inchoata, spe nutrita, charitate aucta, vetustate firmata: tenet ab ipsa Sede Petri Apostoli, cui pascendas oves suas post Resurrectionem suam Dominus commendavit, usque ad presentem Episcopatum successio Sacerdotum: tenet postremo ipsum Catholica nomen, quod non sine causa, inter tam multas hereses, ista Ecclesia sola obtinuit.* Hic non loquitur Augustinus de aliqua Ecclesia particulari, quæ sit Romæ tantum aut Carthagine, sed de Ecclesia Catholica, quæ tota orbe dispersa est: Ideoque ponit quatuor motiva, totam Ecclesiam concernentia, quæ merito suadent homini Christiano, ut maneat in Ecclesia Că-



tholica, & non deficiat ad Ecclesiam Donatistarum, aut Manichæorum. Sunt autem hæc motiva: 1. Consensus omnium populorum, qui in Ecclesia Christi sunt. 2. Miracula, quæ in Ecclesia Christi fiunt. 3. Constans ac perpetua successio pastorum Ecclesiæ Christi. 4. Ipsum nomen Catholicæ, id est, universalis. Circa successionem duo notanda sunt. Unū est, quod Petro commissa sit pastura totius Ecclesiæ. Alterum, quod Pontifex succedat Petro in pastura totius Ecclesiæ. Hoc est, quod hîc quærimus.

15. Idem Augustinus Epist. 162. ad Glorium, Eleusium, Felicem, & Grammaticum, non longe post initium, loquens de Carthagine, sic scribit: *Erat etiam transmarinis vicina regionibus, & fama celeberrima nobilis. Vnde non mediocris utique autoritatus habebat Episcopum, qui posset non curare conspirantem multitudinem populorum, cum se videret & Romana Ecclesia, in qua semper Apostolica cathedra vixit principatus, per communicatorias literas esse conjunctum.* Hîc per primatum Apostolicæ cathedræ intelligit primatum totius Ecclesiæ, quem primo quidem habuit Petrus; deinde Petri Successores, id est, Pontifices. Nam si ille Principatus non transisset à Petro in Successores illius, falsum esset, quod asserit Augustinus, principatum illum semper vixisse in Ecclesia Romana. Non enim potuit semper vigere, si in solo Petro, & non etiam in Successoribus Petri vixisset.



16. Et lib. 1. contra duas Epistolas Pelagianorum, ad Bonifacium Papam. cap. 1. *Neque enim dedignaris, qui non alia sapis, quamvis altius præsideas, esse amicus humilium.* Et infra: *Cum vero non desinant hæretici fremere ad Domini gregis caulas, atque ad diripiendas tanto pretio redemptas oves, aditus undecunque rimari, communis que sit nobis omnibus, qui fungimur Episcopali officio, quamvis ipse in eo præemineas celsiori fastigio, specula pastoralis; facio quod possum pro mei particula muneris.* Hic duo aperte dicit de Pontifice 1. Illum altius præsidere, quam Episcopos. 2. Illum celsiori fastigio præeminere in Episcopatu. 3. Insinuat, hoc esse discrimen inter Pontificem & Episcopos, quòd quilibet Episcopus habeat tantum particulam curæ pastoralis: Pontifici totius Ecclesiæ cura incumbat. *Specula, inquit, Pastoralis est communis omnibus Episcopis: sed tu inter Episcopos celsiori fastigio præemines; ego pro mei muneris particula facio, quod possum.*

17. Dices fortè, Pontificem jure tantum Ecclesiastico præeminere, non divino. Sed hoc jam refutatum est sæpius. Nam Pontifex eo jure præeminet, quo Petrus, cū sit Successor Petri: At Petrus præeminet jure divino: Ergo & Pontifex. Vide titulos & testimonia hætenus citata. Ubi tamen notandū est, præminentiam illam, qua pollet Pontifex præ alijs Episcopis, & divino & Ecclesiastico jure concessam ac stabilitam esse. Divino quidem, quia Christus non soli Petro, sed etiam Petri

Successoribus illam concessit. Et hoc sensu intelligenda sunt testimonia conciliorum & Patrum, quæ jam citavimus. Ecclesiastico verò, quia Ecclesia sæpe declaravit. Pontificem habere illam præeminētiam, præ alijs Episcopis. Et sic intelligendus est Valentinianus in Epist. ad Theodosium ( quæ habetur Tom. 1. conciliorum, immediate ante concilium Chalcedonenſe) cum ait: *Beatissimus Romanæ urbis Episcopus, cui principatum sacerdotij super omnes antiquitas contulit.* Non vult dicere, quòd antiquitas contulerit illi principatum, quem à Christo non habet; sed quòd agnoverit illius principatum, & declaraverit prò tali habendum & agnoscendum. Neq; hoc novum est. Nam sæpe fit, ut eadē res, & divini & humani sit juris. Quo pacto libri Macchabæorum, & divina & ecclesiastica auctoritate sunt canonici. Furtum, & divina & humana lege prohibitum est. Obedientia filiorum erga parentes, & divino & humano jure præcipitur. Ad credendam Christi Divinitatem, & divino & humano jure obligamur. Hæc nota sunt.

#### SECUNDUM PRIVILEGIUM.

##### *Appellatio ad Pontificem.*

18. SECUNDUM privilegium est, quòd omnes Episcopi totius orbis, qui in judicijs Ecclesiasticis sentiunt se gravari ab Episcopis aut Synodis provincialibus, possint confugere ad Romanum Pontificem, tanquam ad judicem supe-

superiorem, cui reliqui etiam Episcopi subiecti esse debeant; & à cujus sententia non liceat ulterius provocare. Hoc patet ex Concilio Sardicensi, cap. 4. juxta secundam editionem: *Osius Episcopus dixit: Quòd si aliquis Episcopus judicatus fuerit in aliqua causa, & putat se bonam causam habere, ut iterum judicium renovetur, si vobis placet, sancti Petri Apostoli memoriam honoremus, ut scribatur vel ab his, qui examinaverunt, vel etiam ab aliis Episcopis, qui in propinquo morantur, Romano Episcopo. Et si judicaverit renovandum esse judicium, renovetur, & det iudices. Si autem probaverit talem causam, ut ea non refricentur, quæ acta sunt: quæ decreverit Romanus Episcopus, confirmata erunt. Si ergo omnibus placet, statuatur. Synodus respondit: PLACET.* Et cap. 5. ejusdem secundæ editionis: *Cum aliquis Episcopus depositus fuerit eorum Episcoporum judicio, qui in vicinis commorantur locis, & proclamaverit agendum sibi negotium in urbe Roma; alter Episcopus in eadem cathedra (post appellationem ejus, qui videtur esse depositus) omnino non ordinetur, nisi causa fuerit in judicio Episcopi Romani determinata.*

19. Hi duo canones magnam habent auctoritatem in Ecclesia, quia concilium Sardicense, in quo conditi sunt, semper ab Ecclesia fuit receptum. De quo Sulpitius lib. 2. Histor. scribit, ex toto orbe fuisse convocatum. Et Socrates lib. 2. cap. 16. appellat concilium generale. Interfuerunt enim legati Julij Primi Pontificis, & præterea ex toto terrarum

rum orbe plusquam trecenti Episcopi, nominatim ex Italia, Gallia, Hispania, Britannia, Africa, Ægypto, Syria, Thraëia, Pannonia, & alijs provincijs, ut refert Athanasius in Apologia secunda, circa initium.

20. De ijsdem canonibus sic scribit Gelasius Papa in Epist. ad Faustum: *Ipsi sunt canones, qui appellationem totius Ecclesie, ad hujus sedis examen voluerunt deferri. Ab ipsa verò, nusquam prorsus appellari debere sanxerunt. Et in Epistola ad Episcopos Dardaniæ: Ad illam de qualibet mundi parte canones appellari voluerunt: Ab illa autem nemo est appellare permissus.* Habentur hæ Epistolæ in tom. 2. concil. inter Decreta Gelasij Papæ primi.

21. Tu quidē, Antoni, non negas hoc privilegium de jure appellationis; sed dicis Ecclesiastico tantum jure, & non divino concessum esse. Erras. Nam antequam Ecclesiastico jure statutum esset in supradicto Concilio Sardicensi, Episcopos posse appellare ad Pontificem; jam usu recepta erat hujusmodi appellatio, ut varijs Exemplis demonstrat Cardinalis Bellarminus lib. 2. de Pontif. c. 21. circa finem. Unde etiam Leo Papa Epist. 87. ad Episcopos Provinciæ Viennensis in Gallia, fatetur antiquam esse consuetudinem appellandi ad Pontificem. Sic n. scribit: *Vestra fraternitas recognoscat, Apostolicam sedem, pro sui reverentia, à vestra etiam provincia Sacerdotibus, innumeris relationibus esse consultā, & pro diversarum (quemadmodū vetus consuetudo poscebat) appellatione causa-*

*rum,*

*rum, aut retractata, aut confirmata fuisse judicia.*

22. Porro hæc consuetudo, qua postea per canones concilij Sardicēsis fuit confirmata, non aliunde, quàm ex Apostolica traditione & auctoritate orta est, ut colligitur ex Theodoro in Epist. ad Renatum Presbyterum, ubi sic ait: *Nudarunt me Sacerdotio, ejiciuntq; ex civitatibus, nec senectutem reveriti, neq; canitiem in religione & pietate nutritam. Quam ob rem deprecor te, ut sanctissimo Archiepiscopo (Leoni Papæ) suadeas, ut Apostolica auctoritate utatur, jubeatq; ad vestrum conciliū adire. Tenet enim sancta ista sedes gubernacula regendarum cuncti orbis Ecclesiarum. Quare, quæ ab isto vestro tribunali proficiscuntur, qualiacunq; erunt, judicij vestri integritate, confisi amplectemur.* Ubi clarè significat, Pontificem, non solo jure Ecclesiastico, sed auctoritate Apostolica, supremum esse judicē in judicijs Ecclesiasticis: ac proinde ad illum appellari posse. Et rationem addit, quia Pontifex Romanus gubernat omnes Ecclesias totius mundi: Ergo ab omnibus Ecclesijs totius mundi potest ad ipsum fieri appellatio. Eodem sensu scribit in Epist. ad Leonem Papam: *Ego, inquit, suffragium Sedis Apostolica expecto, & supplex oro ac que obsecro Sanctitatem Vestram, ut ea me, tribunal vestrum justum ac rectum appellantem defendat ac protegat, &c. Vestram sententiam expecto. Quod si sententia eorum, qui me condemnaverunt, acquiescere jiseritis, acquiescam.*

\* \* \*

TER-

## TERTIUM PRIVILEGIUM.

*Qui in fide non vult errare, debet ad-  
harere Ecclesiæ & Pontifici  
Romano.*

23. **T**ertium privilegium est, quod omnes Christiani, quando oriuntur dissension- nes in fide, debeant adhærere illi parti, quam tenet Romanus Pontifex, & Sedes Apostoli- ca; si non velint errare. Hoc tradunt antiqui Patres Irenæus lib. 3. contra hæreses c. 3. ratio- nem reddens, cur potius describat successio- nem Episcoporum Ecclesiæ Romanæ, quàm aliarum Ecclesiarum particularium, sic scri- bit: *Ad hanc enim Ecclesiam, propter potentiorē principalitatem, necesse est omnem convenire Ec- clesiam, hoc est, omnes qui sunt undique fideles: in qua semper ab his, qui sunt undique conservata est ea, quæ est ab Apostolo traditio.*

24. Et Divus Hieronymus Epist. 8. ad De- metriadem. c. 9. *Et quia vereor, inòrumore co- gnovi, in quovsdam adhuc vivere & pullulare ve- nenata blãdiria; illud te pio charitatis affectu pra- monendamputo, ut Sancti Innocenti, qui Aposto- lica cathedra Successor est, teneas fidem: nec peregri- nam, quantumvis tibi prudens callidag, videaris, doctrinam recipias. Ubi etiam insinuat rationē, cur Pontifici in fide adhærendum sit; quia ni- mirum Pontifex Successor Petri Apostoli. At Petro & Successoribus illius dictum est: Ego rogavi pro te Petre, ut non deficiat fides tua: Et in aliquando conversus, confirma fratres tuos.*

25. Et Basilius Magnus in Epistola data Sabino Diacono ad Pontificem Romanum: *Revera dignum est illa excellentissima voce, qua te beatum predicavit, quod pietati tuae donatum à Domino est, scilicet, ut quod adulterinum est, à legitimo ac puro discernas; ac fidem Patrum sine subtractione ulla praedices. Alludit ad illud, quod Petro dictum est: Beatus es Simon Barjona, quia caro & sanguis non revelavit tibi, sed Pater meus, qui in caelis est. Quod etiam Pontifici, Petri Successori, dictum esse interpretatur. Et rectè. Nam sicut ad illam fidei quaestionem: Vos autem: quæ me esse dicitis? Petrus ex peculiari Dei revelatione respondit: Tu es Christus Filius Dei vivi: ita ad similes fidei quaestiones, Successor Petri, ex peculiari Dei assistentia, debet respondere.*

26. Et Cyrillus Alexandrinus in Epist. ad Celestinum Papam: *Quoniam vero Deus hisce in rebus prudentiam à nobis exigit, longaque Ecclesiarum consuetudo suadet, ut istiusmodi sanctitati tuae communicentur, non possum equidem id, quod apertum est, ad pietatem tuam non perscribere. Et paulo post: Quamvis hac ita se habeant, non prius tamen Nestory Communionem confidenter deferere ausi fuimus, quam hac ipsa pietati tuae indicaremus. Digneris proinde, quid hic sentias, declarare: quo liquido nobis constet, an communicare cum Nestorio nos oporteat, an verò libere ei denunciare, neminem cum eo communicare, qui ejusmodi erroneam doctrinam fovet ac praedicat. Porro tuae integritatis mens, ac super hac re sententia, non*  
modis



*modo pyssimis Deoque devotissimis Macedonia Episcopis, sed totius quoque Orientalis Antistitibus perspicue per literas exponi debet. Hic apparet, totam Ecclesiam Orientalem, tanti fecisse Romanum Pontificem, ut in rebus fidei, nihil, nisi ex ipsius decisione, statuendum esse existimarent.*

27. Et Maximinianus Constantinopolitanus Episcopus in Epist. ad Orientales: *Omnes fines terra, qua Dominum sincerè receperunt, & ubiq; terrarum Catholici veram fidem consistentes, in potestatem Romanorum Pontificum, tanquam in Solem respiciunt, & ex ipsa lumen Catholica & Apostolica fidei recipiunt. Nec immerito, quia Petrus legitur primò perfectam fidem esse confessus, Domino revelante, cum dixit: Tu es, Christus filius Dei vivi. Et infra: Hunc enim de ceteris mortalibus ex toto terrarum orbe conditor orbis elegit, cui cathedram Magisterij principaliter possidendam tenere, perpetuo privilegij jure concessit: ut quisquis divinum aliquid aut profundum nosse desiderat, ad hujus praeceptionis oraculum doctrinamq; recurrat. Nota, perpetuo privilegij iure.*

28. Et Augustinus lib. 1. contra duas Epistolas Pelagianorum ad Bonifacium Pontificem, c. 1. *Hec autem, quæ duabus Epistolis eorum respondeo, ad tuam potissimum dirigere Sanctitatem, non tam discenda, quàm examinanda, & ubi forsitan aliquid displicuerit, emendanda constitui. Verba clara sunt. Similia habent Theodoretus in Epist. ad Leonem Papam, Sozomenus lib. 6. Hist. c. 22, & alij passim.*



## QUARTUM PRIVILEGIUM.

*Nullum Decretum statui potest pro  
tota Ecclesia, nisi Pontifice  
consentiente.*

29. **Q**uartum privilegiū est, quòd nihil gra-  
ve in Ecclesia universali, nisi consulto  
prius ac cōsentiente Pontifice, possit tractari,  
decerni, ac definiri. Hoc quidē concedis, An-  
toni, sed non eo sensu, quo nos. Nam nos dici-  
mus, huiusmodi decreta vel decisiones, quæ  
fiunt pro tota Ecclesia, non habere vim ac ro-  
bur, nisi accedat cōsensu Pontificis. Tu asse-  
ris, habere quidē robur sine cōsensu Ponti-  
ficis, sed tamen plus roboris ex cōsensu illius  
accedere. Nobiscum sentiunt antiqui Patres.

30. Socrates lib. 2. Historiæ cap. 5. *Nec Ju-  
lius Roma Episcopus in concilio adfuit, neque quen-  
quam, qui eius locum suppleret, eo misit, cum utriusque  
Ecclesiasticus canon jubeat, non oportere absq; Ro-  
mani Pontificis sententia. Decreta Ecclesiis sancire.*  
Loquitur de concilio Antiocheno, quod cōtra  
Athanasium celebratum est; sed sine robore &  
autoritate, quia defuit cōsensus Pontificis.

31. Et Sozomenus lib. 3. cap. 7. *Athanasius  
fugiens Alexandria, Romam adventavit. Eodem  
tempore Paulus etiam Cōstantinopolitanus Episco-  
pus forte illo accessit, & Marcellus quoque Episcopus  
Ancyra, & Asclepas Gaza Episcopus: qui cum do-  
ctrina Ariana adversaretur, in crimen vocatus est  
ab Arianis quibusdam, quod altare everterit, &*  
R fuerit

fuerit propterea abdicatus. Cuius locum in Ecclesia Gaze administranda obtinuit Quintinianus, itemq; Lucius Episcopus Adrianopolis, ab aliis accusatus, sua quam regebat Ecclesia spoliatus, Roma a-tatem degit Quorum criminationes cum Episcopus Romanus intellexisset, & omnes fidei concilij Nica-ni consentientes reperisset, in communionem rece-pit. Ac cum propter Sedis dignitatem, cura omnium ad ipsum spectaret, singulis suam Ecclesiam restitu-it, scripsitque ad Episcopos Orientis, eosq; incusavit, quod inconsulto de hisce viris iudicassent, Ecclesias-que perturbassent.

32. Et Theodoretus lib. 2. Hist. c. 22. Nu-merus Episcoporum, qui erant Arimini congregati, praedicti vim habere non debet: praesertim cu for-mula composita sit, neg; Episcopo Romano, cuius sen-entia pra ceteris omnibus expectanda erat, & c.

33. Et Concilium Chalcedonense aet. 1. statim ab initio, post recensita nomina eorum qui interfuerunt: Paschasius vero Reverendissi-mus Episcopus, & Vicarius Sedis Apostolica, cum in medio, una cum his viris reverendissimis collegis suis stetisset, dixit: Beatissimi atque Apostolici viri, Papa urbis Roma, qua est Caput omnium Ecclesia-rum, praecepta habemus pra manibus, quibus prae-ci-pere dignatus est ejus Apostolatus, ut Dioscorus A-lexandrinorum Episcopus non sedeat in concilio, sed audiendus intromittatur. Quod nos observare necesse est. Et infra: Quia cum personam iudicandi non haberet, praesumpsit, & Synodum ausus est fa-cere sine autoritate Sedis Apostolica, quod nun-quam licuit, nunquam factum est.

34. Et Act. 16, in Relatione S. Synodi ad Leonem Papam, paulo post mediū: *Hæc sunt, quæ tecum, qui spiritu præsens eras, effecimus. Indicamus verò, quia & alia quedam pro rerum ipsarū ordinata quiete, & propter Ecclesiasticorum statutorum firmitatem definimus, scientes quia & Vestra Sanctitas eadem probatura & confirmatura est. Et circa finem: Rogamus igitur, & tuis Decretis nostrum honora iudicium, & sicut nos Capiti in bonis adiecimus consonantiam, sic & Summitas tua, filiis, quod decet, adimpleat. Hic petunt Patres concilij, ut, quæ ipsi communi consensu in concilio generali statuerant, à Pontifice confirmarentur, & robur accipiant.*

35. Et Anastasius Hierosolymitanus Patriarcha in Epist. ad Felicem Papam: *Fuit semper Apostolicæ Sedis vestra licentia, injustè damnatos vel excommunicatos, potestatis suæ auctoritate restitnere, & sua omnia ijs reddere, & eos, qui eos condemnarunt aut excommunicarunt, Apostolico punire privilegio: Sicut etiam nostris, & anterioribus novimus factum temporibus, &c. Antiquis regulis sancitum est, ut quidquid, quamvis in remotis provinciis super eorum querelis aut excusationibus ageretur, non prius tractandum vel accipiendum esset, quàm ad notitiam alme sedis vestrae esset deductum, ut huius auctoritate, juxta quod fuisset faciendum, infirmaretur, aut firmaretur.*

36. Et Augustinus cum aliis Episcopis Concilii Carthaginensis Epist. 90. ad Innocentium Papam: *Hoc itaque gestum, Domine frater sancte, charitati tuæ intimandum duximus, ut*

*statutis nostræ mediocritatis, etiam Apostolica Sedis adhibeatur autoritas pro tuenda salute multorum, & quorundam perversitate etiam corrigenda.*

37. Et Ambrosius Epist. 78. ad Theophilum Alexandrinum (ubi agit de componenda discordia, quæ erat inter Evagrium & Flavianum.) Sane, inquit, *referendū arbitramur ad Reverendum fratrem nostrum Romanæ Sacerdotē Ecclesiæ.* Et ibidem: *Ut nos quoq̃, cum id gestum esse cognovimus, quod Ecclesiæ Romanæ comprobaverit, lati huiusmodi fructum examinis adipiscamur.*

38. Et Prosper in Chronicis: *Concilio apud Carthaginem habito ducentorum septendecim Episcoporum, ad Pontificem Sozimum synodalia decreta perlata, quibus probatis, per totum mundum hæresis Pelagiana damnata est.*

39. Accedit efficacissima ratio, quæ sumitur ex primo privilegio in hunc modum: Pontifex habet cūram & gubernationem totius Ecclesiæ, sicut Rex totius regni, aut Imperator totius imperij, quisque in suo genere: At nemo potest facere efficax Decretum pro toto regno aut imperio, nisi consentiente Rege aut Imperatore: Ergo similiter nemo potest facere efficax Decretum pro tota Ecclesiæ, nisi consentiente Pontifice. Hæc tamen duo distinguenda sunt. Primò, facere efficax Decretum pro tota Ecclesiæ. Hoc nemo potest sine expresso consensu Pontificis. Secundò, facere efficax decretum pro hac aut illa Ecclesiæ particulari. Hoc potest Episcopus huius aut illius Ecclesiæ particularis, sine expresso

presso consensu Pontificis ; modo decretum in se bonum sit, & Pontifex rationabiliter non repugnet.

#### QUINTUM PRIVILEGIUM.

*Pontifex potest sancire leges Ecclesiasticas, quæ obligent universam Ecclesiam.*

40. **H**Oc sequitur ex dictis, quia cùm sit Caput Ecclesiæ, sicut Rex est Caput regni, & Imperator imperij ; non minus potest sancire leges pro tota Ecclesia, quàm Rex pro toto regno, aut Imperator pro toto imperio.

41. Hoc magis explicabo ex tribus generalibus principijs. Unum est, quod Prælati Ecclesiæ habeant potestatem regendi subditos ; & quòd subditi jure divino teneantur eis obedire. Patet ex Scripturis, Luc. 10. 16. *Qui vos audit, me audit. Et qui vos spernit, me spernit.* Et Matth. 18. 17. *Si Ecclesiam non audierit, sit tibi sicut ethnicus & publicanus.* Et Act. 20. 28. *Spiritus sanctus posuit Episcopos regere Ecclesiam Dei.* Et Hebr. 13. 17. *Obedite Præpositis vestris, & subiaceite illis.* Et ratio est, quia si subditi non tenerentur obedire, jam non essent subditi.

42. Alterum est, quòd Prælati Ecclesiæ non tantum habeant potestatem regendi subditos, sed etiam coercendi & puniendi, si non obediant, ut passim docet Apostolus 1. Cor. 4.

21. *Quid vultis? in virga veniam ad vos, an in Spiritu mansuetudinis?* Et 2. Cor. 13. 10. *Hac absens*

*scribo, ut non praesens durius agam, secundum potestatem, quam Dominus mihi dedit.* Et hac potestate frequenter usus est. 1. Quando excommunicavit Corinthium incestuosum. 2. Quando reprehendit Corinthios, quod judicio cōtenderent apud infideles. 3. Quando Hymenæum & Alexandrum, propter hæresin, tradidit Sathanæ. 4. Quando Thessalonicensibus scripsit: *Si quis non obedit verbo nostro, per epistolam hunc notate, & non commisceamini illi.*

43. Tertium sequitur ex prædictis, quod Prælati Ecclesiæ habeant etiam potestatem condendi novas leges, obligantes in consciētia. Ratio est, quia habent potestatem regendi & puniendi subditos, & subditi tenentur illis obedire. Ergo habent potestatem condendi leges, secundum quas possint regere & punire subditos, & in quibus subditi teneantur illis obedire.

44. Fortè dices cum Calvino, id non sequi, Nam satis esse, si possint eos regere & punire secundum leges divinas. Nec requiri, ut regant & puniant eos secundum leges humanas. Respondeo. Potestas Prælatorum latius se extendit, quàm ad ea, quæ sunt juris divini. Primò, quia testimonia scripturæ, quæ allata sunt, non astringuntur ad solum jus divinum. Secundò, quia Apostoli multa præceperunt subditis, quæ non erant juris divini. Nam in Concilio Hierosolymitano prohibuerūt sanguinem, suffocatum & immolata, quæ tunc temporis non erant prohibita jure divino.

Jus

Jus enim veteris Testamenti erat abrogatum. Nec ullum aliud exrabat jus divinum, quo illa prohiberentur. Similiter D. Paulus legem statuit de bigamis ad Episcopatum non admit- tendis. 1. Tim. 3. 2. Et alibi (præsertim 1. Cor. 7. 10.) distinguit sua præcepta à præceptis Christi. Denique legantur canones Apostolorum, concilia generalia, Decreta Pontificum, in quibus sunt multæ leges Ecclesiasticæ de ijs, quæ jure divino in particulari determinata non sunt.

SEXTUM PRIVILEGIUM.

*Pontifex potest excommunicare Episcopos, Reges & Principes graviter delinquentes, si contumaces sint.*

45. **D**Uplex est excommunicatio major & minor. Major, de qua hîc agimus, est censura seu pœna Ecclesiastica, qua homo Christianus propter delictum & contumaciã, eiicitur extra Ecclesiam, & privatur communibus Ecclesiæ bonis. Nam sicut is, qui in Republica civili contumax & rebellis est suo Principi, vel magistratui, potest ejici in exilium, & privari privilegijs & commodis illius Reipublicæ, ex qua eiicitur; sic etiam fit in Ecclesia. Sunt autem triplicia bona Ecclesiæ, quibus homo privatur per excommunicationem. 1. Sacramenta. 2. publicæ preces & suf-  
 R 4 fragia.



fragia. 3. communis convictus & conversatio fidelium inter se. Igitur, qui excommunicatus est, non potest admitti ad Sacramenta; nec est particeps publicarum precum & suffragiorum, quæ fiunt in Ecclesia; nec potest cum alijs Christianis in communi convictu seu societate conversari, juxta illud Apostoli 1. Cor. 5. *Scripti vobis, cum eiusmodi nec cibum sumere.* Et v. 13. *Auferite malum ex vobis ipsis.*

46. Potestas infligendi hanc pœnam concessa est Apostolis & eorum successoribus, Matth. 18. 15. his verbis: *Si peccaverit in te frater tuus, corripe eum inter te & ipsum solum. Si te audierit, lucratus eris fratrem tuum. Si autem te non audierit, adhibe tecum adhuc unum vel duos, ut in ore duorum vel trium testium stet omne verbum. Quod si non audierit eos, dic Ecclesia. Si autem Ecclesiam, id est, Prælatos Ecclesiæ, non audierit, sit tibi, sicut Ethnicus & publicanus, id est, privetur omnibus Ecclesiæ bonis, quibus ethnici & publicani privati sunt. Est autem cōcessa propter duos potissimum fines. Primò, in commodum & utilitatem delinquentiũ, ut quando vident se excludi à consortio aliorum, confundantur & resipiscant, juxta illud Apostoli 2. Thess. 3. 14. *Ne commisceamini cum illo, ut confundatur.* Secundò, in bonum & cautelã aliorum, ne inficiantur, juxta illud, 1. Cor. 5. 6. *Nescitis, quia modicum fermentũ totam massam corrumpit?* Vide D. Augustinum lib. 3. contra Epistolam Parmeniani, ubi prolixè & eleganter de hac re disputat.*



47. Hic obiter notandū est, hæc ferè pro eodem usurpari in scripturis & Patribus. 1. Excommunicare aliquem. 2. ejicere de Ecclesia. 3. auferre de medio. 4. tradere Satanæ. 5. habere pro ethnico & publicano. 6. nec cibum cum illo sumere. 7. nec cum eo commisceri. 8. arcere à communione fraternitatis. 9. Sacramento benedictionis exautorare. 10. communicatione interdicare. 11. à communione orationis & omnis sancti commercij relegare. Et speciatim advertit Augustinus in quæstionibus super Deuteron. q. 39. hanc formulam loquendi, *Auferte malum ex vobis*, aliter accipi in veteri testamento, aliter in novo. In veteri idē esse, quod *interficite*: In novo, idem, quod *excommunicate*. Unde subjicit: *Hoc nūc agit in Ecclesia excommunicatio, quod tunc agebat interfectio*.

48. His positis, quæstio est, an Pontifex possit Regem Christianum, qui id meritus sit, excommunicare, seu communibus Ecclesiæ bonis privare? Nihil certius apud Catholicos. Imò tam certum apud omnes hoc est, quàm certo persuasum habent, Pontificē esse Christi Vicarium in Ecclesia, & omnes Christi oves illi commissas esse: ideoque, quod Petro dictū est, *Pasce oves meas*, etiam Pontifici, tanquam Petri Successori, dictum esse interpretantur. Sicut ergo Pastor potestatem habet, non solum pascendi & gubernandi oves, quæ ipsius curæ commissæ sunt; sed etiam morbidas & infectas, ab alijs separandi, seu ex ovili depellendi, ne noceant cæteris; sic etiam de Ponti-

fice, respectu fidelium, sentiendum est. Cum ergo quilibet Rex Christianus, sit ovis Christi, sanè, si contingat illum delinquere, & contagionem contrahere, poterit per Pastorem separari ab alijs, donec sanetur & resipiscat.

49. Hujus rei varia extant exempla. Tametsi enim, primis trecentis annis post tempora Apostolorum, non legamus ullum Regem aut Imperatorem fuisse excommunicatum, quia vix ulli erant tunc Reges aut Imperatores Christiani, qui excommunicari possent (gentiles enim non excommunicantur) tamen deinceps non pauci hac poena castigati sunt. Primo, Theodosius Imperator ab Ambrosio Episcopo. Secundò, Arcadius Imp. & Eudoxia ab Innocentio I. Tertio, Leo Isauricus Imperator à Gregorio II. Quarto, Desiderius Longobardorum Rex ab Adriano Papa. Quinto, Robertus Francorum Rex ab Episcopis Galliarum. Sexto, Henricus III. Imp. à Gregorio VII. in Synodo Romana. Septimo, Petrus Aragoniarum Rex à Martino Papa. Octavo, Philippus Francorum Rex à Paschali Pontifice. Nonno Henricus IV. Imp. à Legatis ejusdem Pontificis. Decimo, Rogericus Siciliarum Rex ab Innocentio II. Undecimo, Wilielmus Siciliarum Rex ab Adriano IV. Duodecimo, Fridericus Imperator ab Alexandro III. in Concilio Lateranensi. Decimo tertio, Henricus Angliarum Rex ab eodem Pontifice. Decimo quarto, Wilielmus Scotorum Rex à Legatis Pontificis. Hec & similia exempla in historijs passim obvia sunt. Nec adversarij negare id possunt.

## CAPUT QUINTUM.

*Diluuntur objectiones Marci Antonij contra Primatum Pontificis.*

1. **M**ulta objicis contra Primatum Romani Pontificis (lib. 4. cap. 7. & 8.) quæ omnia ferè ex Lutheranis & Calvinistis suffuratus es. Et quidem prima objectio sumitur ex principiis hæcenus à te positis. 2. Ex doctrina Parisiensium Theologorum. 3. Ex eo, quòd in Ecclesia nulla sit jurisdictio. 4. Ex dictis Pelagij & Gregorij Pontificum. 5. Ex conciliis Oecumenicis. 6. Ex Episcopis Asianis. 7. Ex Cypriano. 8. Ex Firmiliano. 9. Ex Episcopis Orientalibus. 10. Ex Athanasio. 11. Ex Basilio. 12. Ex Nazianzeno. 13. Ex Hieronymo & Damaso. 14. Ex Socrate. Et sic deinceps.

## I. OBJECTIO.

*Ex principiis Marci Antonij.*

2. **P**rin cipia, quæ ais à te prioribus libris probata esse, sunt hæc tria. 1. Quòd Christus non instituerit Monarchiam Ecclesiasticam. 2. Quòd omnes Episcopi, jure divino, sint inter se pares. 3. Quod solo jure Ecclesiastico introducta sit inter illos aliqua inæqualitas & Hierarchia. Ex quibus inferis, Pontificem non habere Primatum Ecclesiæ: Vel non esse visibile Caput Ecclesiæ. Sed hæc prin-

principia jam refutata sunt. Quibus oppono alia tria. 1. Quod Christus fuerit visibile Caput Ecclesiæ. 2. Quod Petrus fuerit Vicarius Christi in visibili Ecclesiæ regimine. 3. Quod Pontifex sit Successor Petri cum pari potestate. Ex quibus infero, Pontificem habere Primatum Ecclesiæ, sicut Petrus habuit. Hæc hæcenus probata sunt.

## II. OBJECTIO.

### *Ex doctrina Parisiensium.*

3. PRIMò explicas doctrinam Parisiensium ex Gersonio, Petro Aliacensi, Jacobo Almayno, & Joanne Majore (c. 7. n. 4. & aliquot seqq.) deinde nu. 9. ais, illorum doctrinam de Primatu Pontificis, si bene intelligatur, nihil à tua discrepare: nec item à veritate. Illos enim reipsa negare Primatum; & docere, regimen Ecclesiæ non esse Monarchicum, sed Aristocraticum, quod etiam tu doces.

4. Hic non opus est mea responsione. Ipsi Parisienses in sua censura respondent, quicquid hîc dicis, meram imposturam esse. Itaque negant, tuam doctrinam ab ipsorum doctrina nihil discrepare. Tuam damnant: suam, contra tuâ imposturam, à calumnia vindicant. Nihil addam. Hoc solum monco, te similem esse Lutheranis, qui cùm viderent se priorem à Catholicis turpiter defecisse, nec suæ defectionis prætextum reperirent; finxerunt se nihil discrepare à Patriarcha Constantino-

tinopolitano : ut hac ratione persuaderent mundo, doctrinā Lutheranorum eandem esse cum doctrina Ecclesiæ Orientalis. Sed repulsam passi sunt. Patriarcha nō agnovit illos pro veris Christianis, sed tanquam impostores abjecit & repudiavit. Idem tibi accidit, Antoni. Defecisti nuper à Catholicis, propter privatos affectus. Quarebas prætextū Apostasie. Nec alium invenisti, quàm ut dicerēs, te sentire cū Academia Parisiensi. Reclamant Parisienses: impostorem te vocant. Quem deinceps Patronum quæsiturus es? Nemo, nisi nesciat impostorem te esse, tibi assistet.

### III. OBJECTIO.

*Ex eo, quòd in Ecclesia nulla sit  
jurisdictio.*

5. **H**anc objectionem proponis c. 7. n. 6. circa med. his verbis: *Sciant etiam de jure divino, veram jurisdictionem in Ecclesia nullam esse; sed totam charitate regi, regulis voluntariis ac documentis, suasionem, hortatu, increpationibus & obsecrationibus: penas vero alias non habere, nisi ad summum. Exclusionem hominis à reliqua fidelium societate; quæ est pœna duntaxat privativa, non positiva. Quare propter jurisdictiones falsas, & nullas Papatum ponere, est maxima levitatis?*

6. Respondeo. Maxime levitatis est, propter odium privatum; à cōmuni onaniam sententia decedere: quod tu facis. Nullum hīc patronum habes, nec Parisienses, nec alios

Catholicos, nec Anglicanos, ad quos confugisti, nec te ipsum. Nam Parisienses in sua censurâ, de hac tua propositione, qua negas verâ in Ecclesia iurisdictionem, sic statuunt: *Hæc propositio est hæretica, & ordinis Hierarchici subversiva.* Reliqui etiam Catholici agnoscunt veram iurisdictionem in Ecclesia, ut patet ex Scholasticis & aliis Theologis, qui de hac re copiosè scripserunt. Eandem agnoscunt Anglicani Theologi, ac nominatim Thomas Lancelottus, & Guilielmus Tookerus in duello contra Becanum, pag. 305. & alibi. Et tu ipse agnoscis, lib. 1. c. 3. n. 31. his verbis: *Christus immediate concessit Apostolis potestatem ordinis & iurisdictionem plenissimam.* Et lib. 2. c. 3. n. 30. loquens de iisdem Apostolis & eorum subditis, sic scribis: *Ubi enim nullum crimen aderat in inferioribus, quod à superioribus corrigeretur, superiores suâ iurisdictionem, quam in actu primo habebant, in actu secundo non exercebant.* Igitur Prælati Ecclesiæ, ex hac tua concessione, habent iurisdictionem in actu primo, & eam possunt exercere in actu secundo, si necessitas exigat.

7. Accedit duplex ratio, quam negare nō potes. Una est: Ubicunque est potestas condendi leges, quibus subditi obligantur, ibi est iurdictio: At in Ecclesia est potestas condendi leges Ecclesiasticas, quibus Christiani obligantur: Ergo in Ecclesia est iurdictio. Maior nota est, quia duplex solet distingui potestas: Una ordinis: altera iurisdictionis. At potestas condendi leges, non est potestas ordinis  
sed

sed iurisdictionis. Minor probatur dupliciter. Primò, ex supradictis in quinto privilegio, ubi ostendi Prælatos Ecclesiæ habere potestatem condendi leges Ecclesiasticas, sicut Princeps sæcularis habet potestatem condendi leges politicas. Deinde ex tua concessione. Nam li. 2. c. 10. fateris cælibatum Clericorum, jure Ecclesiastico, vel lege Ecclesiastica, vel decreto Ecclesiastico, introductum esse. His enim vocabulis ibi uteris.

8. Altera est: Ubicunque est potestas puniendi subditos delinquentes, ibi est iurisdictionis: At in Ecclesia est potestas puniendi subditos delinquentes: Ergo in Ecclesia est iurisdictionis. Maior nota est. Minor probatur dupliciter. Primo, ex Apostolo 1. Cor. 4. 21. *Quid vultis? in virga veniam ad vos, an in Spiritu mansuetudinis?* Et 2. Cor. 13. 10. *Hæc absens scribo, ut non presens durius agam secundum potestatem, quam Dominus mihi dedit.* Quæ est illa potestas? Non ordinis, sed iurisdictionis. Deinde ex tua concessione, quia fateris, in Ecclesia esse potestatem excommunicandi, seu, ut tuis verbis utar, potestatem *excludendi homines à reliqua fidelium societate.*

9. Quòd autem ais, excommunicationem esse pœnam tantum privativam, non positivam; nihil obstat iurisdictioni positivæ. Imò talis pœna, etiamsi privativa sit, non potest legitimè infligi, nisi ab eo, qui habet positivam potestatem puniendi: Quæ positiva potestas est vera iurisdictionis. Disce hoc, exemplo



emplo Regis. Nam si Rex non haberet positivam jurisdictionem in subditos, non posset delinquentes ejicere in exiliū, neque privare communi civium societate, aut fama, aut Capite, aut bonis temporalibus. Nec valet hæc consequentia: Private hominem civili societate est pœna privativa: Ergo non requirit positivam jurisdictionem.

19. Denique falsum est, quod addis, Ecclesiam non habere alias pœnas, quàm increpationem & excommunicationem. Habet jejunia, orationes, eleemosynas, castigationes corporales, quas per modum pœnæ aut satisfactionis, potest pœnitentibus imponere, ut semper usurpatum est. Habet interdicta, irregularitates, & alias censuras Ecclesiasticas, quibus subditi coercentur. Et quid respondebis Petro & Paulo Apostolis, quorum alter Ananiam & Saphiram corporali morte punivit: alter incestuosum Satanae tradidit in interitū carnis? An illis objecturus es in Ecclesia non esse alias pœnas, nisi increpationem & excommunicationem; ideoq; malè eos tecisse, quòd alias usurpaverint?

#### IV. OBJECTIO.

*Ex dictis Pelagij & Gregorij  
Pontificum.*

11. **A**Is (cap. 7. n. 10. & seqq.) hos duos Pontifices acerrimè oppugnasse Primatum in Ecclesia, eo quòd oppugnaverint titulum:



*Oecumenici seu universalis Patriarchæ*, quo utebatur Joannes Constantinopolitanus Episcopus. Hæc enim duo, secundum te, idem valēt. 1. esse universalem seu Oecumenicum Patriarcham. 2. esse Caput Ecclesiæ universalis, vel habere Primatum Ecclesiæ universalis. Ergo qui oppugnat prius, oppugnat etiam posterius.

12. Verba Pelagij sunt hæc: *Nullus Patriarcharum hoc tam prophano vocabulo unquam utatur, quia si unus Patriarcha universalis dicitur, Patriarcharum nomen ceteris derogatur.* Quæ verba sumpta sunt ex epistola Pelagij Papæ ad illegitimam Synodum Constantinopolitanam (tom. 2. concilior. in Decret. Pelagij) & referuntur apud Gratianum dist. 29. cap. Nullus.

13. Verba Gregorij lib. 4. epist. 32. ad Mauritium sunt hæc: *Quis est iste, qui contra statuta Evangelica, contra canonum Decreta, novum sibi usurpare nomen præsumit? Et infra: Sed absit à cordibus Christianorum nomen istud blasphemiae, in quo omnium Sacerdotum honor adimitur, dum ab uno sibi dementer arrogatur.* Et lib. 6. epist. 30. *Ego fidenter dico, quia quisquis se universalem Sacerdotem vocat, vel vocari desiderat, in elatione sua Antichristum præcurrit, quia superbiendo se ceteris præponit.* Alibi habet similia.

14. Respondeo. Pugnas contra te ipsum. Nam lib. 3. cap. 8. num. 14. sic habes: *Docuimus, unumquemque Episcopum jure divino esse universalem.* Vel verè, vel falsò id docuisti. Si verè, necesse est Pelagium & Gregorium, quos pro

te adducis, falsum docuisse. Nam illi docent, nullum debere vocari Episcopum aut Sacerdotem universalem. Si falsò, revoca errorem. Deinde non intelligis citatos Patres. Reprehendunt illi Joannem Constantinopolitanū Episcopum, quod titulum universalis Patriarchæ vel Sacerdotis, fastuosè sibi arrogaverit. Ut autem constet, quo sensu id fecerit, notandum est, hæc duo distingui, quæ tu confundis.

1. Dici universalem Episcopum in Ecclesia.
2. Dici Episcopum universalis Ecclesiæ.

Prior titulus reprehēditur in Joanne; posterior Romano Pontifici conceditur. Et citati Patres priorem asserunt esse prophanum, blasphemum, Antichristianum: posteriore, non item.

15. Est autem hoc discrimen inter utrumque titulum. Qui dicit se esse universalem Episcopum vel sacerdotem, insinuat se solum esse Episcopum, & alijs omnibus derogat nomen & honorem Episcopalem. Et hoc fecisse Iohannem, testatur Gregorius, partim locis citatis, partim libr. 4. epistol. 34. cum ait: *Triste valde est, ut patienter feratur, quatenus despectis omnibus, prædictus frater & Coepiscopus meus, solus conetur appellari Episcopus.* Et Epistol. 36. ad Eulogium: *Si unus Patriarcha universalis dicitur, Patriarcharum nomen cæteris derogatur.* Et libr. 7. epistol. 69. ad Euseb: *Nam si unus, ut putat universalis est, restat ut vos Episcopi non sitis.*

16. Qui autem dicit, se esse Episcopum vel Pastorem universalis Ecclesiæ, non significat se esse solum Episcopum vel Pastorem; sed se habere

habere generalem curam, & gubernationem totius Ecclesiæ, licet alij Episcopi habeant specialem curam, & gubernationem Ecclesiarum particularium. Et hoc sensu Pontifex solet vocari Episcopus & Pastor universalis Ecclesiæ. Quod etiam fatetur Gregorius. Nam lib. 6. Epist. 32. ait: *Petro omnium Apostolorum Principi, totius Ecclesiæ cura commissæ est.* Item, *Cura ei totius Ecclesiæ & Principatus committitur, & tamen universalis Apostolus non vocatur.* Idem sentiunt alij Pontifices, qui Gregorium præcesserunt, ut Sixtus I. epist. 2. Victor I. epist. 1. Pontianus epist. 1. & alij. Qui se vocarunt Episcopos universalis Ecclesiæ. Verba eorum sunt hæc: *Sixtus universalis Apostolica Ecclesiæ Episcopus, omnibus Episcopis in Domino salutem.* Item, *Victor Romanæ & Universalis Ecclesiæ Archiepiscopus.* Item, *Pontianus sanctæ & universalis Ecclesiæ Episcopus.* Et sic alij deinceps.

17. Vides Marce Antoni, Pelagium & Gregorium frustra à te adductos esse, contra nos. At meritò contra te adduci possunt. Nam Gregorius, ut jam dixi, agnoscit, Petro totius Ecclesiæ curam & Principatum commissum esse, quod tu negas. Similiter Pelagius loco citato sic habet: *Relatum est ad Apostolicam Sedem, Joannem Constantinopolitanum Episcopum, universalem se scribere, vosque ex hac sua præsumptione ad Synodum convocare generalem, cum generalem Synodum convocandi autoritas Apostolica Sedis beati Petri singulari privilegio sit tradi-*

*ta; & nulla unquam Synodus rata legatur quæ Apostolica autoritate non fuerit fulta. Et infrà: Sciat Joannes, nisi errorem suum citò correxerit, à nobis excommunicandum fore.* Quibus verbis fatetur hæc tria. 1. Autoritatem convocandi generalem Synodum, singulari privilegio, traditam esse Apostolicæ Sedi. 2. Nullā Synodum ratam esse, quæ Apostolica autoritate non sit firmata. 3. Pontificem posse excommunicare Episcopos Orientales. Quæ omnia contra resunt. Nec debes excipere, suspectos esse Pelagium & Gregorium in hac causa. 1. quia tu uteris ipsorum autoritate. 2. quia vocas eos Pontifices sanctos: idque propterea, ut ipsorum testimonium plus ponderis habere videatur.

18. Ex dictis facile solvuntur argumenta, quæ frustra ex Pelagio & Gregorio adducis contra Primatum Pontificis, (lib. 4. cap. 7. num. 22.) Percurram obiter. Primum est: Qui se dicit universalem Episcopum, reliquis omnibus Episcopis aufert nomen, honorem, & dignitatem Episcopalem: At Pontifex hoc facit: Ergo &c. Resp. Major vera est eo sensu, quo Joannes vocabat se universalem Episcopum. Minor falsa est, quia Pontifex vocat quidem se Episcopum universalis Ecclesiæ; non tamen Episcopum universalem, eo sensu, quo Joannes.

19. Secundum: Luciferianum est, velle unum Episcopum se efferre super alios Episcopos, qui sunt astra cœli. Resp. Lucifer voluit se efferre supra astra cœli, ex mera superbia, non  
autem

autem ex Dei ordinatione. Luciferū imitatus est Joannes Constantinopolitanus. At Pontifex Romanus, Petri Successor, id non facit. Imitatur Petrum, cui totius Ecclesię cura erat demandata; & ideo totius Ecclesię Pastorem & Episcopum meritò se vocat; non ex superbia, sed ex Christi institutione.

20. Tertium: Schisma aperit & inducit, qui se vocat universalem. Resp. Joannes inducebat schisma, quia cum Pontifex Romanus esset Episcopus universalis Ecclesię, cui omnes tenebantur obedire, ipse se subduxit ab obedientia, & vocavit se universalem Patriarchā: & sic dividebat unitatem Capitis in Ecclesia. Hoc non facit Pontifex. Quærit conservare unitatem Capitis; non in varia schismata distrahere.

21. Quartū: Solus Christus est Ecclesię Caput universale, & omnes Episcopi sunt Christi membra. Resp. Solus Christus est Caput Ecclesię, quoad internum influxum gratiæ. At non Solus est caput, quoad externam gubernationem. In priori officio Capitis non admittit Vicarium; in posteriori admittit. Hoc lib. 1. fusè explicatum est.

22. Quintum: Neq; Petrus, neque ullus Apostolus, aut Sanctus Episcopus, vocavit se unquam universalem. Respondeo. Si de nomine disputas verum est: si de re ipsa, falsum. Nam Petrus re ipsa exercuit officium Pastoris, respectu totius Ecclesię: quod etiam fecerunt Successores Petri: Et tamen non voca-

verint se universales; vocati sunt tamē episcopi seu pastores universalis ecclesiæ, ut c. 1. præcedenti in primo privilegio ostensum est.

23. Sextum: Proprium est Præcursoris Antichristi, superbiendo se ceteris antepondere. Resp. Verum est. At Pontifex hoc non facit. Non enim ex superbia, sed ex divina institutione, ceteris se anteponebat: Sicut in veteri testamento faciebat Moyses, & reliqui summi Pontifices. Sicut etiam in regno Angliæ facit Rex, & in imperio Imperator. Uterque enim legitimo jure Electionis præfert se alijs. In quo dissimiles sunt Joanni Constantinopolitano, qui ex superbia, non ex Dei ordinatione, se ceteris anteponebat.

24. Septimum: Si in ecclesia esset aliquis Episcopus universalis, eo sanè in hæresin lapsus, tota caderet, aut macularetur ecclesia. Resp. Hoc argumentū sumpsisti ex Gregorio lib. 4. epist. 32. & lib. 9. epist. 24. Qui longè aliter id proponit contra Joannem Episcopum Constantinopolitanum. Et supponit hæc duo principia. 1. Quod multi episcopi Constantinopolitani in hæresin lapsi sint, ut Nestorius, Macedonius, & plures alij. 2. Quod is, qui vocat se Episcopum & Sacerdotem universalem, eo sensu, quo Joannes vocabatur se universalem, significet se solum esse episcopum & Sacerdotem; & reliquis omnibus deroget nomen, honorem, & auctoritatem episcopalem ac Sacerdotalem. Ex utroque sic argumentatur: Si Nestorius aut Macedonius  
fuis-

fuiſſet epiſcopus & Sacerdos univerſalis, ſequeretur totam eccleſiam fuiſſe lapſam, quādo ipſe lapſus eſt. Quæ conſequentia bona eſt, ſuppoſitis illis principijs, quæ jam poſita ſunt. Tunc enim cenſetur labi, vel periclitari eccleſia, quando nullus in ea manet Sacerdos aut epiſcopus. At labente epiſcopo univerſali, qui ſolus vult haberi Sacerdos & epiſcopus, nullus amplius manet epiſcopus aut Sacerdos. Ergo labente tali epiſcopo, cenſetur labi tota eccleſia.

25. In hoc argumento plus roboris eſt, quàm in iſto: Si Rex laberetur in hæreſin, totum regnum periclitaretur. Nam etiam ſi Rex laberetur, adhuc ſuper eſſent epiſcopi & Sacerdotes Catholici, qui populum in fide retinerent. At labente epiſcopo univerſali, nullus ſuper eſt epiſcopus aut Sacerdos Catholicus, qui poſſit populum inſtruere. Nec ad Romanum Pontificem poteſt hoc argumentum applicari. Primò, quia Gregorius ſupponit Romano Pontifici dictum eſſe, quod Petro dictum eſt: *Ego rogavi pro te, ut non deficiat fides tua* (lib. 4. epiſt. 32.) Secundò, quia Romanus Pontifex non dicit ſe univerſalem epiſcopum, id eſt, non dicit ſe ſolum eſſe epiſcopum, derogando alijs nomen, honorem, & auctoritatem epiſcopalem. Unde etiam ex hac parte (poſito, ſed non conſeſſo, quod poſſit fieri hæreticus) non ſequeretur, labente Pontifice, totam eccleſiam periclitari. Nam illo labente, adhuc ſuper eſſent multi epiſcopi & Sacer-



dotes, qui Ecclesiæ prospicerent, donec novus eligeretur Pontifex.

## V. OBJECTIO.

### *Ex Conciliis Oecumenicis.*

26. **O**bjicis duo concilia Oecumenica, secundum & quartum, id est, Constantinopolitanum & Chalcedonense, quæ declararunt Episcopum Constantinopolitanum Romano Pontifici in potestate & privilegijs parem esse. Respondeo. Fallum est. Nam in Concilio Constantinopolitano c. 5. juxta primam editionem sic legimus: *Constantinopolitana civitatis Episcopum habere oportet Primatus honorem post Romanum Episcopum, propterea quod sit nova Roma.* Vel, ut habet altera editio: *Constantinopolitanus Episcopus habeat priores honoris partes post Romanum Episcopum, eo quod sit ipsa nova Roma.* In quo canone solum decernitur, ut Episcopus Constantinopolitanus habeat præcipuam dignitatem post Episcopum Romanum, non autem, ut habeat parem dignitatem cum Episcopo Romano. Itaq; hoc decretum factum est in favorem Episcopi Constantinopolitani, non respectu Pontificis, sed respectu aliorum Episcoporum, præsertim Alexandrini & Antiocheni, qui cum illo certabant de honoris prærogativa. Et definitum, ut post Pontificem, qui semper supremus in Ecclesia habitus est, proximum locum teneret Constantinopolitanus, non autem Alexandrinus aut Antiochenus.



27. Ex Concilio Chalcedonenſi, act. 15. citas canonem 28. in quo ſtatuitur, *Conſtanti-  
nopolin æqualib. cum Roma privilegiis ſui debere.*  
Sed fruſtra. Nam canon ille clandestinus &  
ſubreptitiuſ eſt, quem Legati Pontificis nun-  
quam approbarunt. De hoc vide Baronium  
Tom. 6. Annalium, An. Chriſti 451. Bell. lib. 2.  
de Pontif. c. 18. Et Notationē quæ habetur to-  
concil. ad finem 15. actionis Chalcedonenſis,  
quæ ſic habet: *Meminerit candidus lector cano-  
nem hunc 28. de Conſtantinopolitani Episcopi pri-  
vilegiis & eminentia prorsus rejectum eſſe à Leone  
ſanctiſſimo Pontifice Romano, ut ex multis ejus ſu-  
prà excuſſis literis perſpicuè videre licet. Et certè,  
coactus eſt etiam Anatolius ipſe Conſtantinopolis  
Antiſtes, qui callidè à Patrib. Chalcedonenſis Syno-  
di, canonis hujus promulgationem impetraverat,  
reclamantibus Romani Pontificis Leonis Legatis &  
Vicarijs, intra priſtinos ſe limites tenere & ab in-  
fauſtis ambitionis conſiliis animum revocare.*

## VI. OBJECTIO.

### *Ex Episcopis Aſianis.*

28. **S**extò objicis: Polycrates Episcopus A-  
ſianus, & Irenæus reſtiterunt Victori  
Papæ, Aſiaticas Eccleſias excommunicanti.  
Reſp. In factò Victoris duo ſpectanda ſunt. 1.  
Potestas excommunicandi. 2. Cauſa excōmu-  
nicationis. Igitur Polycrates & Irenæus non  
negarunt Victorem Papam habere poteſtatē  
excōmunicandi Episcopos Aſiæ (ut bene no-

tat Baronius to. 2. Annalium Ann. Christi 198. & patet ex eo, quod suprà ostensum est, Pontificem posse excommunicare Episcopos, Reges, & Imperatores, si fuerint cōtumaces) sed negarunt causam excommunicationis fuisse sufficientem, & ideo illi restiterunt. Causa excommunicationis erat hæc. Post longam controversiam de celebratione Paschæ, an deberet celebrari, cum Judæis 14. die primi Mensis, sive dies esset Dominicus, sive non; an verò die tantum Dominico; tandem definivit Victor, celebrandum esse die tantum Dominico. Et voluit, ut in Asia servaretur hoc ipsius decretum. Asiani non volebant servare. Igitur à Pōtifice excommunicati sunt. Pontifici restiterunt Polycrates & Irenæus, asserentes, nihil aliud hoc esse, quàm turbare Ecclesiam: Nec esse legitimam causam excommunicationis: In Asia semper celebratum fuisse Pascha die 14. primi Mensis: hanc consuetudinem mutari non debere.

29. An autem Victor habuerit sufficientem causam, nec ne, jam non disputo. Si habuit, immeritò reprehensus est à Polycrate & Irenæo. Si non habuit, reprehendi potuit cum debita modestia, sicut Petrus à Paulo reprehensus est. At hoc non derogat ipsius potestati aut jurisdictioni. Nam etiam Rex potest reprehendi à consiliario vel Principe, salva ipsius corona & autoritate. Vide quæ dicta sunt lib. 2. c. 7. §. 38. & seqq.

## VII. OBJECTIO.

*Ex Cypriano.*

30. **S**eptimò objicis. Cyprianus libr. 3. Epist. 3. ad Corneliū, non patitur se esse inferiorem Romano Pontifice, sed ei se penitus parem facit. Nam cū Cyprianus excommunicasset quosdam Clericos, qui postea Romam confugerunt ad Pontificem, & ab eo recepti sunt in communionem: egrè id tulit Cyprianus, & scribit Pontificem id facere non potuisse: atq; ex tali facto solere schismata in Ecclesia oriri, quando unus Episcopus immisceet se negotio alterius.

31. Hoc probas ex verbis Cypriani, qui loco citato sic scribit: *Neque enim aliunde hareses oborts sunt, aut nata schismata, quàm inde, quòd Sacerdoti Dei non obtemperatur. Nec unus in Ecclesia ad tempus Sacerdos & ad tempus Judex vice Christi cogitatur, cui si secundum magisteria divina obtemperaret fraternitas universa, nemo adversus Sacerdotum Collegium quicquam moveret: nemo post divinum judicium, post populi suffragium, post Coepiscoporum consensum, judicem se non jam Episcopi, sed Dei faceret. Nemo dissidio unitatis Christi Ecclesiam scinderet: Nemo sibi placens actumens, seorsim foris, novam haresin conderet. Ubi per Sacerdotem Dei, qui unus in Ecclesia fungitur officio judicis vice Christi, ais intelligi unumquemq; Episcopum in suo Episcopatu.*

32. Deinde in progressu sic pergit Cyprianus: Nam cum statutū sit omnibus nobis, & æquum sit pariter ac iustum, ut uniuscujusq; causa illic audiatur, ubi est crimen admissum, & singulis pastoribus portio gregis sit ascripta, quam regat unusquisq; & gubernet, rationem sui actus Domino redditurus; oportet utique eos, quibus præsumus, non circumcursare, nec Episcoporum concordiam coherentem subdola & fallaci temeritate collidere, sed agere illic causam suam, ubi & accusatores habere, & testes sui criminis possint: nisi paucis desperatis & perditis minor videtur esse autoritas Episcoporum in Africa constitutorum, qui jam de illis judicaverunt, & eorum conscientiam multis delictorum laqueis vinctam, judicij sui nuper gravitate damnaverunt. Jam causa eorum cognita est: jam de ijs dicta sententia est. Unde concludis, non esse minorem auctoritatem Episcoporum Africæ, quàm Romani Pontificis, in judicio Ecclesiastico: ac proinde, qui ab aliquo Episcopo Africæ excommunicati sunt, non debere à Romano Pontifice admitti in communionem.

33. Resp. Prius testimonium Cypriani contra te est. Nam ibi expressè docet, ideo in Ecclesia nasci hæreses & schismata, quia non obtemperatur Sacerdoti, id est, Pontifici, qui unus in tota Ecclesia constitutus est, ut loco Christi sit Judex omnium controversiarum fidei. Quod alijs quidem verbis, sed eodem sensu clarissimè docet in li. de Simpl. Præl. seu de unitate Ecclesiæ, ubi quærēs, quare in Ecclesia nascentur hæreses & schismata, sic respondet:

det: *Hoc eo fit fratres dilectissimi, dum ad veritatis originem non reditur, nec Caput quaritur &c.* quē locum fusē explicavi lib. 2. c. 7. object. 1.

34. Circa posterius testimoniū; tria discutienda sunt. 1. Quod sit illud statutum, de quo loquitur Cyprianus. 2. Qui sint illi pauci desperati & perditī, quos ait ab Episcopis dānatos esse. 3. Quo sensu intelligendum sit, quod ait: *Nisi minor videtur esse auctoritas Episcoporum in Africa.*

Est igitur prima quæstio, de quo statuto loquatur Cyprianus? Resp. Vel loquitur de statuto Fabiani Papæ, vel de aliquo simili, quod ex illo desumptum est. Statutum Fabiani habetur in Epistola ipsius tertia ad Hilarium Episcopum his verbis: *Peregrina vero iudicia salva in omnibus Apostolica auctoritate, generali sanctione prohibemus: quia indignum est, ab externis ut iudicetur, qui provinciales, & à se electos debet habere iudices, nisi fuerit appellatum.* Unde oportet, si aliquis Episcoporum super certis accusetur criminibus, ut ab omnibus audiatur, qui sunt in Provincia Episcopis, quia non oportet, accusatū alicubi, quàm in foro suo audiri. Et paulò post: *Semper ibi causa agatur, ubi crimen admittitur.* Et iterum: *Placuit etiam, ut si Episcopus appellavit ad Apostolicam Sedem, id statuendum, quod eiusdē Sedis Pontifex statuerit.* Habetur hæc epistola tom. 1. cōcil. in decretis Fabiani Papæ. Ex hoc statuto colliguntur hæc duo. 1. Causam uniuscujusq; debere illic audiri & judicari, ubi admissum crimen est. 2. Licere tamen appellare ad Pontificem

tificem Romanum tanquam ad supremum in Ecclesia iudicem. Quod tibi contrarium est.

35. Altera questio est, Qui sint illi pauci desperati & perdit, quos ait Cyprianus ab Episcopis Africanis legitimè dñatos esse? Resp. Sunt quinq; schismatici Pseudoepiscopi, Privatus, Felix, Jovinus, Maximus, Repostus, qui propter adulteria, stupra, & nefanda sacrificia legitimè accusati, & ab Episcopis Catholicis in Africa damnati sunt. De quibus hæc scribit Cyprianus in epistola citata. 1. Quòd Fortunatum creaverint Pseudoepiscopum, contra Cyprianum, qui erat legitimus Episcopus. 2. Quod Felicissimū Romam miserint ad Cornelium Papam: non appellandi causa, sed fallendi & mentiendi. Dicebant enim Fortunatum legitimè electum esse Episcopum à viginti quinque Episcopis; quod erat falsum, cū non fuerit electus, nisi à quinq; Pseudoepiscopis. Dicebant Cyprianum non esse legitimum Episcopum. Hæc & similia dicebant, ut à Cornelio Papa reciperentur ad communionem Sedis Apostolicæ, & Cyprianum cum alijs Episcopis facerent suspectum apud Pontificem. Sciebant enim, se pro hæreticis vel schismaticis habendos, si Apostolicæ Sedis cōmunionem carerent. De hac ipsorum fraude conqueritur Cyprianus. Vnde colligo hæc tria. 1. Cyprianum non negare, quin liceat appellare ad Pontificem, si appellatio sit iusta & legitima. 2. Reprehendere tamen mendacem ac fraudulentam appellationem. 3. Non solum Cy-  
pria-

prianū, sed etiam adversarios ipsius agnoscere Pontificem esse supremum judicem in Ecclesia, quia certò persuasum habent, se non habendos pro hæreticis, si cum illo ad communionem admittantur.

36. Tertia quæstio, quo sensu intelligendū sit, quod Cyprianus ait: *Nisi minor videtur esse auctoritas Episcoporum in Africa constitutarū?* Respondeo. Non debet sic intelligi, quasi non sit minor autoritas Episcoporū Africæ, quàm Romani Pontificis, in iudicio Ecclesiastico, ut ru putas. Nam si ab Episcopis licet appellare ad Pontificem; necesse est, minorem esse Episcoporum, quàm Romani Pontificis, auctoritatem. Debet ergo sic intelligi, quòd non sit minor autoritas Episcoporum in Africa, quàm in Gallia & alijs Provincijs. Ut hic sit sensus: Fabianus Papa generatim statuit, ut si quis Episcopus accusetur super certis criminib. audiatur ab omnibus Episcopis, qui sunt in Provincia, ubi crimina commissa sunt. Hoc statutum tam debet intelligi de Episcopis Africæ, quàm aliarum Provinciarum. Si ergo, vigore hujus statuti, permissum est Episcopis aliarum Provinciarum judicare Episcopum de criminibus in propria Provincia commissis; etiam Episcopis Africæ id permissum est. Nam horum auctoritas non est minor, quàm aliorum. Hanc explicationem confirmant illa verba Cypriani, *Nam cum statutum sit omnibus nobis,* id est, cū statutum Fabiani pertineat æquè ad omnes Episcopos &c.



37. Iterum objicis ex eodem: Cyprianus facit se parem Stephano Pontifici in Ecclesia universali gubernanda. Nam lib. 3. epist. 13. sic Stephanum alloquitur: *Cui rei nostrum est consulere & subvenire, frater charissime, qui divinam clementiam cogitantes, & gubernanda Ecclesie libram tenentes, sic censuram vigoris peccatoribus exhibemus, ut tamen lapsis erigendus, & curandis vulneratis, bonitatis & misericordie divinae medicinam non denegemus. Quapropter facere te oportet plenissimas literas ad Coepiscopos nostros in Gallijs constitutos &c.* Hic vim facis in eo, quod dicit Cyprianus, *Qui gubernanda Ecclesia librā tenentes.* Ex quo deducis, æquē Cyprianum ac Pontificē fuisse totius Ecclesie gubernatorem.

38. Respondeo, Cyprianus rogat Stephanum Papam, ut scribat literas ad Episcopos Gallie, & ipsis Pontificia autoritate denunciaret, ut Marcianum Episcopum Arelatensem, propter hæresin Novatianam, deponant ab Episcopatu, & alium in locum ejus substituant. Et simul insinuat hæc duo. 1. Se id rogare ex pio affectu erga Ecclesiam, ne illa detrimentum patiatur. 2. Cum ipse per se, & sua autoritate, non possit Episcopis Gallie id denunciare; rogare se, ut Pontifex id faciat, cui omnes Episcopi subiecti sunt. Alioqui, si ipse potuisset per se præstare, quid necesse erat contugere ad Pontificem?

39. Hunc sensum colligo ex ipsis Cypriani verbis. Sic enim incipit: *Faustinus collega noster Lugduni consistens, frater charissime, semel atque*



que iterum mihi scripsit, significans ea, quæ etiam vobis scio utique nuntiata, tam ab eo, quam à cæteris Coepiscopis nostris in Provincia constitutis, quod Marcianus Arelate consistens, Novatiano se conjunxerit, & à Catholica Ecclesiæ unitate disjunxerit &c. Cui rei nostrum est consulere, &c. Ecce, jã omnes Episcopi Galliæ scripserant Pontifici, ut succurreret. Et unus ex illis, Faustinus nomine, scripserat etiam Cypriano, ut Pontificẽ sui officij moneret. Sed quare omnes scripserant Pontifici? Quare ipsi per se non deponebant Marcianum ab Episcopatu, & alium substituebant? Quia sciebant se sua autoritate id non posse, sed autoritate Pontificis, cui omnes Episcopi subjeti sunt. Et ideo Faustinus etiam petebat à Cypriano, ut Pontificem instigarer. Quod & fecit Cyprianus his verbis: *Quapropter te facere oportet plenissimas literas, ad Coepiscopos nostros in Gallijs constitutos, ne ultra Marcianum pervicacem & superbum, & divinæ pietatis ac fraternæ salutis inimicum, collegio nostro insultare patiantur.* Et infra: *Dirigantur in Provinciam, & ad plebem Arelate consistentem à te literæ, quibus absento Marciano, alius in locum ejus substituat.* Quasi dicat: Neque ego, neque Episcopi Galliæ possunt id præstare. Tui id officij est: ideo ad te confugimus. Vides, Marce

Antoni, Cyprianum tibi iterum  
adversari.

*Ex Firmiliano Episcopo.*

40. **O** Ctavò objicis: Firmilianus Episcopus Casareæ Cappadociæ non agnovit Stephanum Pontificem pro Capite Ecclesiæ, sed illum contempsit. Nam in Epistola ad Cyprianum scripta graviter invehitur in Pontificem: Et inter cætera sic illum alloquitur: *Volentibus vivere, causa mortis fuisti, & insuper indignaris. Vide qua in peritiâ reprehendere audeas eos qui contra mendacium pro veritate nituntur. Et infra: Nisi quod imperitos, etiam animosos atq; iracundos esse manifestum est: dum per inopiam cōflij & sermonis, ad iracundiam facile vertuntur, ut de nullo alio magis, quàm de te dicat scriptura divina, Proverb. 19. Homo animosus parit lites, & vir iracundus exaggerat peccata. Lites enim & dissensiones quantas parasti per Ecclesias totius mundi? peccatū verò quàm magnum tibi exaggerasti, quādo te à tot gregibus scidisti? Et multa alia in eundem sensum. Ex quibus colligis, Firmilianum non agnovisse Pontificem pro suo Primatē, seu Ecclesiæ gubernatore.*

41. Respondeo. Firmilianus tunc fecit, quod tu nunc facis. Offensus erat Pontifici, sicut tu es. Et ex illa offensā, multis convitiis proscindebat Stephanum, sicut tu proscindis Paulum. Itaque argumentum, quod sumis ex Firmiliano, tanti valet, quanti hoc, quod ex te fumo: Marcus Antonius, ex privato odio, non agnoscit Pontificem pro Capite Ecclesiæ: Er-

go Pontifex non est Caput Ecclesiæ. Facessant huiusmodi ineptiæ. Porro causa, cur Firmilianus tam acerbè scripserit in Pontificem, hæc est. Cyprianus cum multis Episcopis Africæ contendebat Baptismum ab hæreticis collatum, non esse validum, ac proinde baptizatos ab hæreticis, quando redeunt ad Ecclesiam Catholicam, esse rebaptizandos. Hanc sententiam sequebatur Firmilianus cum aliis Episcopis Cappadociæ, Siliciæ & Galatiæ: qui omnes in Synodo Iconii habita, statuerunt, nihil eorum, quæ ab hæreticis fiunt, ab Ecclesia Catholica recipiendum esse: Non Baptismum, non ordinationem, non manuum impositionem, non alia similia. Hoc patet ex Epistola Firmiliani jam citata, ubi sic scribit: *Plane, quoniam quidam decorum baptismate dubitant, plurimi simul convenientes in Iconio, diligentissime tractavimus & confirmavimus, repudiandum esse omnino baptismum, quod sit extra Ecclesiam constitutum.*

42. Stephanus Pontifex, nixus Apostolica traditione, contrarium decernebat, nempe Baptismum ab hæreticis collatum, si aliunde non esset defectus, validum esse: ac proinde baptizatos ab hæreticis non esse rebaptizandos. Quia verò Episcopi, qui fuerant in Synodo Iconiensi, pertinaciter persistebant in sua opinione, à Stephano excommunicati sunt, (apud Eusebium lib. 7. c. 4.) Hoc agrè ferens Firmilianus, strinxit calamum, & epistola ad Cyprianum missa, multis calumniis bonum Pontificem

rificem infectatus est : eoque liberius id fecit, quòd sciret Cyprianum esse in eadem secum opinione, & Pontifici in hoc puncto adversari.

43. Hæc est historia reigestæ. In qua tria certa sunt. 1. Cyprianum & Firmilianum cum alijs Episcopis, in illa cōtroversia de Baptismo hæreticorum errasse, quod etiam te tateri necesse est. 2. Eisdem peccasse, quòd non voluerint Stephano Pontifici obedire: ut de Cypriano scribit Augustinus lib. 1. contra Donatist. c. 18. & alibi. 3. Non tamen peccasse contra fidẽ, sed contra obedientiam. Nam Stephanus Papa non definiverat illam controversiam, tanquam de fide : Sed solùm præceperat, ut non rebaptizarentur hæretici, ut fatetur ipsemet Cyprianus in epistola ad Pompejum.

#### IX. OBJECTIO.

#### *Ex Episcopis Orientalibus in Concilio Antiocheno.*

44. **N**ONò obijcis : Episcopi Orientales in Concilio Antiocheno, duplici de causa restiterunt Julio Pontifici. 1. Quòd ipsos Romam citasset. 2. Quòd Athanasium ad se confugientem, qui in Synodo Orientali fuerat damnatus, absolvisset, & suæ Sedi restituisset. In utroque dicebant illum usurpassẽ plus autoritatis, quàm debebat. Unde etiam can. 12. statuerunt, *ut major debeat esse Synodus, quæ absolvit, quàm fuerat illa quæ damnavit.* Insinuantes Athanasium, si legitimè vellet absolvi, non debere quærere absolutionem ab uno Episco-

piscopo, qualis erat Julius, sed ab aliqua Synodo majori, quàm fuerat illa, in qua erat dānatus. Hæc omnia probas ex Epistola Julij, quam scripsit ad Orientales.

45. Respōdeo. Hæc objectio magis reprimat quàm nos. Tu objicis Episcopos Orientales, inter quos erant triginta sex Ariani. Ego vicissim objicio Athanasium & Julium, qui erant sincerissimè Catholici. Objectio tua est hæc: Episcopi Orientales, qui magna ex parte erant Ariani, restiterunt Julio: Ergo nō habebant illum pro Capite Ecclesiæ. Mea est hæc: Athanasius vir doctissimus & sanctissimus, ab Episcopis Orientalibus appellavit ad Pontificem, tanquam ad legitimum judicem: Ergo agnovit illum pro legitimo judice. Item: Julius absolvit Athanasium, & citavit Episcopos Orientales: Ergo agnovit se habere potestatem hoc faciendi. Videamus nunc, tua an mea objectio plus momenti habeat. Tua fundatur in facto Arianorum: mea in facto sanctissimorum Patrum. Tu credis Episcopis hæreticis: Ego credo Episcopis Catholicis. Credo, inquam, Athanasio, de quo testatur D. Thomas (1. p. q. 61. art. 3.) quod nunquam in doctrina fidei erraverit. Credo Julio Pontifici, à quo ipsi etiam Ariani veniam deprecari sunt, ut fateretur Athanasius Apolog. 2. contr. Arianos, his verbis: *Ariani victi à veritate, veniam scriptis literis à Juliano Romano Pontifice poposcerunt, & ad nos pro pace epistolas misere.*

## X. OBJECTIO.

*Ex Athanasio.*

46. **T**Ria objicis ex Athanasio. Primò, quòd totam dignitatem Romanæ Ecclesiæ in eo posuerit, quòd esset Sedes Apostolica. Secundò, quòd commemorans impudentiam cujusdam Eunuchi, non veriti præsentiam Liberij Pontificis, dixerit. *Oblitus sui, quòd coram Episcopo staret.* Si putasset, inquis, Pontificem esse Vicarium Christi, dixisset, *oblitus sui, quòd coram Vicario Christi, coram Vice-Deo staret.* Tertio, quod Orat. 1. contra Arianos, recensens præcipuos Scriptores sui temporis, non ponat primo loco Romanos Pontifices.

47. Respondeo. Prima objectio contra te est. Nam ex eo, quòd Romana Ecclesia est Sedes Apostolica, habet Apostolicam dignitatem. Et sicut in illa Sede Apostolica primus omnium sedit Petrus, qui erat Vicarius Christi; sic post Petrum, in eadem sedit Pontifex, Successor Petri cum pari potestate. Itaque Athanasius nō potuit majorem laudem tribuere Romanæ Ecclesiæ, quàm dicendo, Sedem Apostolicam esse.

48. Altera objectio puerilis est. Nā sicut rectè dicimus: Oblitus sui, quod coram Deo, vel coram Christo, vel coram Rege staret: Ita rectè dicimus: Oblitus sui, quòd coram Episcopo staret. Neq; necesse est, omnes titulos, qui alicui debentur, semper exprimere. Alio-  
qui semper dicendum esset: Oblitus sui, quòd  
coram

coram Deo Optimo Maximo, infinito, æterno, immenso, omnipotente staret: Vel, quòd coram Rege Serenissimo, potentissimo, invictissimo, mansuetissimo staret. Quod ridiculum est. Habent isti tituli suum locum; sed nō semper usurpandi sunt. Addo, Athanasium a libi non neglexisse titulos, qui Romano Episcopo debentur. Nam Apolog. 2. contra Arianos, vocat *Romanum Pontificem*. In epist. ad Marcum, *Sancta Romana & Apostolica Sedes, atque universalis Ecclesia Papam*. Et in epist. ad Felicem II. *Beatissimum Patrem*. Et alibi aliter.

49. Tertia objectio est similis præcedenti. Nam qui recenset præcipuos scriptores sui temporis, non semper debet habere rationem dignitatis personarum; sed aliquando etiam doctrinæ, vel ætatis, vel famæ & existimationis, vel librorum qui ab unoquoque editi sunt. Et tu, Antoni, si hoc tempore texeres Catalogum scriptorum hujus seculi, quem primo loco ponendum statueres? An Regem Angliæ, quia Rex est? Liceret quidem. Sed cur non similiter liceat præponere vel Baronium, propter cognitionem historiæ: vel Bellarminum, propter doctissimos controversiarum tomos, qui toto orbe notissimi sunt: vel Christophorum Clavius, ob insignem peritiam rerum Mathematicarum: in quibus excelluit, vel aliquem alium in suo genere celeberrimum?

## IX. OBJECTIO.

*Ex Basilio.*

50. **E**X Basilio epist. 77. ad Occidentales, producis hæc verba: *Sive Caput vos ipsos Ecclesia universalis reputatis; non potest dicere pedibus caput, Non est mihi opus vobis: sive in reliquum vos Ecclesiasticorum membrorum ordinem locatis, nō potestis nobis dicere, qui in eodem vobiscum corpore constituti sumus, Non estis nobis necessarij. Nā & manus mutuam inter se operam necessariam habent; & pedes mutuo sese firmant; & oculi per concordiam habent, quod objecta clare & dilucide apprehendunt. Nos quidem nostram imbecillitatem agnoscimus, & vestram a vide concordiam requirimus.* Hæc verba interpretaris ironicè à Basilio dicta esse, contra fastum Pontificis, hoc sensu. Sive, ut vos vanè prætenditis, estis Caput; sive, ut est veritas, membra cum alijs debetis nobis ex charitate succurrere. Respondeo. Basilius non scribit ironicè, sed seriò. Scribit autem Damasò Pontifici Romano, & alijs Episcopis Occidentalibus. Et quidem ad Damasum referri debent illa ipsius verba: *Sive Caput vos ipsos universalis Ecclesia reputatis.* Ad reliquos verò Episcopos ista: *Sive in reliquum vos Ecclesiasticorum membrorum ordinem locatis.*

51. Sed iterum sic urges: Basilius epist. 50. ad Athanasium data, laudat Meletium Antiochenum, & dicit dignum esse, qui præsit universo Ecclesiæ corpori. Hoc nō diceret, si putaret Rōmanum Pontificem præesse universo Eccle-



Ecclesię corporis; alioqui injuriam illi faceret, præferendo illi Meletium Antiochenum. Et maximè urges illam particulã, qua utitur Basilii: *Ut universo ut ita dicã, Ecclesia corpori ipse præsit*. Quid sibi vult illud, *Ut ita dicam*? Hoc vult inquis, in Ecclesia talẽ præfulem nõ dari.

52. Respondeo. Tria dicit Basiliius. Primò, Ecclesiam Orientalem in varias partes dissectam esse. Quod verissimum est. Nam alia pars, erat Arianorum : alia Apollinaristarum : alia Catholicorum, qui rursus inter se erant divisi. Et alij quidem adhærebant Meletio (inter quos Basiliius) alij Paulino. Secundò dicit, Meletium fore aptissimum, qui inter partes concordiam & pacem constituat, & omnes ad unitatem redigat. Tertiò, totum Orientem optare, ut Meletius præsit universo corpori Ecclesię Orientalis. Itaque ista particula, *Ut ita dicam*, non significat, nullum dari, qui præsit universo corpori Ecclesię, (quia constat Pontificem præesse) sed significat, se non loqui de universo corpore Ecclesię absolutè sed de universo corpore Ecclesię Orientalis.

## XII. OBJECTIO.

### *Ex Nazianzeno.*

53. **N**Azianzenus, inquis, in orat. funebri in Basilium, commemorans turbas in Basilium excitatas, facit etiam occidentales Episcopos earum autores, vel saltem cooperatores. Verba Nazianzenis sunt hæc: *Aderant &*

*ex Occidentalibus Episcopis quidam, qui Ecclesias, quotquot essent orthodoxæ, ad se pertrahabant.* Hinc ita concludis: Si Romana Ecclesia erat primum Caput Occidentalium, & Domina cæterarum omnium Ecclesiarum, cūr arte & officijs, Orientales Ecclesias ad se trahit & allicit? Hoc erat Primatum artificio sibi comparare, non exercere.

54. Respondeo. Non intelligis, quæ dicis. Historia rei gestæ sic habet. Cæsareæ in Cappadocia vacabat sedes Archiepiscopalis. Cæsarienses petebant Basilium. Basilius fugit. Interea per vim electus & creatus est Eusebius. Ægrè hoc tulerunt Monachi, quibus præerat Basilius, qui maluissent Basilium creari Episcopum, non Eusebium. Ob hanc causam Eusebius fuit offensus Basilio. Cū hoc adverterent Monachi, moliti sunt facere defectionē ab Eusebio. Quod erat illis facile ob tres causas, quas Nazianzenus loco citato commemorat. 1. Quia Basilius, cujus causam agebant Monachi, erat magni nominis & existimationis apud populum. 2. Magna pars populi erat aliena ab Eusebio, tanquam non legitime electo. 3. Eodem tempore erant ibi Episcopi Occidentales, Eusebius Vercellensis, & Lucifer Calaritanus, qui propter fidem Catholicam, à Constantio Imperatore Ariano fuerant in exilium missi, & post mortem Constantij, liberati ab exilio, venerant in Cappadociam, ibique autoritate Liberij Papæ, reformabant Ecclesias Arianas, & Catholicas

in fide conservabant. Illi igitur adhærebant meliori parti factionis. Hæc omnia patent, partim ex Nazianzeno, loco citato, partim ex Baionio, tom. 3. & 4. Annalium, Anno Christi 360. & seqq.

55. Hinc sequitur. 1. falsum esse, quod tu asseris, Episcopos occidentales fuisse vel auctores, vel cooperatores barbarum, quæ in Basilium erant excitatæ: Non enim agebant contra Basilium, sed contra Eusebium. 2. Nullam esse hanc tuam consequentiam: Episcopi Occidentales, auctoritate Romani Pontificis, pertrahebant ad se Ecclesias Orthodoxas, ne inficerentur: Ergo Romanus Pontifex non habebat Primatum totius Ecclesiæ. Hæc melior est: Romanus Pontifex per suos Legatos fuit sollicitus de Ecclesijs Orientalibus, vel ad fidem reducendis, vel in fide confirmandis: Ergo putavit ad se pertinere curam illarum Ecclesiarum.

### XIII. OBJECTIO.

*Ex Hieronymo & Damaso.*

56. **H**ic multa objicis. Primo, quod Hieronymus præfatione in Evangelia, nullum alium titulum tribuerit Damaso Pontifici, quam *Summi Sacerdotis*. At omnes Episcopi vocantur summi Sacerdotes apud Hieronymum lib. contra Luciferianos, & lib. de ordinibus Ecclesiast. Ergo nihil peculiare agnovit in Pontifice, præ alijs Episcopis. Re-  
spondeo.

spondeo. Mirus disputator es. Paulo antè sic concludebas : Athanasius Pontificem vocat Episcopum : Ergo. Nunc sic : Hieronymus Pontificem vocat summum Sacerdotem : Ergo. Sed quid ergo ? Dicam : Ergo Marcus Antonius ineptè disputat. Quasi verò, qui Pontificem vocat Episcopum aut summum Sacerdotem, per hoc neget, esse Caput totius Ecclesiæ. Etiam Christus in Scriptura vocatur Episcopus & Sacerdos, (1. Pet. 2. 25. & Hebr. 7. 11.) An idcò cõcludes, non esse Caput Ecclesiæ ? Nihil minus. Imò & Caput Ecclesiæ, & Episcopus, & Sacerdos est. Non n. pugnant hæc inter se. Nec unum derogat auctoritati alterius. Deinde falsum est Hieronymum omnes Episcopos vocare summos Sacerdotes. Certè in lib. contra Luciferianos, quem tu citas, id non invenio. Alter liber de ordinibus Ecclesiasticis, quem etiã adducis, non est Hieronymi, sed alterius, ut bene observavit Erasmus in censura, & Cardinalis Bellarminus in lib. de Script. Ecclesiasticis.

57. Secundò objicis : Hieronymus in Epist. 85. ad Evagrium sic scribit : *Nec altera Romanae urbis Ecclesia, altera totius orbis existimanda est. Et Gallia, & Britannia, & Africa, & Persis, & Oriens, & India, & omnes barbare nationes, unum Christum adorant, unam observant Regulam veritatis. Si auctoritas quaeritur, orbis major est urbe. Ubicumq. fuerit Episcopus, sive Roma, sive Eucharby, sive Constantinopoli, sive Rhegi, sive Alexandria, sive Thanis, ejusdem meriti, ejusdem est & Sacerdotij.* Hæc verba, inquis, plurimum pugnant cum

cum Papatu Romano. Et qui hæc nunc diceret, statim Romæ hæreticus conclamaretur, & patibulis destinaretur.

§ 8. Respondeo. Non pugnant cum Papatu. Nec Hieronymus ibi loquitur de Papa, sed de Diaconis Ecclesiæ Romanæ, qui quòd pauciores & ditiores essent, quàm Sacerdotes & Episcopi, per quendam abusum, absente Pontifice volebant illis præferri. Contra hunc abusum disputat Hieronymus. Et sic argumentatur: Quod fit in omnibus Ecclesijs orbis Christiani, debet etiam Romæ fieri: At in omnibus Ecclesijs Presbyteri præferuntur Diaconis: Ergo etiam Romæ id debet fieri. Nec divitiarum in hac re habenda est ratio. Hic sensus colligitur ex ipso Hieronymo. Sic n. scribit: *Audiu quendam in tantam erupisse vecordiam, ut Diaconos Presbyteris, id est, Episcopis, anteferret.* Deinde post verba, à te citata, sic pergit: *Potentia divitiarum, & paupertatis humilitas, vel sublimiorem vel inferiorem Episcopum non facit.* Et infra: *Caterum, etiam in Ecclesia Romæ, Presbyteri sedent, & stant Diaconi: licet paulatim incrementibus vitiis, inter Presbyteros, absente Episcopo, sedere Diaconum viderim: & in domesticis convivis, benedictiones presbyteris dare. Discant, qui hoc faciunt, non se recte facere, & audiant Apostolos: Non est dignum, ut relinquentes verbum Dei, ministremus mensis. Sciant, quare Diaconi constituti sint. Legant Acta Apostolorum: recordentur conditionis suæ.* Et cætera, quæ sequuntur.

§ 9. Igitur objectio, quam facis ex hoc loco

co Hieronymi, talis est: Diaconi Romanæ Ecclesiæ, per abusum præferebant se Presbyteris, quod non debebant facere, quia in alijs Ecclesijs Christiani orbis, Presbyteri præferuntur Diaconis: Ergo Pontifex Romanus nõ habet Primatum Ecclesiæ. Vel certè talis: Orbis Christianus major est urbe Roma: Ergo Romanus Pontifex non est Caput Ecclesiæ. Vel talis: Ecclesia Romæ non adorat alium Deum, nec observat aliam regulam veritatis, quam aliæ Ecclesiæ per orbem dispersæ: Ergo Pontifex non est Caput Ecclesiæ. Vel denique talis: Major est autoritas totius Ecclesiæ, quàm solius Romanæ particularis. Ergo. Omnes hæ consequentiæ ineptæ & Apostaticæ sunt.

70. Tertiò objicis: Hieronymus ibidem, comparans Ecclesiam Romanam cum Ecclesia, quæ erat in Bethlehem, ait multo augustiorem locum esse, qui Salvatorem mundi, quàm qui fratris genuit parricidam. At si Romana Ecclesia esset Sedes Monarchiæ Ecclesiasticæ, non deberet illi præferri Bethlehem. Respondeo. Hieronymus non confert inter se Ecclesias illas, quoad dignitatem & jurisdictionem, de qua nos hîc disputamus: Sed quoad sanctitatem locorum, in quibus erectæ & fundatæ sunt. Et ait, augustiorem esse locum Bethlehemiticum, in quo Christus Sanctus Sanctorum, natus est, quàm Romanum, in quo Romulus, parricida fratris, genitus est. Quis hoc negat?

61. Quartò objicis: Hieronymus in Apologia contra Jovinianum, de Damaso Pontifice, qui scripta ipsius contra Helvidium laudaverat, sic scribit: *Num vir egregius & eruditus in scripturis, & virgo, Ecclesia virginis Doctor, aliquid in illo sermone reprehendit?* Hic, inquis, non erat locus tacendi de Papatu; sed omnino addidisset, *Vicarius Christi, & totius Ecclesie gubernator*, si credidisset hos titulos Pontifici convenire. Respondeo. Adhuc nescis, Antoni, ubi sit locus tacendi aut loquendi. Hieronymus volebat ostendere librum suum, quem scripserat contra Helvidium de perpetua Beatæ Mariæ virginitate, à Damaso, tanquam viro docto, lectum & approbatum esse. Nec quicquam in eo repertum, quod scripturis divinis esset contrarium. Quid hinc opus erat mentionem facere de jurisdictione?

62. Quintò objicis: Damasus Pontifex apud Ambrosium, Epistol. 79. fatetur se inferiorem esse Concilio Capuensi, dum non audet judicare causam Bonosi Episcopi, quæ à dicto Concilio judicanda ei fuerat commissa. Respondeo. Causa Bonosi non fuit Damaso judicanda commissa, ut tu fingis; sed aliis judicibus, ut patet ex epistola citata, quæ sic incipit: *Accepi literas vestras* (scribit Theophilo & Anylio) *quibus vel pro veritate, vel pro modestia, nostram sententiam sciscitari voluistis. Sed cum hujusmodi fuerit Concilij Capuensis judicium, ut finitimi Bonoso atq; ejus accusatoribus, iudices tribuerentur, & præcipue Macedones, qui cum E-*  

*piscopo*

*piscopo Theſſalonicenſi de ejus factus cognoscerent, a vertimus, quod nobis judicandi forma competere non poſſet. Igitur Concilium Capuene non commiſerat Damaſo Pontifici, ſed alijs judici- bus cauſam Bonofi cognoscendam & judi- candam, præſertim Macedonibus. Porro inter illos judices, erant etiam Theophilus & Anyſius, ut conſtat ex verbis ſequentibus: Ve- ſtrum eſt igitur, qui hoc recepisti judicium, ſenten- tiam ferre de omnibus: Nec refugiendi vel elaben- di, vel accuſatoribus, vel accuſato copiam dare. Vi- cem enim ſynodi recepisti, quos ad examinandum ſynodus elegit.*

63. Hinc duo colligo, quæ contra te ſunt. Unum eſt, quod Theophilus & Anyſius, qui erant duo ex judici- bus à Concilio Capuensi conſtitutis, voluerint Damaſo Pontifici de- ferre ſententiam judicandam: Quod non fe- ciſſent, niſi agnoviſſent illum pro ſupremo ju- dice, ad quem liceret confugere. Alterum eſt, quod Damaſus non dixerit, ſe non poſſe judi- care ex defectu juridiſ- tionis, ut tu falſò inter- pretaris; ſed non convenire ſeu congruere, ut ipſe judicet, cum jam alij competentes ju- dices à concilio designati ſint. Quod perinde eſt, ac ſi dicat Imperator: Cum Reſpublica Coloniensis designaverit certos judices in cauſa N. Baroni- us, ibi habitantis, non compe- tit, ut ego judicem. Sic enim ſervatur ordo & pax in Imperio. Nam ſi illi rectè judicaverint, bene quidem: Sin malè, ad me poteſt fieri ap- pellatio. Quid hinc colligis, Antoni? Nihil

certè



certè contra nos. Nec plus contra Põtificem,  
quàm contra Imperatorem.

## XIV. OBJECTIO.

*Ex Socrate.*

64. **E**X Socrate lib. 4. c. 24. profers hæc ver-  
ba: *Damasus Liberio in Episcopatus Roma-  
ni administratione successit. Unde Ecclesiæ Roma-  
na status forte fortuna magnopere cõturbatus fuit.*  
Ex quibus colligis hæc duo. 1. Quòd dixerit  
illum successisse in administratione, non to-  
tius Ecclesiæ, sed Romani Episcopatus. 2.  
Quòd dixerit, statum Romanæ, non autem u-  
niversalis Ecclesiæ, turbatum esse. Resp. Mi-  
serit me tui, si putas hujusmodi nugis, te ali-  
quid lectori persuadere possè. Jam suprà dixi,  
non omnia ubique dicenda aut scribenda es-  
se. Scripsit Socrates, quod re ipsa contigerat.  
Scripsit, inquam, Damasum successisse Libe-  
rio in Episcopatu Romano. Quòd verissimum  
est. Scripsit ex ea successione ortam fuisse ali-  
quam turbationem in urbe Roma. Quòd et-  
iam verissimum est, quia Ursinus seu Ursici-  
nus volebat succedere. Quid opus erat adde-  
re, successisse illum in gubernatione totius Ec-  
clesiæ? Aut ex ea successione ortam fuisse tur-  
bationem in tota Ecclesia? prius fuisset super-  
fluum; posterius falsum. Cùm enim constet,  
eum qui succedit in Episcopatu Romano, suc-  
cedere etiam in Primatu Ecclesiæ; superfluum  
est expressè hoc addere. Similiter, cum ex suc-  
cessionem Damasi non fuerit turbatus totius

Ecclesiæ status, sed illa turbatio intra urbem Romam se continuerit; falsò scripsisset Socrates, si illamurbationem toti orbi Christiano tribuisset.

## XV. OBJECTIO.

### *Ex Ambrosio.*

65. **EX** Ambrosio lib. 3. de Sacrament. cap. 1. adducis hæc verba: *Non ignoramus, quòd Ecclesia Romana hanc consuetudinem (lavandi pedes post Baptismum) non habeat, cujus typum in omnibus sequimur, & formam. Hanc tamen consuetudinem non habet, ut pedes lavet. Et paulo pòst: In omnibus cupio sequi Romanam Ecclesiam: sed tamen & nos homines sensum habemus. Ideo quod alibi rectius servatur, & nos rectè custodimus. Ipsum sequimur Apostolum Petrum, ipsius inhaeremus devotioni. Ad hoc Ecclesia Romana quid respondet? utiq; ipse autor est nobis hujus assertio- nis Petrus Apostolus, qui Sacerdos fuit Ecclesiæ Romanæ.* Hæc verba, inquis, destruunt Papatum Romanum. Respondeo. Vide, ne destruas tuum cerebrum; si ex quolibet velis quidlibet efficere. Certè si ad formam revoces argumētum, quod hîc latet, erit ejusmodi: Romana Ecclesia non servat ceremoniam lotionis pedum, quam servant aliæ Ecclesiæ: Ergo Pontifex non habet Primatum Ecclesiæ. Concesso antecedente, nego consequentiam. Quomodo probas? non video, nisi prius probes hæc duo. 1. Quælibet ceremonia Ecclesiastica, quæ servatur in una Ecclesia, debet etiam in alijs

lijs seruari. 2. Si Episcopus Romanus non seruat Romæ aliquam ex ceremonijs Ecclesiasticis, quæ alibi servatur, non potest habere Primatum Ecclesiæ. Si hæc duo probaveris, circumspiciam de alia responsione.

## XVI. OBJECTIO.

*Ex Augustino.*

66. **H**anc si proponis: Augustinus lib. de unico Baptismo contra Petilianum, cap. 14. faciens comparationem inter Stephanum Romanum, & Cyprianum Carthaginensem Episcopum, nec non inter ipsas Ecclesias Romanam, & Carthaginensem; ne ullam quidem umbram ponit Romani Papatus, sed summam æqualitatem. Sæpiissimè verò (ut lib. 2. contra Cresconium Grammaticum cap. 37. & lib. de unitat. Eccles. cap. 12.) ubi singulares Ecclesias commemorat, & ex quibus universalis Ecclesia conflatur, Romanam facit unam ex illis, & singulares omnes Ecclesias membra tantum dicit esse unius Ecclesiæ toto orbe diffusæ: nullam verò excipit e numero membrorum, ut eam faciat Caput. Hæc tu Antonius. Deinde sic concludis: Romana Ecclesia est membrum, non Caput, teste Augustino: Ergo Episcopus Romanæ Ecclesiæ est etiam membrum, non Caput.

67. Resp. Multis modis hæc peccas. Primò, quia Augustinus propriè nō instituit comparationem inter Stephanum & Cyprianum;

sed solum dicit, illos duos inter se dissentire in controversia de Baptismo hæreticorum. Verba Augustini sunt hæc : *Duo erant eminentissimarum Ecclesiarum, Romana scilicet & Carthagensis Episcopi, Stephanus & Cyprianus, ambo in unitate Catholica constituti. Quorum Stephanus Baptismum Christi in nullo iteradum esse censebat, & hoc facientibus graviter succensebat. Cyprianus autem in hæresi vel schismate baptizatos, tanquam non habentes Baptismum Christi, baptizandos in Ecclesia Catholica existimabat. Quid hinc colligis? Nihil ad nostrum propositum.*

68. Secundo, falsum est, Augustinū inter Stephanum & Cyprianum ponere summam æqualitatem. Nam expresse ait, Stephanum statuisse poenā excommunicationis in omnes qui baptizatos ab hæreticis rebaptizarent. Cū ergo Stephanus, inquit, non solum non rebaptizaret hæreticos, sed etiam hoc facientes, vel ut fieret, decernentes, excommunicandos esse censeret, sicut aliorum Episcoporum, & ipsius Cypriani literæ ostendunt; tamen cum eo Cyprianus in unitatis pace permansit. At hinc sequitur, Stephanum habuisse potestatem excommunicandi alios Episcopos, quam Cyprianus non habuit.

69. Tertiò falsum est, Augustinum sæpissimè, & præsertim duobus locis à te citatis affirmare omnes Ecclesias particulares esse membra unius Ecclesiæ toto orbe diffusæ. Uno tantum loco id affirmat, nempe lib. de unitat. Eccles. c. 12. At altero loco, nempe lib. 3. contra Cresconium c. 37. commemorat quidē mul-

tas

tas Ecclesiæ particulares, sed nullā facit mentionē membrorum aut Capitis. Igitur & fraudulenter citas illum locum, ad decipiendum lectorem; & temerè ponis illam particulam, *sæpissimè*. Sed esto: Sæpissimè id affirmat. An iaco valebit hæc consequētia: Omnes Ecclesiæ particulares sunt membra unius Ecclesiæ toto orbe diffusæ: Ergo nulla illarum est Caput? Nō magis quàm hæc: Ergo nulla illarum est pes aut manus. Nisi putes, caput non esse membrum corporis, Tā est membrum, quàm pes aut manus. Sed præcipuum inter mēbra.

70. Sed etiam hoc demus, Ecclesiā Romanam particularem non esse Caput. Insuper & hoc, Pontificem Romanum, quatenus præcisè est Episcopus Romanæ Ecclesiæ particularis, non esse Caput totius Ecclesiæ. Nō sequitur tamen, eundem Pontificem, quatenus illi totius Ecclesiæ cura cōmissa est, non esse Caput totius Ecclesiæ. Accipe simile exemplum. Matthias Imperator non est Caput imperij, quatenus præcisè est Archidux Austriæ; sed quatenus gubernatio Imperij ab Electoribus illi tradita est. Et Marcus Antonius non fuit Caput Ecclesiæ Spalatensis, quatenus erat Doctor Theologiæ; sed quatenus erat Archiepiscopus illius Ecclesiæ.

## XVII. OBJECTIO.

### *Ex Concilio Africano.*

71. **E**Am sic proponis: Episcopi Africani, tempore Innocentij Papæ, in concilio Afri-

cano cap. 72. statuerunt hunc canonem: *Quicunque non communicant in Africa, si in transmarinis ad communicandum obrepserint, jacturā clericatus excipiant.* Ubi per transmarinos, ais potissimum intelligi Ecclesiam Romanam. Ex quo inferis, Episcopos Africanos prohibu- ille, ne quisquam, qui in Africa sit excommu- nicatus, appellet ad Romanam Ecclesiam, vel Pontificem, ut ibi ad communionem recipia- tur. Eos igitur non agnovisse Primum Pon- tificis.

72. Respondeo. Male interpretaris ca- nonem. Non enim prohibet legitimam ap- pellationem ad Pontificem; neque etiam ne- gat Primum Pontificis; sed tantum decer- nit pœnam in eos, qui cum in Africa sint re- pulsi à cōmunionē, postea per fraudem & sub- reptionem communicant in Ecclesiis trans- marinis, quasi excommunicati non essent. Vel certè, per occultam fallaciam obtinent abso- lutionem ab excommunicatione, quasi inju- ste excommunicati essent. Quod constat ex epistola Africanorum Episcoporum ad Cœ- lestinum Papam, ubi sic habent: *Præfato debite salutationis officio, impendio deprecamur, ut deinceps ad vestras aures hinc venientes, non facilius admittatis.* Ubi notandum est, quòd cum de- bita observantia deprecantur Pontificem, nō quidem, ut venientes ex Africa nullo modo admittat ad communionem; sed ut non faciliè admittat, nisi causa prius cognita & examina- ta. A-

ta Aliunde autem constat, quòd agnoverint ipsius Primatum in Ecclesia universali.

73. Reliquæ objectiones, quæ sequuntur, sunt triplices. Quædam non egent solutione. Aliæ solvi possunt ex ijs, quæ dicta sunt. Aliæ denique solutæ sunt à Cardinale Bellarmino. Neque necesse est, solutiones ex Bellarmino huc transcribere. Lege ibi si vis. Et si bonæ sunt, acquiesce: Sin malæ, tuo iudicio, ostende vitium, & succur-  
remus.



LIBER QUARTUS  
DE RECTORIBUS ET  
Ministris Ecclesiæ.



*Hic unum asseris, in quo tibi assentior, nempe Episcopos Presbyteris jure divinis superiores & eminentiores esse: quod tamen est contra tuum Regem in Anglia, qui non aliam distinctionem admittit inter Episcopos & Presbyteros, quam quæ ordinis causa, humano jure introducta est, Cū illo transige. At multa alia asseris, in quibus non assentior. Præcipua ferè sunt hæc. 1. Singulos Episcopos cum plena potestate in solidum gubernare Ecclesiam. 2. Sacros Ministros ad cælibatum jure non teneri. 3. Votum continentia non esse annexum sacro ordini. 4. Et si annexum esset, tali voto non dirimi matrimonium. 5. Sacrum Ordinem non esse Sacramentum. 6. Duo tantum esse Sacramenta ex sententia Augustini. 7. Monachos non fieri Apostatas, si post vota solennia deserant suum statum, & matrimonium incant. Reliqua præterea. Hæc, quæ recensui, breviter examinanda sunt.*



## CAPUT PRIMUM.

*An singuli Episcopi cum plena potestate in solidum regant Ecclesiam?*

1. **T**U affirmas lib. 2. cap. 1. n. 9. his verbis:  
*Episcopi omnes, simul & in solidum, eandem regunt Ecclesiam, singuli cum plena potestate.*  
 Etn. 13. *Episcopi dicuntur Apostolorum Successores, quia in eorum officio, quod erat Apostolorum omnium commune, succedunt omnes omnibus in solidum.* Etn. 15. *In potestate universali, succedunt Episcopi, non modo universi, sed etiam singuli.* Et lib. 3. c. 8. n. 14. *Docuimus, unumquemque Episcopum jure divino esse universalem: & teneri ex officio, & ex charitate, Ecclesia Christi, in quacunque parte illa illius opera indigeat subvenire.*

2. Theologi Parisienses censent has tuas propositiones esse hæreticas, schismaticas, & unitatis Ecclesiæ subversivas. Et sic est. Primò, quia repugnant unitati Capituli, quod Christus in Ecclesia instituit. Nam si singuli Episcopi cum plena potestate succedunt omnibus Apostolis in solidum; Ergo omnes æqualem habent potestatem cum Petro & Pōtifice, quod est hæreticum & hætenus refutatum.

3. Secūdò, si singuli Episcopi, jure divino, habēt plenam potestatem regendi Ecclesiam in solidum, & non hanc aut illā tantum particularem, sed Ecclesiam toto orbe diffusam, ut

tu intelligis; Jam tibi, ex concessione juris divini, licitum est, cum plena potestate regere omnes Anglicanas Ecclesias in solidum; nec alij Episcopi Anglicani, jure divino poterunt tibi obfistere. Experire, an ita sit. Docebunt ipsi te aliam, ut opinor, Theologiam, si hanc potestatem usurpaveris. Nec est, quòd obtendas, te loqui de plena potestate in habitu, non in actu. Alibi quidem sic distinguis: Sed hoc loco non item. Nam illa tua verba: *Singuli regunt Ecclesiam cum plena potestate*, non significat habitum, sed actum. Alioqui debuisses sic dicere, *Singuli habent plenam potestatem regendi*. Nunc dicis, *Singuli regunt*. At regere significat actum, non habitum.

4. Tertio, si singuli, ut tu loqueris, non solum ex charitate, sed etiam ex officio tenentur subvenire cuicunq; Ecclesie indigenti; planè sequitur, te etiam ex officio ad hoc teneri. Cur ergo ex obligatione officij, quâ obstrictus es, ex tua sententia, nō subvenis Ecclesijs Dalmatiae & Croatiae, quæ tuo judicio indigent meliori instructione? Cur fugisti ex illis partibus, & Ecclesias indigentes reliquisti sine Pastore? Si esses bonus pastor, usurpares illud Christi: *Bonus pastor animam suam dat pro ovibus suis*. Nūc, quia mercenarius es, usurpas illud, quod sequitur: *Mercenarius autem, & qui non est pastor, videt lupum venientem, & dimittit oves, & fugit*. Videtur Christus de te locutus esse. Et tu te ipsum damnas, si cū tenearis ex officio subvenire, non subvenis.

5. Quar-

5. Quartò, si verum est, unumquemq; Episcopū jure divino esse universalem, ut hic disertè asseris; quare tam graviter insectaris hūc titulū in Petro & Pontifice? Neutrum vis dici Episcopum universalem. Sic n. scribis lib. 4. c. 7. n. 22. *In Ecclesia nullus est Episcopus universalis.* Et ibidem: *Qui se dicit Episcopum Universalem, reliquis omnibus Episcopis, & nomen & honorem auferit.* Et multa alia in eundem sensum. De quibus suprà dictum est, lib. 3. c. ult. object. 4.

## CAPUT SECUNDUM.

*An Ministri Ecclesia jure teneantur  
ad Cœlibatum?*

1. **T**U negas c. 10. in titulo Capitis, his verbis: *Sacros Ministros ad cœlibatum jure non teneri.* Qui titulus, cū sit negativus, perinde valet; ac si dicas, sacros ministros ad cœlibatū nullo jure, nec divino, nec humano teneri. Quod an verum sit, discutiendum est. Ut tamen certo ordine progrediamur, ostēdam.
1. Sacerdotes veteris testamenti divino jure obligatos fuisse ad continentiam, nō quidem perpetuam, sed pro certo tempore. 2. Apostolos servasse perpetuam continētiam, non quidem jure divino, sed partim consilio Christi, partim sua sponte. 3. Eosdem Apostolos suasisse, & decrevisse, ut alij deinceps Ministri Ecclesiæ servarent eandem continentiam. 4. Eam deinceps servatam esse. 5. Postea etiam lege Ecclesiastica præscriptam, non semel, sed sæpius.

plus. 6. Hanc legem Ecclesiasticam aliter servari in Ecclesia Occidentali, aliter in Orientali. Denique ostendam in tuis verbis aliquot falsitates & contradictiones.

2. PRIMA CONCLUSIO. Sacerdotes veteris Testamenti, jure divino tenebantur ad aliquam continentiam ab usu matrimonij, præsertim pro ijs diebus, quibus Deo in tabernaculo vel templo ministrabant. Hoc tenebas, cap. 10. num. 78. post medium. Sed scripturæ & Patres mecum sentiunt. Ex scripturis habemus aliquot testimonia. Primum Exod. 19. 22. *Sacerdotes quoque, qui accedunt ad Dominum, sanctificentur* id est, abstineant ab uxoribus. In eo enim potissimum consistebat sanctificatio, ut patet ex eodem capite. Nam versic. 10. dicebat Deus, ad Moysen: *Vade ad populum, & sanctifica illos hodie & cras, laventque vestimenta sua.* Moyses autem intellexit illam sanctificationem de abstinence ab uxoribus. Nam mox accedens ad populum, & explicans illi voluntatem Dei, dixit: *Estote parati in diem tertium, & ne appropinquetis uxoribus vestris.* Ubi notandum est, illam sanctificationem, seu ab continentiam ab uxoribus, de qua agitur citato capite, tam populo, quàm Sacerdotibus fuisse præceptam; quia tam populus, quàm Sacerdotes debebant audire promulgationem legis Mosai- cæ, & ad illam toto biduo se disponere per ab- stinentiam ab uxoribus, & per lotionem vesti- mentorum, & castrorum purgationem. Spe- ciali tamen titulo præceptam fuisse Sacerdo- tibus,

tibus, pro omni eo tempore, quo fungebantur officio sacerdotali; siue orando pro populo, siue hostias & sacrificia offerendo, siue aliquod aliud sacrum ministerium exhibendo. Hoc enim significatur illis verbis: *Sacerdotes quoque, qui accedant ad Dominum, sanctificentur.* Nam tunc dicebantur accedere ad Dominum, quando vel erant oraturi vel sacrificium oblaturi, vel aliquid simile facturi. Nosti hæc.

3. Secundum testimonium 1. Reg. 21. 1. *Venit autem David in Nobæ ad Achimelech Sacerdotem.* Et infra: *Respondens Sacerdos ad David, ait illi: Non habeo laicos panes ad manum, sed tantum panem sanctum: Si mundi sunt pueri, maxime à mulieribus.* Et respondit David Sacerdoti, & dixit ei: *Equidem si de mulieribus agitur, continuimus nos ab heri & nudius tertius, quando egrediebamur, & fuerunt vasa puerorum sancta. Porro via hæc polluta est, sed & ipsa hodie sanctificabitur in vasis.* Hic vides, non licuisse comedere panem sanctificatum, nisi præmissa sanctificatione, quæ in duobus consistebat. Primò ac potissimum in abstinencia ab uxoribus. Secundò in purificatione corporis, si quid maculæ in via contraxisset. Et certè, si homines laici debebant hoc modo sanctificari, multo magis sacerdotes; quippe qui ad maiorem puritatem, ratione status ac officij obligabantur.

4. Quod sic ulterius declaro. Duo hic præcepta distinguenda sunt. Unum quo laici prohibebantur comedere panes sanctificados, vel ut alibi vocantur, panes propositionis. De quo,

quo Christus, Matth. 12. 3. *Non legistis, quid fecerit David, quando esurijt, & qui cum eo erant: Quomodo intravit in domum Dei, & panes propositionis comedit, quos non licebat ei edere, neque his, qui cum eo erant, nisi solis Sacerdotibus?* Alterum, quo jubebantur abstinere ab uxoribus, qui manducaturi erant hujusmodi panes. De hoc quæstio est, quosnam obligaverit? Tu dicis obligasse solos laicos. Ego contra, obligasse etiam Sacerdotes. Et quidem per se, & primario, Sacerdotes. Quod tripliciter probò. Primò, ex dictis, quia Sacerdotes tenebantur ad majorem puritatem, quàm laici. Secundò, quia esus panum propositionis per se pertinebat ad solos Sacerdotes; Ergo etiam sanctificatio requisita ad esum istorum panum, per se pertinebat ad solos Sacerdotes. Unde sicut laici non poterant comedere hujusmodi panes, nisi tantum per accidens, & in casu necessitatis; ita non tenebantur se sanctificare pro comestione, nisi tantum per accidens, & in casu necessitatis. Tertiò, quia si præceptum de abstinence ab uxoribus pertinuisset ad solos laicos, ut tu vis; vel fuisset illis datum à Deo, antequàm Achimelech loquebatur cum Davide, vel ab ipso Achimelech cum jam loqueretur cum ipso. Non prius, quia nusquam legimus in scriptura, quòd Deus dederit tale præceptum pro solis Laicis, antequàm Achimelech loquebatur cum Davide. Nec posterior, quia Achimelech, cum dicebat

cebat Davidi, *Si mundi sunt pueri, maximè à mulieribus*; non dabat novum præceptum, sed supponebat, jam antè à Deo datum esse. At non erat aliud à Deo datum, nisi quo Sacerdotes obligabantur abstinere ab uxoribus, quotiescunque fungerentur officio sacerdotali, seu, quotiescunque aliquid sacri ministerij, si-ve orando, si-ve hostias offerendo, si-ve panes sanctos comedendo, peragerent. Itaque sensus Achimelech est hic: Vobis quidem non licet comedere panes sanctificados, sed solis Sacerdotibus: Si tamen vultis propter præsentè necessitatem comedere, cum alij panes haberi non possint, recessè est, vos ea puritate & sanctitate id præstare, qua Sacerdotes facere consueverunt, qui abstinēt ab uxoribus, quotiescunque hujusmodi panes comesturi sunt. Idem ergo à vobis exigo.

5. Tertium testimonium 1. Paralip. 24.7. *Exiit autem sors prima Jojarib, secunda Jedei, tertia Harim, &c.* ubi recensentur viginti quatuor familiæ Sacerdotum, qui per vices debebant ministrare in domo Domini, juxta illud Luc. 1.5. *Fuit Sacerdos quidam nomine Zacharias, de vice Abia.* Et paulo post: *Factum est autem, cum sacerdotio fungeretur in ordine vicis sue ante Deum, secundum consuetudinem sacerdotij, sorte exijt, ut incensum poneret.* Constat autem, Sacerdotes, quando ministrabant Domino secundum vicem suam, debuisse multos dies perseverare in ministerio. Nam ibidem vers. 23. de Zacharia sic legimus, *Et factum est, ut im-*  
*pleti*

*pleti sunt dies officij ejus, abiit in domum suam. Ple-  
rique autores putant fuisse octo dies unicuiq;  
destinatos, nempe à Sabbatho usq; ad Sabba-  
thum, ut Josephus, Ambrosius, Theophyla-  
ctus, & alij apud Maldonatum in Commen-  
tario illius loci. Et colligitur ex illo 2. Paralip.  
23.8. Fecerunt ergo Levitæ, & universus Juda ju-  
xta omnia, quæ præceperat Joad Pontifex: & as-  
sumpserunt singuli viros, qui subscerant, & venie-  
bant per ordinem Sabbathi cum his, qui impleve-  
rant Sabbathum, & egressuri erant.*

6. Igitur Sacerdotes per octo dies, relictis  
domibus & uxoribus suis, permanebant in tē-  
plo, & ibi ministrabant. Et quidem tempore  
sacrificij, erant in ea parte templi, ubi sacrifi-  
cia offerebantur. Reliquo tempore, habita-  
bant in attrio templi, in domunculis, ad id de-  
stinatis: quo non licebat uxores introducere.  
Unde consequens est, debuisse à cohabitatione  
uxorum abstinere. De qua re sic scribit Si-  
ricius Papa in epistola ad Himerium Thara-  
cōnensem Episcopum cap. 7. *Dicat mihi nunc,  
quisquis ille est sectator libidinum, præceptorque  
vitiorum, si æstimat, quòd in lege Moysis passim sa-  
cris Ordinibus à Domino laxata sint frena luxuria,  
cur eos, quibus committebantur sancta sanctorum,  
præmonet dicens: Sancti estote, quia & ego Sanctus  
sum Dominus Deus vester? Cur etiam procul à suis  
domibus, anno vicis sue, in templo habitare iussæ  
sunt Sacerdotes? Hac videlicet ratione, ne vel cum  
uxoribus possent carnale exercere commercium, ut  
conscientia integritate fulgentes, acceptabile Deo*  
munus



munus offerrent Quibus etiam, expleto deservitionis suæ tempore, uxorius usus, solius successionis causa fuerat relaxatus, quia non ex alia, nisi ex tribu Levi, quisquam ad Dei ministerium fuerat præceptus admitti. tom. 1. concil.

7. Idem, quod ad rem attinet, sentiunt alij Patres. Hieronymus lib. 1. contra Jovinianum, longè post medium: Nam & in veteri lege, qui pro populo hostias offerebant, non solum in omnibus suis non erant, sed purificabatur ad tempus, ab uxoribus separati; & vinum & siceram non bibebant, quæ solent libidinem provocare.

8. Et Innocentius I. epist. 2. ad Victricium Rotomagensis Episcopum, c. 9. Præterea, quod dignum & pudicum, & honestum est, tenere Ecclesia omni modo debet, ut Sacerdotes & Levitæ cum uxoribus suis non cocant, quia ministerij quotidiani necessitatibus occupantur. Scriptum est enim: Sancti estote, quoniam & ego sanctus sum, Dominus Deus vester. Nam si prisca temporibus, de templo Dei Sacerdotes anno vicis sua non discedebant, sicut de Zacharia legimus, nec domum suam omnino tangebant, quibus utique propter sobolis successionem uxorius usus fuerat relaxatus: quanto magis hi Sacerdotes vel Levitæ pudicitiam ex die ordinationis suæ servare debent, quibus vel Sacerdotium, vel ministerium, sine successione est, nec præterit dies, quæ vel à sacrificiis divinis, vel à Baptismatis officio vacent? (tom. 1. concil.)

9. Et Beda ad cap. 1. Luc. Hoc est, quod dixi, quod vicis sua tempore Pontifices, templi tantum officii mansipati, non solum à complexu uxorum,

*sed ab ipso quoque domorum suarum abstinerent ingressu: ubi nostri temporis Sacerdotibus, quibus semper Altari servire jubetur, perpetuum servanda castitatis exemplum datur. Quia n. tunc Sacerdotum ex stirpe Aaron successio quarebatur, necessario tempus substituenda sobolis procurabatur. At quia nunc non carnalis Successio, sed perfectio spiritualis inquiritur, consequenter Sacerdotibus, ut semper Altari queant assistere, semper ab uxoribus abstinendum, semper castitas observanda precipitur.*

10. SECUNDA CONCLUSIO. Apostoli servarunt perpetuam continentiam, non quidem ex præcepto divino, sed partim ex cōsilio Christi, partim sua spōte ac proposito. Ac primò, quod servaverint perpetuā continentia, constat ex illo Matth. 19. 27. *Ecce nos reliquimus omnia, & secuti sumus te: quid ergo erit nobis: Iesus autem dixit illis: Amen dico vobis. Et infra: Omnis qui reliquerit domum, vel fratres, aut sorores, aut patrem, aut matrem, aut uxorem, &c. Ex quo loco constat, Apostolos reliquisse omnia, quæ habebant. Ac proinde, qui antea habebant uxores, reliquisse etiam uxores; & qui antè habebant filios aut filias, reliquisse etiam filios aut filias. Et sic deinceps. Et Paulus, qui post alios Apostolos separatim vocatus est à Christo, de se scribit. 1. Cor. 7. 7. *Volo vos omnes esse, sicut me ipsum, id est, vellem seu optarem, si cōmodè fieri posset, vos omnes esse cœlibes & continentes, sicut ego sum. Et ibidem: Dico autem nō nuptis & viduis: Bonum est illis, si sic permaneant, sicut & ego. Nempe, in statu continentia.**

11. Quòd

11. Quòd autē non servaverint continentiam ex præcepto divino, sed ex Christi consilio & propria voluntate, clarum est. Nullum enim extat præceptum divinum novi testamenti, quò vel Apostoli, vel alij Ecclesiæ ministri obligentur ad cœlibatū. Extat tamen consilium Christi, Matth. 19. 10. *Dicunt ei Discipuli ejus: Si ita est causa hominis cum uxore, non expedit habere. Qui dixit illis: Non omnes capiunt verbum istud, sed quibus datum est. Sunt enim Eunuchi, qui de matris utero sic nati sunt. Et sunt Eunuchi, qui facti sunt ab hominibus: Et sunt Eunuchi, qui se ipsos castraverunt propter regnum cœlorum. Qui potest capere capiat.* Hic ponit triplex genus continentium & abstinentium ab uxoribus. Nam aliqui à natura; alij à necessitate; alij à propria voluntate habent, quòd abstineant. Ad hoc tertium genus hortatur Christus, cum ait: *Qui potest capere capiat.* Et hoc Christi consilium, tanquam sanum & meritorium, propria voluntate amplexi sunt Apostoli.

12. TERTIA CONCLUSIO: Apostoli & suaferunt, & statuerunt, ut alij deinceps ministri Ecclesiæ servarent continentiam. Audi Paulum ad Tit. 1. 7. *Oportet Episcopum sine crimine esse, sicut Dei dispensatorem: hospitalem, benignum, sobrium, justum, sanctum continentem.* Ubi inter cæteras virtutes, præscribit etiam continentiam, distinctam à sobrietate, id est, continentiam ab uxoribus, ut Divus Hieronymus rectè interpretatur.

13. Et 2. Timoth. 2. 3. *Labora sicut bonus miles*

*les Christi Iesu. Nemo militans Deo, implicat se negotiis secularibus, ut ei placeat, cui se probavit. Alludit ad milites, qui ut placeant suo Imperatori, toti intenti sunt in bellum, & abstinere se ab omnibus curis secularibus, etiam ab uxoribus. Nam ut scribit Cornelius Tacitus lib. 14. & Dio. lib. 60. Olim prohibitum fuit militibus conjugium, ut tanto facilius vacare possent militiæ. Et similiter Tertullianus in exhortatione ad castitatem, docet suo tempore milites fuisse cœlibes, sicut etiam multi hoc tempore sunt, præsertim milites ordinis Teutonici, & alij, qui regulam certam profitentur. Vult igitur Apostolus, multo magis milites Christi, debere intētos esse in ministeriū divinum, & abstinere ab ijs omnibus, quæ hoc ministerium quocunq; modo impediunt. Maxime autem impedit usus matrimonij. Nā ut alibi loquitur idem Apostolus: *Qui cum uxore est, sollicitus est, quæ sunt mundi, quomodo placeat uxori, & diuisus est.**

14. Et 1. Cor. 7. 5. *Nolite fraudare invicem, nisi forte ex consensu ad tempus, ut vacetis orationi. Ex quo loco D. Hieronymus ad cap. 1. Epist. ad Tit. sic argumentatur: Si laicis imperatur, ut propter orationem abstineant se ab uxorū coitu, quid de Episcopo sentiendum est, qui quotidie pro suis populique peccatis illibatas Deo oblaturus est victimas? Et lib. 1. contra Iovinianum, longe post medium: Si laicus, & quicumque fidelis orare non potest, nisi careat officio conjugali: Sacerdoti, cui semper pro populo offerenda sunt sacrificia,*

*ficia, semper orandum est. Si semper orandum est, ergo semper carendum matrimonio.* Similia habent Origenes Hom. 23. in Num. Epiphanius hæresi 49. Innocentius I. in epistola ad Exuperium, cap. 1. & alij.

15. Dices fortè, Apostolum quidem suasse continentiam, sed non præcepisse. Respõdeo. Certum est quod in hoc genere plus exegerit à Sacerdotibus, quàm à laicis. At à laicis dupliciter exegit continentiam. Primo per modum consilij & desiderij, .Cor. 7. 7. *Volo vos omnes esse, sicut me ipsi sum.* Secundò, per modum præcepti, ibidem vers. 5. *Nolite fraudare invicem, nisi forte ex consensu ad tempus, ut vacetis orationi,* ut interpretatur Patres jam citati. Ergo per modum majoris cujusdam obligationis debuit exigere continentiam à Sacerdotibus. Quæ major obligatio exprimitur illis verbis: *Oportet Episcopum, esse continentem.* Itẽ: *Labora sicut bonus miles Christi Iesu.* Itẽ: *Qui sine uxore est, sollicitus est, quæ Domini sunt, quomodo placeat Deo. Qui a. cum uxore est, sollicitus est quæ sunt mundi, quomodo placeat uxori, & divisus est.* Unde sic concludo: Tanta est obligatio Sacerdotum, ut abstineant ab uxoribus, quanta est ut serviant Deo & non mundo. At majori obligatione tenentur ad serviendum Deo, quam laici. Imo sicut ratione officij obligati sunt, ut se totos tradant servitio Dei, & nõ sint divisi: Ita ratione officij obligati sunt, ut abstineant ab uxoribus, & caueant divisionem.

16. Hæc ex Paulo. Accedit cõmune de-

cretum Apostolorum, quod habetur can. 27. inter canones Apostolorum, his verbis: *Innuptis autem, qui ad clerum proeecti sunt, precipimus ut si voluerint, uxores accipiant: sed lectores cantoresque tantummodo.* Ubi nomine lectorum & cantorum, comprehenduntur et alij minores ordines, ut fateris c. 10. n. 6. *Est n. omnium par ratio.* Excipiuntur autem ij, qui sunt in majeribus ordinibus constituti, quibus non licet uxores accipere. Quod similiter fateris n. 8.

17. Habemus ergo sanctionem Apostolicam de cœlibatu clericorum, quam negare nō potes. De qua loquuntur Patres Concilij Carthaginensis secundi, can. 2. ubi statuentes vel potius confirmantes legem Cœlibatus, addūg hanc rationem: *Ut, quod Apostoli docuerunt, & ipsa servavit Antiquitas, nos quoq, custodiamus.*

18. QUARTA CONCLUSIO. Continentia, quam Apostoli Ministris Ecclesiæ præscripserunt, statim in Ecclesia, tam Orientali, quā Occidentali, recepta & servata est. Hoc patet primò ex verbis concilij jam citatis: *Ut quod Apostoli docuerunt, & ipsa servavit Antiquitas.* Secundò, ex tua concessione Nam cap. 10. n. 3. sic scribis: *Ecclesia semper vel ab ipsis ipsius incunabulis, ut mox ostendam, in suis ministris plurimum amavit, commendavit, & etiam interdum præcepit continentiam.* Et n. 9. ais, *fuisse decretum communetotius Ecclesiæ.* Nec opus est pluribus in re clara.

19. QUINTA CONCLUSIO. Subsecutæ sunt varieg leges Ecclesiasticæ, quibus eadem conti-

continentia Ministris Ecclesiæ imperata est. Et quidem dupliciter. Primò, ut non liceat illis uxores ducere, post susceptos ordines. Secundò, ut si ante susceptos ordines duxerint uxores, & postea susceperint ordines, non liceat uti uxoribus, sed debeant perpetuam seruare cōtinentiam. Huiusmodi leges latæ sunt hoc ferè ordine. Primò à Concilio Elibertino (Anno Christi 313. aut 315. can. 33. *Placuit in totū prohibere Episcopis, Presbyteris, Diaconis, ac Subdiaconis positis in ministerio, abstinere se à conjugibus suis, & non generare filios. Quod quicumque fecerit, ab honore clericatus exterminetur.* (tom. 1. concilior.)

20. Secundo à Concilio Carthagenensi secundo circa annum Christi 396. can. 2. *Om-nibus placet, ut Episcopi, Presbyteri & Diaconi, vel qui Sacramenta contrectant, pudicitia custodes, etiam ab uxoribus se abstineant. Et ratio additur: Ut quod Apostoli docuerunt, & ipsa servauit Antiquitas, nos quoque custodiamus.* (tom. 1. concil.)

21. Tertiò, à Siricio Papa, (circa idē tempus) in Epistola ad Himerium Tharaconensem Episcopum cap. 7. *Plurimos Sacerdotes Christi atque Levitas, post longa consecrationis sue tempora, tam de conjugibus propriis, quam etiam de turpi coitu, sobolem didicimus procreasse, & crimen suum hac prescriptione defendere, quia in veteri testamento Sacerdotibus ac ministris generandi facultas legitur attributa. Ecce, vocat crimen, quòd Sacerdotes Christi utantur proprijs uxoribus. Et illorum defensionem mox*

refutat, asserens, Sacerdotes in veteri testamento habuisse etiam legem continentiae pro eo tempore, quo ministrabant in templo (verba illius §. 6. adducta sunt) ac deinde subiicit: *Quarum sanctionum Sacerdotes omnes atque Levita insolubili lege constringimur, ut à die ordinationis nostrae, sobrietati ac pudicitiae, & corda nostra mancipemus & corpora* Hic habes legem pudicitiae corporis, qua Sacerdotes constringuntur. Audi etiam poenam, si hanc legem non servent. *Hi verò, (pergit Siricius) qui illiciti privilegij excusatione nituntur, & sibi asserunt veteri hoc lege concessum, noverint se ab omni Ecclesiastico honore, quo indignè usi sunt, Apostolica Sedis auctoritate dejectos, nec unquam posse veneranda atrectare mysteria* (tom. I. concilior.)

22. Quartò, ab Innocentio I. (circa annum Christi 400.) in epist. ad Exuperiũ, c. I. ubi repetit & confirmat legem à Siricio latam, his verbis: *Proposuisti, quid de his observari debeat, quos in Diaconij ministerio, aut in officio Presbyterij positos, incontinentes esse aut fuisse, generati filij prodiderunt. De his, & divinarum legum manifesta est disciplina, & beata recordationis viri Siricii Episcopi monita evidentia commearunt, ut incòtinentes in officiis talibus positi, omni Ecclesiastico honore privarentur, nec admitterentur accedere ad ministerium, quod sola còtinentia oportet impleri. Est n. vetus admodum sacra legis auctoritas, jam inde ab initio custodita, quòd in templo, anno vicis suae habitare precepti sunt Sacerdotes, ut servientes sacris oblationibus puros & ab omni labe purgatos, sibi*



sibi vendicent divina ministeria, neq; eos ad sacrificia fas sit admitti, qui exercent vel cum uxore carnale consortium &c. (tom. 1. concil.)

23. Quintò, à Concilio Agathensi (Anno Christi 506.) can. 9. *Placuit etiam, ut si Presbyteri vel Diaconi conjugati, ad thorum uxorum suarum redire voluerint, Papa Innocentij ordinatio, vel Siricij Episcopi autoritas, quæ est his canonibus inserta, seruetur.* (tom. 2. concil.)

24. Sextò, à Concilio Aurelianensi tertio (An. Christi 537.) can. 7. *Clerici vero, qui cum uxores non haberent, benedictione suscepta, conjugia crediderint eligenda, qui volentes abjg, ulla reclamatione in astate fuerint legitima ordinati, cum ipsis mulieribus, quas acceperint, excommunicatione percellantur.* (tom. 2. concil.)

25. Septimò, à Cōcilio Aurelianensi quarto (Anno Christi 547.) can. 17. *Ut sacerdotes siue Diaconi, cum conjugibus suis non habeant communem lectum & cellulam, ne propter suspicionem carnalis consortij, religio maculetur. Quod qui fecerint, juxta priscos canones ab officio regradetur.* Omitto reliquos canones & decreta, quæ posterioribus seculis statuta sunt. Omitto testimonia sanctorum Patrum, quæ habentur apud Bellarminum & Coccium.

26. **SEXTA CONCLUSIO.** Lex continentiae seu cœlibatus, de qua hætenus dictum est, semper viguit in Ecclesia Occidentali [nisi quod in quibusdam forte locis particularibus aliquantulum fuerit neglecta, vt notat Gabriel Vazquez 3. par. disp. 248. cap. 2.] At in o-

rientali non item. Nam Græci, tametsi post susceptos ordines non soliti sint uxores ducere; tamen si antea duxerint, possunt ordines suscipere, & simul uxores retinere. Nec tenentur ab earum consortio abstinere, nisi tempore vicis suæ, sicut in veteri testamento factum est. Hæc illorum consuetudo, in qua differunt ab Occidentalibus, cepit à tempore sextæ Synodi generalis (aut circiter) & huc usque perseverat. Vide Vasquez ibidem.

27. Venio nunc ad tuas falsitates & contradictiones. Primo asseris in titulo cap. 10. *Sacerdos Ministros ad cælibatum jure non teneri*. Falsum est, quia tenentur jure Ecclesiastico, quod in supradictis canonibus sancitum est. Deinde tibi ipsi contradicis. Nam in eodem capite n. 3. expressè dicis, *Ecclesiam præcepisse continentiam*. Et hoc præceptum Ecclesiæ (n. 9.) vocas *commune decretum totius Ecclesiæ*.

28. Secundo asseris (cap. 10. n. 16.) *sextam Synodum, hoc est, Patres Trullanos permittere Presbyteris uxores*. Falsum est. Nam sexta Synodus nullos canones aut decreta promulgavit. Synodus a. Trullana, quam tu confundis cum sexta synodo, post sextam synodum celebrata est in palatio Imperatoris Justiniani, quod Trullum dicebatur. Sed non fuit legitima.

29. Tertio asseris (c. 10. n. 19.) *Siricium Papam commendasse quidem clericis continentiam, non tamen præcepisse*. Falsum est. Nam & præcepit continentiam, & pœnam constituit ijs qui præceptum continentiae non servant. Utrumque colli-

colligitur ex verbis illius suprà citatis. Nā præceptum continetur illis verbis: *Quarū sanctio-  
num Sacerdotes omnes atq; Levita insolubili lege  
constringimur. Pœna verò illis: Noverint se ab  
omni Ecclesiastico honore dejectos.*

30. Quarto asseris (c. 10. n. 23.) *absolutam  
& perpetuam continentiam primum omnium in-  
dictam esse presbyteris & Diaconis conjugatis à Cō-  
cilio Agathensi, can. 9. Falsum est. Nam Conci-  
lium Agathense, canone citato, proficitur, te  
id statuere, quod jam antea à duobus Pontifi-  
cibus, Siricio & Innocentio fuerat statutum.  
Sic enim loquitur: Placuit etiam, ut si Presbyteri  
vel Diaconi conjugati ad thorum uxorum suarum  
redire voluerint, Papa Innocentij ordinatio, vel Si-  
ricij Episcopi autoritas, qua est his canonibus inser-  
ta, servetur.*

31. Quinto asseris (n. 10. n. 35.) *in Occidenta-  
li Ecclesia multas esse expressas leges, qua præcipi-  
unt plenam & absolutam continentiam. Rectè  
quidem. Sed contrarium dicis n. 70. asserens,  
tam in Occidente, quàm in Oriente, Presbyteris li-  
berum mansisse, ut, qui possent capere, caperent.*

32. Sexto asseris (ibidem) *in Orientali Ec-  
clesia, nullam esse legem, aut decretum, aut consti-  
tutionem Ecclesiasticam, sive universalem, sive  
provincialem, qua præcipiat plenam & absolutam  
continentiam. Contrarium dicis alibi. Nam n.  
12. sic habes: Græci Patres, initio satagerunt, ut  
Diaconi cælibes tantum, hoc est, non uxorati, &  
sub promissione castitatis ac cælibatus, ad Diacona-  
tus gradum proveherentur. Sic enim statuit Ancy-  
rana*

*rana synodus. Et n. 16. Concilium Neocasariense statuit, ne Presbyter uxorem ducat. Et n. 29. circa controversiam est, quod Ecclesia Græca neque diffitetur, neque servare respuit, v. delictet nemini in sacris ordinibus constituto, licere uxorem ducere. Et ibidem: Sed in eo convenimus, quoad Episcopos, ut si conjugatus ad Episcopatum ascendat, omnino ab usu uxoris cesset, et se penitus contineat. Et n. 73. Si leges Ecclesiasticas, totius Ecclesie universalis antiquas, nec non antiquum usum earum, tam Occidentis quàm Orientis spectes; nemini in sacris Ordinibus, à Subdiaconatu & supra constituto licere uxorem ducere, si sit in gradu Ecclesiastico retinendus. Id enim constanter servavit & servat Ecclesia universalis, Græca pariter ac Latina.*

33. Septimo asseris (cap. 10. n. 49. in fine) *Ecclesiasticas leges, quæ præcipiunt cælibatum, ponere hominibus laqueum. Fallum est. Non ponunt laqueum, sed exigunt eam sanctitatem & castimoniam à sacerdotibus, quæ ipsorum officio consentanea est. Deinde injuriam facis illis omnibus, qui hujusmodi leges statuerunt. Et quis es tu, qui tot pontificum & Conciliorum decreta audes accusare & traducere? Tu potius laqueum ponis, qui conaris sacerdotibus persuadere, non teneri ipsos ad continentiam, sed potius uxores ducere, & contra leges Ecclesiasticas in matrimonio vivere. Similis illi qui persuadebat primis patribus, ut contra legem divinam comederent de ligno scientiæ boni & mali, adiiciens: Nequaquam moriemini.*

34 Octauo asseris (n. 65.) *Ecclesiam non posse statuere legem, qua certo hominum statui generatum adimat libertatem contrahend: matrimonium.* Verum quidem est, quòd absolutè loquendo non possit hoc facere: Sed falsum est, quòd non possit hoc facere, eo modo, quo nunc facit, nempe sub hac conditione: Si quis velit esse Presbyter aut Episcopus, debet servare continentiam. Nam per huiusmodi legem, non cogit hominem ad continentiam, sed relinquit unicuique liberum, ut possit amplecti statum Ecclesiasticum, vel non amplecti; & consequenter, ut possit uxorem ducere, vel non ducere, prout placuerit. Deinde, tibi ipsi contradicis. Nam n. 73. asseris, *leges Ecclesiasticas totius Ecclesia universalis, quæ cælibatum præcipiunt, posse abrogari per contrariam consuetudinem.* Ergo supponis huiusmodi leges, antequam abrogentur, receptas esse & obligare.

35. Nono asseris (n. 70.) *Episcopos olim si conjugati essent in sui promotione, cessasse quidè in posterum ab opere nuptiarum; non tamen cessasse ex religione aut cautione, quasi putarent id eis minime jam licere; sed ex devotione & amore perfectioris cujusdam puritatis.* Falsum est, ut patet ex Siricio Papa, qui, ut supra dixi, ait crimen esse, si Episcopi aut Presbyteri conjugati utantur propriis uxoribus. At non esset crimè, si liceret illis uti. Deinde tibi ipsi contradicis. Nam paulò ante dicebas: *In eo convenimus, quoad Episcopos, ut si conjugatus ad Episcopatum ascendat, omnino ab usu uxoris desset, & se penitus contineat.*

*An votum continentiae sit annexum  
sacro ordini?*

1. **T**U negas lib. 2. c. 11. n. 1. & trib. sequent. Ratio est, quia votum est promissio Deo facta: At promissio est actus perfectè liber & voluntarius in promittente. Huiusmodi autè actus non potest esse annexus sacro ordini, qui est externa tantùm ceremonia. Non enim Ecclesia potest efficere, ut externa ceremonia necessario annexum habeat meum liberum & voluntarium actum, quo Deo promittam continentiam. Potest quidem exigere à me, ut huiusmodi actum eliciam; sed non potest efficere, ut huiusmodi meus actus per se sit annexus externae ceremoniae.

2. Frustra laboras, Antoni. Nos non dicimus, huiusmodi actuale & expressum votum annexum esse sacris ordinibus. Solùm asserimus, Clericos ex praecepto Ecclesiastico obligatos esse ad continentiam. Hanc obligationem, quatenus per praeceptum Ecclesiae annexa est sacris ordinibus, vocamus votum continentiae: Non quidem explicitum & expressum, de quo tu loqueris, sed quasi implicitum ac virtuale. Nam is, qui scit huiusmodi obligationem requiri ab eo, qui vult sacros ordines suscipere; certè, si liberè suscipit sacros ordines, censetur etiam liberè consentire in obligationem continentiae, quae illis annexa est. Sicut is, qui liberè adit hereditatem, cui scit anne-

xum esse onus restitutionis; censetur etiam libere suscipere hujusmodi onus.

3. Sed objicis: *Hujusmodi votum, quale jam descriptum est, non obligat coram Deo, si non adsit internus animus votendi, quod sæpè fit; sed solum præsумitur obligare. Ac proinde, qui susciperet sacros ordines sine interno actu votendi continentiam, non esset obligatus ad continentiam, sed posset uxorem ducere.* Respondeo. Verum est, votum non obligare, si non adsit internus actus votendi. Qui autem susciperet sacros ordines sine interuo votendi actu, tamen si non obligaretur ad continentiam vi voti, quod nullum esse supponitur; obligaretur tamẽ vi præcepti Ecclesiastici, quod præcipit continentiam, ac proinde non posset uxorem ducere.

4. Iterum objicis: *Multi olim invitati ad Episcopatum vel Presbyterium pertractati sunt, ut Ambrosius, Augustinus, Paulinus, & alij. Ergo illi saltem non habuerunt internum actum liberum & voluntarium servandi perpetuam continentiam.* Respondeo. Non sequitur. Nam licet non libenter admiserint Episcopatum vel Presbyterium, id tamen non fecerunt, quòd invitati servarent continentiam (quam post susceptos ordines servarunt libentissimè) sed quòd invitati susciperent eam dignitatem, qua putabant se indignos esse. Est igitur duplex voluntas hîc distinguenda. Una suscipiendi dignitatem Ecclesiasticam: Altera servandi continentiam, quæ cum illa dignitate connexa est. Hæc posterior potest esse prompta

prompta & expedita, tametsi prior sit aliquo modo, ut sic dicam, coacta vel extorta. Simile est de eo, qui invitus suscipit officium Regis vel Imperatoris, quia putat se tanto oneri imparem esse; & tamen paratus est subire laborem, qui tali officio annexus est.

#### CAPUT QUARTUM:

*An votum continentie, quod sacris ordinibus annexum est, dirimat matrimonium.*

1. **H**Oc dupliciter potest intelligi. Primò de obligatione servandi continentiam, quæ per legem Ecclesiasticam annexa est sacris Ordinibus, de qua dictum est præcedenti capite. Secundò, de voto expresso, quo quis liberè & voluntariè promittit Deo perpetuam continentiam, quando suscipit sacros ordines. Est igitur quæstio, An vel hoc votum, vel ista obligatio sit impedimentum, quod dirimat subsequens matrimonium? Utrumq; negas, li. 2. c. 11. n. 8. & seqq. Et probas duplici potissimum argumento.

2. Primò, quia pœnæ Ecclesiasticæ, quæ olim statutæ sunt in eos, qui post susceptos ordines contrahunt matrimonium, sunt tantum pœnæ depositionis à ministerio, vel excommunicationis. Nec in tota antiquitate reperire est ullum testimonium Patrum aut Conciliorum, quo hujusmodi matrimonia declarantur



rentur irrita & invalida. Quod confirmas varijs exemplis.

3. Secundò: Votū simplex non dirimit matrimonium: Ergo nec votum solenne, quia solennitas seu publica professio nihil addit voto simplici. Hoc confirmas ex Apostolo 1. Tim. 5. 11. *Adolescentiores viduas devita. Cum enim luxuriatae fuerint in Christo, volunt nubere: habentes damnationem, quia primam fidem irritam fecerunt* Si inquis, matrimonium, quod hujusmodi viduae, post solenne votum castitatis contrahabant, fuisset irritum, non dixisset Apostolus, *Volunt nubere, sed, Volunt scortari*. Hic addis auctoritatem Patrum & Conciliorum.

4. Respondeo Quæ adfers de voto solenni, quo quis liberè & voluntariè, promittit Deo perpetuam continentiam, capite ultimo discutienda sunt, ubi de Monachis disputandum est. Ibi ostendam, votum solenne, non solum impedire, quod tu concedis; sed etiam dirimere matrimonium, quod tu negas. Reliqua, quæ pertinent ad obligationē continentiae, quæ per præceptum Ecclesiasticum sacris ordinibus annexa est, hoc loco examinanda sunt, De quibus sic sentio.

5. PRIMA CONCLUSIO. Matrimonium, quod olim contrahebant clerici in sacris ordinibus constituti, erat quidem validū, sed tamen illicitum. Hoc concedis. Et quidem, quod fuerit validum, ex eo patet, quia in antiquis conciliis & canonibus nulla lex lata est, quæ declararet irritum & invalidum esse.

Y

Huc

Huc spectat primum Argumentum quod attulisti. Quod autem fuerit illicitum, ex eo constat, quia jure Ecclesiastico erat prohibitum. Quidquid autem lege Ecclesiastica prohibitum est, illicitè fit.

6. SECUNDA CONCLUSIO. Matrimonium, quod nunc contrahunt clerici in sacris ordinibus constituti, non solum est illicitum, sed etiam irritum & invalidum. Hoc posterius tu negas. At ego probo, quia nunc lata est lex Ecclesiastica, quæ hujusmodi matrimonium declarat esse irritum & invalidum, ut patet ex jure canonico, cap. *Ut lex.* 27. q. 1. Et ca. unico, de voto, in 6. & in Concilio Tridentino Sess. 24. can. 9. Et ratio est, quia sicut Princeps Secularis potest ferre legem, qua decernat personas esse inhabiles ad civiliter contrahendum; ac proinde, si tales personæ præsumant contrahere, contractum illorum esse irritum & invalidum: Sic etiam potest Ecclesia statuere legem Ecclesiasticam, qua decernat certos homines esse inhabiles ad contractum matrimonij; ideoq; si præsumant contrahere, contractum esse nullum. Et re ipsa id facit. Decernit n. eos inhabiles esse, qui clandestinè contrahunt, sine parochio & testibus; qui in certo gradu cognationis aut affinitatis contrahunt; qui in sacris ordinibus constituti contrahunt: ac proinde si præsumant contrahere, matrimonium esse invalidum.

7. Objicies fortè, quod solet objici, *legem Ecclesiasticam non posse derogare juri naturali.* At  
jus

*Jus naturale concedit hujusmodi matrimonia, de quibus jam dictum est: Ergo lex Ecclesiastica non potest illa facere irrita & invalida. Respondeo. Jus naturale quædam præcipit vel prohibet; quædam libera permittit. Igitur lex Ecclesiastica non potest derogare jure naturali, in ijs, quæ præcepta aut prohibita sunt. Potest tamen derogare, vel potius certi aliquid determinare in ijs, quæ libera permilla sunt. Verbi gratia. Jus naturale præcipit charitatem, temperantiam, justitiam: prohibet furtum, adulterium, homicidium. In his non potest lex humana derogare juri naturali. Rursum: jus naturale permittit liberum usum rerum externarum, ut agrorum, fluminum, montium, fructuum, avium, piscium, pecorum: Et hoc sensu dici solet, jure naturali, omnia esse communia. At lex humana tollit hanc communitatem, & introducit divisionem ac proprietatem rerum, ut liceat mihi dicere: Hic ager est meus, non tuus; & sic deinceps. Idem facit Ecclesia circa matrimonium. Jus naturale permittit liberum contractum matrimonij in multis casibus. At lex Ecclesiastica in quibusdam tollit hanc libertatem. Et determinat certos gradus, in quibus non liceat contrahere: Determinat certa impedimenta, quæ dirimant matrimonium. Inter quæ impedimenta, est sacer*  
*Ordo clericorum. Sed de hoc*  
*alibi latius.*

*An sacer Ordo sit Sacramen-  
tum.*

I. **I**N sacro Ordine duo spectanda sunt. Primò, externa actio, qua ordinantur ministri Ecclesiæ. Quæ vocari solet sacra ordinatio. Secundò, interna potestas, quæ confertur per externam actionem. Quæ vocari solet potestas Ordinis. Alij vocant charactrem Ordinis. Augustinus, ut infra videbimus, vocat jus dandi Baptismum. Hoc posito, quæstio est, *An sacer Ordo sit Sacramentum?* Quod etiam dupliciter potest intelligi. 1. An ordinatio sit actio Sacramentalis? 2. An potestas Ordinis sit proximus effectus Sacramentalis, proueniens ex actione Sacramentali? Tunegas lib. 2. cap. 4. Catholici affirmant. Tibi patrocinaur Lutherani & nonnulli Calvinistæ: Nobis Scriptura, & Consensus Ecclesiæ. Unde duplex sumi potest argumentum.

2. Primum est: Tria requiruntur & sufficiunt ad Sacramentum novæ legis, ut Catholici & aduersarij fatentur. 1. Externa ceremonia, vel ritus, vel signum, vel symbolum: quæ omnia idem valent. 2. Institutio Christi. Nam externa ceremonia non est apta pro Sacramento, nisi à Christo sit instituta vel deputata. 3. Promissio gratiæ; quæ debet esse annexa externæ ceremoniæ à Christo institutæ.

tutæ. Nam Christus in institutione Sacramenti, solet promittere gratiam illis omnibus, qui digne & legitime usurpant externam ceremoniam, ab ipso institutam. At hæc tria reperiuntur in sacra ordinatione, ut patet ex Scriptura, 1. Timoth. 4. 14. *Noli negligere gratiam, quæ data est tibi per Prophetiam cum impositione manuum Presbyterij.* Et 2. Timoth. 1. 6. *Admoneo te, ut resuscites gratiam Dei, quæ est in te per impositionem manuum mearum.* Ubi aperte fit mentio gratiæ, quæ datur Ministris Ecclesiæ per impositionem manuum, tanquam per externam ceremoniam à Christo institutam. Nam illa ceremonia non potest institui ab Apostolis, quia illi non habebant potestatem instituendi ceremoniam, per quam gratia infallibiliter conferretur legitime accedentibus.

3. Accedit consensus Ecclesiæ. Qui colligi potest ex duplici capite. Primo ex Augustino lib. 2. contra Parmenianum, cap. 13. Ubi disputans contra Donatistas asserentes, Baptismum quidem non amitti per hæresin, sed tamen sacrum Ordinem amitti, sic scribit: *Nam illud, quod quidam eorum veritate convicti dicere cæperant. Baptismum quidem non amittit, qui recedit ab Ecclesia, sed jus tamen dandi amittit: multis modis apparet frustra & inaviter dici. Primò, quia nulla ostenditur causa, cur ille, qui ipsum Baptismum amittere non potest, jus dandi amittere possit. Utrumque enim Sacramentum est: & quadam consecratione utrumq; homini datur:*

*illud, cum baptizatur, istud, cum ordinatur: ideoque in Catholica Ecclesia utrumque non licet iterari. Hæc postremam partem probat ex praxi Catholicorum; quia sicut is, qui recedit ab Ecclesia Catholica, & postea ad eam redit, non solet iterum baptizari; ita etiam non solet iterum ordinari. Et postea subjicit: Sed si nos male facimus, ipsi explicent, quomodo Sacramentum baptizati non possit amitti, & sacramentum ordinati possit amitti: quoniam dicunt Recedens ab Ecclesia, Baptismus non amittit, jus dandi tamen amittit. Si enim utrumque Sacramentum est, quod nemo dubitat, cur illud non amittitur, & illud amittitur? Neutri Sacramento injuriâ faciendâ est.*

4. Hic tria asserit Augustinus. 1. Sacrum Ordinem esse Sacramentum. 2. Non minus esse Sacramentum, quàm Baptismum. 3. Neminem dubitare de hac re. Unde sequitur, quod mihi probandû est, omnes fideles, quotquot vixerunt tempore Augustini, certò credidisse, sacrum Ordinem esse verum Sacramentum, sicut Baptismus est. Cur igitur & tu non credis, Antoni? Cur à communi consensu Catholicæ Ecclesiæ temerè recedis? Nimirum, ostendis te Apostatam ac hæreticum esse: Et quidem deteriorem, quàm erant Donatistæ, qui in isto articulo à Catholicis non dissentiebant. Tametsi enim putarent, hoc discrimen esse inter Baptismum & Ordinem, quòd Baptismus amitti non possit. Ordo autem amitti possit; fatebantur tamen utrumque esse verum Sacramentum.

5. Idem Ecclesiæ consensus colligitur ex Concilijs. Primo ex Concilio Chalcedonen- si (quod fuit unum ex quatuor primis genera- libus & Occūmenicis,) act. 15. can. 2. Ubi sta- tuit pœnam in Episcopos, qui accipiunt pec- uniam pro ordinatione Clericorum. Ratio- nem addit; quia censentur vendere gratiam Dei, quæ vendi non potest. Supponit ergo gratiam Dei conferri per sacram Ordinationem, ac proinde sacram Ordinationem esse Sacramentum. Idem facit Concilium Brac- carense 2. can. 3. his verbis: *Placuit de ordinatio- ne Clericorum, Episcopi munera nulla accipiant, sed sicut scriptum est, quod gratis donante Deo acci- piunt, gratis dent. Non aliquo precio gratia Dei, & impositio manuum venundetur.*

6. Deinde ex Concilio Florentino & Tri- dentino, ubi sacer Ordo expressè numeratur inter septem Sacramenta novæ legis. Nec ob- stat, quod tu impudenter objicis; *Hæc duo Con- cilia non fuisse legitimè celebrata; non fuisse gene- ralia; non fuisse à tota Ecclesia acceptata & appro- bata; fuisse in multis ex diametro antiquis Ecclesiæ Concilijs contraria.* Mera hæc calumnia est: eo- que major & intolerabilior, quòd in tui crea- tione ad Archiepiscopatum Spalatensem, cū juramento promiseris receptionem Concilij Tridentini, ut bene notant Theologi Colo- nienfes in sua censura.

7. Sed audiamus, quid à communi Ec- clesiæ sententia pertraxeritis in errorem Lu- theranorum. Præcipua argumenta, quæ ad

fers, sunt quatuor. Primum est: Si Ordo est Sacramentum imprimens characterem, indelebilem, sicut Baptismus, debent illi convenire hæc tria. 1. ut semper sortiatur suum primū & proximum effectum in quocunque homine, quantumvis fictè & indignè accedente, id est, ut cuicunque accedenti conferat potestatem Ordinis. 2. ut qui semel ordinatus est, & accepit potestatem Ordinis, nunquam possit illam amittere. 3. ut semper valide possit ea uti, etiamsi indignè utatur. At hæc tria non conveniunt sacro Ordini: Ergo sacer Ordo non est Sacramentum. Minorem probas auctoritate Cypriani, Dionysij Arcopagita, Hieronymi, Gelasij, Augustini, Leonis, & aliorum Patrum, de quibus sigillatim dicendum est.

8. Ex Cypriano lib. 1. epistol. 4. citas hæc verba: *Sollicite ac religiose considerantes in ordinationibus Sacerdotum, non nisi immaculatos & integros Antistites eligere debemus, qui dignè & sanctè Deo sacrificia offerentes, audiri in precibus possint, quas faciunt pro plebis Dominica incolumitate, cum scriptum sit: Deus peccatorem non audit, sed si quis Deum coluerit, & voluntatem ejus fecerit, illum audit. Propter quod plena diligentia, & exploratione sincera, oportet eos ad Sacerdotium deligi, quos à Domino constat audiri. Nec sibi plebs blandiatur, quasi immunis à contagione delicti esse possit, cum Sacerdote peccatore communicans, & ad injustum & illicitum prepositi sui Episcopatum, consensum suum commodans: cum per Oseam Prophetam comminetur, & dicat censura divina:*

*Sacri-*



*Sacrificia eorum, tanquam panis luctus, omnes qui manducant ea, contaminabuntur. Docens scilicet & ostendens, omnes omnino ad peccatum constringi, qui fuerint prophani & iniusti Sacerdotis sacrificio contaminati. Quod idem in Numeris manifestari invenimus, quando Chore, Dathan, & Abiron, contra Aaron Sacerdotem sacrificandi sibi licentiam vendicaverunt.*

9. Ex hoc loco Cypriani sic argumentaris: Si Ordo, esset Sacramentum tale in suo genere, qualis est Baptismus, jam Sacerdos etiam indignissimus, eo initiatus, sacrificium legitimum & sanctum conficeret, At non conficit ex sententia Cypriani. Primò, quia Cyprianus dicit, panem ab eo consecratum, esse panem luctus. Secundò, dicit plebem ab huiusmodi sacrificijs debere abstinere: & nisi abstineat, contaminari. Tertiò, confert Episcopum indignè ordinatum cum Chore, Dathan, & Abiron, qui non fuerunt Sacerdotes, sed meri usurpatores officij Sacerdotalis.

10. Resp. Malè interpretaris Cyprianum. Erat illi proposita quæstio, an liceret plebi communicare cum Martiale & Basilide Episcopis, qui peccato idololatriæ & alijs facinoribus erant contaminati? Aliqui affirmabant; alij negabant. Respondet Cyprianus, non licere. Et ex hac occasione, simul explicat, quales debeant esse Episcopi ac Sacerdotes, ut à Deo exaudiantur. Hoc posito, facile diluuntur, quæ objicis. Ac primò, non dicit Cypria-

nus, panem ab Episcopo consecratum esse panem luctus, ut tu falso illi affingis; sed citat testimonium Osee Prophetæ cap. 9. v. 4. ubi de Israelitis, qui falsos Deos adorabāt, sic loquitur: *Non libabunt Domino vinum, & non placebunt ei. Sacrificia eorum, quasi panis lugentium: Omnes, qui comedent eum, contaminabuntur: quia panis eorum anima ipsorum, non intrabit in domum Domini.*

11. Sensus huius loci consistit in duabus propositionibus. Una est: panis lugentiū, qui reperitur in domo alicujus mortui, secundum legem Moyseicam, immundus & contaminatus est, & qui comedunt talem panem, sunt etiam immundi & contaminati (Num 19. 14.) Altera: sicut panis lugentium mortuum contaminatus est; sic etiam sacrificia & libamina populi Israelitici contaminata sunt. Et sicut illi, qui comedunt de pane lugentium mortuum, fiunt immundi & contaminati; sic etiam, qui comedunt de sacrificijs, & bibunt de libaminibus populi Israelitici, fiunt immundi & contaminati. Scis causam Antoni. Nam populus Israel, tempore Osee Prophetæ, ex vna parte agnoscebat verum Deum, & ex altera colebat falsos Deos, iuxta illud 3 Reg. 18. 21. *Usquequo claudicatis in duas partes? Si Dominus est Deus, sequimini eum; Si autem Baal, sequimini illum.* Sacerdotes autē tamen si offerret sacrificia, sub prætextu colendi Deum, non tamen legitimè offerebant, ex triplici defectu. Primo, quia claudicabant in duas partes, ut dixi.

Secun-

Secundò, non offerebant ad honorem Dei, sed ad propriam utilitatem: nimirum, ut ex vino, pane, & pecoribus, quæ populus in sacrificium illis dabat, possent bibere & epulari. Et hoc est, quod dicit Oseas loco citato: *panis eorum, anima ipsorum.* Tertiò, non offerebant Hierosolymæ in templo, qui locus erat designatus pro sacrificijs, sed alibi, contra expressum Dei mandatum. Et huc spectat illud Osee: *Non intrabit in domum Domini.* Igitur ex hoc triplici defectu, sacrificia eorum non placebant Deo, sed censebantur immunda & contaminata: & qui comedebant ex illis, fiebant etiam immundi & contaminati, quatenus erant participes peccati.

12. Ex hac duplici propositione, altera de pane lugentium, altera de sacrificijs Israelitarum, deducit Cyprianus tertiam propositionem, quæ est huiusmodi: Sacrificium, quod offerunt Martialis & Basilides Episcopi, non placet Deo, ex parte offerentium; quia ipsi sunt peccato idololatriæ; & alijs flagitijs contaminati: & populus, qui sponte communicat cum huiusmodi Episcopis, quos scit esse flagitiosos, fit particeps peccati illorum, præsertim cum possit habere bonos Episcopos, si vellet. Et per hanc propositionem respondet ad quæstionem, quæ illi erat proposita. Dixi, *ex parte offerentium*, quia ex parte rei oblata est alia ratio. Nam si Martialis & Basilides offerebant verum sacrificium Eucharistiæ secundum ritum Catholicorum, & institutionem

tionem Christi; non poterat esse defectus ex parte rei oblatæ, sed tantum ex parte offerentium, qui erant indigni propter peccatum idololatriæ. Et similiter populus non poterat contaminari ex eo præcise, quia erat particeps illius sacrificij, oblatis, sed quia erat particeps peccati offerentium.

13. Quod addis, Cyprianum conterre Episcopos indignè ordinatos cum Chore, Dathan & Abiron, qui non erant Sacerdotes, sed usurpatores officij sacerdotalis, distinguendum est. Confert illos quoad peccatum, non quoad potestatem. Nam sicut Chore, Dathan, & Abiron, in eo peccabant, quod indignè ambi-  
rent Sacerdotium: sic mali Episcopi in eo peccant, quod indignè accipiunt Sacerdotium. At in eo differunt, quòd illi, tametsi ambi-  
rent Sacerdotium, non tamen adepti sunt, ac proinde non habebant potestatem sacrificandi. Hi vero non solum ambiunt, sed etiam impetrant sacerdotium; ideoque habent potestatem Ordinis, tametsi indigne accipiant, & indignè utantur. Hæc sufficiant de primo Cypriani testimonio.

14. Secundò, ex eodem Cypriano lib. 4. epist. 2. post medium, citas hæc verba: *Episcopatum tenere nō posset, etiamsi Episcopus prius factus, à Coepiscoporum suorum corpore, & ab unitate Ecclesie desisceret, cum Apostolus admoneat: ut inuicem nosmetipsos sustineamus, nec ab unitate, quam Deus constituit, recedamus, & dicat: Sustinentes inuicem in dilectione, satis agentes servare unitatem*

tem Spiritus, in conjunctione pacis. Qui ergo nec unitatem Spiritus, nec conjunctionem pacis observat, & se ab Ecclesie vinculo, atque à Sacerdotum collegio separat, Episcopi nec potestatem potest habere, nec honorem, qui Episcopatus nec unitatem voluit tenere, nec pacem. Hinc infero, potestatem Ordinis separari posse ab Episcopo legitimè ordinato, si fecerit schisma.

15. Resp. Non loquitur de potestate Ordinis, sed jurisdictionis. Nam potestas Ordinis amitti non potest, ut expressè docet Augustinus lib. 2. contra Parmenianum, c. 13. Ratio Augustini est, quàm superius attigi, quia sicut Episcopus, qui recedit ab Ecclesia, & postea redit, non solet iterum baptizari; sic etiam nō solet iterum ordinari: Ergo signum est, quod sicut Baptismum non amisit; ita nec sacrum Ordinem amisit.

16. Quod si contendas Cyprianū putasse, potestatem Ordinis auferri posse ab Episcopo per hæresin: Jam contendis illum errasse cum Donatistis, quos loco citato refutat Augustinus. Dicebāt Donatistæ, Baptismum à Sacerdote vel Episcopo hæretico collatum, nō esse validum. Ut defenderēt hunc errorem, assu-  
mebant alium, nempe Sacerdotem vel Episcopum, quando sit hæreticus, amittere potestatem Ordinis, & ideo non posse validè baptizare: ac proinde, qui ab illo baptizati essent, ab alio Catholico rebaptizari oportere. Vide ne injuriam facias & Cypriano, & tibi ipsi. Cypriano quidem, si dicas illum errasse cum Do-  
nati-

natistis. Tibi, si asseras potestatem Ordinis à te ablatam esse, quando separasti te ab unitate Ecclesiæ; & Schisma, non dico Anglicanū, sed Antonianum amplexus es, quod ab Anglicano diversum est.

17. Tertiò ex Dionysio Areopagita in epist. ad Demophilum citas hæc verba: *Quod si Sacerdotum Ordo illustrandi vim habet, profectò penitus abhorret à Sacerdotum Ordine atque facultate, is, qui illustrandi vi non est præditus, ac multo magis etiam is, qui illustratus non est. At mihi quidem videtur audax & temerarius, si quis ea sibi sumat, qua sunt propria Sacerdotum, neq. metu & pudore à divinarum tractatione præter captum ac meritum deterreatur, putatque Deum ignorare, qua ipse sibi est conscius, & sperat se decepturum eum, qui à se falso nomine appellatur Pater, audetq. scelestus suas, ut ita dicam, maledictiones, (neque enim preces dixerim) in divinis mysteriis, Christi imitatione proferre. Non est iste Sacerdos, non est, sed inimicus fallax, irrisor sui, lupusque in gregem Domini ovina pelle armatus. Unde infers, hominem imperitum non esse capacem Sacerdotij; ac proinde, etiam si ordinetur, non tamen fieri verè Sacerdotem.*

18. Respondeo. Pervertis sensum Dionysij. Non enim absolute asserit, homines imperitos, etiam si ordinentur, nullo modo fieri Sacerdotes; sed non fieri tales, quales esse oporteret. Quod verissimum est. Sicut etiam Apostolus, (1. Tim. 3. 1.) non absolute asserit, nullū fieri Episcopum, nisi irreprehensibilem, sobrium,

brium, prudentem, ornatum, pudicum, hospitalem, doctorem: Sed ait huiusmodi qualitates seu virtutes requiri in Episcopo, si suo officio debeât satisfacere. Igitur duo spectanda sunt in Sacerdote. 1. Potestas Ordinis. 2. Sufficiens dispositio ad exercitium illius potestatis. Qui utrumque habet, perfectus Sacerdos est: qui prius tantum sine posteriori, Sacerdos quidem est, non tamen in suo genere perfectus. Et hoc sensu intelligendus est Dionysius.

19. Quartò adducis Hieronymum (in cap. 1. epist. ad Galat.) asserentem, promotos ad Sacerdotium modis illegitimis, non esse verè ordinatos. Verba Hieronymi sunt hæc: *Tertium Apostolorum genus, quod ab homine, non à Deo, est, cum hominū favore & studio aliquis ordinatur: ut nunc videmus plurimos, non Dei iudicio, sed redempto favore vulgi, in sacerdotium subrogari.* Respōdeo. Hieronymus nō dicit, quod tu dicis. Non dicit eos, qui favore hominū ordinantur Sacerdotes, non verè ordinari: Sed non vocari ad Sacerdotium à Deo, sed ab homine. Hoc nō obstat, quo minus verè ordinentur. Nam hæc duo distinguenda sunt. 1. Deus vocat, seu interius excitat hominem ad sacrum Ordinem suscipiendum. 2. Deus in susceptione sacri Ordinis operatur. Hoc posterius potest disjungi à priori. Sicut fit etiam in Baptismo. Nam Judæus, qui propter solam spem lucri temporalis, indignè accedit ad Baptismum; non censetur à Deo vocari ad suscipiendum.

dum Baptismum; & tamen Deus operatur in Baptismo, quem ille suscipit: Non quidem dādo illi gratiam, qua indignus est, sed conferēdo charactērem. Idem dico de sacro Ordine. Sicut ergo potest aliquis verē baptizari, etiā si à Deo nō sit vocatus ad Baptismum; ita potest etiam verē ordinari. Et in tali casu, Deus non dicitur autor Sacramēti, quoad accessum, sed quoad effectum seu charactērem.

20 Quintò ex eodem Hieronymō (in cap. 4. epist. ad Ephes.) adducis hæc: *Ut qui Pastor est, esse debeat & Magister: nec in Ecclesiis, quamvis sanctus sit, Pastoris sibi nomen assumere, nisi possit docere, quos pascit.* Respondeo. Aliud est, aliquem ordinari Sacerdotem, & accipere potestatem Ordinis: aliud fieri Pastorem & Doctorem populi. Hieronymus nō dicit, Magisterium & doctrinam esse necessariam conditionem, sine qua nemo possit consecrari Sacerdos; sed sine qua nemo possit fieri pastor ovium, & per se instruere populum in fide ac pietate. Quod verissimum est.

21. Sextò eundem Hieronymum citās (in cap. 3. Sophoniæ,) ubi sic ait: *Sacerdotes, qui Eucharistia serviant; & sanguinem Domini populis ejus dividunt, impie agunt in legem Christi, putantes Eucharistiam imprecantis verba facere, non vitam: & necessariam esse tantum solennem orationem, & non Sacerdotum merita.* Hinc inferis malos Sacerdotes non verē consecrare Eucharistiam, ac proinde potestatem Ordinis auferri per peccatum. Respondeo, Si ita pergis An-  
toni,



toni, turbabis totam Ecclesiam. Nam si mali Sacerdotes amittunt potestatem Ordinis per peccatum, necesse est, & tō, & reliquos omnes Sacerdotes, per primum peccatum, quod post susceptos Ordines perpetrastis, amisisse potestatem Ordinis, & non amplius esse Sacerdotes. Unde ulterius sequitur, toties commisisse vos Sacrilegium, quoties Eucharistiam conati essetis consecrare; quoties absolutionis Sacramentum impendere; quoties sacros Ordines conferre. Et quis obsecro erit securus in conscientia, si cogitet se nunquam verè accipere Eucharistiam, vel absolutionem, vel sacros Ordines, si accipiat à Sacerdote vel Episcopo in peccato mortali existente? Schismaticus es, Antoni.

22. Porro Hieronymus, quem adducis, longè abest à tuo errore. Cum enim ait: *Sacerdotes impiè agere, qui putant Eucharistiam imprecantis verba facere non vitam*: nō loquitur præcisè de consecratione panis & vini Eucharistici, quasi asserat, panem & vinum non consecrari per verba consecrationis, sed per bonam vitam Sacerdotis, quia constat hoc falsum esse: sed loquitur de Eucharistia, id est, de gratiarum actione, quæ exhibetur Deo à Sacerdote per oblationem sacrificij Eucharistici. Est ergo hic sensus: Sacerdotes impiè agunt, qui putant se Deo gratiarum actionem exhibere per solam consecrationem, etiam si malè vivant. Quem sensum alijs verbis explicat D. Thomas 3. p. quæst. 82. art. 5. ad 1. cum ait: *Hie-*

*ronymus improbat errorem Sacerdotum, qui credebant se dignè posse Eucharistiam consecrare ex hoc solo, quòd sunt Sacerdotes, etiamsi sint peccatores.*

23. Septimo citas Gelasium (apud Gratianum cap. Sacrosancta. i. quæst. i.) ubi ait. *Sacrosancta religio, quæ Catholicam continet disciplinam, tantam sibi reverentiam vendicat, ut ad eam quilibet, nisi pura conscientia, non audeat pervenire. Nam quomodo ad divini mysterij consecrationem cælestis Spiritus invocatus adveniet, si Sacerdos, qui cum adesse deprecatur, criminosis plenius actionibus reprobetur?* Hinc etiam infero, Eucharistiam à malo Sacerdote invalidè consecrari. Addis D. Thomam 3. p. q. 82. art. 5. ad 2. distorquere Gelasij verba, quasi dicta sint cōtra eos Sacerdotes, qui se dignè putant consecrare Eucharistiam, ex eo, quòd sint Sacerdotes, tametsi peccatorum sordibus immundi sint. Respondeo. Falsum est, Antoni. Non dicit hoc D. Thomas de verbis Gelasij, sed Hieronymi, ut paulo antè ostendi. Gelasium aliter interpretatur. Nempe Spiritum sanctum non advenire ex merito mali Sacerdotis, sed ex virtute Christi, cujus verba profert Sacerdos. Hanc interpretationem, quæ bona est, dissimulasti; & aliam, mala fide, in ejus locum substituísti. Sed Apostatæ non aliter docentur à suo Magistro.

24. Octavo citas Augustinum (in Dial. 65. quæstionum, quæst. 64.) ubi ait: *Apostolorum sunt genera quatuor: à Deo, non per hominem: à Deo, sed per hominem: per hominem tantum: &*

*ex*

ex se. A Deo etenim missus est Moyses. A Deo per hominem, Jesus Nave. Per hominem tantum, sicut nostris temporibus, multi favore vulgi in sacerdotium subrogati sunt. Ex se autem, sicut sunt ipsi Pseudoprophetae. Ex quo concludis, Sacerdotes, qui favore vulgi ordinati sunt, non esse verè ordinatos. Respondeo. Augustinus non est autor illius Dialogi, ut nosti. Deinde jam antè ad similem Hieronymi sententiam responsum est, Nec opus est hîc repetere.

25. Nono citas Leonem Papam (epist. 95) asserentem, promotos contra canones non suscipere Ordinem; ac proinde Ordinem non esse Sacramentum. Verba Leonis sunt hæc: *Nulla ratio finit, ut inter Episcopos habeantur, qui nec à Clericis sunt electi, nec à plebibus expetiti.* Et ibidem: *Quis ambigat non esse eis tribuendum, quod non docetur fuisse collatum?* Respondeo. Hæc verba non habentur epist. 95. sed 90. ad Rusticum Narbonensem Episcopum. Nec integrè à te citata sunt. Integrè sic habent; *Nulla ratio finit, ut inter Episcopos habeantur, qui nec à Clericis sunt electi, nec à plebibus expetiti, nec à provincialibus Episcopis, cum Metropolitanis iudicio consecrati.* Unde cum sæpe quaestio de male accepto honore nascatur, quis ambigat, nequaquam istis esse tribuendum, quod non docetur fuisse collatum? Hæc verba, Antoni, si quem tangunt, te tangunt. Nam si Angli hoc tempore quærent ex Leone Papa: An Marcus Antonius debeat inter Episcopos haberi, cum in Anglia nihil constet de ipsius ordinatione; responderet

sine dubio: nulla ratio finit, ut inter Episcopos Angliæ habeatur, qui ab Episcopis Angliæ cū Metropolitanis iudicio consecratus non est: nisi doceat, alibi honorem Episcopalem sibi collatum esse. Hoc doce, & cessabit quæstio. Sed, si docere id nō posses, an ideo valebit hæc consequentia: Antonius non est legitimè ordinatus: Ergo ordinatio nō est Sacramentum? Abhis non pendet naturā Sacramenti à defectu iudicii hominis.

26. SEQUITUR ARGUMENTUM: Simoniaci, quodlibet officium accipiunt; & heretici, quodlibet dant, nihil conferunt: Ergo Ordo non est Sacramentum. Antecedens est manifestè falsum. Primò ex Gregorio libro septimo. ubi sic habet: *quicumque Sacerdos datus est, pretij datione mercari, non officium, sed officium attendit: non esse sed dici tantum Sacerdos concupiscit.* Respondeo. Gregorius non loquitur de effectu Ordinationis, sed de intentione illius, qui Simoniacè ordinatur. Intentio illius duplex est. Una, ut habeat titulum, honorem, & dignitatem sacerdotij; non autem, ut reipsa præstet officium, quod à vero Sacerdote exigitur. Altera, ut possit fieri Sacerdos sine prævio examine de doctrina & moribus. Utramq; intentionem explicat Gregorius. Priorem quidem, verbis jam citatis. Posteriores verò his sequentibus. *Quid scilicet? quid per hoc aliud agitur, nisi ut nulla de acta probatio, nulla sollicitudo de moribus; nulla sit de vita discussio: sed ille solummodo dignus, qui dare pretium*

*pretium suffecerit, aestimetur? Non negat tamen Gregorius, quin Ordinatio sit valida.*

27. Secundò ex Ambrosio lib. de dignit. Sacerdotal. cap. 5. ubi sic scribit: *Ergo gratiam, cum ordinareris, non suscepisti, quia gratuito eam non meruisti. Et ideo frater, si gratiam non accepisti, quomodo Episcopus effici potuisti? Aurum dans perdidisti, & gratiam sanctam non acquisisti.* Hic per gratiam ut tu interpretaris, intelligit potestatem Ordinis, quam accipit Simoniacè ordinatus. Respondeo. Vera interpretatio est hæc. Ambrosius instituit colloquium inter se & alium Episcopum Simoniacè ordinatum, his verbis: *Interrogo tamen fratrem & Coepiscopum nostrum, quia & ego Episcopus sum, & cum Episcopo loquor. Dic ergo mihi paulisper frater Episcope, cum dares pecuniam, quid accepisti? Gratiam Episcopalem accepi. Ergo interrogo te: hac gratia, cur tali vocabulo nuncupatur? Respondet: cur, inquis? ut reor, pro eo, quod gratis datur, ideo gratia vocitatur. Ergo si gratia gratis datur, & auro non aestimatur, à te cur gratia pecuniis comparatur? Respondet: Non, inquit, mihi daretur, si pecuniis non emeretur: Nec Episcopus fuisset ordinatus, si pecuniis non dedissem. Ergo ut apparet, ex responsionibus tuis, gratiam cum ordinareris, non suscepisti, quia gratuito eam non meruisti. Et ideo frater, si gratiam non accepisti, quomodo Episcopus effici potuisti? Nam & ad Discipulos suos Dominus dicit: Gratis accepistis: gratis date. Cur ergo gratuitam existimasti te pretio possidere gratiam? nam ut video, aurum dans perdidisti, & gratiam sanctam*

*non acquisisti: Adhuc tamen semel adjiciens, fratrē perquiro Episcopum, ne quid de approbamentis veridici nos pratermississe videamur. Quis dat, frater, Episcopalem gratiam, Deus, an homo? Respondes sine dubio: Deus. Sed tamen per hominem dat Deus. Homo imponit manus: Deus largitur gratiā, Sacerdos imponit supplicem dextram: & Deus benedicit potenti dextra. Episcopus iuviat Ordinem, & Deus tribuit dignitatem. O justitia, o equitas! Si homini pecunia datur, qui nihil in Ordine amplius operatur, nisi solum servitium, quod ei creditur; cur Deo totum negatur, qui ipsum Ordinem tibi largitur?*

28. In hoc colloquio proponit Ambrosius tres potissimum quæstiones Episcopo Simoniacæ ordinato, ut eum capiat. Prima est, *quid accepisti in Ordinatione? Accepi gratiam Episcopalem* Altera, *cur vocatur gratia. Quia gratis datur.* Tertia, *quis eam dat? Deus per ministerium hominis.* Et ex responsione ipsius, dupliciter illum capit. Primo, *si gratia Episcopalis datur gratis; ergo illam non accepisti, quia non accepisti gratis, sed pecuniam numerasti.* Secundo, *si Deus illam dat cur pro eo numeras homini pecuniam, & non Deo?* Gratosè autem ludit in vocabulo gratiæ. Nam tamen si Episcopus Simoniacus, per gratiam intelligat dignitatem & potestatem Ecclesiasticam; Ambrosius tamen, ut reducat illum ad sanam mentem, intelligit etiam gratiam Sacramentalem, præsertim cum ait: *Homo imponit manus: Deus largitur gratiam.* Alludens ad illud Apostoli 2.

Tim.

Tim. 1. 6. *Admoneote, ut resuscites gratiam Dei, quæ in te est, per impositionem manuum mearum.* Item: cum ait, *Aurum dans perdidisti, & gratiam sanctam non acquisisti.* Hinc tria colligo ex sententia Ambrosij. Primò, Simoniacè ordinatū non accipere gratiam Sacramentalem: *Gratiā sanctam non acquisisti.* Secundò, accipere tamē potestatem Ordinis: *Cur Deo totum negatur, qui ipsum Ordinem tibi largitur?* Tertiò, Sacrum Ordinem esse Sacramentum: *Homo imponit manus: Deus largitur gratiam.*

29. Tertiò objicis autorem operis imperfecti, (Homil. 53. apud Chrysost.) ubi asserit, *iustos ordinari à Deo; injustos autem minimè.* Et Clementem lib. 8. Constit. Apostol. cap. 1. ubi similiter asserit, *Episcopos imperitos, non esse Episcopos, nec à Deo constitutos, sed ab hominibus.* Respondéo. Confundis omnia. Nam hic agitur de Simonia: & probandum tibi est, Simoniacè ordinatos, non esse verè ordinatos. At hi duo autores, quos citas, nihil dicunt de Simonia, sed de imperitia & malitia eorum, qui accedunt ad Ordines. De quibus jam supra dictum est in primi argumenti solutione. Eò te remitto.

30. Quartò objicis Tharasium Patriarchā Constantinopolitanum in epist. ad Adrianum Papam (apud Gratianum cap. Eos qui. 1. quæst. 1.) qui ait: *Quanquam* (Simoniacè ordinatus) *nomine sacerdotium sortitus est; sed in eum falso nomen istud conferri, re ipsa comprobatur.* Itē: *Cō-*  
*pertiissimum quoq. est, in ipsis sancti Spiritus gratiā*



*non esse, aut sacerdotij sanctificationem, & quædā acciperunt, non habent* Respondeo. Verum est, quod dicitur in hoc posteriori testimonio, Simoniacos in Ordinatione, non accipere gratiam sanctificantem. Prius testimonium non habetur apud Gratianum loco à te citato. Nec etiam in Epistola Tharasilij ad Adrianum, quæ extat tom. 3 Concil.

31. Quintò ex Gregorio VII. (Lib. 6. Regist. ad ep. 5. in Decret.) objicis hæc verba: *Ordinationes, quæ interveniente pretio, vel precibus, vel obsequio alicujus personæ, impenso; vel quæ non communi consensu cleri & populi, secundum canonicas sanctiones fiunt, & ab his, ad quos consecratio pertinet, non comprobantur, infirmas & irritas esse dijudicamus*. Respondeo. Hæc verba invenio apud Gratianum, cap. Ordinationes. 1. quæst. 1. sub nomine Gregorij IV. Sed non nihil mutata. Nam ubi tu dicis, *infirmas & irritas esse dijudicamus*, ipse sic recitat, *Falsas esse dijudicamus*. Porro, tuam citationem non potui reperire. Quod ad rem attinet, quid mirum est, irritas esse ordinationes, quæ non approbantur ab ijs, ad quos pertinet consecratio?

32. Hæc de priori parte secundi argumenti, in qua falsò contendis, Simoniacos non ordinari validè, id est, nihil accipere in Ordinatione. Catholici docent cum D. Thoma in 2. 2. q. 100. art. 6. ad 1. Simoniace ordinationes accipere quidem characterem, seu potestatem Ordinis, propter efficaciam Sacramenti; non tamen accipere gratiam sanctificantem,



tem, neq; Ordinis executionem; sed ipso iure suspensos esse, vt nō liceat ipsis exercere potestatem Ordinis, quam acceperunt. De quare vide Extravag. *Cum detestabile*.

33. Sequitur altera pars ejusdem argumenti, in qua contendis, irritas esse Ordinationes, quæ fiunt ab Episcopis hæreticis. Ac primò citas Innocentium I. epist. 20. ubi sic scribit: *Arianos, caterasque hujusmodi pestes, quia eorum laicos converjos ad Dominum, sub imagine pœnitentia, ac sancti Spiritus sanctificatione, per manus impositionem suscepimus, non videtur Clericos eorum cum Sacerdotij aut ministerij cujuscumque suscipi debere dignitate. Quoniam quibus solum Baptisma ratum esse permittimus, quod utique in Nominis Patris & Filij & Spiritus sancti perficitur, nec Spiritum sanctum eos habere ex illo Baptismate, illisque mysterijs arbitramur: Quoniam cum à Catholica fide eorum autores desciscerent, perfectionem Spiritus, quam acceperunt, amiserunt, nec dare ejus plenitudinem possunt, quæ maxime in ordinationibus operatur, quam per impietatis suæ perfidiâ potius, quam per fidem dixerim, perdiderunt. Ubi inquis, agnoscit differētiā inter Baptismum & Ordinem, quòd baptizati ab Arianis, habeantur pro baptizatis: Ordinati autem ab Arianis, non habeantur pro ordinatis. Respondeo. Illa verba non habentur epist. 20. quam tu citas, sed epist. 18. quæ est ad Alexandrum Episcopum, cap. 3. Neque nobis contraria sunt. Non enim asserunt ordinatos ab Arianis Episcopis, nō esse validè ordinatos aut cum rede-*

unt ad Ecclesiam, iterum ordinandos esse, sed non debere suscipi cum sacerdotij aut ministerij cuiuspiam dignitate, id est, non esse illis permittendum, ut locum & gradum obtineant inter Sacerdotes, quando redeunt ad Ecclesiam. Vide Gabrielem Vaquez 3. part. disp. 243. cap. 1.

34. Secundò citas eundem Innocentium (epist. 27. ad Episcopos Macedoniæ) ubi sic scribit: *Ventum est ad tertiam questionem, quæ pro sui difficultate, longiorem exigit disputationem. Cum nos dicamus ab hæreticis ordinatos vulneratum per illam manus impositionem habere caput, ubi vulnus infixum est, medicina est adhibenda, quæ possit recipere sanitatem quæ sanitas post vulnus secuta, sine cicatrice esse non poterit, Atque ubi pænitentia remedium necessarium est, illic Ordinationis honorem locum habere non posse decernimus. Nā si, ut legitur, quod tetigerit immundus, immundum erit, quomodo ei tribuetur, quod munditia ac puritas consuevit accipere? Sed è cōtrario asseritur, eum, qui honorem amisit, honorem dare non posse, nec illum aliquid accepisse: quia nihil in dante erat, quod ille posset accipere. Acquiescimus, & verū est. Certè quia quod non habuit, dare non potuit, damnationem utiq; quam habuit, per pravam manus impositionem dedit: & qui particeps effectus est damnato, quomodo debeat honorem accipere, invenire non possum. Respondeo. Hæc verba habentur epist. 22. cap. 3. (tom. 1. concilior.) nec aliud ex ijs colligi potest, quàm ordinatos ab hæreticis, non habere honorem & dignitatem in Eccle-*

Ecclesia. Quòd sic probat: Episcopi hæretici, qui alios ordinant, non habent honorem in Ecclesia, cùm sint præscissi ab Ecclesia: Ergo non possunt alijs dare honorem in Ecclesia. Rectè. At non negat Innocentius, quin sicut ipsi habent Characterem Ordinis, sic alijs eum conferre possint.

35. Tertiò citas Nicolaum I. (epist. 9. ad Michaellem Imperatorem) ubi de Gregorio Syracusano Episcopo schismatico, qui Photiũ ordinaverat, sic scribit: *Gregorius ergo, qui canonicè ac Synodicè depositus, & anathematizatus erat, quemadmodum posset quenkumque provehere vel benedicere, ratio nulla docet. Igitur nihil Photius à Gregorio percepit, nisi quantum Gregorius habuit: Nihil autem habuit, nihil dedit.* Respondeo. Non invenio Epistolam Nicolai ad Michaellem, tom. 3. concil. ubi tamen habentur epistolæ Nicolai ad diversos. Nihilominus verba, quæ citasti, eodem sensu explicanda sunt, quo verba Innocentij. Nimirum: *Nihil habuit, nihil dedit*, id est, non habuit honorem & dignitatem Episcopi in Ecclesia: Non ergo potuit dare. Quod verissimum est.

36. Post citata hæc Patrum testimonia (quæ ais videri asperiora, & ad terrendos malos Sacerdotes amplificata) perplexus es. Et duo asseris. Unum est, Sacram Ordinationem sapè ex antiquo defectu, vel personæ ordinantis vel ordinatæ, irritam & inanem esse: Et qui sic ordinati sunt, non esse verè ordinatos. Alterum, nihilominus eorum ministeria non esse

se penitus irrita. Utrumque confirmas ex Chrystostomo homil. 2. in posterior. ad Timot. ubi ais, illum docere, etiam non ordinaros à Deo, & malos & indignos, validè Baptismum conferre, Eucharistiam conficere, ac alia ministeria peragere. Quod tamen spectat ad Ordinationem internam, eam à solo Deo operagi, & non omnes, qui ab hominibus ordinantur externè, etiam à Deo ordinari internè. Mox addis: Hi ergo si quid efficiunt, non vi Ordinis interioris, sed ex speciali divina providentia efficiunt, ne salus patiatur animarum.

37. Audi Antoni. Tu quidem meritò perplexus es, quia deserta via veritatis, in varias ambages incidisti: Nec facilè, nisi ad viam redeas, elabendi facultas est. Sed Chrystostomo injuriam facis. Verba ejus loco citato, sunt hæc: *An ignoras, quid sit Sacerdos? Angelus utiq; Domini est. Non ex seipso loquitur. Si despicias, non illum despicias, sed Deum, qui illum ordinavit. Sed unde, inquires, constat Deum fuisse illius ordinationis autorem? Nempe, nisi tu habeas hanc opinionè, spes tua inanis facta est. Nam si nihil per illum operatur Deus, neque lavacrum habes, neq; mysteriorum particeps es, neq; benedictionibus fruere. Non ergo Christianus es. Quid ergo? Deus omnes ordinat, etiam indignos? Non omnes quidem ille ordinat, per omnes tamen ipse operatur, salutem populi moliens, nō illorum intuens merita. Et infra: Quid enim non agit Deus salutis nostra causa? Quid non loquitur? Per quem non operatur? Si enim per Judā operatus est, & per Prophetas, quibus dicturus est: Non novi vos; perq; illas, qui Damones in Nomine suo*

*suo ejecerunt, non magis per Sacerdotes divino ministerio famulantes operabitur?*

38. In hac tota sententia nihil est, quod difficultatem habeat, nisi illa verba: *Non omnes quidem ille ordinat per omnes tamen operatur*; quæ tu perperam intelligis. Non enim sensus illorū est, aliquos non esse vix ordinatos Sacerdotes, & tamen validè præstare ea, quæ sunt officij Sacerdotalis, nec præstare, vi Ordinis, sed ex speciali Dei providentia, (quod tuum commentum est.) Sed non omnes Sacerdotes, qui habent characterem, habere etiā gratiam Ordinationis: ac proinde, non omnes, quoad integrum effectum Ordinationis, à Deo ordinatos esse, Deum tamen per illos, ratione characteris, multa operari. Quod confirmat duplici exemplo. Uno Judæ proditoris, qui certè habuit characterem Ordinationis, juxta illud, *Act. 1. 20. Episcopatum ejus accipiat alter*: non tamen habuit gratiam Sacramentalem, quia *fur erat & proditor*. (Joan. 12. 6. & cap. 13. 2.) Altero, quorundam aliorum, qui in nomine Dei prophetabant & Dæmonia ejiciebant; & tamen erant mali ac Deo ingrati. Et quidem, quatenus prophetabāt & miracula faciebant, Deus per illos operabatur; quatenus verò erant impij, non censébantur perfectè à Deo ad hoc officium vocati esse.

39. TERTIUM ARGUMENTUM, quò probas Ordinem non esse Sacramentum, multis verbis otiosè inculcas. Summa est hæc: Ex scriptura apertè constat, Baptismum & Eucharistiam

stiam esse Sacramenta, à Christo instituta: Ac non constat aperte, Ordinem esse Sacramentum à Christo institutum: Ergo. Respondeo. Primò falsum est, non constare id ex Scriptura. Jam suprà ex scriptura ostensum est, Ordinem esse Sacramentum. Sed esto, non constet ex Scriptura: An ideo Sacramentum non est? Sufficit nobis, constare ex Traditione. Si respicis Traditionem, quomodo probabis Symbolum Apostolorum, quod in Ecclesia legitur, Apostolicum & canonicum esse? Beatam Mariam, semper virginem mansisse? Baptizatos ab hæreticis, rebaptizandos non esse? Et quæ similia sunt. Si autem admittis Traditionem, cur in hac quæstione, An Ordo sit Sacramentum, non admittis?

40. Sedurges: Canonistæ docent, Summum Pontificem solo verbo posse facere Sacerdotem & Episcopum. Nec ullus Catholicorum audet contra illos mutire. At si sacer Ordo esset Sacramentum, non sufficeret solum verbum, sed opus esset externa ceremonia, sicut fit in alijs Sacramentis. Respondeo 1. Falsum est, quod de Catholicis assumis. Hi enim generatim docent cum D. Thoma 3. part. q. 60. art. 6. ad 2. Omnia Sacramenta novæ legis constare rebus & verbis, tanquam materia & forma, quæ sunt partes essentielles. Et multi speciatim docent, inpositionem manuum, quæ est externa ceremonia, esse materiam essentialem Sacramenti Ordinis, ut Bonaventura, Scotus & Paludanus in 4. dist. 24.

Alti-

Altifiodorensis in Summa, par. 4. Petrus Soto, lect. 5. de Sacrament. Ord. Martinus Ledesmius in 4. quæstio. 36. artic. 4. ad 1. Bellarminus lib. de Sacrament. Ordinis, cap. 9. Henriquez cap. 6. & plures alij. Ergo hi saltem non concedunt Pontificem solo verbo posse facere Sacerdotem vel Episcopum. Nam si impositio manuum est de essentia Ordinis, non potest conferri Ordo sine manuum impositione. Respondeo secundò Canonistæ non loquuntur de tota ordinatione, sed de sola forma; & tantum volunt dicere, cum sic loquuntur, non esse necessarias absolutè tot orationes, unctiones, ac ceremonias; sed sufficere manuum impositionem, quam Apostoli nunquam omittebant, cum verbis quibus significetur, tradi potestas sacerdotalis: Proinde ex sententia Canonistarum non sequitur, sufficere verbum sine aliqua ceremonia, sed requiritur saltem manuum impositio, quæ in scripturis passim exprimitur. Sicut & è contrario, cum dicitur in scripturis, & in ipso Concilio Tridentino sess. 14. capit. 3. de extrema unctione, Sacerdotes ordinari per manuum impositionem; non intelligimus, ita solum sufficere manuum impositionem, ut non requiratur aliquod verbum, declarans potestatem, quæ datur.

41. ~~Iterum arguitur~~ Petrus Damiani Episcopus Ostiensis, in relatione suæ Legationis Mediolanensis (apud Baronium tom. 11. Annal. Anno Christi 1059. num. 59.) idem sentit, quod



quod canonistæ, nempe Ordinationem solo verbo perfici posse. Sic enim scribitur. *Quæque tali modo reconciliatis decretum est. Et mox post: in omnibus redderetur officium, si daretur laxat, qui & literis eruditi, & ceteris personis gravitate videretur hominibus. Ceterum, si sufficeret, quod a Sanctis & ceteris per deum, & ceteris essent transmissum, inferi, & ceteris. Iuramentum, & ceteris sententia falce praefixa, & ceteris, quibus ministrandi licentia redderetur. & ceteris. Ceteris veteri Ordinatione, admissum, & ceteris. Efficiunt, sed ex illa potius beati Apostolorum Principis efficacissima auctoritate, quam beatum Apollinarium repente usus est, dicens: Surge, accipe spiritum sanctum, simulque Pontificatum. Ex his verbis duo colligis. Primò, Petrum Damiani docere, Ordinationes Simoniacè factas, nullas esse. Secundò, eundem clericos Simoniacè promotos solo verbo, autoritate Papali, ordinasse.*

42. Respondeo. Neutrum ex illis verbis colligitur. Ego potius hæc colligo. 1. Mediolani multos Simoniacè fuisse ordinatos, antequam Petrus Damiani eò veniret, ad reformandum clerum Mediolanensem. 2. Aliquos ex illis fuisse doctos, castos, & honestis moribus præditos: alios non item. 3. Prioribus redditum esse officium, seu redditam licentiam ministrandi: non autem posterioribus. 4. Licentiam non esse redditam, vi Ordinationis, quæ fuerat Simoniaca: sed autoritate Petri Apostoli. Ubi per licentiam, quæ reddita est, non intelligit potestatem Ordinis, ut tu falsò interpre-



terpretaris; quia illa potestas non erat illis ablata: Sed intelligit licentiam utendi potestate Ordinis. Itaque sensus est: Ex illis omnibus qui Simoniacè erant ordinati, aliquos accepisse licentiam utendi sacro Ordine; alios non item. Omnes tamen valide fuisse ordinatos. Jam quod ad factum S. Petri Apostoli attinet, quo S. Apollinarem uno verbo Episcopum fecisse dicitur, eodem modo intelligendum, id est, quo antea de Canonistis dictum est; non negari scilicet, quin & manus eidem B. Petrus imposuerit, & verbis, quæ recensentur, potestatem, quam signo conferebat, expresserit; & si Petrus Damiani verborum tantum faciat mentionem.

43<sup>o</sup> QUARTUM ARGUMENTUM: Si dicamus Ordinem esse Sacramentum, & præterea Episcopatum esse distinctum Ordinem à presbyteratu; emergent inextricabiles & insolubiles difficultates. Vel enim dicendum erit, Episcopatum & presbyterium esse duo Sacramenta, vel unum. Si duo sunt, multiplicatur numerus Sacramentorum. Si unum, quomodo sunt distincti Ordines? Respondeo. Nimis frigidè, Antoni. Multa sunt mysteria fidei Christianæ, præsertim mysterium Trinitatis, Incarnationis, prædestinationis, Eucharistiæ, ex quibus emergunt multò majores difficultates, quam ex sacramento Ordinis: an ideo neganda sunt? Nullo modo. Intellectus in captivitatem fidei redigendus est. Et quæ non possumus humano ingenio penetrare; di-

vina fide credenda sunt. Nam *fides*, teste Apostolo, *est argumentum rerum non apparentium*. Esto igitur: emergant aliquæ difficultates circa Sacramentum Ordinis; non ideo negandum est, Ordinem esse Sacramentum. Alioqui pari ratione, neganda esset realis distinctio personarum in una Deitate; Hypostatica unio duarum naturarum in Christo; æterna hominum prædestinatio ad gloriam; præsentia corporis Christi in Eucharistia. Quod absit.

44. Porro difficultates, quas prætendis, non sunt tanti momenti, ut explicari non possint. Nam si dixerò, Episcopatum & Presbyteratum esse duos Ordines specie distinctos, & similiter duo Sacramenta specie distincta, sub eodem genere Ordinis; quid difficultatis hinc emerget? Multi hoc dicunt, & probabiliter defendunt. Addo, ex tua sententia, plures oriri, non dico difficultates, sed absurditates. Recitabo aliquot, quas tu admittis. Sunt autem hujusmodi. 1. Ordo non est Sacramentum, sed mera ad ministerium deputatio, sine ullo charactere aut impressione. 2. Potest aliquis ex laico immediatè fieri Episcopus, & non necesse est, ut prius fiat Sacerdos. 3. Melius est, si necesse sit, ex laico immediatè fieri Episcopum, quàm Lectorem, Ostiarium, Exorcistam.

4. Impositio manuum non est à Christo instituta, sed tamen ab Apostolis usurpata. 5. Sacer. Ordo amitti potest, & iterari. Unde, qui

qui nunc Sacerdos aut Episcopus est, potest  
cras non esse: Et postquam desit esse, potest  
iterum ordinari. 6. Nullus ritè ordinatur, in  
quo gratia præstò non sit. 7. Ordinatio si sit  
legitima, semper confert gratiam: non ex o-  
pere operato, sed ex sola deputatione, per le-  
gitimam auctoritatem facta. Hæc & similia,  
quæ antiqui Theologi censent absurda esse;  
tibi, homini novatori, placent vel maximè.  
Sed duo ex te quæro. Primò, an Episcopus,  
qui committit peccatum mortale, retineat  
potestatem Ordinis nec ne? Si retinet, potest  
validè conferre Ordinem, quod suprà nega-  
sti. Si non retinet, necesse est, vel te non am-  
plius Episcopum esse, vel si adhuc es, nūquam  
peccasse mortaliter, ab eo tempore, quo Epi-  
scopatum suscepisti. Quid dicis de teipso? Se-  
cundo, an possis ostendere ex Scriptura, quòd  
Deus, extra Sacramētum, det alicui gratiam,  
ad solam alterius hominis deputationem? Vel,  
quòd Christus instituerit, ut aliquis solo ver-  
bo deputantis, ordinetur in Sacerdotem, si-  
ne ulla externa ceremonia? Et, si hoc institue-  
rit, quare Apostoli non servarint hanc in-  
stitutionem, sed manuum im-  
positionem adhibue-  
rint?

*An Augustinus duo tantum agnoscat Sacramenta?*

1. **T**U affirmas lib. 2. c. 4. n. 33. his verbis: Si de vero & maximè proprio Sacramento sit sermo, Augustinus duo tantum agnoscit Sacramenta, quæ clare & expressè pateant à Christo esse instituta. Sic enim loquitur epist. 118. Unde Sacramentis numero paucissimis, observatione facillimis, significatione præstâtissimis, societatem novi populi colligavit. Sicut est Baptismus Trinitatis nomine consecratus; Cômunicatio corporis & sanguinis ipsius; & si quid aliud in Scripturis canonicis cômendatur.

2. Theologi Parisienses in sua censura dicunt, hanc tuam propositionem esse falsam, & in beatum Augustinum contumeliosam. Et sic est. Quod dupliciter ostendo. Primo generatim, ex verbis illius jam citatis. Nam si agnosceret duo tantum Sacramenta, Baptismum & Eucharistiam; frustra, post illa duo enumerata, addidisset: *Et si quid aliud in Scripturis canonicis commendatur.* Debuisset ex tua sententia dicere: *Et præter hæc duo, nullum aliud in Scripturis canonicis commendatur.* Eodem modo loquitur Concion. 1. in Psalm. 103. *Munus, inquit, Sacramentum in Baptismo & Eucharistia, & in cæteris sanctis Sacramentis, quale munus est?*

3. Secundò speciatim. Nam præter Baptismum & Eucharistiam, agnoscit quinque alia,

alia, quæ etiam nos agnoscimus. Agnoscit Confirmationem, lib. 2. contra liter. Petilianum, cap. 104. cum ait: *Sacramentum chrismatis in genere visibilibus, Sacramentum est Sacrosanctum, sicut ipse Baptismus.*

Agnoscit Ordinem, lib. 2. contr. Epist. Parmeniani, c. 13. ubi confert illud cum Baptismo, his verbis: *Utrumq; Sacramentum est, & quadam consecrati neutrumq; homini datur: illud, cum baptizatur; illud cum ordinatur, ideoq; in Ecclesia Catholica utrumq; non licet iterari.* Alibi similia habet, ut supra visum est.

Agnoscit Pœnitentiam, lib. 1. de adulterin. conjug. c. 26 & 28. *Eadem est, inquit, causa Baptismi & Reconciliationis, sine quibus Sacramentis homines credunt, se non debere exire de corpore.*

Agnoscit Matrimonium, lib. 1. de nupt. & concupisc. cap. 10. *Hujus Sacramenti res est, ut mas & fœmina connubio copulati, quamdiu vivunt, inseparabiliter perseverent.*

Agnoscit Extremam unctionem, Serm. 215. de temp. *Quoties aliqua infirmitas supervenerit, Corpus & sanguinem Christi, ille qui ægrotat, accipiat: & inde, corpusculum suum unget, ut illud quod scriptum est, impleatur in eo: Infirmitur aliquis, inducat presbyteros, & orcent super eum, ungentes eum oleo &c.*

4. Vides, Antoni, Augustinum non duo tantum, ut tū falso illi imponis, sed plura Sacramēta agnoscere. Et quidem propriè. Nam expressè dicit, *Confirmationem esse Sacramentum, sicut est Baptismus.* At Baptismus est pro-

prie Sacramentum, quod nemo negat: Ergo & Confirmatio. Similiter Pœnitentiam confert cum Baptismo, asserens eandem esse Baptismi & Reconciliationis causam. Idem affirmat de Ordine.

## CAPUT SEPTIMUM.

## De Monachis &amp; Apostatis.

1. **M**ulta asseris de Monachis & Apostatis lib. 2. c. 12. quæ partim falsa, partim inter se pugnantia sunt. Ea breviter percurram. Primo asseris, votum simplex & solenne, esse unum idemque votum essentialiter, ejusdem valoris & obligationis, (n. 17. itaque coram Deo, *votum simplex & votum solenne. unicum essentialiter, & idem votum est, ejusdem prorsus valoris, ejusdemq; obligationis. Et num. 41. Votum ex solennitate nihil acquirit, quod essentialiter, dum simplex esset, non haberet.*) Hanc assertionem revocas alibi, ut paulò post patebit.

2. Secundò asseris, votum simplex & solenne, nō aliter differre; quàm quòd alterum externum sit, (n. 3. *Si loquamur de quocung; voto in genere, simplex votum est, quod privatim Deo fit internè inter hominem & Deum solum: Solenne verò erit, si hoc ipsum internum, etiam publicè fiat, & actu externo coram alijs declaretur.* Et n. 32. *Votum simplex voco id, quod est internum: Solenne verò, quod præterea externè fuerit manifestatum.* Et n. 35. *Differunt, ut internum & externum; con-*  
ceptum

*ceptum & prolatum; cogitatum & explicatum.*) Hæc assertio est nova, contra communem Theologorum sententiam.

3. Tertiò asseris, votum internum, nō esse votum, sed propositū; nec obligare corā Deo, (n. 19. *In posteriori verò*, [id est, in voto personali & permanente, quale est votum Religiosorum] facile mihi persuadeo, ex sola interna deliberatione, & plenissima etiam electione, votum quod de se jam plenum & perfectum esse deberet, pro pleno & perfecto à Deo nondum haberi, sed quamdiu internum est, potius propositū, quam voti rationem habere. Et n. 31. *Vota monachandi, simplicia sunt, quamdiu in interno homine latent, inter ipsum & Deum solum: & hæc, dum ita simplicia sunt, adhuc hominem non obligant, etiam coram Deo.* Et ibidem in fine: tantum igitur abest, ut in voto simplici, hoc est, purè interno religionis, necessaria sit Papalis dispensatio, ut ne dispensatione quidem indigeat, qui vovit; sed sit in libertate ipsius id exequi, & non exequi Et n. 32. *In personali & permanente voto, aggressio illa, & vita susceptio, per quā ego solam id ex simplici solenne facio, est essentialis huic voto, quia per illam hoc votum, votum est, & sine ea coram Deo votū non est, sed tanquam merè propositū.*) Hæc assertio est et nova, & destruit duas præcedentes. Nam in prima dixisti, *votum simplex & solenne non differre essentialiter.* Nunc dicis, differre essentialiter: Et solenne differre à simplici, per suspensionē vitæ religiosæ, tanquam per differentiam essentialē. Rursum in prima dixisti, *votum simplex & solenne*

*esse ejusdem valoris & obligationis. Hic dicis, simplex non obligare coram Deo, nec habere rationem voti, sed tantum propositi. Præterea in secunda dixisti, simplex solū differre à solenni. sicut internū ab externo. Hic dicis, differre, sicut propositū à voto; sicut nō obligans ab obligante. Scandalosa hæc sunt: & magnā fenestram aperiūt ad perfidiā.*

4. Quartò asseris, externam voti professionem plus obesse Ecclesiæ, quàm prodesse, (nu. 29.) *Si quis ex me querat plusne profuerit, an obfuerit vere religioni, externa hæc professionis additio; dicam ei: Apud me clarum esse, longè majus esse detrimentum inde secutum, quàm emolumentum.* Hæc assertio est falsa, & in sacros Religiosorum Ordines contumeliosa. Lege Platū de bono status Religiosi, & invenies, quātum boni contulerint in Ecclesiam Patres Dominicani, Franciscani, Benedictini, & alij passim. Et qui hoc tempore fortius defendunt Ecclesiam, quā Religiosi? Qui nervosius oppugnant hæreticos, Apostatas, scribendo, disputando, concionando, quam Religiosi? Quod autem nonnulli ex illis, ut Lutherus, Bucerus Petrus Martyr, Pellicanus, Ochinus, Occolampadius, & tu Marce Antoni, hæretici & Apostatæ facti estis; magnum quidem detrimentum est: sed vestræ perfidiæ, nō externæ votorum professioni imputandum. De quo tamen ipso detrimento, meritò potest dubitari, an non plus profuerit Ecclesiæ, quàm obfuerit. Vobis quidem, tanquam privatis hominibus, obest vel maximè, quia facit vos reos æternæ damnationis,



tionis, sed Ecclesiæ non parum prodesse, certissimum est. Vestra enim paucorum defectio & Apostasia, excitat multos alios, tum ad diligentem cautelam in posterum; tum ad maiorem fidei explicationem & propugnationem. De qua re vide Augustinum, si vis, in lib. de vera Religione.

5. Quintò asseris duos esse effectus voti solennis, qui turbant Ecclesiam, (n. 37. *Duos sunt precipui effectus voti solennis, quos nostri Romana doctrina Theologi ponunt & defendunt: & tamen, sicut novi sunt, & olim in Ecclesia inauditi, ita multas inducunt in Ecclesiam turbationes, & multa incommoda, atque animarum damna non contemnenda. Alter effectus est inhabilitatis ad matrimonium; alter verò Apostasia, si Monasterium deseratur.*) Hæc assertio est falsa & contumeliosa. Falsa dupliciter. Primò, quia Apostasia non est effectus, sed transgressio voti solennis. Nam solennitas voti non est causa Apostasiæ; sed quasi destruitur & enervatur per Apostasiam. Secundò, quia inhabilitas ad matrimonium non turbat Ecclesiam, sed malitia Apostatarum; qui cum voverint perpetuam castitatem, postea non servant, quod voverunt. Hinc scandala & alia incommoda oriuntur.

6. Sextò asseris, votum solenne non dirimere matrimonium subsequens, ac proinde si Monachus contrahat matrimonium, validè contrahere. Num. 43. *Concludimus hæc voti solennitates Monachorū, impedire quidem ac vetare, ne matrimonium contrahatur; contractum tamen*

*post illas, ex eis non dirimi, sed esse ratum, firmum, & validū, tam in Monacho quam in Moniali; sicut post votū simplex.)* Hæc assertio est Lutherana, & ab Ecclesia damnata in Concilio Tridentino, Sess. 24. can. 9. Et merito. Nam antiqui Pōtiffices & Concilia statuerunt, votum solenne Religiosorum non solum impedire, sed etiam dirimere matrimonium, ut Concilium Toletanum primum, c. 16. Turonense secundum, can. 16. Gregorius I. lib. 1. epist. 40. Alexander III. cap. Meminimus, qui Clerici vel voventes. Bonifacius VIII. cap. unic. de voto, in 6. Verba Bonifacij sunt hæc: *Presentis declarandum duximus oraculo sanctionis, illud solum votum debere dici solenne, quantum ad post contractum matrimonium dirimendum, quod solennizatum fuerit per susceptionem sacri Ordinis, aut per professionem expressam vel tacitam, factam alicui de Religionibus, per Sedem Apostolicam approbatis.*

7. Septimò asseris; Monachos, si post vota solennia contrahant matrimonium, nō peccare contrahendo matrimonium, sed solum peccare recedendo à vita monastica, (n. 38. *At verò Monachus & voti reus est, & promissæ fidei. Quòd si uxorem ducat, malum non facit, quòd uxorem ducat, sed quòd uxorem ducendo à vita monastica, quam professus est, recedat.*) Hæc assertio falsa est. Nam voluntas contrahendi & consummandi matrimonium, repugnat voto perpetuæ castitatis, ut per se constat: Ergo talis voluntas mala est. Quod tripliciter confirmo ex tuis verbis. Primo, quia *vita Monachorum,*  
ut

ut tu ibidem loqueris, *essentialiter & substantialiter includit cœlibatum & continentiam*: Ergo qui vovet vitam monasticam, eodem actu essentialiter & substantialiter vovet cœlibatum & continentiam. Ergo voluntas recedendi à vita monastica, essentialiter & substantialiter includit voluntatem recedendi à cœlibatu & continentia. At prior voluntas est mala, ut tu fateris: Ergo & posterior. Malum igitur est, velle recedere à cœlibatu & continentia, quã vovisti: At hæc voluntas recedendi à cœlibatu essentialiter includitur in voluntate contrahendi & consummandi matrimonium, post votum solenne. Secundò, quia, ut ibidem loqueris, *idem est Monacho uxorem ducere, quod Monachatum deferere*. At Monachus peccat Monachatum deferendo: Ergo peccat uxorem ducendo. Tertiò, *Monachus, qui ad nuptias appellat avimur, is voti sui desertor, fidem suam irritam facit*, (verba tua sunt.) At Monachus sine dubio peccat deferendo suum votum, & irritam faciendo suam fidem: Ergo etiam peccat animum ad nuptias appellendo.

8. Octavo asseris, Monachum, si deserat suum statum, non magis peccare contrahendo matrimonium, quàm continentiam servando, (num. 38. *Idem prorsus peccatum erit Monacho, si à monachatu recedat, etiam si abstineat à conjugio, & in cœlibatu perfectissime cum plenissima continentia perseveret; ac si uxorem ducat.*) Rationem addis, quia votum monachale, non versatur immediatè circa cœlibatum &

con-

continentiam, sed circa regulam monasticā.) Hæc assertio est falsa, sicut præcedens. Primò, quia si Monachus deferat suum Ordinem, & nihilominus velit servare continentiam; nullo modo peccat in eo præcisè, quòd velit servare continentiam, quia ex hac parte vult servare, quòd per votum Deo promisit. At peccat volendo contrahere & consummare matrimonium, quia ex hac parte non vult servare, quòd Deo promisit. Ergo non est parratio. Secundò, quia servando continentiam, non facit se inhabilem ad resumendam vitam monasticam. At contrahendo matrimonium, facit se inhabilem. Qui autem facit se inhabilem ad id servandum, quòd ex voto tenetur servare, peccat. Ergo Monachus peccat matrimonium contrahendo, non autem continentiam servando: Nec verum est, quòd ais, *votum monachale non versari immediatè circa cœlibatum & continentiam*. Nam Monachus, dum vover, vel expressè vover vitam monachalè, vel expressè castitatem, paupertatem & obedientiam, quæ tria constituunt vitam monachalem. Si posterius, captus es. Si prius, æquè captus es. Nam vita monachalis, ut paulò antè dicebas, essentialiter & substantialiter includit cœlibatum & continentiam.

9. Nonò asseris, vel videris asserere, Monachos non fieri Apostatas, si post vota solennia deferant suum statum in Summa capitis. *Solenne votum est solubile, nec ejus desertio verè facit Apostasiam.*) Hæc assertio similiter falsa est,

est, & in totam Ecclesiam contumeliosa: Atq;  
ad hoc solum à te posita, ut suscipias patrocini-  
um Lutheri, & similium Monachorum, qui  
statum Monachalē turpiter deseruerunt, (de  
tenihil dicam: relinquo te tuæ conscientiaē.)  
Certè ex communi totius Ecclesiae consensu,  
& ex ipsa Etymologia vocabuli, Apostasia idē  
est, quod defectio: & Apostata idem, quod de-  
fector, desertor, transfuga. Consule Calepi-  
num. At Monachus, qui post vota solennia re-  
cedit à suo statu, quid aliud est, quā defector,  
desertor, & transfuga à suo Ordine?

10. Decimò asseris, Ecclesiam nihil juris  
habere in Monachum desertorē, (n. 45. *Quid  
si propria auctoritate, sine causa legitima, quis Mo-  
nachus professus, fiat desertor? Illic sane peccat cōtra  
Deum & damnationem habet; sed Ecclesia nihil  
habet contra illum, in foro externo.*) Hæc assertio  
est contra scripturam. Nam Ecclesia potest  
quēlibet Christianum in externo foro repre-  
hendere, punire, & etiam excommunicare, si  
delinquat & contumax sit. Matth. 18. 17. *Si Ec-  
clesiam non audierit, sit tibi sicut Ethnicus & Publi-  
canus.* Et 1 Cor. 4. 21. *Quid vultis? in virga veni-  
ad vos, an in Spiritu mansuetudinis?* Et 2. Cor. 13.  
10. *Hæc absens scribo, ut non presens durius agam,  
secundum potestatem quā Dominus mihi dedit.* Et 2.  
Thess. 3. 14. *Si quis non obedit verbo nostro, per e-  
pistolā hunc notate, & non commisceamini illi.* Cur  
hīc excipis Monachum, sui status desertorem?  
Dicā, Antoni. Tuā causam ubiq; agis. Deser-  
tores: Transfuga es: Peccatum non agnoscis:  
puniri

puniri non vis. Sed contra Deum non valet tergiversatio.

11. Undecimò asseris, Monachos nō posse esse Clericos, seu sacris Ordinibus initiatos. (n. 51. *Ex hoc ipso evidenter colligitur, Monachos, qui monachatum cum clericatu confuderunt, jam neque esse veros Monachos, neque veros Clericos. Clericatus enim cum monachatu pugnat, & sunt incompatibilia.*) Hæc assertio est contra perpetuam Ecclesiæ praxin. Nam Benedictini, Frāciscani, Dominicani, Carthusiani, & alij Religiosi, semper habuerunt, & adhuc habent Sacerdotes sui Ordinis, qui simul & Monachi, & Sacerdotes sunt. Et tu audes, Antoni, hanc praxin tot sæculis servatam & confirmatam, jam tandē carpere & accusare? Nimirum, hoc tantū sectari te video, ut sicut desertor es Ordinis, ita etiam desertor sis doctrinæ, quam Ecclesia Catholica profitetur.

12. Omitto alias assertiones, & que absurdas, quæ propè infinitæ sunt. Et hîc finio. Si, quod vehementer opto, redibis ad Ecclesiam, ex qua digressus es, erit mihi occasio gaudij ac consolationis. Sin animum obstinaveris, perpendam illud Apostoli: *Tu autem fide stas: noli altum sapere, sed time.* Item, *Vide bonitatem & severitatem Dei: in eos quidem, qui ceciderunt, severitatem: in te autem bonitatem Dei, si perseveris in bonitate, alioqui & tu excideris.*

F I N I S.




780950











73

